

ა. პაულენკო

დღეები
მეზობელ
სიბუხეები

7-3-3

ალექსანდრე კალანდაძის წიგნი „ღლეები ბრესტის სიმაგრეში“ მკითხველს მოუთხრობს დიდ სამამულო ომში საბჭოთა ადამიანების უმაგალითო გმირობასა და მამაცობაზე.


ბრესტის გმირი ციხე-სიმაგრის დაცვა არის ლეგენდარული ეპოპეა, კომუნისტური პარტიისადმი უსაზღვრო ერთგულების, საბჭოთა ადამიანის უძლეველობისა და სამშობლოს სიყვარულის უკვდავი სიმბოლო.

ავტორი უშუალო მონაწილე იყო ბრესტის ბრძოლებისა. მან აღადგინა და გააცოცხლა სახელოვანი სიკვდილით დაცემული მრავალი ქართველი მებრძოლის სახე, რომლებმაც საბჭოთა ხალხის სხვა შვილებთან ერთად დიდებით შემოსეს ჩვენი არმიის საბრძოლო დროშები.

1964 წელს „ღლეები ბრესტის სიმაგრეში“ რუსულ ენაზე მასობრივი ტირაჟით დაიბეჭდა. საბჭოთა კავშირის სხვადასხვა კუთხიდან ავტორმა ათასობით წერილი მიიღო, მათ შორის ბრესტის ციხე-სიმაგრის დაცვის მონაწილეთა, ბრძოლაში დაღუპულ მებრძოლთა ოჯახის წევრებისა და ნაცნობ-მეგობრებისაგან. დაგროვდა ახალი, საინტერესო მასალა, გამოირკვა 1961 წლის ქართულ გამოცემაში მოხსენიებულ უცნობ გმირთა ვინაობა და უგზო-უკვლოდ დაკარგულთა თავგადასავალი. ეს მეორე ქართული გამოცემა შეესებოდა და გადამუშავებულია აღნიშნული ცნობების საფუძველზე.

„**ომის პირველ დღეებში საზეოთა
ვეოფრების პატრიოტული ვეირების
მკაფიო მბბალითია ბრესტის ციხე-
ნიმბრის ღაცვა**“.

**(საბჭოთა კავშირის კომუნისტური
პარტიის ისტორია)**



* * *

შემოდგომის დღე თვალსა და ხელს შუა ქრებოდა, როცა სოფელ ნიგვზიანში კითხვა-კითხვით მივადექი ძველი მეგობრის ეზოს.

ჭიშკარი ღია იყო, მაგრამ ეზოში შესვლა ვერ გავბედე, კარგა ხანს ველოდი. ვფიქრობდი, ვინმე გამოვა-მეთქი. არავინ ჩანდა. ჩამიჩუმიც არ ისმოდა.

დაბინდლა. კვანჭუხეთის გორაკები მონაცრისფრო ნისლში ჩაიკარგა. ბინდს შეერია აივნის ბოძების სილუეტები. ის იყო გავიფიქრე, ალბათ შინ არ არიან-მეთქი, რომ სახლის უკანა მხრიდან ნაჯახის კაკუნი მომესმა. ნაბიჯი წინ წავდგი და გავ-
დახე:

— მასპინძელო!

სიბნელე კარიდან გამოჭრილმა შუქმა ვაკვეთა და ისევ ჩამობნელდა. ეზოდან მსუბუქი ნაბიჯის ხმა მოისმა. ჭიშკარში სახელოებდაკაპიწებული მოხუცი ქალი გამომეგება და შინ შემიპატიუა.

მოხუცი ოთახში შესვლისთანავე აფუსფუსდა. სკამი შემოთავაზა, აკეცილ სახელოებს ნაჩქარევად ისწორებდა და თან წუხდა, დიდხანს გაცდევინეო. მეც, რაც შემეძლო, ვარწმუნებდი, სულ რამდენიმე წუთია მოვედი და დაძახებაც ვერ მოვასწარი-მეთქი.

— საცაა ამბროსიც გამოჩნდება, ნენა. მასწავლებლის საბჭო თუა დღეს, თვარა ამ დროზე ყოველთვის შინაა.

ძნელი ყოფილა სათქმელად მომზადებული სიტყვის შენახვა და მეც უნებურად წამომცდა:

— ამბროსის არ ვიცნობ, ბიცოლა, პანტელეიმონის ამხანაგი ვარ.

ქალმა თავი მოაბრუნა, ნელა მომიახლოვდა. ახლალა შევამჩნიე ჩაკენკილი ნაოჭები და თვალის უპეებში ჩამდგარი ნალველი. სკამზე უღონოდ ჩამოჯდა.

თვალი გავუსწორე და მოჩვენებითი სიმშვიდით ვუთხარი:

— მე და პანტელეიმონი ორ წელიწადს ერთად ვმსახურობდით, ერთ ნაწილში.

მოხუცი ჯერ უსიტყვოდ შემომამჩერდა, შემდეგ ფიცხლად წამოდგა, კარი გამოაღო და ქმარს გასძახა:

— ქრისტეფორე! ქრისტეფორე!

ნაჯახის კაკუნი შეწყდა. მოისმა კიბის ყრუ ჭრიალი და ვილაცამ კარის ზღურბლთან დაიბერტყა დასველებული წაღე-

ბი. ოთახში შემოვიდა მთლად გათეთრებული ბრგე მამაკაცი. მას ფეხდაფეხ შემოჰყვნენ ახალგაზრდა ქალი და ორი ბავშვი — გოგო და ბიჭი.

— ქრისტეფორე, ჩვენი პანტელეიმონის ამხანაგი გვესტუმრა, — უთხრა ცოლმა და უცებ დაბოხებული ხმა ხველებით ჩაიწმინდა. ბერიკაცმა დაფანჩული, თეთრი წარბების ქვემოდან გამოძხვდა, ხელი ჩამომართვა, მაგიდას მიუჯდა და ბრტყელი ხელისგულები ამობურცულ მუხლისთავეებზე დაიწყო. ცოლს რომ შეშფოთება შეატყვო, ვითომღა მშვიდად თქვა:

— ბედნიერი იყოს, შვილო, თქვენი შემოსვლა ამ ოჯახში. რა გვარი ბრძანდებით?

თვალი შევავლე მის ათრთოლებულ მუხლებს და ჩემი გვარი ვუთხარა.

ბერიკაცმა თავი დაიქნია და სკამი ჩემკენ მოსწია.

— გიცნობთ, შვილო!.. პირველ ქალაქში იწერებოდა თქვენს ამბავს — ჩვენებური კაცი გავიცანიო. მერეც ხშირად გიხსენიებდათ წერილებში. დღე არ გავიდოდა, მისი ქალაქი არ მიგველო... პირველი თოფი რომ გავარდა, მერე აღარაფერი ვიცი მისი, ვერ გავიგეთ, სად გაქრა ასე უკვალოდ... თქვენთან ერთი ჩვენი სოფლეელიც იყო, შენგელია. მტერი რომ დავამარცხეთ და შინ მშვიდობით დაბრუნდა, ვკითხეო შვილის ამბავი, მარა ვერაფერი გვითხრა. თქვენთან მოგვასწავლა — იმას ეცოდინებო. ბევრი გეძებეთ. ამბროსიმ ვილაცას კიდევ მისწერა თბილისში, თქვენს მისამართს სთხოვდა. ახლა, მადლობა ღმერთს, ველირსეთ თქვენს ნახვას.

ყველა დაჟინებით შემომყურებს. ბავშვები ბებიას ეხუტებიან. მოხუცი ქალი ხან ერთს, ხან მეორეს ათრთოლებული თითებით ნელა უვარცხნის წაბლისფერ თმას. რძალი კედელ-

თან დგას და ანგარიშმიუცემლად მისჩერებია ერთ წერტილს. შემოდგომის ქარს შემოაქვს ფოთლების იღუმალი შრიალი და ბე ფრთხილად, დაკვირვებით ვყვები, როგორ გავიცანი პანტელეიმონი, როგორ ვატარებდით დღეებს სამხედრო სამსახურში, როგორ დაიწყო ომი.

დღეა მოულოდნელად სიტყვას მართმევს და მიაჩნობს, როგორი ბეჯითა და კეთილი იყო მისი ბიჭი, როგორ უყვარდა ოჯახი, როგორ გაემგზავრა არმიაში.

ვამჩნევ, დოდადრო როგორ ებურცება ფერწასული, დამსკლარი ქვედა ტუჩი და როგორ უთრთის ყელთან ჩაყოლებული ნსხვილი ლურჯი ძარღვი.

— ჩვენს სოფელში მუშაობდა, — გულს იოხებს დედა, — ქე დეინახავდი გზაზე დიდ შენობას. იმ სკოლაში სწავლობდა და მერე ორივე ძმამ აქვე დაიწყო მასწავლებლობა.

ბავშვები უფრო მაგრად ეკვრიან ბებიას და მოხუცი ჩუმდება, ესიყვარულება პატარებს.

— უიმე! რამ გამომაშტერა აი დედაბერი, — მეუბნება ანაზღად, — ველარ გაგაცანი ჩემი ამბროსის ცოლ-შვილი.

მერე ქმარს მიუბრუნდა:

— ქრისტეფორე, კაცო, ჩადი პალატში, მიხედე ქვებს...

ბერიკაცი სასწრაფოდ გადის და მე უსიამოდ ვფიქრობ, რომ უღროდ დროს მოვედი. შემოდგომაა, ათასი საქმე აქვს ახლა გლეხკაცს.

ცხრა საათისათვის ამბროსიც მოვიდა. გაჭრილი ვაშლივით ჰგავს ძმას.

ამბროსის მიწერ-მოწერით დიდი ხანია ვიცნობდი და ახლა ბევრი აღარ გვილაპარაკია.

— ჟინელლიანი დღეა, — აჩქარებით თქვა მან, — გრილა,

წყალმანკიანი შემოდგომაა წელს. სტუმარს შესცივდება, პატარა ოთახში გავიდეთ, ცეცხლი დავანთოთ.

გაიხურა თუ არა მოხუცმა კარი, ამბროსი შემომევედრა:

— ნუ ეტყვი, რომ ჩემი ძმა დაიღუპა. ამაზე არასოდეს ვლაპარაკობთ, თქვენი წერილის შინაარსიც არ გამიმხვდია. ვახსენებთ, როგორც ცოცხალს და მოხუცებს სჯერათ, რომ დაბრუნდება. ამ მოლოდინს შეჩვეულები არიან.

ამბროსიმ პასუხი აღარ დაჰაცალა, ხელი მოჰკიდა და მეორე ოთახში გამოყვანა.

მრგვალ მაგიდაზე, ბრტყელ კიდეჩამოტეხილ თევზზე, ლამპა დგას. თეთრ კედელზე ჩვენი უზარმაზარი ლანდები მოძრაობენ. ბუხარში რცხილა გუზგუზებს. ცეცხლთან, სამფეხა სკამზე, ჩაფიქრებული ქრისტეფორე ზის. გრძელი დანით მუხის მოზრდილ ნაჭერს აჩუქებთმებს.

მეც მერევა ფიქრი, არეული. დაულაგებელი; ერთ წამში რომ შემოგატარებს ცაა და ხმელეთს... აქ, ამ ბუხართან, ოდესღაც ჩემი მეგობარი იჯდა. ოცი წელიწადია, რაც წავიდა და არ დაბრუნებულა. არც დაბრუნდება. აქ კი მაინც განაგრძობს სიცოცხლეს... ელიან... არავის გაუკვირდება, უცებ კარი რომ შემოაღოს... რა ახლოსაა ერთმანეთთან სიკვდილი და სიცოცხლე!

ცელქი გოგონა სახელურს ჩამოჰკიდებია, კარს აჭრიალებს და თან ითვლის — ერთი, ორი, სამი... ბებია სთხოვს, დახურე კარი, შინ შემოდით. განაწყენებული ბალღი მორჩილად მისჩერებია მოხუცს... კარი კი ისევ ჰრიალებს... ოჯახის მამა აღმიმქრალ მუგუზლებს უჩუჩხუნებს და შეშას უმატებს...

რძალ-დედამთილი ბუხართან სწევს მაგიდას. სუფრას შლიან, ბოთლებით იზაბელას მაჭარი შემოაქვთ. ჩუქურთმაში ამო-

ღებულ ზარდახშსა და დანას მამა ჯორკოზე აწყობს, მაჭრიან ბოთლებს დაკოჟრილი ხელით იღებს და გარეთ გადის. მალე ფუჩჩიით თავდაცული დოქი შემოაქვს და ბუხრის წინ დგამს.

— უიმე, ღმერთო კი მომკალი! — წუხს დედა, — ველარ მოვისაზრე ჩხავერის შემოტანა...

ქმარმა ჭალარა წარბებს ქვემოდან ცერად გახედა, ეგ რა შენი საქმეა, მე ვიციო.

ამბროსიმ მითხრა, ეზოში შერჩენილ რამდენიმე ძირ ჩხავერს მოხუცი საგულდაგულოდ უვლის, — „ერთი ჭარიკა ღვინო დგება“ და ხელუხლებლად ინახავს ახალ მოსავლამდე, — პანტელეიმონს უყვარდა და იყოს მაინცო.

ოჯახის უფროსი ჭიქებს ქარვისფერი ღვინით ავსებს და ჯარისკაცს აღდეგრძელებს, — გული ერჩოდეს, თვალი უჭრიდეს. მუხლმა არ უმტყუნოს, თოფს ტყვია შორს გაჰქონდესო.

მაგარი ღვინოა ჩხავერი. სამიოდ სასმისის შემდეგ გაკვირვებული ვამჩნევ, რამდენი მქონია სათქმელი, რა გრძელი ყოფილა ომის ამბავი. მეგონა კი, რომ ეს წინათ, ძალიან დიდი ხნის წინათ მოხდა და ორიოდე სიტყვით შეიძლებოდა ყველაფრის თქმა... რაც დრო გადის, ის საზარელი ამბავი თანდათან ფერმკრთალდება ჩემში და ისე პატარავდება, როგორც ნაპირი ზღვაში მიმავალი გემიდან.

სულგანაბული მისმენენ. დროდადრო რცხილადან ავარდნილი ნაპერწკალი ტკრციალებს და მისი ცეცხლოვანი წერტილები ტკაცანით მოფრინავენ ჩვენკენ; მაშინ მოხუცი კვლავ მუგუზლებს უჩუჩხუნებს და ცეცხლი ცოტა ხნით მშვიდდება.

მე კი აღარ ვიცი, სად შევჩერდე, როგორ შევჩერდე. ასე მგონია, რადაც ვერ ვთქვი, ცუდად ვთქვი და განვაგრძობ, მაინც განვაგრძობ, არავინ არათერს მეკითხება, არც მაჩერებს

ვინმე; თვალეში შემომცქერიან მოლოდინით, ვედრებით, გამომცდელად, მაგრამ აღთქმული არ მავიწყდება, წყლულს გარშემო ვუვლი...

დედამ წერილებით სავსე ორი ფუთა და ალბომები შემოიტანა, სკამზე დამიწყო. თეთრები და ჩხავერით თავმოდგმული ჭიქები განზე გავწიე, მაგიდაზე აღვილი გავითავისუფლე და ალბომი გადავშალე.

ქრისტეფორემ სამფეხა სკამზე გადაინაცვლა, კოლოფის გამოჭრა განაგრძო... ზოგჯერ თავს წამოსწევს, შორიდან შემოგვხედავს.

დედა გვერდით მომიჯდა, ჩემთან ერთად ჩაპყურებს ალბომს. დანარჩენები გარს შემოგვისხდნენ. უსიტყვოდ დაცქერი ფოტოაურათზე აღუქდილ ნაცნობ სახეს. მიყვარს ფერმიმქრალი სურათი, მისგან მონაბერი ჩუმი სევდა.

ქარი ისევ ზუზუნებს, წვიმა არ წყდება... დედა ჩუმი ხმით მიამბობს:

— აი სურათი, ნენა, მაშინ გადაიღო, ლანჩხუთში რომ სწავლობდა. ამფერი კოხტა ჩაცმა-დახურვა უყვარდა ბალნობიდან. არა კაცს არ შეაწუხებდა, თვითონ უვლიდა თავს... აგი სტუდენტობის დროინდელია, ქუთაისში გადაიღო ამხანაგებთან. შაფათ-კვირე ისე არ გევილიდა, შინ რომ არ ჩამოსულიყო. ათი წლის უნახავივით ყველა მეზობელს ჩამოურბენდა, ყველა ხეს ჩაეხუტებოდა, თოხსა და წალდს ხელს წამოავლებდა... მაინც ქე მოგვენატრებოდა. მე და მამამისიც ავაკითხავდით თვეში ორ-სამჯერ. უთქმელი ბაღანე იყო და დავხედავდით, ხომ არაფერი მოაკლდა-თქვა... ამ სურათზე, ნენა, მის შეგირდებთანაა გადაღებული ნიგეზიანში. ჯერ ლანჩხუთში იყო მასწავლებლად, მერე აქ გადმეიყვანეს...

მე კი ვფურცლავ და ვფურცლავ. ახალ-ახალ სახეებს ვეცნობი. ამ გვერდში ორი დამკვიანრი ჩაის ვარდი ძევს. ფერწასულ სურათს ფრთხილად ვაშორებ მის გახევებულ ფოთლებს... ჩემს მეგობარს გრუზა თმა წარბებამდე ჩამოშლია, ოდნავ გადახრილი, ალერსით უმზერს თეთრკაბიან ახალგაზრდა ქალს, რომელიც მაღალზურგიან სკამს მიყრდნობია, თითზე ქორწინების ბეჭედი უბზინავს.

დღეა სახეს მარიდებს. ფართოდ გახელილი თვალებით მიმტერებია ლამპის მოლიცლიცე შუქს. ბავშვებს უხმოდ ეალერსება, თითქო ვეღარც კი მამჩნევს. მამა გასაკრავად მომზადებულ ასანთის ღერს მაგიდაზე დებს, გიზგიზა ნალვერდალს იღებს, არ ჩქარობს ჩიბუხის გაღვივებას.

თავს დაბლა ვხრი... მიყვარს სურათის მეორე მხარეს წარწერების ძებნა, მაგრამ ეს სურათი?..

აი, ჩემი მეგობარი უკვე სამხედრო ფორმაშია. თავგადახოტრილს პილოტურა გვერდზე მოუგდია. ქამარშემოჭერილ ხალათს თეთრი საყელო უმშვენებს. ქართულად გადაკეთებული გალიფე ფართოყელიან ჯარისკაცურ ჩექმაში ჩაუტანებია. ულვაშმოპარსული სახე უცინის.

სურათს ვაბრუნებ და ვკითხულობ: „ძვირფას მშობლებს. ქ. ბრესტ-ლიტოვსკი. 1940 წ. 10 ივლისი“.

ბავშვებს არ ეძინებათ. გოგონა დიდ ბურთს მოაგორებს და თან უდარდელად ტიკტიკებს:

— თუ მოხვდა, ერთი ქულა! იცოდე, ერთი ქულა მეჭნება!..

უნებურად მეღიმება და გამალებით ვწლი ახალ გვერდს. ავლავ ნაცნობი სახე, ბრესტელები — ჩემი ამხანაგები.

ღედა ჯერ უსიტყვოდ ჩაპყურებს ალბომს, მერე თითქმის ჩურჩულით მეკითხება:

— ეს ზესტაფონელი ბრიგადირი ხომ კარგად არის, ნენა, ხომ მშვიდობით დაუბრუნდა ცოლ-შვილს?

— არა, ბიცოლა, პირველსავე შეტაკებაში დაიღუპა.

— უბედური დედამისი! საწყალი მისი ოჯახი! ეს კახელი ბიჭი, შვილო, კაი მოჭიდავე რომ ყოფილა?

— დაიღუპა, ბიცოლა, ომის დაწყებისთანავე დაიღუპა, მაგრამ გვასახელა: დაჭრილი, მუხლზე დაცემული ებრძოდა მტერს.

ოჯახის მამა წელში გაიმართა, წარბშეკრული მოგვიან-ლოვდა... ზემოდან დაგვეყურებს და ხმას არ იღებს. თვალს ვარიღებ მის გამომცდელ მზერას და მშვიდად ვპასუხობ დედის შეკითხვებს...

— ეს მოსკოველი სერჟანტი მდინარის გადაცურვისას მოკლეს...

აღათის ყველა ებრალება, ოხვრით ამბობს:

— უბედური მისი დედა! ვაი, საწყალ მის მშობლებს!

ქრისტეფორე ნერვულად აბოლებს ჩიბუხს. მატყლივით მოთელილ წვერს გამწარებით იწიწკნის და ველარ ითმენს:

— ომი, აბა, რის ომია, ქალო!.. ვინ გაიმარჯვა, აბა! ვინ გადააჩინა ჩვენი ქვეყანა? ვინც წავიდა, ყველა ხომ ვერ დაბრუნდებოდა?!

ღედა დუმს. მიმქრალი ცეცხლი ლეგა ფერფლით იბურება, ბავშვები ბურთს ეძიძგილავენებიან, გოგონა გახარებული ყვირის:

— არის ერთი ქულა! არის ერთი ქულა!

ბებია მათ ყურადღებას აღარ აქცევს. თავს მალლა სწევს.

თეთრი თმა სახეზე ჩამოშლია. წარბებზენიღული ქმარს შესცქერის და ამბობს:

— რეიზა ჩივი ვითამ მაგას! ჩვენ სხვაზე ნაკლები შვილები გავზარდეთ თუ? ჩემი შვილი, ნენა, ყველაფერში კაი იყო — სიტყვაში კაი, მასწავლებლობაში კაი, მტერ-მოყვრობაში კაი. რაფერ დავიჯერო, რომ იქინე შეგვარცხვენდა. არა, კი ვიცი, მის მოსვლას ვეღარ მოვესწრები, სიკვდილს რა გადაუდგება წინ! ვინც მოსასვლელი იყო, ქე მოვიდა, შვილო, დიდი ხანია... მაგრამ ცუდი ქართველი არც ჩვენ გაგვიზრდია, ნენა.

დანაოჭებულ ლოყებზე ორი მსხვილი ცრემლი მოგორავს.

მამა კვლავ ბუხარს უბრუნდება, შეშას უმატებს. რცხილას ნოლად ედება ალი და კვლავინდებურად გიზგიზებს.

შუალამისას ქარს ახალგაზრდული სიმღერა შეება. მიყვარს ეს ხალისიანი სიმღერა, მისი მიამიტური ხვეულები. შეზარხოშებულ გურულ ძმაბიჭებთან უნდა მოისმინო იგი, გურიის ამწვანებულ მთის კალთებზე უნდა მიუგდო ყური და მაშინ დასდებ ღირსეულ ფასს, მაშინ დარწმუნდები, რომ „არსად ისე არ მღერიან, როგორც აქ, ამ ქვეყანაში“...

— ბიცოლა! ბიცოლა ალათი! — გაისმა ომახიანად.

დედამ თავსაფრის ბოლოთი ცრემლი მოიწმინდა და აივანზე გავიდა. ტკბილად გაეხმიანა მომსვლელთ.

— ჩემი ძმისწულია, — მითხრა საქმეზე ხელაჩქარებულმა მამამ, — ჯარში ვაგზავნით ხვალ დილით. საგზალს ვუმზადებთ. ეს პატარა კოლოფიც მინდა სახსოვრად გავატანო, წერილებსა და სურათებს შეინახავს. აი ბიჭი ჩემი პანტელიეს მაგიერია. იმან რომ უკანასკნელად გამეიხურა ჭიშკარი, იმ წელიწადს დეიბადა. კოლოფის სახურავში ჩემი შვილის სურათს

ჩავსვამ. ჩვენ, შვილო, ას წელიწადს აღარაფერი გვიკლია. ჩვენი სიკვდილი აღარა კაცს არ გაუკვირდება. იგი ბალანეა ჯერ და შეინახავს ამ სურათს, გეიხსენებს ხანდისხანე და კაია...

ბავშვები კარგა ხანია დაწვნენ. ახალგაზრდა ცოლ-ქმარიც მეორე ოთახში გავიდა დასაძინებლად. მე კი შეუსვენებლივ ვათვალისწინებ ფერწასულ სურათებს. ბრესტის გმირული დაცვის მუზეუმისთვის მასალას ვარჩევ.

ალბომები სკამზე გადავაწყვე და პირველად გავხსენი წერილებით სავსე შეკვრა. სულმოუთქმელად გავშალე საგანგებოდ გაკეცილი ჯარისკაცური სამკუთხედები; სტრიქონთა შორის ფრონტილი მეგობრის სუნთქვას ვგრძნობდი.

ქარი კი არ ისვენებდა. ბავშვებს უზრუნველად ეძინათ. დედა ღამეს ტეხდა, წერილებს ჩასცქეროდა და ჩურჩულებდა:

— გლახა არ გამიზრდია, ნენა. თავს რაღა შეირცხვენდა... მარა, ვინ იცის. შვილო, რა დარდი გაჰყვა, რა ნაკვერცხალი ენთო გულში! უმტერმოყვარო ვინაა ქვეყანაზე, იგი რომ ყოფილიყო. ბიჭი ყველაფერს ხომ არ ეტყოდა დედას...

ზ ა ც ი ლ ე ბ ა

მაშინ საგარეჯოში ვიყავი მასწავლებლად.

სამი წელიწადი შეუმჩნევლად გამიფრინდა. 1939 წლის შემოდგომაზე არმიაში გამიწვიეს. რამდენიმე კვირამ გამგზავრების მოლოდინში განვლო. ბავშვებს ათასგვარი სახსოვარი მოჰქონდათ. ყველა ჯგუფთან სურათი გადავიღე. მეგობრებმა გზა დამილოცეს. როგორც იქნა, ეტლი ადგილს მოწყდა და სადგურისკენ დაეშვა.

აი, სკოლის პატარა შენობაც გაუჩინარდა. სოფელს მთის კალთა მოეფარა. მე კი მაინც დიდხანს გავცქეროდი საყვარელ ადგილებს...

ვერ გამეგო მწყინდა თუ მიხაროდა. ერთი გული აქ მრჩებოდა, მეორე კი წინ მეწეოდა. ვისმე რომ ეთქვა: დარჩი, ნუ მიდიხარო, მეწყინებოდა.

მარტო არ ვიყავი. ჩემთან ერთად ბევრი ჩემი ნამოწაფარიც მოდიოდა.

წვევამდელები ცალკე ვაგონში მოვთავსდით და საგზალიც ნაადრევად ამოვალაგეთ. თუმცა გამცილებელმა ოფიცერმა მაგარი სასმელები აგვიკრძალა, ბიჭებმა მალულად ამოაცოცეს

არაყიანი მათარები და, მოგეცა ლხენა, გავაჩაღეთ სადღეგრძელოები. ერთმანეთს გზას ვულოცავდით, შინ დარჩენილებს მშვიდობას ვუსურვებდით.

დრო სწრაფად მიქროდა და კახეთის მატარებელი უჩვეულოდ ჩქარი მეჩვენებოდა.

მაგონდება ერთი აწოწილი, თმააბურძენილი, შავტუხა ბიჭი სოფელ კაკაბეთიდან, გვარად, მგონი, ჭიკაძე. დილიდანვე კარგად დამბალიყო ღვინოში... გრძელ, გაფოფრილ ფაფახს ხან ჰაერში აისროდა, ხან წარბებამდე ჩამოიფხატავდა, გახუნებული ფარაჯის კალთებს კუდივით აიბზეკდა, მთიულურს დასჭყვივლებდა და რაღაც უცნაურ დავლურს დაუვლიდა.

— უფროსო, გვიკადრე რაღა, — არ ასვენებდა გამცილებელ ოფიცერს, — გზა დაგვილოცე! ტალიკ-ტალიკი ბიჭები მივდივართ სამშობლოს დასაცავად, ასჩაფიანი ქვევრით უნდა დალიო ჩვენი სადღეგრძელო. აფსუს, ტიკებო, ორ წელიწადს მშრალი იქნებით ჩემთვის!...

გამცილებელი ღიმილით აფრთხილებდა კაკაბელ ბიჭს. მერე ისიც ჩვენთან ჩამოჯდა და კისერწაგრძელებული გვისმენდა.

ფანჯარასთან შეკგუფულნი მომავალ საშსახურზე ვბასობთ — თითქო ჩვენს სურვილზეაო, ჯარის სახეობასა და ადგილსამყოფელს ვირჩევთ.

ბავშვური გამომეტყველების ვეება ფშაველი, ლეო გახუტელაშვილი არტილერიის ოცნებობს; კუნთმაგარი, ჩასკვნილი გოგია გულისაშვილი ავიაციას ამჯობინებს; ზოგიერთს მეზღვაურის გადაფენილი ლურჯი საყელო მოსწონს. მე ქვეითი ჯარი მირჩევნია. გოგია სოზაშვილი და მიხა ოთიაშვილიც იზიარებენ ჩემს აზრს. სართიჭალელი მჭედელი კოლმეურნე

ედუარდ დამი, სქელი, ჩოფურა ბიჭი, იშვიათად ერევა საუბარში. იმდენი ხელობა იცის, ყველგან გამოდგება.

კრასნოგორკელი რუსები: პავლე სტრუჩალინი, რემიზოვი, და შირინი კადრში აპირებენ დარჩენას.

კაკაბელი ბიჭი სხვას არა ჰგავს.

— ცხენის ტყავზე დავიბადე, — გვიმტკიცებს, — ჩემი აკვანი ახური იყო. ლაჭები ლანჩასავით მაქვს გამოთელილი. ორ ვერსზე გაჭიმულ ფარას ხან წინიდან წამოვურბენდი ქარივითა, ხან ბოლოდან. ჭიხვინას და ფაფარიანს ვენაცვალე, ჩემი ადგილი ცხენოსანშია — გვერდზე ხმალი, ხელში მათრახი.

— კაკაბელო! — კენწლავს ალექსი ჯარიამვილი. — ხომ არ გგონია, გენერლად დაგნიშნავენ კავალერიაში! გიყვარდეს, დილით ნიჩაბი და სადამოთი სამურველი.

წვევამდელები ხარხარებენ, მაგრამ კაკაბელი იხტიბარს არ იტებს:

— მაშინაც ნახეთ, ლახტის ტყლაშუნითა და თქარათქურით რომ ჩამოგიქროლებთ წელში მოკაკულ ქვეითებსა.

ვერა და ვერ ისვენებს კაკაბელი. მღერის, ოხუნჯობს, დაროგორც ყველა გარეჯელი, ჭიდაობაზე სდებთ თავს. ხან ერთს გაებღლარძუნება, ხან მეორეს. ღონეს ისინჯავს, მაგრამ ხელს არაფერს ჰკიდებს. სკამიდან ოდნავ წამოიწევენ, ფეხს გამოსდებენ და რამდენსამე წუთს ასე აწვალევენ, მერე თავს წაახრევიანებენ და ამ საერთო სიცილ-ხარხარში უხერხულად ძიძგლაობს კაკაბელი.

— არ წახდე, კაკაბელო! სარმა, სარმა გამოსდე! — ინშის ყოველი მხრიდან.

კაფანდარა კაკაბელი უმწეოდ იგრიხება, ფეხს ულაზათოდ გამოჰკრავს და გამხდარი ბეჭებით ზომავს ვაგონის იატაკს...

მაინც არ მშვიდდება. ცალს დაეძებს. კახელი ბიჭებიდან კი ვინ იკადრებდა მასთან შებმას. ვატყობ, ჩემზეც უჭირავს თვალი, მაგრამ ჩემი ნამოწაფარი ფალავნების შიშით ვერას მიბედავს. სხვა გზა არა აქვს, ისევ ნაცადი მოჭიდავეებისაკენ მიიწევს... ისევ და ისევ გააქვს ზღაბთანი ვაგონის მტკრიან იატაკზე.

— კაკაბელო, ე მაგრე ჩლუტეს კავალერიაში ვინ მიგიღებს, გაგაპანღურებენ, — აჯავრებენ უიღბლო მოჭიდავეს, რომელიც უდარდელად იკრიჭება და ვაგონის კედელზე „საჭიდაოს“ უბრაახუნებს...

ნავთლუღის სატვირთო სადგური უკვე სავსეა ზესტაფონელი, ლანჩხუთელი და თბილისელი წვევამდელებით. გარეჯელები ერთ ვაგონში მოვთავსდით. მეზობლად თელაველები არიან.

დეკემბერი იდგა, მაგრამ თბილი, მზიანი დღე იყო. შავნაბადა ოქროსფრად ბრწყინავდა ლურჯ ჰორიზონტზე.

წვევამდელებს გული არ უდგებოდათ ვაგონში, მზისგულზე გამოეფინენ. მოედანი ბიჭებით გაივსო. ზოგს ფარაჯა აცვია, ზოგს დაბამბული ჯუბა, ზოგსაც კოსტუმი.

ლაშქრად მიმავალი სხვადასხვა კუთხის ქართველნი ერთმანეთს ვეცნობით.

რამდენიმე ადგილას წრე შეუტკრავთ. ერთგან მღერიან, სხვაგან — ცეკვავენ, ყველაზე დიდ წრეში კი ჭიდაობაა გახურებული.

კაკაბელმა ბიჭმა მოსვლისთანავე თვალი ჰკიდა ჭიდაობას. რაკი გაიგო, გურული ბიჭები ჭიდაობენო, გული მოიცა, გულდა-ნაბადი ვაგონის თაროზე შეჰყარა და წრეში შეიჭრა. ჩიქურ ეძგერა ბრგე ფალავანს, ქაშარში ხელი სტაცა, ცეკვახტუნვით შეათამაშა, ფეხი ფეხზე შემოაგრიხა. მოწინააღმდე-

გე, რომელსაც ვიწრო გალიფე მალალ წინდებში ჰქონდა ჩატანებული, ჩაეჭიდა კაფანდარა კახელს, მოგვერდით მოუნდომა გადაგდება, მაგრამ კაკაბელმა ელვისებური სარმა გამოჰკრა და ფალავანი ძირს გაიშხლართა.

წათამამდა კაკაბელი ბიჭი. მაცურებლებს ძალით ითრევს საჭიდაოდ. აღარავინ მიჰყვება, ერიდებიან.

გახარებულმა გარეჯელებმა ფიცხელი გარეკახური საჭიდაოდ დასცხეს.

— ყოჩაღ, კაკაბელო! არ შეგვარცხვინო, ჩემპიონობა არ დაკარგო! — ხორხოცობენ თანასოფლელები.

დოლ-ფანდური მუცელზე იფხრიწება, „საჭიდაო“ სისხლს აფორიაქებს, მაგრამ „ჩემპიონთან“ შერკინებას ვერავინ ბედავს. დამკლავებული კაკაბელი ბიჭი ქორივით დაჰქრის წრეში. ჩია ხალხს უკადრისობს, დევგმირებს ეძებს.

უცებ შეჩერდა. ვიღაც მოუვიდა თვალში. გამგელებულმა წრე გაარღვია და შავგვრემან გოლიათს ჩაებლაუჭა. ეს ლურჯკოსტუმიანი ვაჟკაცი განმარტოებით იდგა ჩაფიქრებული. შორიდან თვალს ადევნებდა ამხანაგების გართობას. კაკაბელმა ბიჭმა ძვრა ვერ უყო, მაგრამ სეირის მოყვარულნი წამოემველნენ, გაძალიანებული ჭაბუკი წრეში შეაგდეს. იგი თითქოს შველას ითხოვსო, აქეთ-იქით თვალს აცეცებდა, ლამობდა გათავისუფლებულიყო, წრე გაერღვია, მაგრამ გაფიცხდა „საჭიდაო“. კაკაბელ ბიჭს ფეხი აუტოკდა, ჭირვეულ მეტოქეს სარმა გამოსდო და წამოაჩოქა. ვაჟკაცი უმაღ ზეწამოიჭრა, გულდაგულ ეკვეთა აბეზარს, მაგრამ კაკაბელი ბიჭის სარმამ ახლა ორსავე მუხლებზე დასცა.

ხალხი შეჩოჩოლდა. წაქცეული ნელა წამოდგა და არამკითხე მოჭიდავისკენ გაიწია.

— გეყო, გეყო, კაკაბელო! — გაბრაზებით მიაძახეს ჩვენებურებმა, — რას გადაეკიდე, ხომ ხედავ, კაცი გამოუცდელია ჭიდაობაში.

კაკაბელი ბიჭი შეყოყმანდა. დაბნეულ მეტოქეს ხელი გაუშვა.

მეზობლად გურული სიმღერა შეწყდა. ბაჯაჯინა, ცქაფმა ლანჩხუთელმა გოგუამ ცხვირწინ მუშტი დაუტრიალა კაკაბელს, რომელსაც რიგიანად ვერც კი მოესაზრებინა, რას ერჩოდნენ.

— სხვაი ვერი კაცი ნახე, მაგას რომ დიეტაკე? — სხაპასხუბით მიაყარა გოგუამ. — რავა, ჩვენს მასწავლებელს შენ უნდა ეძიძგილაო ახლა? რომ იკადროს, ნაკერავზე გაგხეთქავს, შე გლახა. ერთი რომ სული შეგიბეროს, ჰაერში გაგაფრენს, ჭიდაყელასავით რომ წაგიგრძელებია მაი კისერი...

საქმეში ჩაერია ჩემი ნამოწაფარი, წყნარი, მუდამ უშფოთველი ლეო გახუტელაშვილი.

— არაფერი გეწყინოთ, ბიჭებო, თქვენი ჭირიმე, — თავზიანად სთხოვა მათ. — ეს კაკაბელი ახირებული კაცია. ჭიდაობაზე თავსა სდებს... შეეძლოს მაინცა! ისე კი არ არის ავგულისი აი, ნახავთ, ერთად ვიქნებით, შეგიყვარდებით...

ასე გავიცანით ~~პანტელეიმონ აფხაზაფა~~ რომელსაც მკაცრი იერს აძლევდა ხშირი წარბები, მოკუმული თხელი ტუჩები და ჯარისკაცურად გაკრეჭილი თმა.

ახლა სიბრაზე აღარ ეტყობოდა. ოდნავ მოღიმარე, ცერად გაჰყურებდა კაკაბელს და თავისიანებს ამშვიდებდა.

მალე გაისმა ეშელონის უფროსის ბრძანება:

— ვაგონებში!

გუნდ-გუნდად შეკრული ხალხი დაიშალა. წამსვლელ-
დამრჩომნი ერთმანეთს ეთხოვებოდნენ.

მომავალნი კისერწაგრძელებული ვიყურებით ვაგონებიდან.
შეზარბოშებული გამცილებელი ბიჭები უღარდელად მღერიან.
ორთქლმავალმა ქშენას უმატა. წასვლის ნიშანიც მისცეს.
ცხვირაახოცების ფრიალი გახშირდა. მატარებელმა ნელ-ნელა
დატოვა ბაქანი. ზოგი ფეხდაფეხ მოსდევს ვაგონებს... რაღაც
დავიწყებიათ, აბარებენ, არიგებენ, ამხნევებენ...

აი, უწვევრულვაშო, ახოვანი ბიჭი ვერ დაეწია წინა ვაგონს,
ჩამორჩა, ეტყობა, გადაკრულშია. ახლა ჩვენკენ იბრუნა პირი,
გვიცინის, გვემშვიდობება.

— ნუ გეშინიათ, ბიჭებო! — მხიარულად მოგვძახის. —
არ დაღონდეთ!.. გოგოებს ჩვენ მოვუვლით.

კაკაბელი ბიჭი უპასუხოდ არ ტოვებს ენამწარეს:

— ჰეი, ქალაქელო! შენც მალე გადაგკრეჭენ მაგ ხუჭუჭა
მატყლს.

ეტყობა, გაიგონა. გულიანად იცინის.

ხარბად გავყურებთ დედაქალაქს...

შემდეგ ერთუროს ვეჯიბრებით, აბა ვინ გამოიცნობს, რო-
მელ სადგურში შეჩერდება ჩვენი ეშელონი-თქო.

გადის დღეები. მატულობს ყინვა და თოვლი. უფრო და
უფრო სქლად იჭირხლება ვაგონის მინები და ალაგ-ალაგ თოვ-
ლით აჭრელებული მინდვრები ერთიანად იფარება თეთრით...
გავიარეთ ბაქო, მახახ-ყალა, როსტოვი, ხარკოვი, ორიოლი,
სმოლენსკი, ვინსკი, ბარანოვიჩი და... როცა სადგურის ფასად-
ზე წავიკითხეთ: „ბრესტ-ლიტოვსკი“, მივხვდით, რომ ამას
ჩქით ჩვენი მატარებელი აღარ წავიდოდა.

ბუბის ნაპირებზე

სადგურს ჯერ კიდევ აჩნდა გერმანია-პოლონეთის 1939 წლის ბრძოლის ნაკვალევი. უკანა ლიანდაგებზე ყუმბარის ნამსხვრევებისაგან ჩაღეწილი ტყვიით დაცხრილული ვაგონები იდგა გერმანული და პოლონური წარწერებით. მათი ჩაშვებულნი ფანჯრებიდან შერუჯული ფიცრები და თუნუქის ნაჭრები მოჩანდა. ირგვლავ შაზეთისა და ნავთის მძიმე სუნი ტრიალებდა.

ბაქანზე ჯარისკაცები ირეოდნენ — დაჭმუჭნილი მაზარები ეცვათ და თავზე ყურებიანი თბილი ქუდი ეხურათ. მძიმე ჩექმებქვეშ მშრალი თოვლი ხრამუნობდა.

ყინავდა.

ძვალსა და რბილში ატანდა ქარა.

ჩვენი ბიჭები ვაგონიდან ჩამოსვლისთანავე ბაქანზე შეჯგუფდნენ და ტაშფანდურა გააჩაღეს. კაკაბელი ბიჭი და წინანდლელი ალექსი მამალაშვილი ფეხის წვერებზე დაქროდნენ წრეში და თან გათოშილ ხელებს იორთქლავდნენ.

გაოცებული და გამხიარულებული მაყურებლები მაღიმალი სრესდნენ ცხვირის ნესტოებს და წრის შუაგულისაკენ მიიწეოდნენ...

ჩვენს წასაყვანად მოსულ ტანმაღალ მეთაურს რომ მოეკარით თვალი, „ქართველიაო“, სიხარულით გადავუჩურჩულეთ ერთმანეთს. არც შევცდარვართ: ~~ახალწვეულთა მისაღებად სიმაგრადან კაპიტანი ხარაბაძე გამოეგზავნათ ეს მაღალი, მხრებში ოღნავ მოხრილი, სათნო სახის კაცი ბრესტში ჩამოსვლისას ბატალიონს მეთაურობდა თურმე; შემდეგ პოლკის მეთაურის მოადგილედ გადაიყვანეს, ხოლო მოგვიანებით ტანკსაწინააღმდეგო ბატარეა ჩააბარეს.~~

ხარაბაძე მეგობრულად გამოგვესაუბრა, ნაცნობები მოიკითხა და გაგვაფრთხილა: ჩვენს პოლკში ბევრი ქართველი ოფიცერია, ყველა მოუთმენლად მოგელთ და აბა, თქვენ იცით, გვასახელეთ, კარგად მოიქეცითო.

ოთხი კილომეტრი გავიარეთ. ჩრდილოეთის კარიბჭით ციხე-სიმაგრეში შევედით, რამდენიმე ხიდი გადავჭერით და ცენტრალურ კუნძულზე შევჩერდით.

ყაზარმის წინ, ფართო მოედანზე, ასეულებში გაგვანაწილეს. დაგვაპურეს, ცხელი შხაპი მიგვალებინეს და სამხედრო ფორმა დაგვირიგეს. უმცროსი ლეიტენანტი ზიმიანი დიდხანს არჩევდა სარგო შარვალ-ხალატს პანტილოიმონ აფხაზავასთვის, ლეო განუტელაშვილისათვის და, ასე გასინჯეთ, გოგუასთვისაც კი.

მეტად გულთბილი კაცი იყო ეს ზიმიანი, მოძრავი, მხიარული, სიტყვაგამოსწრებული, საუკეთესო სპორტსმენი და მემწეობრე. ჩვენი პოლკიდან მალე გადაიყვანეს, მაგრამ სამუდამოდ დასამახსოვრდა, როგორც პირველი მასწავლებელი.

იმავე საღამოს პოლიტხელმა ბლინოვმა და მისმა მოადგილემ პიროგოვმა ლენინის ოთახში საუბარი ჩაგვიტარეს, 333-ე პოლკის ისტორია გაგვაცნეს. საამაყო წარსული ჰქონდა ჩვენს პოლკს. ორიოლის წითელდროშოვანი დივიზია, რომელსაც იგი ეკუთვნოდა, 1918 წელს ვლადიმერ ილიას ძე ლენინმა გააცილა ფსკოვის ფრონტზე და აღმაფრთოვანებელი სიტყვით მიმართა მებრძოლებს; სამოქალაქო ომში ეს დივიზია თავზარს სცემდა დენიკინს.

პოლკის მეთაური მაიორი ტერენტი ურთქმელიძე პირველსავე დღეებში გამოგვეცნაურა და ძამაშვილურად დაგვარიგა. ამ დაბალ, ჩამკვრივებულ ვაჟკაცს ვერასოდეს შეამჩნევდით

ალექსანდრე ხარაბაძე.

ღიმილს. მისი მკაცრი სახე სრულებით არ გამოხატავდა იმ გულკეთილობას, რისთვისაც ასე უყვარდა ყველას.

ჩვენს ნაწილში სხვა ქართველი მეთაურებიც იყვნენ. უმცროს მეთაურთა სკოლას კაპიტანი ალექსანდრე ჯიჯიშვილი ხელმძღვანელობდა; პირველი ბატალიონის მესამე ასეულს — უფროსი ლეიტენანტი იაკობ გელაშვილი — კაცი ჯმუხი და სიტყვაძვირი. მალე მეორე ასეულის უფროსად დანიშნეს ლე-


ატენანტი გოგი ანანიაშვილი -- მაღალი, ტანხმელი, ფერმკრ-
თალი ახალგაზრდა. მეორე ბატალიონის ერთ-ერთ ასეულს
ლეიტენანტი ნესტორ ბოკრია შეთავაზობდა.

ნაწრთობი, ცეცხლში გამოვლილი ოფიცრები იყვნენ.
მთელი გარნაჰონი პატივს სცემდა კაპიტან ჯიჯიშვილს — პირ-
ველ მსროლელსა და სპორტსმენს. ყველას ხიბლავდა მისი
სიძინჯე, თავდაპერა, მხედრული გამართულობა. ღერძსა და
ორქელზე აღეწაპნდრეს ოსტატურ ვარჯიშს აღტაცებაში მოპ-
ყავდა ამბანაგები.

ახალწვეულებმა სამოქალაქო ქურქი კარგა ხანს ვერ გამო-
ვიცვალეთ. რამდენსამე კვირას მოგონებებია ვსუნთქავდით.
ზოგს ოჯახი და შეყვარებული აგონდებოდა, ზოგი საფერავსა
და მწვადს გაიხსენებდა, ზოგიც, ჭირვეული დედაბერივით
შუა იანვარში მარწყვსა და ყურქენს მოინატრებდა.

ცოდვა გამოტეხილი ჯობია და, არც მე მასვენებდა ფიქ-
რები. მეორე თუ მესამე დღეს ავიღე ერთი სქელი ბლოკნოტი,
ჩემი ორწლიანი სამხედრო სამსახურის თვე და რიცხვი სათი-
თაოდ ჩამოვწერე ფურცლებზე და გადავწყვიტე, ყოველ სა-
ლამოს წამეშალა განვლილი დღე. ხშირად ვფურცლავდი ამ
უცნაურ კალენდარს; დაჟინებით ვშლიდი ერთსა და იმავე
რიცხვს და გული მწყდებოდა, ასე რომ მიზოზინობდა დრო.

ჩემთან მოხვდნენ ლეო გახუტელაშვილი, გიორგი გული-
საშვილი, გიორგი სოზაშვილი, მიხეილ ოთიაშვილი, სამსონ
მარიდაშვილი, სოლიკო სონიშვილი, ნიკა მეკოკიშვილი,
მიხაკო თირცხალაიშვილი, გიორგი გოგუა, ვლადიმერ ჩხარ-
ტიშვილი, აკაკი შევარდნაძე. შალვა გოგეშვილი, ვალერიან
კილაძე. ნესტორ ბოკრია ასათიანი, მიხეილ მუშლაძე,
გოგია ბარბაქაძე, გენადი ქანტურაძე, ალოლა ქათამაძე, ძმები



მარცხნიდან: ონისიმე ასათიანი, სერგო ბაშაღ-
იშვილი, ა. კალანდაძე

კაპანაძეები, გრიგოლ კვეტენაძე, ბეგლარ ავალიანი, შოთა
კვეტენაძე, დავით ნებიერიძე, ბუჭუ კალატოზი, ამბროსი
კვეტენაძე, შოთა ქვათაძე, თელაველები გოგია დელიშვი-
ლი, სერგო ბაშაღიშვილი, გიგლო მეზერიშვილი, ვანო კეც-
ლიშვილი, ალავერდა იმანოვი, ალიოშა ტაგიევი და მრავალი
სხვა.

პანტელეიმონ აფხაზაძე, როგორც მათემატიკოსი, ორმოც-
დახუთ მილიმეტრიან ტანკსაწინააღმდეგო ქვემეხების ბატარე-
აში ჩარიცხეს, ედუარდ დამი კი — პოლკის სასულე ორკესტრ-
ში. მასთან რამდენიმე ქართველიც მსახურობდა.

აფხაზავა იშვიათად მოდიოდა ჩვენთან. დღისით მეცადინეობდა, ღამით წერილების წერასა და კითხვას უნდებოდა.

როცა ნიგვზიანიდან საგულდაგულოდ შერჩეულ ამანათს მიიღებდა, ყველას დაგვიძახებდა და მაშინ ბუგის ნაპირებზე პირს ვიტკბარუნებდით გურული ჯანჯუხით, ხურმის ჩირით და ტკბილისკვერით.

სხვა დროს პანტელეიმონს ჩვენგან შორს ეჭირა თავი. მკაცრი გამომეტყველება ჰქონდა. ენაკვიმატებმა „ალგებრის მასწავლებელი“ შეარქვეს და ბიჭები მუდამ რიდითა და კრძალვით ეპყრობოდნენ.

ყველაზე მეტად ონისიმე ასათიანსა და სერგო ბაშალე-იშვილს დაუუახლოვდი.

ონისიმე ობოლი ბიჭი იყო, დედობილ-მამობილს დიდი სიყვარულით იგონებდა. საშუალო სკოლა ახლახან დაემთავრებინა ზესტაფონის რაიონში.

კომკავშირელი, პარტიის წევრობის კანდიდატი ონისიმე ასათიანი სამხედრო სამსახურს გასაოცარი გულმოდგინებით მოეკიდა. მართალია, სროლაში ბედი არ სწყალობდა, მაგრამ სხვა მხრივ სანიმუშო ვაჟკაცი იყო.

უყვარდა ამხანაგების დარიგება, მუდამ მხნედ და კმაყოფილი გამოიყურებოდა. ბიჭებს საოხუნჯოდ ჰქონდათ მისი გადაჭარბებული თავაზიანობა. „გამარჯობასაც“ არ იტყოდა, „თ“ რომ არ დაეყოლებინა: „გამარჯობათ“, „აქა მშვიდობათ!“

სვილისფერი, ოღნავ შებერებული გამხდარი სახე ჰქონდა, კეხიანი ცხვირი. მუდამ უცინოდა ჭროლა თვალები. ტუჩებზე ღიმილი უკრთოდა. ხშირად ლაპარაკობდა შეყვარებულზე, მაგრამ ბოლომდე ვერ გამოვარკვია, მოგონილი იყო ეს სატრფიალო ამბავი, თუ მართლა უყვარდა ვინმე.

სერგო ბაშალეიშვილი) ჩვენს პოლკში მიიღეს პარტიის წევრობის კანდიდატად. ისე უხაროდა, რომ მზად იყო თავისი დაზვის ტყვიამფრქვევი დღე-ღამე შეუსვენებლივ ეტარებინა.

სერგო დაბალი და მკვრივი აგებულების ლამაზი ჭბატუკა იყო. შვენოდა მოკლედ შეკრეჭილი უღვაში, ვერავითარი მუქართა და შეგონებით რომ ვერ მოაპარსვინეს. თითოთ საჩვენებელი იყო მისი სიკობტავე და სიფაქიზე.

სერგო და ონისიმე შექილიკებული იყვნენ ერთმანეთთან:

— ე, ბიჭო, ფუქსალია, ერთხელ მაინც ეიწიე ზევით, შენც ისიამოვნე ამ სუფთა, ჰაერით! — გამოიწვევდა კაფანდარა ზესტაფონელი.

გულფიცხ სერგოს მეტიც არ უნდოდა, მაშინვე აღმური მოედებოდა და ბრაზმორეული უპასუხებდა:

— გირჩევნია, ემაგ შვილივით მოსწრებულ ცხვირს მიხედო, ბეჩარა კისერი არ ჩამოგწყვიტოს.

ერთი გურული ბიჭი, გვარად გორგილაძე, მოსვენებას არ აძლევდა ონისიმეს: ყურს მოჰკრავდა თუ არა, ბაშალეიშვილს ეკამათებო, უმალ იქ გაჩნდებოდა და მწარე-მწარე სიტყვებით კენწლავდა.

ერთხელ ონისიმემ ველარ მოითმინა და ირონიულად უთხრა:

— მაი დაგაბარათ ნენამ, ჯარში რომ მოდიოდით?

გორგილაძემ მაშინვე ხმა გაკმინდა, მაგრამ ასათიანს მაინც აღარ მოვეშვით, სანამ არ ვათქმევიანეთ, რა დააბარა ნენამ გორგილაძეს.

— ეს ყმაწვილი სადგურამდე გამოუცილებია დედას; გზაში სულ ასე ეჩიჩინებოდა თურმე: „თოფს და ზარბაზანს არ მიეკარო, ტყვია არ გაგივარდესო!“

გაწითლებული გორგილაძე ირწმუნებოდა, ეს ამბავი ჩვე-

ნებურებმა მომიგონეს, დედას არ გამოვეუცილებივარო, მაგრამ მთელ პოლკში მაინც სასაცილო გახდა: „ნენა, ფრთხილად იყავი, თოფი არ გაგივარდესო!“

კაკაბელი ბიჭიც ჩვენს ასეულში მოხვდა. არც აქ ისვენებდა, ვერც აქ მოიშალა თავისი ახირებულობა. მაგონდება ერთი ამბავი. საველე საშხარეულო კარგა მოშორებით იდგა ჩვენი ყაზარმიდან. ძილის წინ ცხელი ჩაი ყველას გვსიამოვნებდა, მაგრამ თბილი ოთახიდან გასვლა მაინცადამაინც არავის ექაშნიკებოდა. გარეთ ყინავდა. კაკაბელმა ბიჭმა აქაც გამოძებნა იოლი გამოსაგალი... თავისი კარდალა მორიდებით გაუწოდა ონისიმეს და ენატკბილად მიუთილისმა:

— პატივცემულო, ანისიმ! თქვენისთანა მორუსულე აქ არავინ მეგულება. ვინმე რომ გამაჩეროს, სიტყვას ვერ მოვაბრუნებ, ჯორივით დავდგები. ქენი სიკეთე, ეს ერთი კარდალა ადუღებული წყალი ამომიტანე, შენი კვნესამე. ჩაი მინდა დავლიო...

რუსული ონისიმესაც უჭირდა, მაგრამ ცოდნაზე თავს სდებდა: არაფერს დაიზარებდა, თუკი ვინმე სარუსულო რამეს დაასაქმებდა. ახლაც დაუფიქრებლად სტაცა ხელი კარდალას და თვალის დახამხამებაში ამოუბრენინა ადუღებული წყალი. ჩვენ სიცილ-სარხარით შევეგებეთ ცხვირწამოწითლებულ „მორუსულეს“, კაკაბელი ბიჭი კი ნეტარებისაგან გალურსულიყო და ვითომც აქ არაფერიო, ნება-ნება ხვრებდა ცხელ ჩაის.

ერთხელ კაკაბელი ბიჭი ღამის მორიგედ იყო... უდროოდ დროს გაგვადვიდა... თვითონ კი დამდგარიყო სერგოს ლოგინთან და ხითხითებდა... თელაველს მაგრად ჩაეხუტებინა ბალიში და ფეხები მეზობელი ჯარისკაცისათვის ჩაეგრინა.

— არ გამოაღვიძოთ, სიზმარი არ დაუფრთხოთ! — ქირ-
ქილებდა კაკაბელი, — ეგ ახლა თელავშია, ცოლთან...

სამხედრო ფიცი რომ მივიღეთ, ნამდვილ ჯარისკაცებად
მაშინ ვიგრძენით თავი.

არასოდეს დამავიწყდება ის დღე. საზეიმოდ ვიმეორებდით
ფიცის თვითეულ სიტყვას და ჩვენს ხმაში ფოლადის წკრაალი
გვესმოდა.

ღიაღი, წმინდა სიტყვაა ფიცი. კაკაბელი ბიჭიც ტუჩებს
ბურცავდა და მალულად ისრესდა ცხვირის წვერს.

ამის შემდეგ წინანდელზე მეტსაც გვავალებდნენ და უფრო
მკაცრადაც გვთხოვდნენ.

რიყრაყზე ვდგებოდით: რამდენსამე წამში ვიცვამდით. ვემ-
ზადებოდით, და ნასაუზმევს სუსხიან ქარბუქში გავუღვებო-
დით სასროლეთის გზას.

იქ საღამომდე ვრჩებოდით. გაშლილ მინდორზე ნიშანში
ვისროდით, წელამდე თოვლში ტაქტიკურ ამოცანებს ვასრუ-
ლებდით, საჭმელს თვითონვე ვიმზადებდით, ხოლო საღამოს,
ციხე-სიმაგრემდე შეუსვენებელი სირბილით გავდიოდით რვა
კილომეტრს. დაბრუნებისთანავე იარაღს გავწმენდით, ზემ-
დევს შევამოწმებინებდით და დაღლილ-დაქანცულნი ვიძი-
ნებდით. გვეგონა გამოვშუშდებოდით, მაგრამ ახალ ჩაძინე-
ბულებს ხშირად გვადვიებდა განგაში და კვლავ სალაშქროდ
მივდიოდით.

კაცმა რომ თქვას, გამიჭირდა. ზოგჯერ გავჭიქდებოდი კი-
დეც, ათმეთაურსაც შევუბღვერდი, მაგრამ არ მახსოვს, რომ
ჩემთვის დაეთმოს. რაც წესდებაში არ ეწერა, არ დამა-
ვალებდა, მაგრამ ბრძანების შეუსრულებლობას არ შემარჩენ-
და. კარგა ხანს ვძიბვილობდით მე და სამხედრო დისციპლინა.

ერთხელ, ტექნიკური მეცადინეობის შემდეგ, დაღლილნი გზატკეცილზე მივდივართ. ანაზღად ათმეთაურის ბრძანება მესმის:

— დაზგის ტყვიამფრქვევმა ტყის განაპირას, გუბურაში, საბრძოლო პოზიცია დაიკავოს!

ეს ნიშნავდა, რომ ასიოდე მეტრი გამერბინა და ტყვიამფრქვევით ჭაობში ჩავწოლილიყავი.

„რას მიჭქარავს“, — გავიფიქრე, — „რა საჭიროა ახლა ასეთი ბრძანება?“ რამდენიმე წუთს უძრავად ვიდექი და გაკვირვებული შევყურებდი ჩემს უფროსს... ასეთი ფილოსოფოსობისათვის მაგრად შემახურა ასმეთაურმა გელაშვილმა:

მეორედ, გულმოდგინედ ვერ მივესალმე ათმეთაურს, რომელიც ასჯერ მაინც მენახა იმ დღეს. სამწყობრო ნაბიჯი და ხელის აღება ერთმანეთს არ შეეხამა. არც ეს შემარჩინა. გამაჩერა და მთელი საათი საჯაროდ მამეორებინა სალამი. ავბუზღუნდი, მაგრამ აქაც მე დავრჩი მტყუანი.

პოლკის კომისარი, ძველი, გამოცდილი მეთაური მუზნიჩენკო მზრუნველ მამასავით თავს გვევლებოდა. პირადად იცნობდა ყველას, იცოდა, ვის როგორ უნდა მოქცეოდა, სამართალს არასოდეს გადალუნავდა და ჩვენც ვცდილობდით სირცხვილი არ გვეჭამა.

საინტერესო კაცი იყო ბატალიონის მეთაური, კავალერიისაში ნამსახური კაპიტანი, ყაზანელი თათარი გაიფუღინი.

იშვიათად გაიღიმებდა და პირველ ხანებში ძალიან გვეშინოდა მისი. მაგრამ, როცა გავკაყდით და ჩვენი მომზადებაცოფაქცევით ვმაყოფილი იყო, ბედნიერად ვთვლიდით თავს. ერთმანეთს ვანიშნებდით: „შეხედეთ, შეხედეთ! ჩვენს კაპიტანს გაეღიმა!“

ახლაც თვალწინ მიდგას კაპიტანი გორნოსტაევი — პოლკის

მეთაურის მოადგილე სამწყობრო ნაწილში, მაღალი, ზორბა ვაჟკაცი. გასაოცრად შეენოდა საპარადო ნაბიჯი. მთელი დღე შეუსვენებლად შეეძლო მკერდის სიმაღლეზე აწეული, გამართული ნაბიჯებით სიარული. ჩვენც ამასვე გვასწავლიდა. მის თვალს არასოდეს გამოეპარებოდა, მწყობრში ვინმეს ნაბიჯი თუ აერეოდა; მაშინვე მასთან გაჩნდებოდა, უსიტყვოდ გვერდში ამოუდგებოდა და სახეგალიმებული ურტყამდა მიწას მაღლა აქნეულ ფეხს.

გორნოსტაევი შემდეგ ქალაქ ბრესტის კომენდანტად გადაიყვანეს.

რა დამავიწყებს ჩუმ, ქალივით ლამაზ პოლიტხელ ნიკოლოზ ივანოვს; ჩია ტანის, ბეჭებში მოხრილ უფროს ლეიტენანტ ემელიანოვს — პოლკის ყველაზე კარგ მეტყვიამფრქვევეს; საოცრად ახმახ, თაშფაშა ინტენდანტ იურიევს, რომელმაც კაპიტანი ხარაბაძე შეცვალა პოლკის მეთაურის მოადგილის თანამდებობაზე.

ზოგიერთის სახე კი უკვალოდ წაიშალა ჩემს მეხსიერებაში, მხოლოდ მათი გვარებიღა მახსოვს. მე უკვე აღარ შემიძლია წარმოვიდგინო პოლკის შტაბის უფროსის რევიაკინისა და მისი ნაცვალჯარდის — ვორონცოვის პორტრეტი. აღარც ტანკსაწინააღმდეგო ბატარეის ოცმეთაურის — ვინოგრადოვის შესახებდაობა მაგონდება. ისღა მახსოვს, რომ ჩვენს პოლკში პირდაპირ სამხედრო აკადემიიდან მოვიდა, კარგი არტილერიისტი იყო და სხვებთან ერთად პანტელეიმონ აფხაზავასაც ასწავლიდა.

პირველ ხანებში გული გვწყდებოდა, რომ ბრესტში წასვლის ნებას არ გვაძლევდნენ, მაგრამ მალე მე და ასათიანი პოლკის კომისარმა სააჩჩევნო უბანს მიგვამაგრა აგიტატო-

რებად და ხშირად დავდიოდით ამ ძველისძველ სლავურ ქალაქში.

პუშკინის ქუჩაზე, სადაც მე და ონისიმე მიგვამაგრეს აგიტატორებად, მშრომელები იმედით ეგებებოდნენ არჩევნებს, მომავალს რწმენით შეჰყურებდნენ.

ზაფხული ჩვენმა პოლკმა მალორიტის ტევრში გაატარა. პოლიტხელის მოადგილე პიროგოვი, ვიქტორ ჩორნი, პეტია სტუკალენკო, პანტელეიმონი, ონისიმე, სერგო და მე შაბათ-კვირას საბანაოდ დავდიოდით ბანაკიდან ორბოდე კილომეტრის დაშორებით, სადაც ხეების ჩრდილქვეშ საამურად განაბულიყო წყალკამკამა აუზი. ოდესღაც გრატისა თუ თავადის სასახლე ყოფილა აქ. მემამულეს მარმარილოთი მოეპირკეთებინა საგუბარი, რომელაც მარმარილოსვე კიბით კომქს უერთდებოდა. ფრთხილ მემამულეს სასახლე მკვიდრი გალავნით შემოეზღუდა. ახლა მხოლოდ ციხის ნანგრევებიღა შემორჩენილიყო. ჩამოშლილი კედლები სუროს დაებურა და ბასტიონის ნაშთებს რამდენიმე ნაბიჯიდანაც ვერ შეამჩნევდით.

აუზიდან მონაბერი გრილი ნიავი ქოჩორს უვარცხნის ფრთათეთრას, ვარდკანაფას, შროშანს, ტაძრის თაღივით რომ გადაჰხურვია სიჩუმეში გარინდულ ანკარა წყალს.

ჩვენ მიერ არჩეულ მყუდრო ადგილს ვერხვისა და ალატის ჩრდილი ეფინება. მათი ტოტებისა და ფოთლების ლივლივი უცნაური სახეებით ხატავს მიწას.

გვიყვარს აქ განმარტობა და საუბარი, არყნარში მიმალული სიძველეები, მათი იღუმალეებით მოცული თავგადასავალი. შემოგარენის სიმაგრეთა სქელ კედლებზე არტილერიის მთელ ისტორიას აღადგენს კაცი. თავშესაფრის ასაგებად რა ღრმად შექრილა ადამიანი მიწაში, მაგრამ ცეცხლითა და მახვილით

მოსულა მტერი და ციხე-ბურჯი დამცველთათვის სამარედ უქცევია.


აქ ყოველ ნაბიჯზე შეხვდებით მებრძოლის საფლავს, რომელთაგან ზოგი ქამთა სიავისაგან წაშლილა და გაქრალა.

როგორც ქალაქში, ისე ქალაქგარეთ, ერთეულ საფლავების გარდა, რამდენიმე კეთილმოწყობილი სამარხია. მათ შორის ყველაზე მეტად მოცუბდა 1914 — 1918 წლების ომში დაღუპულ ძმათა სასაფლაო, ბრესტ-ვისოკოვს გზის მარცხნივ რომ შემორჩენილა. აქ ყოველი მებრძოლი მკვიდრად დასახლებულა, თავს ვეება ლოდი წამოუხურავს და ახლა აღარავის აწუხებს! თორმეტი ათასი კაცი ერთ მტკაველ მიწაზე მოთავსებულა და მათი სამყოფელი შემაზრხენ დუმილს მოუცავს.

მოსულან აქ ბოდმით, ზიზღითა და მტრობით აღესილნი, ველური ყიყინით დასჯახებიან ერთმანეთს, რათა სამუდამოდ დამცხრალიყვნენ. ახლა აქ აღარც შურია და აღარც მტრობა, არც ყიყინა და არც ხიშტის ტრიალი, აქ მხოლოდ დუმილი მეფობს — მარადიული და საზარელი. სასაფლაოს ნახვა, ჩვეულებრივ, სიცოცხლის წარმავლობაზე აგვიშლის ფიქრებს. აქ რატომღაც სხვა გრძნობა მერევა. ვინ იცის, რა უსაზღვრო იყო მათი ოცნებები, სურვილები, და რა მოკლეა აწ და მარადის მათი ეპიტაფია: „აქ განისვენებს ჰაინრიხ ველერი, დაბად. ვაიმარში, 189... წელს. დაიღუპა ბრესტ-ლიტოვსკში 1916 წელს“... ამ საფლავიდან არცთუ ისე მოშორებით სხვა წარწერებიცაა რუსული, რომელიც გვაუწყებს, რომ აქ განისვენებს ამა და ამ პოლკის ჯარისკაცი ნიკოლოზ ალექსის ძე მიშკოვი...

განმარტოებულ ხის ძირას ერთხელ ქართველი ჯარისკაცის საფლავს წავაწყდი. ძლივს ამოვიკითხე ქარწვიმისაგან გადა-

შლილი წარწერა. იქნებ დღესაც მოეღიან ხონში მსოფლიო ომში დაღუპულ უწვერულვაშო ყრმას...

— დაშამათებული ადგილია! — მითხრა ერთხელ მოხუცმა ბელორუსმა: — არც ერთი ომი ამ ქალაქს არ ასცდენია. შვილს მამისეულ სახლში კერა ვერ გაუჩაღებია. ყოველ თაობას ერთი ომის გადახდა მაინც უხდება. მამაჩემის აშენებული სახლი პრუსიელებმა დასწვეს 1914 წელს. შემდეგ მე ავაშენე ახალი სახლი, ისიც იმათ დამინგრეს შარშან; ახლა ისევ მინდა ავაშენო, მაგრამ... მოგვასვენებენ? 

ვიქტორ ჩორნის თავდავიწყებით უყვარს ისტორია. ბევრი რამ წაუკითხავს და გაუგონია, ბევრ საინტერესოს გვიამბობს. მასთან არასოდეს მოიწყენს კაცი. ეს უზარმაზარი, მსუქანი, შავგვრემანი ახალგაზრდა მეტად გულჩვილია. რომ იტყვიან, ჭიას ფეხს არ დაადგამს.

ვიქტორს გვიან დავუმეგობრდით. ზონზროხა ჭაბუკი ძალიან ქედმაღალი და თან დონდლო გვეგონა. ამიტომ, როცა კაპიტან გაიფუღინს ყაბინკის სასროლეთიდან ციხე-სიმაგრემდე სირბილით მიიყავდით, ვცდილობდით სწრაფად გვერბინა: დარწმუნებული ვიყავით, რომ ჩორნი უკან დარჩებოდა, მაგრამ შენც არ მომიკვდე!.. ვიტია მშვიდად, აუღელვებლად კეცავდა გზას და ჩვენც თვითონ მისი მოსაშველებელი ვხდებოდით; ჩამორჩენილს დაუყვედრებლად ჩამოართმევდა დისკს ან ტყვიამფრქვევს და ისე ხალვათად მირბოდა, ვითომდა აქ არაფერიყო.

პეტია სტუკალენკო ერთი შეხედვით უფრო მკაცრი მოგეჩვენებოდათ, მაგრამ ისიც მეტად გულალალი კაცი იყო.

— ეჰ! საუკუნე ერთი წუთია! — დაიწყებდა ფილოსოფოსობას ონისიმე, როცა ამ ადგილებს გადახედავდა. — განა

დიდი ხანია, რაც აქ სუვოროვი და კუტუზოვი იბრძოდნენ?! და მათთან ერთად ჩვენი სახელოვანი თანამემამულე პეტრე ბაგრატიონიც. ცოტა მოგვიანებით, ძმებო, ბრესტში ალექსანდრე გრიბოედოვსაც უმსახურია, შემდეგ მთელი ქვეყანა მოიარა, სადღაც სპარსეთში მტრის ტყვიამ განგმირა და ჩვენს მშობლიურ თბილისში, თავის საყვარელ მთაწმინდაზე, ჰპოვა სამუდამო განსასვენებელი.

კაკაბელმა ბიჭმაც თავისი ამქარი მონახა. თავდაპირველად ყველას როდი ესმოდა მისი ლაზღანდარობა. უადგილოდ ვის სარმას გამოჰკრავდა, ვის მოგვერდით წამოიღებდა. ჭიდაობაში აღარავინ მიჰყვებოდა. კვანტის სამართლიანობაზეც დიდი კამათი და პაექრობა იმართებოდა. მისი უკრაინელი მეგობრები გაუალა და ზაიკა „ვერაგულ კაუქს“ კანონის აღმამფოთებელ დარღვევად თვლიდნენ. თავის მხრივ, კაკაბელი ბიჭიც ვერ ურჩავდებოდა ფეხებში ხელით შევარდნას. ბოლოს და ბოლოს, როგორც იქნა, მორიდდნენ. კაკაბელი ბიჭი დიდი გულმოდგინებით ასწავლიდა ახალ მეგობრებს „ეშმაკურ კვანტს“.

როცა ციხის ნანგრევებთან სვიატოპოლკსა და სუვოროვზე ვსაუბრობდით, ამ „მზიარულ ტრიოს“ ტყის ნაპირას ჭიდაობის გაკვეთილები ჰქონდა.

ამ დროს ბანაკში ყველა სასიამოვნო სანახავი იყო: ხორშაკით გაფიცხებული და მზით შერუჯული ჯანსაღი სახე, დაკუნთული სხეული, მოქნილი, მოსხლეტილი ნაბიჯი, მხნე, მზიარული გამომხედვა.

თვითონვე მიკვირდა, როგორ შევიცვალე, თითქო ფრთები გამომმესხაო, ისე მსუბუქად და ლაღად დავაბიჯებდი. ხარბად ვსუნთქავდი ტყის ჯანსაღ ჰაერს და სისხამ დილით, წყაროზე

პირის დასაბანად რომ მივეშურებოდი, გული უჩვევი სიხარულით მევსებოდა, აუწერელ სიამეს ვგრძნობდი, როცა ახალპირდაბანილი, ტანდაზელილი, ხალსიანად მივდიოდი რეპროდუქტორიდან გადმომქუხარი სამხედრო მარშის ხმაზე, უჩვეულად გამომახილს რომ გამოსცემდა უღრანი ტყის მყუდროებაში. ვამაყობდი და ვისაც სამხედრო ხალათი არ ეტარებინა, ვაყვაცადაც არ მიმაჩნდა.

დღეები სწრაფად მიქროდნენ. სამოქალაქო ცხოვრებას ისე მღელვარებით აღარ ვიხსენებდით. და ერთხელ, ძველი ქალაქების გადათვალიერებისას, ჩემს ბლოკნოტს რომ წავაწყდი, გამეცინა: რვა თვე დამრჩენოდა წაუშლელი...

1941 წელი ბედნიერად დაიწყო. დივიზიის პოლიტგანყოფილების უფროსმა პიმენოვმა ჩორნის, ოსადჩის, ასათიანსა და შევარდნაძეს პარტიული ბილეთები გადასცა.

გაზაფხულზე საშუალო და უმაღლესი განათლების მქონე წითელარმიელები მოკლევადიან კურსებზე გაგვიწვიეს. მალე უმცროსი სერჟანტის წოდებაც მოგვანიჭეს, ამას სასიხარულო წარმატება მოჰყვა. ჩორნი პოლკის შტაბში გადაიყვანეს. ოსადჩი კომკავშირის კომიტეტის მდივანი გახდა. ონისიმე ახალშექმნილი ნაღმსატყორცი ასეულის პოლიტხელად დანიშნეს, შევარდნაძე და ბაშალაიშვილი კი — ოცმეთაურის მოადგილეებად. მე მესამე ასეულშივე დავრჩი, როგორც პოლიტხელის მოადგილე. დაწინაურება პირველად ჩემმა ათმეთაურმა მომილოცა. გადამეხვია და გადამკოცნა. ახლა თვითონვე საპაგალითოდ ასრულებდა ჩემს ბრძანებას. მრცხვენოდა, როცა ვიგონებდი ჩემს საქციელს სამსახურის პირველ დღეებში.

მაისის შუა რიცხვებში ბრესტის ციხე-სიმაგრე თითქმის

დაცარიელდა. სამხედრო ნაწილები საზაფხულო ბანაკებსა და სამუშაოებზე გაიკრიფნენ. სიმაგრეში მხოლოდ შტაბები, სამეურნეო ნაწილები და მორიგე ასეულები დარჩნენ.

ჩვენი პოლკი სამ ნაწილად გაიყო. მეორე ბატალიონი ხეტყის დასაზღაბლად გაგზავნეს, მესამე — სასროლ წვერთანაა გადიოდა. ხოლო ჩვენ სიმაგრის ჩრდილოეთით, მდინარე ლესნაიას ნაპირზე გავემგზავრეთ შემოდგომით დაწყებული სასაზღვრო ხაზის ნაგებობათა დასამთავრებლად.

ზედ ბუგის ნაპირებზე — შტოშის, ნიყის, ბოგვის ბუჩქნარებში. თეთრი კარვები გავშალეთ და მუშაობას შევუდექით.

იმ გაზაფხულზე ყველამ შეამჩნია, როგორ გამოიცვალა საზღვრის გაღმა განლაგებული გერმანიის ჯარის ნაწილები. თითქმის აღარც მალავდნენ თავიანთ მტრობას. ხშირად მდინარეზედაც გადმოდიდოდნენ ქურდულად და როცა დავიჭერდით, — „გზა აკვერიაო“, — ამბობდნენ.

15 ივნისს, მდინარისპირად საგუშაგოზე მყოფ გაქალას დამტვრეული რუსულით დედა შეაგინეს. კაკაბელი ბიჭის ძმობილი დიპლომატიაში სუსტად ერკვეოდა და ეს უხამსობა უპასუხოდ არ დატოვა.

19 ივნისს, სადილობის დროს ჩვენს ბანაკს „მეზობლის“ ხუთმა თვითმფრინავმა გრილით გადაუჭროლა. ყველანი გარეთ გამოვცვივდით. რამდენიმე წუთის შემდეგ ჩვენმა ათმა გამანადგურებელმა საზღვრის დაპრღვევნი წინ გაიგლო და საზღვრამდე „პიაცია“.

არ გასულა დიდი ხანი. რომ ბუგს გაღმიდან ოცმა თვითმფრინავმა ხელახლა გადმოსერა საზღვარი, ჩვენს მიწა-წყალზე შეპოიჭრა და თვალს მიეფარა.

განაბული გავყურებდით ცას.

ცოტა ხნის შემდეგ საზღვრის დამრღვევებს რისხვად დაატყდა ოცდახუთი საბჭოთა თვითმფრინავი. ამჯერად გერმანელები ისე იოლად არ აპირებდნენ უკან გაბრუნებას. ჩვენს ზემოთ ტყვიამფრქვევების კაკანი გაისმა...

ვეგრძნობდით, როგორ იქუფრებოდა ცა, გროვდებოდა სპავდრო ღრუბელი, მაგრამ მეხის ხმა ჯერ არ ისმოდა და ჩვენც მშვიდად განვაგრძობდით საქმეს.

მაისის ბოლოს ჩვენი ასეულის პოლიტხელი პარშინი გაათავისუფლეს და მის ნაცვლად მე დამნიშნეს. ამ საქმეზე 21 ივნისს, შაბათს, პოლკის შტაბში ვიყავით ორივე დაბარებული.

ამხანაგებს გამოვეთხოვეთ და ციხე-სიმაგრისაკენ ადრინადად გავეწიეთ, რადგან რვა კილომეტრი ფეხით უნდა გაგვევლო.

სალამო მშვიდობისა და დილა ბრძოლისა

აღმოსავლეთის ფორტს რომ მივატანეთ, პარშინმა საერთო საცხოვრებლისაკენ გაუხვია, მე ციტადელში წავედი.

მზე დასავალზე იყო.

ცის კიდეს ვარაყივით შემორჩენოდა მეწამული. სიმაგრე ნაირფრად ელავდა ბუნების მშვიდ ფონზე.

ცის კაბადონს მიწაყრილის მომადლო ქედი კვეთდა, ფორტის ბალახოვანი კალთები ჩამავალი მზის ოქროსფერ სხივებში ლივლივებდა.

ციტადელის სამთალოვან ალაყაფში, რომელიც მუხავეცის

ხილს კეტავს, გრილი ნიავი ქროდა. ნიავი არბილებდა ივნი-
სის თაკარას, მდინარის ნაპირზე შეფენილ შტოშის ბუჩქნარს
ალერსიანი ჰაერი ელაციცებოდა.

მყუდროება სუფევდა სიმაგრეში. მრგვალი ყაზარმის კე-
დლებთან თითო-ოროლა ჯარისკაცს შეამჩნევდით გახუნებულ
ხალათსა, მაღალყელიან ხამლებში და აჩაჩულ ტოლალებში.
ესენი მოკლევადიან გადაშაადებაზე გაწვეული ბელორუსე-
ბი იყვნენ.

დაცარიელებული სიმაგრე მაგონებდა საზფხულო არდა-
დეგების პერიოდში დროებით მიტოვებულ სკოლას... ბავშვო-
ბისას ძალზე მიყვარდა ზაფხულობით დაცარიელებული სკო-
ლის ეზოს, საყვარელი ადგილების შემორბენა. იმ უჩვეულო
მდუმარებაში რაღაც განსაკუთრებით ძვირფასსა და საოცნე-
ბოს ვპოულობდი. გულმა არც ახლა მომითმინა, ჯერ თეთრი
ყაზარმისაკენ გადავუხვიე, მერე ჩვენი შტაბის უკან, სასპორ-
ტო მოედანზე, გავედი. ყოფილი ეკლესიის, იმყამად სასადი-
ლოს, შენობაში შევირბინე, კლუბში ახალი ჟურნალ-გაზეთები
გადავათვალეირე და პოლკის მორიგესთან გამოვცხადდო.

მეორე სართულის კიბეზე რომ ჩამოვრბოდი, პოლკის
პარტიუროს მდივანმა ივანე პოჩერნიკოვმა შემაჩერა.

— ოჰო! თქვენ უკვე ჩამოსულხართ! — მომაძახა და გაღი-
მებულმა ხელი გამომიწოდა. — რა ამბავია ასეთლში, როგორ
არის საქმე?

უკანასკნელი სიტყვა უფროსმა პოლიტბელმა ქართულად
წარმოთქვა და თვალეზი უფრო გაუშუქდა.

მინდოდა, იქვე ორიოდე სიტყვით მეპასუხა მის შეკითხვა-
ზე, მაგრამ პოჩერნიკოვმა მკლავში ხელი მომკიდა, თავის სა-
მუშაო ოთახში შემეყვანა და კარგა ხანს მესაუბრა.

ეს ფერმკრთალი კაცი, რომელსაც ჭორფლი ისე მორეოდა, რომ ნაყვავილარი გეგონებოდათ, უსაყვარლეს ადამიანად ითვლებოდა ჩვენს პოლკში. ასე მომხიბლავად გაღიმება მხოლოდ 'სპეტაკი სულის ადამიანებმა იციან. იმ დღეს, როცა პარტიზურის მდივანი ღიმილს შემომავებებდა, არაჩვეულებრივ სიხარულს ვგრძნობდი, თითქოს რაღაც დიდი ჯილდო მიმეღო.

მეც გაპორჩეულად მიყვარდა ეს გულმართალი მეთაური, ისიც ვიცოდი, რომ პოლიტხელის თანამდებობაზე მან წარმადგინა და მის წინაშე განსაკუთრებულ პასუხისმგებლობას ვგრძნობდი.

— არ შემარცხვინო! — მითხრა პოჩერნიკოვმა გამომშვიდობებისას. — პარშინის შეცდომები კარგად გაითვალისწინე! ასეულში სულ თანამემამულეები გყავს და შენთვის უფრო ადვილი იქნება მათთან მუშაობა... ხომ იცი, როგორი დროა, სიფრთხილე გვმართებს...

ხელს რომ მართმევდა, ერთხელ კიდევ გაშოაჩინა ღიმილით გაშუქებული, მეტისმეტად მსხვილი ვერცხლის კბილები და თითის დაქნევით დაუმატა:

— ქართულ ლიტერატურაზე როდისღა აპირებ საჯარო ლექციის ჩატარებას? ჯერ შოთა რუსთაველზე უნდა წაიკითხო აუცილებლად. მაგრად მოემზადე! იცოდე, „ვეფხისტყაოსანი“ შინ გვაქვს და ყოველ დამით ვკითხულობთ მე და ჩემი მეუღლე. უფრო დაწვრილებით კი ორშაბათს მოვილაპარაკოთ ყველაფერზე...

ჩვენი ასეულის ბინა, სადაც ღამის გათევას ვაპირებდი, არეულ-დარეული დამხვდა, დერეფანი ჩახერგილი იყო მაგიდებით, სკამებით, ერთმანეთზე შედგმული ტახტებითა და კა-

რადებით. კართან ეყარა საღებავიანი ვედროები და გრძელტარაანი ფუნჯები.

ვიფიქრე, ონისიმეს ვნახავ, ამაღამ იმასთან დავრჩები-მეთქი, მაგრამ პირველ სართულზე, სადაც ნაღმმტყორცნელთა ასეული იძყოვებოდა, მორიგემ მომახსენა — არ ვაცი, პოლიტხელი სად წავიდაო.

შტაბში გავბრუნდი. მითხრეს, რემონტი რამდენიმე დღეს გაგრძელდება, თქვენს გარდა. პირველი ბატალიონიდან თხუთმეტი კაცი კიდევ არის უბინაოდ, ზოგი ჰოსპიტლიდან გამოეწერა, ზოგაც შვებულებიდან დაბრუნდა, ჩაიბარე ისინი და ძეორე ასეულის დიდ დარბაზში მოთავსდითო.

კარი რომ გამოვადეთ, დახუთული ჰაერი გვეცა. რემონტი ჯერ კიდევ არ დაეწყოთ, მაგრამ ოთახი მთელ თვეა დაკეტილი ჰქონოდათ. ფანჯარა გავალეთ და კარიც ღია დავტოვეთ, რომ პაერს ემოძრავა. დერეფნიდან ორსართულიანი საწოლები და ლეიბები შემოვიტანეთ.

დაბალმა, მწითურმა სერჟანტმა საწოლი ფანჯარასთან დადგა, ზემო საწოლი დაიკავა, ზედ ზურგჩანთა დადო და ჩემი დავალებით, ერთ ჯარისკაცს საბნებისა და ზეწრების მოსატანად გაჰყვა.

ცოტა ხნის შემდეგ ოთახში შემოაჭრა აღმურმოდებული წითელარმიელი, რომელსაც გიმნასტურა მხარზე გადაეგდო და შიშველ ფეხებზე წამოცმულ ხამლებს მოაფლატუნებდა. ტანწვრილი ბიჭი იყო, საულვაშე ქერა ღინღლით ჰქონდა შემოსილი. ზურგზე გადაკიდებული ტომარა დაუდევრად ეკირა ცალი ღვედათ. თავაწეული ერთი კი შეჩერდა კარებში, არც მოგვესალმა, არც არავის წარუდგა, პირდაპირ ფანჯრისკენ გაექანა. ნათქვამია, უფროსს ზოგჯერ ცალი თვალი ბრმა უნდა

ჰქონდეს და ცალი ყური ყრუო... მეც თვალი მოვარიდე და საბნებით დატვირთულ სერჟანტს მივეგებე.

საბან-გობანი მაგიდაზე დავაწყვეთ და ის იყო საწოლებზე უნდა ჩამოგვერიგებინა, რომ ის გაღვლილი ჯარისკაცი მოვარდა, არც აცია, არც აცხელა, თეთრეული აურდაურია, ხან ერთს წაეპოტინა, ხან მეორეს; გული ეთანაღრებოდა, უნდოდა ყველაზე უკეთესი ამოერჩია. სერჟანტმა მკაცრად გააფრთხილა, მაგრამ თითქოს არ გაუგონიაო, ყურიც არ გააბარტყუნა, ილიაში ამოჩრილი ზეწარი და საბანი ისევ შეუურია დანარჩენებს და გამომწვევი სიმშვიდით განაგრძო ამორჩევა.

ჩამორიგება რომ დამთავრდა, სერჟანტმა თავის საწოლს მიაშურა, მაგრამ ზურგჩანთა ეუცხოვა, გოცებულმა ხელი დაავლო ტომარას და ხმამაღლა იკითხა:

— ჩემი ზურგჩანთა ვინ აიღო, ვისია ეს ბარგი-ბარხანა?..

ყმაწვილი გულარხეინად იცქირებოდა ფანჯარაში, მაგრამ ამ სიტყვებზე სწრაფად მობრუნდა და მკლავეში ეცა სერჟანტს:

— ახლავე დადე თავის ადგილზე! მანდ მე ვწევარ. შენი ჩანთა იქ, სადმე, დაბლა მონახე!

სერჟანტი გაკვირვებული მისჩერებოდა გაცეცხლებულ ბიჭს, რომელიც ცდილობდა ჩანთა ხელიდან გამოეგლიჯა და მამლაყინწასავით იფხორებოდა.

— რას ნიშნავს, თავის ადგილზე დავდო! ცუდად იღო თუ რა, ძირს რომ ჩამოგიგდია? რას ჰგავს ეს? რა უღისციპლინობაა!..

— უღისციპლინობაა!.. — გამოაჯავრა ბიჭმა. — უნდა იცოდე, სად დაიკავო ადგილი.

— ამხანაგო მებრძოლო, სწორდი! — დაუყვირა მოთმინებადაკარგულმა სერჟანტმა და ჩანთას ხელი შეუშვა.

ბიჭი გამარჯვებულივით შებრუნდა საწოლისაკენ და ჩანთა მალლა ააგდო.

— სწორდი!.. ვითომ მაგის მაჩანჩალა ვიყო! მე ყველაზე ადრე მოვედი, ჰკითხე, თუ გინდა, შტაბის მორიგეს... ოთახი ვერ მიწოვეს და ფეხბურთს ვთამაშობდი. რაკი შემომასწარი, შენ უნდა დაიკავო უკეთესი ადგილი?.. დღეს საავადმყოფოდან განმომწერეს, დასუსტებული ვარ, სამი თვე ვიწექი. სუფთა ჰაერი მესაჭიროება. ფანჯარასთან მე უნდა დავიძინო.

სერჟანტი უსიტყვოდ გაეცალა.

დათმობა აღარ შემეძლო.

— რა ამბავია, სად გგონიათ თავი! — დავუყვირე უცნაურ ჯარისკაცს, რომელიც ამასობაში გულდამშვიდებით შლიდა ლოგინს. — გუშინ ხომ არ მოსულხართ არმიაში? არ გესმით, როგორ უნდა მოექცეთ თქვენს უფროსს — უმცროს სერჟანტს?..

წესრიგის დამრღვევმა დაკვირვებით ამათვალ-ჩამათვალბედა. გარეგნულად რიგითი ჯარისკაცისაგან არაფრით განვსხვავდებოდი: ისეთივე ჯარისკაცური ჩექმეები, ისეთივე გიმნასტურა და გალიფე, იგივე პილოტურა... ოღნავ წამოზრდილი თმა... საყელოზე ნიშნები არ მეკეთა, მხოლოდ მარცხენა სახელოზე დაკერებული წითელი ვარსკვლავით გამოვიჩიქოდი. არ ვიცი, შეამჩნია თუ არა ეს ვარსკვლავი. აინუნშიაც არ ჩაუფიქვარ, დაცინვით ჩაილაპარაკა:

— ჩემი უფროსი!.. ერთი ამას დამიხედეთ, დიდი ვინმე ბრძანებულა!.. უმცროსი სერჟანტი!.. გამომიჩნდა რაღა გენერალი, რომ პატავით მივეგებო, ადგილი დავუთმო! ფრთხილად, ძამია, მე ურალელი გახლავარ, აგრე იოლად ვერ მომ-

თოკავ! შენ კი, — მომმართა ირონიულად, — მეცამეტე გო-
ჭივით სხვის საქმეში ნუ ეჩრები...

წამოვენთე. მუქარით თვალი თვალში გავუყარე. ახალბედა
ჯარისკაცი შეკრთა, უმანკო, ბავშვური სახე გაუფითრდა, წამ-
წამები აუთამაშდა, თხელი, ფერმკრთალი ტუჩები აუთრთოლ-
და, ასე მეგონა, თავს ვერ შეიკავებს, საცაა ტირილი წასკდება-
მეთქი.

— მე პოლიტხელი ვარ, გიბრძანებ, ახლავე გაათავისუფ-
ლო უმცროსი სერჟანტის ადგილი! კმარა უდისციპლინობა!..

ურალელმა თავი დახარა. ერთხელ კიდევ მალულად შე-
ავლო თვალი ჩემს მტვრიან სამოსელს, გაქუცულ ჩექმებს...
ყოყმანობდა... სიტყვის უკან წაღება უჭირდა... ბოლოს მზერა
ჩემს სახელოზე შეაჩერა და ზანტად, უკმაყოფილოდ აკრიფა
გუდა-ნაბადი.

შევატყვე, თავს შეურაცხყოფილად გრძნობდა და ჩუმად,
მაგრამ სხვების გასაგონად ბუზღუნებდა:

— გაგონილა ასეთი დაბრეყება?.. ხმას ვერ ანოილებ!.. ეს
რა პანები გამომიჩნდნენ!.. ვითომ რით მჯობიან, ა?

— ამხანაგო პოლიტხელის მოადგილევე, — მითხრა მეორე
ასეულის ერთ-ერთმა მებრძოლმა. — ეს ურალელი ახალწვე-
ულია. ჩამოსვლისთანავე ავად გახდა და რამდენიმე თვეს
ჰოსპიტალში იწვა. მგონი, ფიციც არ მიუღია ჯერ. პოეტია,
ლექსებს თხზავს... ჯერ ხამია... მაგას ლეიტენანტი ანანიაშვილი
მოარჯულებს...

გულზე მომეშვა. გასაგებია ეს ჭირვეულობა... ნაწილები აქ
არ არიან... ყაზარმებში რემონტია. ყველაფერი აყრილ-დაყ-
რალია... საშუალო სკოლიდან პირდაპირ ჰოსპიტალში მოსუ-
ლა... ოჩნობს. უნებურად სარგებლობს არეულობით...

გულკერპ ურალელს დავემუქრე, დაგაჯი-მეთქი და, რად-
გან ჯერ კიდევ ადრე იყო, მეგობრების სანახავად წავედი.

კარებში რომ გავდიოდი, ურალელის ქაქანი მომესმა:

— კინალამ გული გამისკდა! პოლიტხელის მოადგილე!..
ბიჭოს, ბიჭოს, ვინ ყოფილა!.. პირში წყალი უნდა დავიგუბო,
რალა!..

დაბინდდა.

ამ დროს ჩვენი ბიჭები ეკლესიის წინ, მოედანზე გროვდე-
ბოდნენ ხოლმე, ზოგჯერ ჰოსპიტლისკენ მიდიოდნენ, სამხ-
რეთ კუნძულზე, სადაც მუდამ გრილა, მაგრამ უფრო ხშირად
აქვე, მოტომექანიზებული ბატალიონის მახლობლად, მუხავე-
ცის ნაპირზე იკრიბებოდნენ. იყო ტანსაცმლისა და კარდალე-
ბის ერთი რეცხვა-ხეხვა, ბანაობა, სილაში გორაობა, ცხელ-
ცხელი ამბების მოყოლა. მეც იქით გავუხვიე და არც შევ-
მცდარვარ.

ეგონებ კველა ჩვენი პოლკელი, ვინც ამ ზაფხულს სიმაგ-
რეში დარჩა, მუხავეცის ოკრობოკრო ნაპირზე გამოფენილიყო-
მხიარულად შემხვდნენ ვიტია ჩორნი, პეტია სტუკალენკო,
ონისიმე, პანტელეიმონი, კაკაბელი ბიჭი, მალაკელიძე,
ალექსი ჯაჩიაშვილი, გიგინეიშვილი, ნიკა აბზიანიძე. პავლე
შირინი, ალავერდა იმანოვი, ნიკოლოზ რემიზოვი, სოლიკო
სონიშვილი, იოსებ რთველიაშვილი, ნიკა მეკოკიშვილი, ედუ-
არდ დამი, პრონინი, ლისაუკი, კურენოი...

დამხვდურებს მეგობართა ამბები ჩავუყენებ, ჩვენი ასე-
ულის წარმატებებით წავიტრაბახე, ბუგგაღმელი „მეზობლე-
ბის“ უკეთურობაც ვახსენე.

გაოცებულნი მისმენდნენ. ნათქვამი არ სჯეროდათ, მაგრამ
ჩორნიმაც დამიდასტურა: ვიცი, ასეთი შემთხვევები სიმაგრის

უბანზეც იყო. ამის გაგონებაზე ყველა გაილურსა. გუნება გამოეცვალათ. განსაკუთრებით პანტელეიმონ აფხაზავას და-
ეტყო შეშფოთება. შინიდან მიღებული წერილები დაჩქარებით
უნმობდნენ ახალგაზრდა ცოლთან, რომელთან სიშორე კლავ-
და და მოსუფრებას არ აძლევდა...

ონისიმე სასაცილოდ აგვიგდო:

— ე. ბიჭო, რას ჩამოგტირით ცხვირ-პირი. დამიჯერეთ,
არაფერი მოხდება. ახვთ შემთხვევებს პოლიტიკის ენაზე სა-
საზღვრო ინციდენტი ჰქვია. რამეს რომ აპირებდნენ, უფრო
მოიკატუნებდნენ თავს. მართლა საშიში რომ იყოს, ჩვენც
გავიგებდით რაღაცას.

თვალეგაბრწყინებულმა აფხაზავამ ბანჯგვლიანი ფეხებით
სილაში მოიკეცა და მხარზე ხელი მოუთათუნა ასათიანს:

— შენს პირს შაქარი, ჩემო ონისიმე!..

— დამიჯერეთ, პანტელეიმონ. ტეხა-კრეფაზე შინ ვიქნე-
ბით. ხომ ხედავთ, რა მალე გაირბინა ორმა წელიწადმა... თვი-
თონ დაფიქრდით ახლა: საშიშროება რომ იყოს, ანანიაშვილი
და გელაშვილი საქართველოდან ცოლ-შვილს ჩამოიყვანდნენ?
წერილი გაუგზავნეს, — ჩამოდითო და გუშინლამ ჩამოაკი-
თხეს... ამ ზაფხულს სიმეგრეში გაატარებენ, მეთაურთა სახლ-
ში... ჯიჯიშვილის ოჯახიც ხომ აქ არის... დღესაც დავინახე თა-
მარი, კლარა ივანოვნასთან ერთად ბიდიოდა კლუბში, ბიჭუ-
ნაც თან ჰყავდა... ესენი კადრის ოფიცრები არიან და ყველა-
ფერო კარგად იციან. მერე, გერმანელების კომისიას, მგონი,
ჯერაც არ დაუმთავრებია ომში დახოცილი ოფიცრების ამოთხ-
რა და წასვენება... სხვანაირად რომ იყოს საქმე, ამისთვის
მოიცლიდნენ ახლა?.. არც ჩვენები მისცემდნენ ამის ნებას...

ონისიმეს საბუთებს ხომ წყალიც არ გაუვიდოდა:

ბიჭები დამშვიდნენ. ყველაზე მეტად აფხაზავა გამხიარულდა.

ონისიმემ გამყივანი ხმით სიმღერა წამოიწყო, პანტელეომონს ხელი გადაჰხვია და სხვებმაც ბანი უთბრეს:

ომში წასვლა მას უხარის,
ვისაც კარგი ცხენი ჰყავსო,
დაბრუნება და შინ მოსვლა —
ვისაც კარგი ცოლი ჰყავსო...

წყლის ნაპირთან ჩამომჯდარმა კაკაბელმა ბიჭმა, რომელსაც ფეხები მდინარეში ჩაეყო, კნაქა კანჭები აატყაპუნა და ვაგვწუწა. მერე ამხანაგებს სიმღერა ჩამოართვა და სულ სხვა ხმაზე დასჭყვივლა:

გზა ყივის წამაველისა. დამწოლელისა ლოგინი.

წყალში შორს შესვლას ვერ ბედავს კაკაბელი ბიჭი — ცურვა არ იცის. არადა, არ შორდება ნაპირს. ზოგჯერ ფრთხილად შევა მდინარეში, ფსკერს ფეხის წვერებით მოსინჯავს, სახედაჭიმული ჭყუმპალაობს, ნაპირზე კი ხარხარებენ: — კაკაბელო, ნუ ღუპავ შეყვარებულს, ქვევრის ღვინო და ცვრიანი მწვადი გაიხსენეო. თავქუდმოგლეჯილი გამორბის. ნაპირზე რომ გამოვა, სიხარულისაგან შეკუთნტრუშდება და უჩინარ მეტოქეს სარმას სარმაზე გამოსდებს.

ბავშვობიდანვე მომყვება: ზაფხული ზაფხულად არ მიმაჩნია, ცურვით თუ გული არ ვიჯერე. იმ წელს ივნისი ისე მიილია, რომ ცივ წყალში ფეხი არ ჩამიდგამს. ბუგი საზღვრით იყო გა

დასერილი და სად უნდა მებანავა!.. მინდოდა ახლა მაინც ამე-
სრულებინა წადილი, სასწრაფოდ გავიხადე და გადავეშვი
მდინარეში.

მაგრამ აქაც სიფრთხილე იყო საჭირო. გაღმა ვერ გასცუ-
რავდი, ეკლიანი მავთულხლართი არ გაგიშვებდა; ხიდსაც ვერ
გასცდებოდი, რადგან ბუგის შესართავთან მიახლოება საზღვ-
რის დარღვევად ითვლებოდა, ხიდის ერთი ნაწილი წითლად
იყო შეღებილი, მეორე — თეთრად. ერთი სიტყვით, ფრთხილად
უნდა გვეტყაპუნებინა ხელი, როგორც ვარკლში, და ჩვენც,
რა თქმა უნდა, განსაკუთრებულ წინდახედულებას ვიჩენდით,
რომ „მეზობელს“ უსაფუძვლო ეჭვები არ აღძვროდა.

ხერთვისებზე მძიმედ ჩამოწვა ბინდი.

დასავლეთისაკენ ცა ჩამუქდა.

პოლკის შტაბის წინ, მოედანზე ფრენბურთის ბადე იყო
გაბმული. მექანიკოსებს კლუბის კედელზე კინოეკრანი გაეჭი-
ბათ.

ისეთი ალერსიანი, თბილი ნიავი გვიღიტივებდა, ისე მსუ-
ბუქად ვგრძნობდით თავს, ისე ამაღელვებელი იყო რეპროდუქ-
ტორიდან გამომქუხარი მარშები, რომ კინოსეანსის დაწყე-
ბამდე შშვიდად ვინ გაძლებდა...

ალავერდა იმანოვმა დაჯაგრული წარბები აძგობა და ბი-
ლიარდის სათამაშოდ პოლკის კლუბისაკენ გასწია.

ჩორნიმ ტყავის ბურთი გამოიტანა და თამაში დავი-
წყეთ.

ერთ მხარეზე შტაბის მუშაკები იყვნენ, მეორეზე „ნაკრე-
ბი“ — მუსიკოსები, ნაღმმტყორცნელები, არტილერიისტები.
პანტელეიმონი არ თამაშობდა, შორიდან გვაღევენებდა თვალს.

კაკაბელ ბიჭს არ ვათამაშებდით, თამაშის წესებს არღვევდა — მოთამაშეებს კვანტს უღებდა.

„ნაკრების“ გუნდის წევრებმა რამდენიმე ბურთი გავიტანეთ. შტაბის თანამშრომლები აშაოდ ცდილობდნენ ანგარიშის გაქვითვას. მათ ვერც ახმახმა შეკარემ, ვიტია ჩორჩი-მ. უშველა.

ჩამოხნულდა, მაგრამ გულგაღვლილნი და გაოფლიანებულნი მაინც დავდევი ბურთს. მხოლოდ მაშინ დავიშალეთ, როცა გაისმა კინოსაპროექციო აპარატის ტკაცუნა და ეკრანზე ჩრდილები ათამაშდა. გრძელ სკამებზე ჩამოვსხედით და ახალსურათს მივაჩერდით.

მებუქემ ფილმის დამთავრებისთანავე დაუკრა საღამოს სადარი, მაგრამ ჩვენ კიდევ დიდხანს ვბაასობდით ეზოში. მხოლოდ მაშინ ვიკადრეთ დასაძინებლად წასვლა; როცა პოლკის მორაგემ კატეგორიულად გაგვაფრთხილა.

პანტელეიმონი მრგვალი ყაზარმისაკენ წავიდა. იქ, ზეღბუგის ნაპირზე, იდგა ტანკსაწინააღმდეგო ბატარეა. კაკაბელი ბიჭი უკან გაჰყვა; იგი მეალაღედ გადაიყვანეს პანტელეიმონთან და ნაწილობრივ მაინც აუსრულდა წადილი — ცხენოსანი გახდა.

* * *

იმ ღამით სამი ქართველი ოფიცრის ოჯახიც იმყოფებოდა ბრესტის სიმაგრეში.

ნინო ანანიშვილი და მარო გელაშვილი მერვე კორპუსში ცხოვრობდნენ, ორ-ორი ბავშვი ჰყავდათ. ახალჩამოსულთ

ხეირიანად ჯერ კადევ ვერ მოესწროთ მეზობლების გაცნობა. თამარ ჯიჯიშვილი მეცხრე კორპუსში ცხოვრობდა.

მამაკაცები შინ არ იყვნენ. იმ შაბათს ანანიაშვილი და გელაშვილი გამაგრებული რაიონიდან სახლში არ დაბრუნებულან. პატარა ელიკო და მაგული შუალამემდე ამაოდ ელოდნენ მამას...

ალექსანდრე ჯიჯიშვილი 19 ივნისს კობრინში გაგზავნეს: ათი დღე უნდა დარჩენილიყვნენ არმიის შტაბში.

ოჯახის კაცი იყო ალექსანდრე, მთელ თავისუფალ დროს ცოლ-შვილში ატარებდა, შინაურ საქმეში ეხმარებოდა მეუღლეს. ხუთი წლის თამაზთან თამაშს ხომ არაფერი ერჩინა. კობრინში გამგზავრების წინა საღამოს დიდხანს ელაღებოდა შვილს. ათ საათზე, როცა ხტუნვა-სიცილით მოღლილმა ბიჭუნამ თვალი მილულა, მამა ფრთხილად დაიხარა ტახტზე და ჩუმად წასჩურჩულა:

— თამაზიკო, ხვალ დილით მე შორს მივდივარ და გამომშვიდობებისას ყელზე უნდა გაკოცო, ხომ გაიღვიძებ?


— ჰო, მამა, მაკოცე! — ჩუმადვე მიუგო ბავშვმა.

ლამის ორ საათზე ნესტორ ბოკერიამ გამოუთარა ჯიჯიშვილს. კაპიტანი სწრაფად მოემზადა.

წასვლისას უნდოდა ეკოცნა შვილისთვის, დაიხარა კიდევ. — მაგრამ გადაიფიქრა, ძილი არ დაუფრთხოო. ამ მოძრაობაზე ბიჭი უნებურად შეიშმუშნა, თვალდახუჭული ოღნავ წამოიწია და ნუკრით გადასწია ყელი...

კაპიტანმა ჯერ შვილს აკოცა, შემდეგ ცოლს გადაეხვია, წუთით შედგა... ერთხელ კიდევ თვალი გადაავლო ოჯახს და თითქოს რაღაც დანაწებით ნელა გაიხურა კარი.

44-ე პოლკის ყოფილი მეთაური, ამჟამად საბჭოთა კავ-



ალექსანდრე ჯიჯიშვილი.

შირის გმირი, პეტრე მიხეილის ძე გავრილოვი, ამას წინაა
ჩემთან იყო სტუმრად. მან მიაშობო, რომ მისი პოლკის ერთ-
ერთ ქართველ მეზრძოლს, რომლის გვარი აღარ ახსოვს, იმ სა-
ღამოს მამა ესტუმრა სოფლიდან.

მოგვადგა ხურჯინებით დატვირთული ბერიკაცი, — მითხ-
რა გავრილოვმა, — შვილის ამბავი მკითხა. მამა-შვილი ცალკე
ოთახში მოვათავსე. საშველი არ მოგვცა მოხუცმა, დაგვპატიე,

მეფური სუფრა გაგვიშალა, დილით საქართველოში აპირებდა გაბრუნებასო.

გავრილოვის პოლკი ჩვენგან ცოტა მოშორებით იდგა. იგი 1940 წელს ჩამოყალიბდა და თავი ისახელა მანერჰაიმის სიმაგრეთა გარღვევაში, რისთვისაც ბევრი მეთაური და მებრძოლი დააჯილდოვეს ორდენებით. თვით პეტრე მიხეილის ძემ იმ ხანებში დაამთავრა ფრუნზეს სახელობის აკადემია. მას უკვე სახელოვანი საბრძოლო გზა ჰქონდა გავლილი. 1918 წელს მოხალისედ შესულა წითელ არმიაში, სამოქალაქო ომის ფრონტებზე მამაცურად უბრძოლია, 1921 — 1923 წლებში საქართველოშიც ყოფილა.

44-ე პოლკი იმ ზამთარს გადმოვიდა ბრესტის სიმაგრეში, მაგრამ მკვრივ, მუდამ კოხტად გამოწყობილ, სახეკუმტ და გულკეთილ გავრილოვს შორიდან იცნობდა ყველა.

ჩვენც ვამყობდით პოლკის მეთაურით. პოლკოვნიკი მატეევი, რომელმაც ურთქმელიძე შეცვალა, გამორჩეული კაცი იყო — არაჩვეულებრივად მაღალი და ტანწერწეტი, როგორც იტყვიან, ბეჭედში გაიტანდა ქამარშემოჭერილ წელს. მართალია, კვალერიიდან კარგა ხანია ქვეითთა ნაწილში გადმოყვანათ, მაგრამ ჩექმიდან დეზებს მაინც არ იშორებდა.

წითელი დროშის ორდენი, რომელიც ძალიან შვენოდა მის გრძელ ხალათს, სამოქალაქო ომში დაემსახურებინა.

* * *

ოთახში რომ შევედი, ბიჭები გახდილი დამხვდნენ, მაგრამ ჯერ არავის ეძინა. ზოგი უსაბნოდ წამოწოლილიყო, ზოგიც კარებთან იდგა და კინოფილმზე მსჯელობდა.

ტრუსებისამარა ურალელი და რანდენიმე სხვა წითელ-
არმიელი ფანჯარას გადაჰყურებდნენ, ერთმანეთს მუჯღუგუნს
ჰკრავდნენ და სახეგავარვარებული ცმუკავდნენ.

— შეხედე, შეხედე ერთი... აკოცა!..

— იმ უღმერთომ წელზე მოხვია ხელი!..

— რა საფოფინოა!.. ღმერთმანი, გულისცემა მესმის ამ სი-
შორეზე...

ისმოდა გაფიცხებული ბიჭების ხორხოცა. თვალზე ხელს
იფარებდნენ, ფანჯრის რაფაზე წვებოდნენ, ლამის ძირს გადა-
ცვენილიყვნენ...

გავბრაზდი: საცა იყო პირველი საათი გახდებოდა, ესენა
კი დაძინებას არ აპირებდნენ. გულმოსული ფანჯარასთან მი-
ვიჭერა... ურალელს არც შენოუხედავს. იაე დამითმო აღგილი.

ჩვენს პირდაპირ ორსართულიანი თეთრი შენობა იდგა.
იქ მე-17 საგუშაგოს მესამე სახაზო კომენდანტურა იყო და მე-
საზღვრეები ცხოვრობდნენ ცოლ-შვილით. ცოტა მარჯვნივ,
დასავლეთ კუნძულის გასასვლელთან, ტირასპოლის კარიბ-
ჭესთან, სადაც ბუგის ორი ტოტი ერთმანეთს უერთდება, კოშ-
კურიანი ჭიხური იყო მიშენებული.

ჩვენს ყაზარმასა და მესაზღვრეთა სახლს შუა ქუჩა გადი-
ოდა. მოპირდაპირე ფანჯარა ისე ახლოს ჩანდა, გეგონებოდათ,
ხელით მივწვდებო.

ოთახში ფერმიპკრთალი შუქი ლიცილიცებდა. ღია სარკ-
მელზე გრძელი, სიფრიფანა ფარდა იყო ჩამოშვებული, ძლივს
შეამჩნევდით, რომ სუფრაგადაფენილ მაგილაზე გრაფინი იდგა.
იქვე, სავარძელში, ქალი იჯდა, მახლობლად ვაჟი ბოლთასა
ტყებდა.

ოთახში მისი ბუნდოვანი ლანდი მოძრაობდა... მაღალი ჩრდილი სავარძელზე დაიხარა...

ურალელი მოუთმენლად ხტოდა, ჭახჭახებდა:

— ჩაეკონა! იფ. როგორ ჩაეკონა!

ბიჭები ფანჯარაზე გადაეყუდნენ.

ნელი ქარი მოუსვენრად არხევდა ფარდას, ერთმანეთში არეული ჩრდილები კედლებზე ათასგვარ სურათებად იშლე-ბოდა.

გამოვფხიზლდი.

ხმამაღლა, მაგრამ უნებურად დამთმობი ტონით ავჯუჯ-ლუნდი:

— ბიჭებო, არა გრცხვენიათ, ბოლოს და ბოლოს?! აბა, რას ჰგავს ეს! დაწეკით, ახლავე დაწეკით, ერიჰა! სად გაგონილა სხვის ოჯახში მალულად ცხვირის შეყოფა! ეს ხომ ხატი-პარიობაა!

ბიჭებმა ძლივძლივობით მოწყვიტეს მზერა ფანჯარას. თვალი რჩებოდათ ნიავისაგან აფრიალებული ფარდისკენ, რომელზედაც კვლავ გამოუცნობი სილუეტები ირხეოდა...

დავწეკით, მაგრამ ძილი კარგა ხანს არ მოგვეყარა. ზოგმა სურათები და წერილები ამოალაგა... ათვალიერებდნენ, მოუსვენრად წრიალებდნენ წელზევით შიშველნი, საბანზე გაშლართულნი. ხან ერთ მხარეზე გადაბრუნდებოდნენ. ხან მეორეზე.

ისეთი ღამე იყო, რაღაც სანუკვარს, დიადს ომ გპირდება. ღია ფანჯრიდან სიყვარულით იცქირებოდა ვარსკვლავებით მოჭედილი შორეთი. გაზაფხულის ხავერდოვანი ცა ოქროს სხივებით მოქარგულიყო, ნიავი სათუთი ფრთებით არხევდა ზეწარს... ფიქრი მალღდებოდა, შორს მიდიოდა, ათასგვარ კოშკს

აშენებდა... ვფიქრობდი ვიღაცაზე. გაურკვეველზე, მიუწვდომელსა და ბუნდოვანზე.

ძილმა ნელ-ნელა წაგვართვა თავი. ნიავს შეუერთდა მღელვარებით მოთენთილი ბიჭების ფშვანვა...

ახლადჩაძინებულმა ერთბაშად ვიგრძენი, რომ შუქი საგანგაშოდ ჩაქრა და მაშინვე უცნაურმა რყევამ იატაკზე გადმომავდო.

აზრმიუცემლად ზეწამოვიჭერ. ჩამონგრეული, აალებული ფანჯრის ჩარჩოში ზეცა თავზარდამცემად შეცვლილიყო.

წითლად და მწვანედ ანთებული აურაცხელი რგოლი შხუილითა და წივილით მოფრინავდა სიმაგრისაკენ. სახურავგადაცლილი ყაზარმის ზემოთ მრისხანე გუგუნის ჰაერს არყევდა.

დაბზარული კედლები ცახცახებდა. ახალ-ახალი დარტყმისაგან ინგრეოდა და ქვევით ცვიოდა. ჰერის ნამტვრევები ენარცხებოდა დაღეწილ საწოლებს.

განუწყვეტლივ ელავდა და ქუხილთან ერთად ავარდნილი კაშკაშა შუქი შემაზრზენად ანათებდა მიღამოს.

ეს მოხდა დილის ოთხ საათზე.

ბრესტის ნანვრევებში ნაპოვნია ამ გასაოცარი გამოღვიძების უტყუარი მოწმე — მალვიძარა საათი. მისი მექანიზმი დაუანგულა, ციფერბლატი დამპალა, მაგრამ ისრები სწორად უჩვენებენ დროს: დილის ოთხ საათს ორმოცდახუთი წუთითა უკლია... ჩვენს პირისპირ, ტირასპოლის კარიბჭესთან მდგომი გერმანელთა 45-ე დივიზიის ყოფილი ოფიცერი რუდოლფ გშობფი 1955 წელს ლინცში (ავსტრია) დაბეჭდილ თავის მემუარებში წერს: „ზუსტად სამ საათსა და თხუთმეტ წუთზე, დაიწყო ურაგანი, რომელმაც ისეთი ძლიერებით გადაიქუხა

ჩვენს თავზე, როგორც არც მანამ, არც შემდეგ, მთელი ომის განმავლობაში აღარ განმეორებულა... ამ გიგანტური კონცენტრირებული ცეცხლის ტალღებმა პარდაპირ დედამიწა შეაზანზარა...“

პირი ამოვსებული მაქვს მტვრითა და ნაცრით, ტანზე მოდებულ ცეცხლს ვიქრობ, წამდაუწუმ ვაფუროთხებ, დახანძრულ საწოლში ხელის ფათურით ვეძებ ტანსაცმელს და ხმადახშული ვყვირი:

— იარაღი...

— თავს უშველეთ...

— სარდაფებში...

ერთმანეთში ირევა ნაწყვეტ-ნაწყვეტი, გაოგნებული, ნამძინარევი შეძახილები:

— ივანოვ!..

— მიტია!

— სავჩუკ!

— ხმა გამეციოთ, მიწისძვრაა!..

მეწამულ ბუღში არაფერი ჩანს. იატაკის პირდაღებულ ხახაში ვიღაც გადაიჩეხა. სერუანტის საწოლი ნანგრევებმა დაიტანა.

მეხდატეხილებივით გავრბივართ ქვევით. ტყვია, ყუმბარა, ნამსხვრევეები ფეხდაფეხ მოგვდევს. წინ გვეგებება ხანძარი, პირდაბრენილი დერეფანი წითლად ბოლავს, კიბე ჩალეწილია, გასასვლელს სწრაფად ხერგავს ყაზარმის ნანგრევები.

სასწრაფოდ გადავეშვი ნაკიბარზე და ძლივს პირველ სართულამდე ჩავალწიე. სრულებით ვერ ვგრძნობ, როგორ მეთუთქება ხელისგული და შიშველი ტანი.

სარდაფი სულ ახლოს არის, მაგრამ ძნელია გზის გაგნება.

მოტორიზებული ბატალიონის უბნიდან, სადაც წინა სადამოს-
მუხნავეცში ვბანაობდით, ახლა ტყვიამფრქვევის კაკანი ისმის.
ვიწრო გასასვლელში დაცხრილული გვამები ყრია.

მოედანზე, სადაც ბურთს ვთამაშობდით, ცეცხლმოკიდე-
ბული ჩინჩხვარი გიზგიზებს. ყაზარმიდან მოგლეჯილ რკინასა-
და ქვას რაღაც საოცარი ძალა ირგვლივ ფანტავს, ჰაერში
ცეცხლოვანი ნამსხვრევები დაქრის.

გზა ამერია: სარდაფს ზემოთ, უმცროს მეთაურთა სკოლის
ოთახებში შევიჭერი.

აქაც დარბეულია ყველაფერი. იატაკსა და საწოლზე კურ-
სანტთა გვამები ყრია.

ისე დახოცილან, არაფერი გაუგიათ...

საყრდენებზე იარაღი შევამჩნიე, რამდენიმე ავტომატს
ხელი წამოვავლე და გარეთ გამოვევარდი.

ტყვიამფრქვევების კაკანი გვიახლოვდება. ჩვენი ყაზარმის
ბოლოშიაც გაისმის ტყვიის ტკაცუნა. სროლის ხმა ძლიერ-
დება. რაღაც საშინლად და შემზარავად უცხო ძალა დაჟინე-
ბით მოიწევს ჩვენკენ. ეტყობა, ახლავე უნდა სარდაფებში
შეგვასწროს და ერთბაშად მოგვითაოს საქმე.

სარდაფის საფეხურები სწრაფად ჩავირბინე.

აფეთქებული ბომბების შუქი ჩასასვლელებიდან და უკანა
მხრის სათოფურებიდან ამაზრზენად ანათებს მიწისქვეშა ჯურ-
ღმულს. სქელ კედლებს განუწყვეტელი გუგუნის არყევს.

გრძელი სარდაფის კუთხეებში სათოფურებთან და შესას-
ვლელებთან გადარჩენილი თანაპოლკელები დამხვდნენ. აქ
იყვნენ შტაბის მუშაკები, სამეურნეო ნაწილის მებრძოლები,
მუსიკოსები, ნალმტყორცნელები, არტილერიისტები.

ზოგი ტრუსებისამარა შემოვარდნილა თავშესაფარში,

ზოგს შაშხანის, ავტომატისა და ტყვიამფრქვევის წამოღებაც მოუხწრია. გონმოსული უიარაღონი აღარაფერს ეპუებიან, უკანვე გარბიან იარაღისათვის.

სულგანაბული სარდაფი უსიტყვოდ ამოქმედდა.

ჩასასვლელბთან ტყვიამფრქვევებს ვდგამთ. გარშემო სახელდახელო ბარიკადებს ვაგებთ. სათოფურებთან შაშხანიან მებრძოლებს ვანაწილებთ და მტრის დასახვედრად ვემზადებით.

დროდადრო სარდაფში აქლოშინებული მებრძოლები შეძობრიან: ზოგი დაჭრილი, ზოგი უიარაღო, ზოგი უტანსაცმლო, ზოგიც შეიარაღებული. წუთით ჩერდებიან და ამხანაგების დანახვით ერთბაშად გამოფხიზლებულნი საჩქაროდ ებეებიან მუშაობაში.

ძლიერდება ჰეჰა-ჰუხილი, გაუთავებელი გრგვინვისაგან ყურთასმენა აღარ არის. მტერი გაცოფებით გვაყრის ყუმბარებსა და ბომბებს. ცდილობს ძირფესვიანად ამოთხაროს სიმაგრე, უმსხვერპლოდ დაეპატრონოს მას. დაუზოგავად უშენს შენობებს, მიწაყრილს, გადასასვლელებსა და სარდაფებს.

ირგვლივ ყველაფერი ირყევა, ძრწის, ზანზარებს.

საზღვარზე ვერაგულად თავმოყრილი, ჩვენკენ საგულდაგულოდ მომართული ათასობით ქვემეხი და ნალმტყორცნი უშეცდომოდ ურტყამს მიზანს. დღემდე დუმილით მოცულ სასაზღვრო ხაზს ცეცხლის ნიაღვარი უპირებს წალეკვას.

ნახევარტონიანი ბომბები გააფთრებით გლეჯს ცასა და მიწას. ზედაპირიდან ავარდნილი კორიანტელი სარდაფის სათოფურებს აწყდება და თვალთ გვიბნელებს. ცაში არ ცხრება შემაშფოთებელი ყრუ გუგუნი. ამოუსუნთქავად ჭახჭახებენ

ქვემეხები და საღდაც, სულ ახლოს, ტყვიამფრქვევი კაკანებს. გარეარაზე არტილერიის ცეცხლი მთელი ძალით დაატყდა ცენტრალურ კუნძულს. სარდაფის კედლებმა უიჟედოდ დაიწყეს რწევა. მტერი ცდილობდა ცეცხლის ქვეშ მოექცია ციხე-სიმაგრის მთელი სივრცე, გოჯიც არ დარჩენოდა გადაუხნავი.

სათოფურიდან ეკლესიის შენობას გავყურებ. სპორტული მოედანი მოგიზგიზე ცეცხლით განათებულა, იქითკენ უფრო მძაფრად ისმის ტყვიამფრქვევების ტყრციალი. მარჯვენა მხარეზე მტერი განსაკუთრებული გაბოროტებით ურტყამს მესაზღვრეთა სახლებს. კომენდატურისა და საგუშაგოს შენობები პირველ წუთშივე მიწასთან გაასწორეს, ჰაგრამ მაინც არ ეშვებიან, ნანგრევებსაც დაუზოგავად აყრიან ყუმბარებს. ბევრი ბავშვი და ქალი დაიღუპა. თავშესაფარი ახლოს არ ჰქონდათ, ჩვენი სარდაფებისაკენ გამოღწევა კი ძნელი იყო.

გათენებისას, ბომბების გრიალში სათოფურს მოადგა ახალგაზრდა დედა. გაწეწილი, გასისხლიანებული: თავწაგლეჯილ ჩვილს გულში იხუტებდა. სანამ სარდაფში ჩამოყვანას მოვასწრებდით, ყუმბარამ დაფლითა.

იმ დილით კრიჭა შეეკრა ყველას. სიტყვას იშვიათად გაიგონებდით. ზოგჯერ თუ აღმოხდებოდა ვისმეს:

— ქვეწარმავლები!..

სარდაფი უხმოდ ემზადებოდა.

განთიადისას უმცროს მეთაურთა სკოლის მხრიდან პირველი ბრძანება მოვიდა და ჩუმი გადალაპარაკებით რამდენსამე წუთში სარდაფის ბოლოში — მეორე ბატალიონის ჩასასვლელთან ჩააღწია:

— მტერი მწვანე მუზარადშია... ჩვენ უმუზარადოდ ვიქნებით...

ამ ბრძანების მეორე ნაწილი მალე შეიცვალა:

— ჩვენ თავწაქრული ვიქნებით...

ამას ახალი განკარგულება მოჰყვა:

— მტრის მოახლოებამდე არ ისროლოთ! დაელოდეთ ბრძანებას!..

დიდიდანვე შევამჩნიეთ, რომ მოწინააღმდეგეს, ისე როგორც ჩვენ, მწკანე მუზარადები ეხურა. ბევრს საბჭოთა ფორმაც გადაეცვა და დიდი სიფრთხილე გემართებდა, რომ მტერ-მოყვარე გაგვეჩრჩია, თავდამსხმელები არ აგვრეოდა ამხანაგებში, რომლებიც, სხვადასხვა ადგილას მიმალულნი, გამთენიისას სარდაფისაკენ მოიკვლევდნენ გზას.

შვიდი საათის დაბომბვის შემდეგ, რომელსაც ბოლო არ უჩანდა, მტერს მართლაც შეეძლო ეფიქრა, რომ სიმაგრე უბრძოლველად ჩაბარდებოდა.

ამიტომ, მოწინააღმდეგის მოწესრიგებული ცეცხლი ჯერ კიდევ მთელი სიმძაფრით მძვინვარებდა, როცა გერმანელმა მოიერიშეებმა ორივე მოედნას მიმართულებით შემოგვიტიეს.

მაშინ ერთბაშად იგრიალა გარინდულმა სარდაფმა და ძლიერმა ცეცხლმა მტერს გზა გადაუღობა.

უ რ ა ლ ე ლ ი

ცეცხლის გრიგალი სახეში გვაყრიდა გამოტყორცნილ ღველფს, ორსავე მოედანზე ხანძარი ბობოქრობდა.

სამრეკლოს მოპირდაპირე ამბრაზურიდან ავტომატს ვისროდი.

მართალია, მტერს ვერ ვხედავდი, მაგრამ უცხო იარაღის ჩუხილი, უჩვეულო ღრინაცელი თუ ცალკეული შეძახილები მაგრძნობინებდა, რომ იგი სულ ახლოს იყო და ალაღბედად ნასროლ ტყვიასაც შეეძლო მისი მიგნება.

კაშკაშა სინათლეზე ჩრდილები აჩქარებით მოძრაობდნენ. ჩემს სათოფურშიაც რამდენიმე ავტომატმა და შაშხანამ გაჰყო ლულა.

რალაც ახირებულმა გრძნობამ შემიპყრო იმ დილით. თავს ვეღარ ვიმორჩილებდი, მინდოდა ყველასთან მივსულაყავ, გამემხნეებინა, დამეიმედებინა...

სათოფურს მოვშორდი, ცენტრალური ჩასასვლელისაკენ გავწიე. ერთ ჯგუფში ასათიანს მოვკარი თვალი. გავეხშიანე.

ონისიძემ ხმა არ გამცა. ჩამუხლულს თავი ჩაეჭინდრა.

დღესაც მიკვირს: მისმა დანახვამ ჩემი უცნაური აღტაცება გააძლიერა. არ ვიცი, რა იყო ეს — მეგობრის გამხნეება თუ სასოწარკვეთილებისაგან გამოწვეული თავდავიწყება, სიცოლით ვუთხარა:

— დაიწყო, ონისიძე, დაიწყო!.. იქ, ალბათ, უკვე ყველაფერი იციან ჩვენებმა... წამოვა ავიაცი, ტანკები და, აბა, მაშინ ნახე ამათი თამაშა...

ჩვენ ზემოთ მძიმე ბომბი დაეცა. ბარბაცით მივეხალე კედელს, მაგრამ იხტიბარი აღარ გავიტეხე და უდარდელად ვთქვი: „ფრთხილად, ნენა, თოფი არ გაგვივარდეს!“

ონისიძემ მიყურა, მიყურა, გულგრაღად ჩამათვალაოდა და კედლისკენ შებრუნდა.

მის ნაღმმტყორცნთა ასეულს, რომელიც ახლა ჩვენი პოლკის ერთადერთი სრულფასოვანი საბრძოლო ნაწილი იყო, რამდენიმე ამბრაზურა დაეკავებინა. პოლიტხელი ერთ-ერთ

რაზმს ყაზარმის ნანგრევებში გზავნიდა გადარჩენილი იარაღის მოსაძებნად და სარდაფში გადმოსატანად.

ამ ცივმა შემოხედვამ შეურაცხმყო, გამომაფხიზლა, ისევ შევაგლე თვალი მეგობარს, მის ფეხებთან აყუდებულ ხიშტიან შაშხანას და გავშორდი.

შტაბის ჩასასვლელთან ფერმიხდილი აფხაზავა თავის არტილერისტებს აგროვებდა.

უხმოდ ჩავუარე, ერთი სიტყვაც არ დამცდენია. გონმოსულს ათასი ფიქრი შემომესია. ერთ წამში თვალწინ გამიელვა ომის საშინელებათა სურათებმა, ასე მოულოდნელად რომ დაიწყო, მახლობლებმა, რომლებმაც ჯერ არც კი იციან, რა მოხდა საზღვარზე და რა დღეში ვიმყოფებით, იმის სახემ, ვისზედაც ასე ტკბილი იყო ოცნება, სამშობლომ, რომელიც უსაზღვროდ დიდი და თვალუწვდენი ჩანდა ახლა.

ყველაზე მეტად ის მაწუხებდა, რომ ამ გადამწყვეტ მომენტში ჩემს ასეულთან, მშობლიურ ბატალიონთან არ ვიყავი... დიდი, ძალიან დიდი მნიშვნელობა აქვს იმ ადამიანებთან მხარდამხარ ბრძოლას, რომლებთანაც გიმსახურია. რაღაც განსაკუთრებულ მოვალეობასა და პასუხისმგებლობას გვაკისრებს ეს და განსაკუთრებულ ძალასაც გვმატებს...

პოლკის უმცროს შეთაურთა სკოლის ჩასასვლელთან შევჩერდი.

აქ ყველაზე ახლოს იგრძნობოდა ბრძოლა, მტერი ცეცხლს პირდაპირ ჩასასვლელს უშენდა.

დიდი ხნის შემდეგ შემთხვევით გავიგე, ამ მხარეზე ასე უცებ საიდან გაჩნდნენ მოიერიშეები. ჩვენ ქვემოთ საპატიმროში, საზღვრის დამრღვევნი ყოფილან დაკავებულნი. პირველი გასროლისთანავე გაქცეულიყვნენ ციხიდან, თავისიანებს

შეერთებოდნენ და მათთან ერთად შემოჭრილიყვნენ ჩვენს უბანზე. ეს ცოფიანი ხროვა გაბოროტებით მოიწვედა სარდაფისაკენ.

საბედნიეროდ, ჩასასვლელი იმ კუთხიდან დილიდანვე საიმედოდ აღმოჩნდა ჩაკეტილი. ჩვენს ტყვიამფრქვევებს გაშმაგებული დუელი ჰქონდა მოწინააღმდეგესთან, განუწყვეტლივ ცელავდა ვრცელ მიდამოს მოტომექანიზებული ბატალიონის სადგომიდან სარდაფამდე.

ის იყო საფეხურზე შევდექი, ორიოდ ნაბიჯი წავდგი და კისერწაგრძელებულმა ჩვენი ბატალიონის ყაზარმას გავხედე, რომ ტყვიამ ზედ ყურთან გამიზუზუნა; იმავე წამს ნესტოებში საშინელი სიმწარე შევიგრძენი.

ბედად, ვილაცამ გვერდი გამკრა, იატაკზე დამაგდო და ირონიულად დასძინა:

— ფრთხილად, ამხანაგო პოლიტბელო!..

მეორე ტყვიამ თავზე გადამიარა...

გადაპრჩენს გაოგნებით შევხედე.

ის თავნება ურალელი ვიცანი.

შემრცხვა და მეწყინა.

ურალელი ჩემკენ აღარ იხედებოდა.

ფიცხლად აწვდიდა გაზნებს მემიზნეს, დატენაში შველოდა, თანაც მოედანს თვალს არ აშორებდა.

დრო რომ იხელთა, მშვიდი ღიმილით გადმომხედა.

— აი, ხომ ხედავთ, როგორია!.. — მითხრა. მე კი ვერ მივხვდი, ამით რის თქმა უნდოდა.

ურალელი, თურმე, დილიდანვე დაუღალავად მუშაობდა ამ ტყვიამფრქვევთან.

ზემოდან რომ ჩამორბოდა, პირველ სართულზე „მაქსიმის-

თვის“ მოეკრა თვალი, იქვე რამდენიმე ყუთი ვაზნაც აღმოეჩინა... ყველაფერი სარდაფში ჩაეტანა და სანამ უფროსები გამოჩნდებოდნენ, დაჭრილ კურსანტთან ერთად ეს საშიში ჩასასვლელი დაეკავებინა.

ძნელი საცნობი იყო ეს ბიჭი. წინანდელზე გამხდარი ჩანდა, საფეთქელზე აღმური მოსდებოდა. წარბები მოექმუნხა.

შეუსვენებლივ მუშაობდა, მეტყვიამფრქვევეს ქედწახრილი აწვდიდა ვაზნებიან ზონარს, მტერს უთვალთვალებდა, ხან დაცლილ მჭიდებს გაჰკრავდა ფეხს, ხანაც ვაზნით სავსე ყუთს გადასწევდა, არაფერი მოხვდესო. მეც წავეშველე, ყუთი უფრო ახლოს მივწიე კედელთან, ჭუჭყიან ტბორს მოვარიდე.

ურალელმა ცერად გადმოიმხედა. მერე ტუჩაბზუებობი წაილაპარაკა:

— თავდება!.. არ გვეყოფა ჩვენების მოსვლამდე. ეს წყეულები კი აქეთ მობობდავენ!..

ვურჩიე სვენებ-სვენებით ესროლათ, ვაზნებს გაფრთხილებოდნენ, მაგრამ თვითონვე მივხვდი, რამდენად უადგილო იყო ჩემი რჩევა. მტერს ყოველ წამს შეეძლო ესარგებლა პაუზით და ყაზარმის კუთხეებიდან ელვისებურად შემოჭრილიყო სარდაფში.

დროგამოშვებით ნანგრევთა შორის უცხო სილუეტებს დალანდავდით, რომლებიც მოჩვენებასავით გაიჭროლებდნენ ხოლმე. მეგონა, თვალი მატყუებდა, მაგრამ მათ სიახლოვეს ვგრძნობდი და ტანში ჟრუჟანტელი მივიღიდა.

საქმით გართული ურალელი პასუხს მიგვიანებდა, მერე მორჩილად თქვა:

— არის, ამხანაგო პოლიტბელო!

ხმაში სამღურავი შევამჩნიე.

არც გაემტყუნება. რა თქმა უნდა, ეს თეთრეულის განაწილება არაა. ტყვია-წამალი აუცილებელია, — ვამბობდი გულში, — რამდენიმე საათს რომ ასე გაგრძელდეს, ერთი ვაზნაც აღარ დაგვრჩება...

მერედა, სად უნდა გვეშოვა ტყვია-წამალი და იარაღი!.. ერთიანად განადგურებული იყო მახლობელი აეროდრომები, საარტილერიო პარკები, ტანკსადგომები, ბენზინის რეზერვუარები, საბრძოლო მასალათა საწყობები.

მდინარის შესართავის ზემოთ მრგვალი ყაზარმის კუთხეში მოთავსებულ პოლკის იარაღის საწყობს ცეცხლი წაჰკიდებოდა. აბა, რას წარმოვიდგენდით, თუ იქ რაიმე გადარჩებოდა. მაგრამ სხვა გზა აღარ იყო და არც გაგვეკვირვებია, როცა დაიძახეს: „იარაღისათვის მცირე ჯგუფებად საწყობთან გადაირბინეთ!“ ფიცხლად ათობით მოხალისე გაჩნდა ჩასასვლელთან. აქამდე კი ეს უიარაღო ხალხი წარბშეკრული დაბორილობდა სარდაფში.

მწერალ სერგეი სმირნოვის ცნობით, გადარჩენილი იარაღი პეტია კლიპას აღმოუჩენია.

თოთხმეტი წლის ამ გაკნაჭულ, ქერა ბიჭს, რომელიც ალავერდა იმანოვთან და ედუარდ დამთან მეგობრობდა, მეც ვიცნობდი.

ყველას უყვარდა პოლკის შვილობილი, ყველას სურდა მიალერსებოდა, მაგრამ პატარა ჯარისკაცს ღირსეულად ეჭირათავი — მოფერებას უკადრისობდა.

შაბათ საღამოს ბიჭი ყაზარმაში დარჩა, ხოლო მისი უფროსი ძმა, რომელმაც დაობლებული პეტია ბრიანსკიდან ბრესტში ჩამოიყვანა, ქალაქს წავიდა. იმ ღამით პეტიასთან

ეძინა ჩვენი პოლკის მეორე აღსაზრდელს, თექვსმეტი წლის კოლია ნიკოლაევსაც.

პირველმა დარტყმამ პეტია დააბნია. მსუბუქი კონტუზია დაემართა, მაგრამ მალე გონს მოეგო, იარაღს წამოავლო ხელი და ლეიტენანტ სანიინის დავალებით მეორე სართულის ნანგრევებიდან უთვალთვალებდა მტერს.

ღილით პეტია და კოლია ტირასპოლის კარიბჭის პირდაპირ ფანჯრიდან ქუჩაში გადაძვრნენ, საჯინიბოებს გაჰყვნენ და მრგვალი ყაზარმის კუთხეში საწყობს წააწყდნენ. ავტომატები, ხელყუმბარები და ნაღმით სავსე ყუთები რომ დაინახეს, სიხარულისაგან თვალები გაუბრწყინდათ.

საწყობში რაღაც სასწაულით ბევრი რამ გადარჩენილიყო. ბიჭები საჩქაროდ გამოიქცნენ და ეს ამბავი მეთაურებს ახარეს.

ჩასასვლელიდან საწყობამდე ასიოდე მეტრი იქნებოდა.

გადასარბენი მოედანი ჩახერგილი იყო გავარვარებული ნამსხვრევებით; დაბომბვა გრძელდებოდა. ცოტა ზემოთ, საწყობის მარჯვნივ, ტყვიამფრქვევი კაკანებდა. საწყობის წინა მხარეს ხანძარი მოსდებოდა, ცეცხლის ზღვასა ჰგავდა იქაურობა... ამ ადგილზე ხომ თამბაქოს მოწვევაც აკრძალული იყო წინათ...

ფეთქდებოდა ღველფით სავსე ორმოები. სკდებოდა ტყვია და ყუმბარა, ნაღმი და ჭურვი.

მცირე ჯგუფებად დაენაწილდით; ოთხ-ოთხს უიარაღოდ უნდა გადაგვერბინა მოედანი.

მეტყვიამფრქვევეს დავავალეთ, გადამღობი ცეცხლით დავეფარეთ.

პირველსავე ჯგუფს გავყევი. ჯერ ჩვენი ბატალიონის ყა-

ზარმას ვეფარებოდით, მერე ერთი მებრძოლი კედლის ქიმთან დავტოვეთ, დანარჩენები, მიწაზე გართხმულნი, ხოხვით გავე-
პართეთ საწყობისაკენ.

ბომბებით გადახნული და სისხლით გაღაფული მიწა ტან-
ზე გვეგლისებოდა; წვეტიანი ქვები, ბასრი ნამსხვრევები
სხეულს გვიკაწრავდა, მაგრამ ტკივილს ვერც კი ვგრძნობდით.

ცარიელი მასრები ისე ჩაქანგულიყო, გეგონებოდათ ათი
ზამთარი მაინც ყოფილა მიწაშიო.

საწყობის ნანგრევებს რუხი ბოლი ასლიოდა. ორმოებში
მოგუზგუზზე ღაღარიდან კაშკაშა შუქი გვცემდა. გვამების
მთელი გროვა ეყარა აქაც.

საკირესავით ანთებულ საწყობში შევირბინეთ.

ხელას ფათურით დავეძებდით გადარჩენილ იარაღს. ორ-
მოებში მიმალულ ღველფს ნავლს ვაცლიდით, ხარბად ვიტა-
ცებდით მიყრილ-მოყრილ გახურებულ ყუთებს. წელში წახ-
რილნი მოვძუნძულებდით სარდაფისაკენ.

გახურებული იარაღი ხელს გვითუთქავდა; სიკვდილით
გვემუქრებოდა ტყვია-წამლით სავსე ცხელი ყუთები.

უცებ ჩემს გვერდით პორთილე ზაიკას, პატარა, გამხდარ
უკრაინელს, ხელყუმბარით სავსე ყუთი აუფეთქდა. მებრძოლი
ნაფლეთებად გაიფანტა ჰაერში.

ჩვენებმა არ იცოდნენ, რომ ყუთი აგვიფეთქდა. იფიქრეს,
მტერი გადმოვიდა იერიშზეო და დაუნდობლად დაგვიშინეს
ტყვიამფრქვევი. განაბული ვეყარეთ თაკარა მიწაზე. ერთი ბე-
წო აღგილი არ რჩებოდა გამოუთოფავი. მაშინ ვიგრძენით, რა-
ტომ ვერ გვეკარებოდა ამ მხრიდან მტერი.

ძლივძლივობით მოვახერხეთ დაყვირება, რომ სროლა შე-
ეწყვიტათ... დაზაფრულნი, დასისხლიანებულნი ძვირფასი

ტირთით დავბრუნდით სარდაფში. მერე სხვა ჯგუფი წავიდა ცეცხლმოკიდებულ საწყობისაკენ და მალე ისინიც იარაღით დატვირთულნი დაბრუნდნენ.

საჭირო იყო სიჩქარე, სანამ კიდევ შეიძლებოდა თუნდ ერთი ხელყუმბარის, თუნდ ერთი ვაზნის გადარჩენა...

მტერმა მართლაც შეგვნიშნა და რამდენიმე წუთში ძირ-ფესვიანად ამოძირკვა საწყობი. მაგრამ დაავიანდა. საჭურველი ტირასპოლის კარიბჭესთან გადმოვზიდეთ. იარაღის განაწილება დაევალა უფროს ლეიტენანტს, რომლის გვარი აღარ მახსოვს.

ზოგმა მოტანისთანავე წამოავლო იარაღს ხელი და თავისი ადგილი დაიკავა.

იქნებ ვცდები, მაგრამ რატომღაც მჯერა, რომ იმ საბედისწერო დილას ვერავითარი ბრძანება, ვერც ერთი მეთაური ვერ გააწესრიგებდა სხვადასხვა ნაწილებიდან სახელდახელოდ მოგროვილ ხალხს ისე კარგად, როგორც თვითონ აკეთებდნენ ამას, საკუთარი ნება-სურვილითა და მოფიქრებით.

საწყობიდან რომ მოვბრუნდი, ურალელი ჩასასვლელთან შემომეგება, ყუთები ხელიდან გამომტაცა, ვაზნები კედელთან დაახვავა.

— აი, ეს მესმის, ამხანაგო პოლიტბელო! არა ჰგავს ზეწრების განაწილებას...

ჭაბუკი განალისდა. ღიმილით შემომყურებდა. შევატყვე, რაღაც უნდოდა ეთქვა.

ბოლოს ვერ მოითმინა:

— ძალიან გთხოვთ, ცოტა ხნით ჩემი ადგილი დაიკავოთ! თქვა და გამზადებული ზონარი ხელში მომაჩეჩა. თვითონ ეზოში გავარდა, მუხავეცისაკენ დაეშვა.

გარბოდა, წელშიც არ იხრებოდა. მე კი ვბრაზობდი. აბა, რა სისულელეა, კაცს ჩაბარებული ჰქონდეს საბრძოლო უბანი, ის კი ტყუილუბრალოდ საფრთხეში იგდებდეს თავს!... მეტი რისკი სწყურია. მეტი რისკი მეტი სიამოვნებაა ჭაბუკისათვის. ისე ტკბილია სიცოცხლე, გამბედაობა რომ უტკბესი არ იყოს, ადვილად ვერავეინ გაწირავდა თავს.

ურალელი სახეგაბრწყინებული დაბრუნდა, დეგტიარევის ახალთახალი ტყვიამფრქვევი მოარბენინა.

— ეს საწყობიდან არ არის! ამას გუშინ სალამოს მოვკარი თვალი... გადარჩენილა... ახლა კი გვეყოფა ჩვენების მოსვლამდე...

მეტყვიამფრქვევე სარდაფიდან ნახევარი ტანით აღმართული ისროდა. სხვაგვარად შეუძლებელი იყო დამიზნება, ტყვიასაც არ გაიტანდა გარეთ. ამიტომ ტყვიამფრქვევი ჩასასვლელს ზემოთ იდგა და მემიზნე ყოველ წამს საფრთხეში იყო.

კურსანტმა რამდენიმე საათს გაძლო იმ ადგილზე. ახლოს დაცემულმა ყუმბარამ ტყვიამფრქვევი გვერდზე გადაადგო, მემიზნეს საფეთქელი შეუზღვრია, ხოლო ურალელს ტყვიამწარბი გაუსერა.

ჭაბუკმა, რომელიც გასაოცრად მშვიდი და საქმიანი ჩანდა, იარაღი ოსტატის თვალით გაზომა, ნაწილები გაუსინჯა, სავაზნე გამოუცვალა და სულმოუთქმელად ააკაცანა.

ვიფიქრე, გამოცდილ მემიზნეს გამოვნახავ, ურალელს კვლავ მიმწოდებლად გადავიყვან-მეთქი, მაგრამ იუკადრისა.

წამით თვალწინ დამიდგა გუშინდელი დიდგულა ბიჭი, ქათქათა ზეწრითა და ბალიშისპირით ხელში.

— რაო, არ ვარგივარ, ამხანაგო პოლიტხელო?..

კაცმა რომ თქვას, რას ვემართლებოდი: ტყვიამფრქვევი განუწყვეტლივ ჭახჭახებდა კუნთმაგარი ჭაბუკის ხელში.

„როდის ისწავლა?! — ვფიქრობდი მე. — ამბობდნენ, ჯერ ფიციც არ მიუღია, რაც მოვიდა, ჰოსპიტალს არ მოშორებიაო“.

მხრები ავიჩეჩე, აღარაფერი ვუთხარი.

ურალელი გულდინჯად განაგრძობდა მუშაობას. ბრძოლაში ხომ უმთავრესი სწორედ სიმშვიდეა, თორემ მამაცი ხარ თუ მხდალი, განსაცდელს ვერსად წაუხვალ; ავად იქნება თუ კარგად, უნდა გაუძლო!

თითქოს აქ არაფერიყო, უშფოთველად, მშვიდად ირჯებოდა ურალელი, გეგონებოდათ, ბალახის სათიბად გამოსულა მინდორშიო.

არც გვარი, არც სახელი ურალელისა არ მახსოვს, მაგრამ მუდამ თვალწინ მიდგას ცეცხლის ნიაღვარში დანთქმული სიმკრე, ბომბებით დამძიმებული ცა, აზანზარებული სარდაფი და მის მთავარ ჩასასვლელთან ოდნავ მოღიმარი, მკერდგაღებული, უწვერულვამო ახალწვეული, რომელიც გატაცებით მუშაობდა და ჩუმად, სულ ჩუმად ღიღინებდა:

იქუხე, ჩემო შაშხანავ,
ნუ დაღუმდეგი წამით,
სიკვდილმა ფრთები გაშალა,
დადგა განკითხვის ჟამი.
არ დაიკარგოს უკვალოდ,
ძმებო, არც ერთი ტყვია, —
შაშხანავ, ჩემო ვულკანო,
ჩვენ მეგობრები გვქვია.¹

გამიგონია, არსებობსო ვარსკვლავი თავღირი, „რომელი რა აღმოხდების, სიწითლეს მისცემს რომელთამე ნივთთა და

¹ თარგმანი ჯ. ნიქაბაძისა.

რომელთაჲმე ხილთა“. სწორედ ასეა: განსაცდელი ახალ ელვა-რებას აძლევს სულს.

შუადღემ მოაწია. მეთაურები არ ჩანდნენ. ვფიქრობდით, ქალაქიდან მოსვლა ვერ მოასწრეს-თქო.

სარდაფში იყვნენ მხოლოდ შტაბის უფროსის მოადგილე პოტაპოვი, ქიმიური ნაწილის უფროსი ლეიტენანტი სანიინი და ლეიტენანტი სემიონოვი. მოგვიანებით, ქლოშინით შემოიჭრა უფროსი ლეიტენანტი გორიაჩი — სქელი, მწითური კაცი. მაშინვე შუა სარდაფში კედელთან მიწვა, კარგა ხანს გაოგნებული გაჰყურებდა მესაზღვრეთა სახლს, სადაც ქვას ქვაზე არ ტოვებდა მტერი.

ლეიტენანტი ანდრეი კიჟევატოვი მაინც ჯიუტობდა, არ თმობდა ნანგრევებს.

გადარჩენილი ბავშვები და ქალები სარდაფში ჩამოვიყვანეთ, შედარებით უშიშარ ადგილას დავაბინავეთ. ამაზე უფრო საიმედო ადგილს ისინი ვერსად იპოვიდნენ; არა მარტო იმიტომ, რომ სარდაფები გამძლე იყო, არამედ იმიტომაც, რომ იმ დროისთვის პოზიციები უკვე საგულდაგულოდ გვექონდა გამაგრებული და მტრის ყოველ გამოხდომას პოლკი ძლიერი ცეცხლით ხვდებოდა. გერმანელებს შეეძლოთ ეფიქრათ, რომ აქ რამდენიმე ასეული კი არა, მთელი დივიზია იყო ჩასაფრებული. ამიერიდან მეტი მოგვეთხოვებოდა, რადგან პატარების სიცოცხლე გვებარა.

ვცდილობდით, ჩვენც საკადრისად დავწვედროდით მტერს; ნანგრევებს შორის ვაზნებს დავეძებდით, ვაგროვებდით იარაღის ნაშესვრეებს, ვამაგრებდით თავდაცვის ხაზს...

შებოლილი ქვების გროვიდან ტყვიამფრქვევის გავარეარებული ლულა გამოშვერილიყო, სარკმლის მოღრეცილ ხიდურებს შაშხანა დარაჯობდა.

სარდაფი თვალის ბრიალით გაჰყურებდა ანთებულ სივრცეს. უხმოდ მბრძანებლობდა ომის მარტივი სიბრძნე: მოგკლავს, თუ არ მოჰკალი...

* * *

კარგა ხანია ინათა, მაგრამ მტერი წუთითაც არ წყვეტდა სროლას. გერმანელთა თვითმფრინავები გრიალით მოაპობდნენ სივრცეს, წივილით ეშვებოდნენ ძირს და შემზარავ ტვირთს თავზე გვაყრიდნენ. ჩანდა, ფაშისტებმა კარგად იცოდნენ ამ იერიშების მნიშვნელობა. ფსიქიური ეფექტი რომ უფრო ძლიერი ყოფილიყო, ბომბებთან ერთად ბენზინით სავსე კასრებს, თუნუქისა და რკინის ნატეხებსაც ჰყრიდნენ. ჰაერი ჯოჯოხეთურ დგრიალს მოეცვა და ეს უფრო აუტანელს ხდიდა სარდაფში ყოფნას. ზოგჯერ რაღაც საგანი ისეთი ზთქით წამოვიდოდა, იტყოდი, ცა ჩამოირღვა. დედამიწა თან უნდა ჩაიტანოსო. მაგრამ ჩვენი ტყვია კვლავ სტვენით მიაპობდა ჰაერს და ლამის სიბნელეში შემოპარული მტერი ნაბიჯს ვერ დგამდა წინ.

ახალ-ახალი სამუშაო გვიჩნდებოდა. კარგა შეგვიანებული იყო, როცა პეტია სტუკალენკომ და ვიტია ჩორნიმ დაიყვირეს:

— ბიჭებო, დროშა და შტაბის საბუთები გადავარჩინოთ! ახლალა მოგვაგონდა, რომ ზემო სართულები ხანძარში იფერფლებოდა.

— იქ აღარაფერი გადარჩებოდა! — ჩაილაპარაკა თადარიგის წითელარმიელმა, შაშხანა დატენა, გულიანად შეიგინა,

სადღაც შორს ვიდაცას თუ რადაცას დაუმიზნა და თოფის ქუხილთან ერთად სათქმელი ასე დაამთავრა: — ამაო გარჯა იქნება, უკეთესია ჩასასვლელები გავამაგროთ!..

ვიტია ჩორნი, პეტია სტუკალენკო, მე და რამდენიმე სხვა მებრძოლი ზემო სართულზე ავბობდით.

ვასხებილი შენობა აფეთქებით გამოწვეული ტალღებისაგან ირხეოდა. კედლები ან მთლად ჩამონგრეულიყო ან ისე იყო დაჩეხილ-დახეთქილი, რომ ყოველ შეტორტმანებაზე ინგროდა. ორივე სართული ცეცხლწაქიდებულ ჩონჩხს წააგავდა. ძველისძველი ნანგრევი გეგონებოდათ ეს სახურავახდილი სახლი. ფარღალალა კედლებში სტვენა-წივილით დაქროდა ტყვია და ყუმბარის ნამსხვრევი.

დანახშირებულ დირეზე ავძვერით და ჩამონგრეული კიბით მეორე სართულს ავალწიეთ.

აქ შტაბის მთავარი ოთახები იყო განლაგებული. დაღადრული კედლებიდან ხელისგულივით მოჩანდა მეწამულ ბოლში გახვეული ციხე-სიმაგრე. თითქოს უხილავ ძალას ჰაერში აუტაცნია და მერე მიწაზე გამეტებით დაუხეთქებიაო, ისე იყო ყველაფერი ერთმანეთში ათქვეფილი.

სტუკალენკო და ჩორნი კარგად იცნობდნენ შტაბის შენობას, იცოდნენ, სად რა იყო შენახული. დაქროდნენ იავარკმნილ ოთახებში და დოკუმენტებს ეძებდნენ. დახანძრულ კარადებში რამდენიმე ჩანთა და საქალაღდე ვიპოვეთ.

— ამ ქალღღებში ეშმაკიც ვერაფერს გაარჩევს, რაღად გვინდა ეს ნახორხალი!.. — თქვა ერთმა მებრძოლმა, რომელსაც მარცხენა ხელი შარვლის ნახევით ჰქონდა ჩამოკიდებული. შეგროვებულ ქალღღებს მაინც ფრთხილად აწყობდა, პატარა ნაფლეთსაც დასტას უმატებდა და ბუტბუტებდა: —

ღმერთმა უწყის, იქნებ, მართლა გამოდგეს! რაც უნდა იყოს, ფაშისტებს მაინც არ ჩავუგდებთ ხელში!..

რის გადარჩენაც შეიძლებოდა, შევავროვეთ და სწრაფად გამოვბრუნდით.

ტყვია კვალდაკვალ მოგვდეგდა, ყურთან გვიწიოდა, აშკარა იყო, ვილაც გვიმიზნებდა. სარდაფის ზემოთ, ჩვენი შტაბის შენობაში, მტერი იყო ჩასაფრებული.

ლოკუმენტები სარდაფში ჩამოვიტანეთ, დროებით შტაბს ჩავაბარეთ და ზემო სართულების გასაჩხრეკად რამდენიმე მებრძოლი გავგზავნეთ.

ვარაუდი გაგვიმართლდა. მეორე სართულის ერთ-ერთ საიდუმლო ოთახში, რომელიც შედარებით ნაკლებ დაზიანებული აღმოჩნდა, ბიჭებმა ორი გერმანელი დაიჭირეს და მეთაურებს მოჰგვარეს.

იმ დროს სამეთაურო პუნქტიდან კარგა მოშორებით, ურალელის ტყვიამფრქვევთან ვიდექი და მსტოვრების ჩამოყვანას არ დავსწრებივარ. მაგრამ ტყვეთა შეპყრობის ხმა მთელ სარდაფს მოედო.

ყველას უნდოდა თვალი შეეველო გერმანელი ავაზაკებისათვის, რომლებიც რაღაც საკვირველ ქმნილებებად წარმოგვედგინა, მაგრამ პოსტს არავინ მოშორებია. ურალელმა ერთი კი გადმოგვხედა, გაიღიმა, მერე ხმამაღლა ჩაახველა და კვლავ ტყვიამფრქვევს მიუბრუნდა.

— ოინი თუ გინდა, ეს არის! — ჩაილაპარაკა მსროლელმა ჩემ გვერდით, ერთი კიდევ გახედა მტრის მხარეს, შემდეგ სათოფურს მოშორდა და ბუზლუნით გაემართა სარდაფის სიღრმეში: — მძინარეს მოგვიხტნენ, აგვაწიოკეს და უკვე ხელთა გვყავს ტყვე!.. ძნელია რუს ძმასთან ჩხუბი!..

ათიოდე წუთის შემდეგ ედუარდ დამი და ლეიტენანტი მოვიდნენ ჩემთან, ძთხოვეს, ტყვეები დაჰკითხეო. დამი მეუბნებოდა, ვერაფერი გავაგებინეო. ედუარდი, მართალია, შვაბურად მეტყველებდა, მაგრამ სალიტერატურო ენაც გვარიანად ეხერხებოდა და გამიკვირდა, მე რომ მომმართა. როგორც ჩანს, მაინც ჩემი თანდასწრებით ამჯობინა ჩვენების ჩამორთმევა.

პოლკის სასულე ორკესტრი, რომელშიც პეტია კლიპასთან ერთად ედუარდ დამი, ალავერდა იმანოვი და ნიკა აბზიანიძე მსახურობდნენ, ზედ ტირასპოლის ხიდზე, სასაზღვრო კოშკში იყო განლაგებული და ბუგს გადაჰყურებდა. ისინი პირველი წუთიდანვე გარემოცვაში აღმოჩნდნენ, კიბეც ჩაღეწილი დახვდათ. ამიტომ ამ ადამიანთა ერთგულება და თავდადება განსაკუთრებით დასაფასებელია. მათ არა მარტო თავი დააღწიეს მოულოდნელად შემოჭრილ მტერს, მედგარი წინააღმდეგობაც გაუწიეს, სარდაფში იარაღით და, წარმოიდგინეთ, კლარნეტითა და ტრომბონით შემოაღწიეს.

ტყვეები შუა სარდაფის კედელთან ეყარნენ მტვერსა და ჭუჭყში. ხმელ-ხმელი უნტერ-ოფიცერი გულადმა გაშოტილიყო, გადაჭდობილი ხელები თავქვეშ ამოედო, შუბლს ძაბრულა ქუდი უფარავდა და წვრილი, მოთეთრო სახე სანახევროდ უჩანდა. ფერგამქრალი იყო, ვერ შეატყობდით — შიშისაგან თუ დაღლილობისაგან.

მის გვერდით ჩაცუცქული ტანდაბალი ეფრეიტორი ცივად და უკმეხად შეჰყურებდა ცნობისმოყვარეთ.

ტყვეებს სადაურობა ვკითხე.

მშვიდად მიპასუხეს. სახელიც მითხრეს. არც ჯარის ნაწილი დაუფარავათ. ისიც მიამბეს, როგორ შემოაღწიეს ჩვენი პოლკის შტაბში.

უნტერ-ოფიცერი ღიმილით ჰყვებოდა ყველაფერს. ეფრეიტორი გაბუსუნებული იჯდა.

წინა დღით მოეხერხებინათ სიმაგრეში შემოსვლა. ღამით შტაბის შენობაში მოკალათებულიყვნენ საიმედო ადგილას. ომის დაწყებამდე მათი განაყოფიდან სხვებიც შემომძვრალიყვნენ სიმაგრესა და ქალაქში. უნდა გადაეჭრათ ტელეგრაფის მავთულები, ამოეხოცათ მეთაურები, აეფეთქებინათ ხიდები, რკინიგზები და აეროდრომები. თავიანთ შტაბთან მუდმივი რადიოკავშირი ჰქონდათ; მათი ცნობების საფუძველზე ეწყობოდა თვითმფრინავების თავდასხმა, ზუსტდებოდა საარტილერიო მონაცემები. მსტოვრები თურმე უკანასკნელ წუთამდე ზვერავენენ ჩვენს სარდაფს.

ჯაშუშების ნათქვამი სიტყვა-სიტყვით გადავუთარგმნე ამხანაგებს.

გავგიკვირდა, რომ ძალდაუტანებლად გვითხრეს ყველაფერი. ეჭვი შეგვეპარა მათ ნაამბობში და უნტერ-ოფიცერს ვკითხე:

— მართალია, რასაც ამბობთ?..

ტყვეებმა გესლიანად გაიცინეს:

— ახლა რალა მნიშვნელობა აქვს ამას?.. ომი დამთავრებულია...

ნათქვამი ვერ გავიგე. ვიფიქრე, მომეყურა ან ენის უცოდინარობის ბრალია-მეთქი.

— რა თქვით?

— ოძი დამთავრებულია!..

— როგორ თუ დამთავრებულია?!

უნტერ-ოფიცერმა ჯიბიდან ვერცხლის სათუთუნე ამოიღო, დინჯად გახსნა, სიგარეტი ამოიღო, თავი მოუსრისა და სან-

თით მოუკიდა. შემდეგ მეორე გვერდზე გადაბრუნდა. ახლა შევამჩნიე, რომ კისერში დაჭრილი იყო.

— ჩვენი ჯარები უკვე რუსეთში არიან, — თქვა მან, — სამი ათას კილომეტრზე გაჭიმული ფრონტი წინ მიიწევს. დღეს-ხვალ მოსკოვი დაეცემა... „რუსლანდ კაპუტ!“ „ბოლ-შევიზმუს კაპუტ!..“ სადაცაა, კაპიტულაცია გამოცხადდება... წამოვენთე, მაგრამ თავი შევიკავე.

— ღორია! — ქართულად ჩაილაპარაკა ედუარდ დამმა.— გიყია, კაცო, ე ოხერი... მაგის სიტყვა რა დასაჯერია?!.. ბახ!.. და მორჩა!

ისე პირქუშად შევეყურებდი მოპასუხეებს, მეგონა, მიწაში ჩაძვრებიან-მეთქი, ისინი კი არხეინად იწვნენ. ის კი არა, ზურ-გიც შემოგვაქციეს, სათოფურს გაჰყურებდნენ.

უნტერ-ოფიცერმა დაცინვით ამხედ-დამხედა, გამტკერიანებული მწვანე პიჯაკი გაიბერტყა და სავარცხელი ამოიღო.

„ნუთუ ვერ გრძნობენ, რომ ჩვენს ხელთ არის მათი სიცოცხლე?“ — ვფიქრობდი მე. მუშტშემართულ ამხანაგებს შევხედე და მსტოვრებს ვუთხარი:

— მაშ, ასე. ომი დამთავრებულია!.. ასე იყოს! ამას არა აქვს ჩვენთვის მნიშვნელობა... ახლა გვითხარით: სად არიან ჩასაფრებული თქვენი ამხანაგები?.. საიდან გვიტევს ქვეითო ჯარი?.. სად იმყოფება თქვენი ნაწილის შტაბი?.. სამეთაურო პუნქტი? რამდენი ასეულია გადმოსული ჩვენი პოლკის ტერიტორიაზე, სად არის მათი საცეცხლე წერტები?..

ტყვეები ხმას აღარ იღებდნენ. ისეთი გამომეტყველება ჰქონდათ, ვიფიქრე, ვერ გავაგებინე-მეთქი.

დამი ყვირილით უმეორებდა შეკითხვებს, მაგრამ უშედე-

გოდ. მზვერავეები დამუნჯდნენ. დამამცირებელი გულგრილობით შემოგვეყურებდნენ.

ჩვენს ფეხქვეშ ეყარნენ, მაგრამ თავი ისე ეჭირათ, თითქოს ისინი გვადგნენ თავზე. ჩასასვლელთან ბომბმა დაიგრგვინა. სარკმელის პირდაპირ ჭერი ჩამოწვა, თან დაიტანა რამდენიმე მებრძოლი. აფეთქების ხმა კედელ-კედელ მიჰყვებოდა სარდაფს.

ჭერი კი ყოველ წუთს შეიძლებოდა ჩამონგრეულიყო და ერთად დაემარხა მტერ-მოყვარე.

— კარგად მუშაობენ! — გადაულაპარაკა უნტერ-ოფიცერმა ეფრეიტორს.

ნანგრევებიდან რომ მოკლული მებრძოლი გამოვათრიეთ, შევნიშნე. უნტერ-ოფიცერის თვალში ბოროტმა ნაპერწკალმა გაიელვა.

— ხომ ხედავთ, რა ამბავია?.. თქვენს პასუხს ველოდებით...

მსტოვრებმა არც ახლა გამცეს ხმა.

— მაშ, საკუთარ თავს დააბრალებთ! განსოვდეთ, რომ ჩვენი ტყვეები ხართ!

უნტერ-ოფიცერმა გაკვირვებით შემომხედა და ირონიულად მკითხა:

— ჩვენ ვართ ტყვეები?

— არა! — ვუპასუხე მე. — თქვენ მსტოვრები ხართ, ჯაშუშები! ომის დაწყებამდე შემოიჭერით ჯაშუშური ცნობების შესაგროვებლად.

გერმანელებმა ქედმალღურად შემათვალიერეს.

— თქვენი ნებაა! — ვუთხარი მათ, — საცაა ჩვენი მაშველი ნაწილებიც მოვლენ და ზურგში გაგზავნით.

— ეს მართლა გჯერათ? — ღიმილით ჩაილაპარაკა გერმანელმა. — ხომ გითხარით, ომი უკვე დამთავრებულია-მეთქი. თქვენი მშველელი ახლა უფალი ღმერთია. დიდი, დიდი, კიდევ ათი წუთი გაძლოთ ამ სარდაფში. არ ჯობია, ახლავე გავათავოთ?.. ჩვენ ცუდად როდი ვეპყრობით ტყვეებს...

ბოლმისაგან ენა ჩამივარდა.

გარეთ გუგუნი ძლიერდებოდა. ბომბის ყოველ აფეთქებაზე ისე გვეგონა, თითქოს უზარმაზარ უროს გვირტყამდნენ. ტყვეები მასპინძლებივით გრძნობდნენ თავს.

ვუბრძანე ფეხზე წამომდგარიყვენ და, ეს უსიამოვნო საქმე რომ სასწრაფოდ დაგვემთავრებინა, ეღუარდთან ერთად ჩვენების ჩამორთმევა განვაგრძე.

დაკითხვამ მაინც მოგვცა ზოგიერთი საყურადღებო ცნობა: გავიგეთ, რომ ციხე-სიმაგრე გარემოცული იყო და ერთ-ერთი შემტევი ნაწილის სამეთაურო პუნქტი ტირასპოლის კარიბჭესთან იმყოფებოდა.

ჩვენმა ბიჭებმა მალე დაჰკარგეს ტყვეებისადმი ინტერესი და დაიშალნენ.

ახლა სარდაფის ბოლოს მყოფმა დაჭრილებმა მოისურვეს ტყვეების ნახვა. დასისხლიანებული, გაბურძენილი მომაკვდავები ისე შეჰყურებდნენ ძათ, როგორც საოცარ მოჩვენებებს. მაგონდება მძიმედ დაჭრილი ახალგაზრდა დედა, რომელიც გათენებისას ამოვთხარეთ ნანგრევებიდან. იმ დღით მან დაკარგა ქმარი, დასასვენებლად ჩამოსული სტუდენტი და ორი შვილი, ხოლო მესამე, მძიმედ დაშავებული ექვსი თვის გოგონა ხელში ეჭირა. სახეზე რისხვა აღბეჭდოდა, რაღაც ნაღვლიანი და უძლური რისხვა.

— არ გრცხვენიათ, ამხანაგებო? ეს რა გვიყავით... ასე

როგორ გაგაბრიყვეს!... — ჩუმი ხმით ეუბნებოდა მსტოვრებს, რომლებიც, ვინ იცის, იქნებ, საბჭოთა ფრონტზე შეპყრობილი პირველი ტყვეებიც იყვნენ.

„ამხანაგები“ უგულოდ შეპყურებდნენ დაქრილებს, გარეთ მიუტრბოდნენ თვალი...

ტყვეებს მაინც გადავუთარგმნე უბედური ქალის სიტყვები.

მხრები აიჩეჩეს:

— რას იზამ, ომია!..

„რას იზამ, ომია!“, „რას იზამ, ომია!“ — ცივად ვიმეორებდი გულში. ხომ გაგიგონიათ, აგურს რეცხდნენ და უარესი წვენი გასდიოდაო. ჯაშუშებთან ლაპარაკს აზრი აღარ ჰქონდა.

ისინი მთელ სარდაფში ჩამოვატარე, მოკლედ გავაცანი მებრძოლებს მათი ნალაპარაკევი და შევეცადე ამეხსნა, რა ვერაგ, უსულგულო და არაადამიანურ მტერთან გვქონდა საქმე. შემდეგ მსტოვრები სამეთაურო პუნქტში გავგზავნეთ, სარდაფის ბოლოს.

არ ვიცი, რა ბედი ეწია მათ...

ჩავაბარე თუ არა ტყვეები შტაბს, პოტაპოვის დაჯალიზა მივიღე — დაზვერვაზე წავსულიყავი. მრგვალი ყაზარმის ზარალელურად უნდა გავყოლოდი გზას, ჩამევლო ტირასპოლისა და ხოლმის ხიდებთან, ბრესტის სამხრეთით გავსულიყავი სამხედრო ქალაქში, სადაც უწინ ჩვენი საარტილერიო და სატანკო ნაწილები იდგა.

წავედი, მაგრამ სამხრეთ კუნძულს ვერ მივალწიე. ტირასპოლის კარიბჭესაც ვერ გავცდი. ყველა გასასვლელი გამოთოფილი იყო. გზას თვითმფრინავები დარაჯობდნენ, ხოლო გაბატონებული სიმაღლეებიდან მტრის ტყვიამფრქვევები გვიშენდა.

ძლივძლივობით მოვახერხე უკან დაბრუნება. მიკროოდენი ცნობები მოვიტანე. ტირასპოლის კარიბჭის კომუხე გერმანელი მეთვალყურე და ტყვიამფრქვევი იდგა. დასავლეთი კუნძული მტრის ხელთ იყო. ხოლმის კარებთან ძლიერი სროლის ხმა ისმოდა.

დაზვერვიდან რომ მოვბრუნდი, ჩვენი სარდაჯი მთელ ქვეყანას მოწყვეტილი მეჩვენა.

* * *

— უმცროსი პოლიტხელი კალანდაძე უფროს ლეიტენანტ გორიაჩინთან! — ერთმანეთისათვის გადალაპარაკებით მოაღწია შტაბიდან წამოსულმა ბრძანებამ მე-2 ბატალიონის განლაგებამდე, სადაც მაშინ საცეცხლე წერტების მდგომარეობას ვამოწმებდი.

სწორედ იმ წუთს მორიგი ულტიმატუმის ვადაც ამოიწურა, სარდაფებს უარესი გაშმაგებით დააცხრა საარტილერიო ცეცხლი და პოზიციაზე ყოფნა აუცილებელი აღარ იყო. მაშინვე პოლკის სკოლის მიმართულებით გავქანდი. წითელ არმიელთა სასადილოს გვერდით, პატარა ოთახში, აღელვებული, ავტომატმომარჯვებული გორიაჩინი შემომეგება.

რამდენადაც მახსოვს, მას ასტმა ჰქონდა და ლაპარაკი ყოველთვის უჭირდა. რაღაც სასწაულით მან დილითვე შემოაღწია ქალაქიდან სიმაგრეში და ახლა დადლილობისაგან სულს ძლივს ითქვამდა. სიტყვებს ქოშინით, ნაწყვეტ-ნაწყვეტად წარმოთქვამდა:

— ახლავე შეკრიბეთ ჩემთან პარტიის წევრები და კანდი-

დატები, საშუალო მეთაურები, ვისაც კი, სანამ დაბომბვა გრძელდება, ხუთი-ათი წუთით შეუძლია თავისი პოზიცია ვინმეს გადააბაროს!

პატარა ოთახი თვალის დახამხამებაში გაივსო კომუნისტებითა და მეთაურებით.

გორიაჩინმა, პოლკის პარტიული ბიუროს წევრმა და დამსწრეთაგან თანამდებობითაც ყველაზე უფროსმა, ჩვეულებრივი ცერემონიების გარეშე პარტიული კრება გახსნილად გამოაცხადა და პირდაპირ დაიწყო:

— ამხანაგებო, მდგომარეობის სერიოზულობაზე ლაპარაკი ზედმეტია. ყველაფერი დამოკიდებულია უსწრაფეს, მოფიქრებულ მოქმედებაზე. თვითუფრო წამს გადამწყვეტი მნიშვნელობა აქვს. ჩვენი ნაწილები სიმაგრეს უახლოვდებიან. უსათუოდ უნდა შევინარჩუნოთ პოზიციები და გზა გავუხსნათ მათ. საჭიროა: 1. დავიცვათ პოლკის მთელი ტერიტორია; 2. საიმედოდ ჩავკეტოთ ტირასპოლის კარები; 3. გადავარჩინოთ და სარდაფში შემოვხილოთ იარაღი და ტყვია-წამალი; 4. დავამყაროთ კავშირი მეზობელ ნაწილებთან; 5. აღვრიცხოთ და გავანაწილოთ მთელი პირადი შემადგენლობა; 6. შევადგინოთ მოიერიშე რაზმები.

მთავარი ნაწილებისა და მეთაურების მოსვლამდე პოლკს უხელმძღვანელებს უფროსი ლეიტენანტი პოტაპოვი, სარდაფების გამაგრებასა და დაცვას — უფროსი ლეიტენანტი სემიონოვი, მოიერიშე რაზმებს — უმცროსი პოლიტხელი ჩორნი, შტაბის საქმეების გადმოტანას — ზემდეგი სტუკალენკო, მეზობელ ნაწილებთან კავშირის აღდგენას — ლეიტენანტი სანინი.

ამ მძიმე პირობებშიც ჩვენს სახელოვან პოლკს სრული

შესაძლებლობა აქვს გადაწყვიტოს ყველა ამოცანა — დიდხანს დაიცვას და შეინარჩუნოს თავისი პოზიციები, არ შემოუშვას მტერი ციტადელში, მტკიცე ბურჯად დაუდგეს მეზობელ ნაწილებს. თქვენ კარგად იცით, რომ ჩვენ ცენტრალური პოზიცია გვიკავია, ოდნავ უყურადღებობასაც კი შეუძლია მთელი ციხე-სიმაგრე საფრთხეში ჩააგდოს...

დაუყოვნებლივ ჩაატარეთ სახელდახელო საუბრები ტანკებთან და თვითმფრინავებთან ბრძოლის საშუალებებზე; აღკვეთეთ ჭორების გავრცელება, შთააგონეთ მებრძოლებს გამარჯვების რწმენა, გამოავლინეთ მტრის აგენტები, დივერსანტები; ებრძოლეთ სულმოკლეობასა და პანიკორობას, საჩქაროდ გვაცნობეთ და ყველა უბანზე ჩაატარეთ საუბრები წარჩინებულ მებრძოლთა გმირულ საქმეებზე, შექმენით ცალკეულ ნაწილებში კომკავშირული ჯგუფები და უხელმძღვანელებთ მათ, წარმოადგინეთ პარტიანი მოსაღებ და მთავრობის ჯილდოებზე წარსადგენ ამხანაგთა ლიბე; წინასწარ გააცანით მათი ვინაობა და დამსახურება თავდაცვის უბნის მთელ პირად შემადგენლობას... მეთაურის ბრძანება სამშობლოს ბრძანებაა!...

— შეკითხვები გაქვთ?

— არა.

— მაშ, მივიღოთ დადგენილებად ყველაფერი, რაც ვთქვით?

— სამშობლოსათვის! უკანასკნელ სისხლის წვეთამდე! — იგრიალა პასუხად პარტიულმა კრებამ.

— ადგილებზე! — დაიძახა გორიაჩიხმა, მაგრამ იქვე მიაყოლა: — მოითმინეთ! ყოველ საღამოს, დაბომბვის საათებში, აქ, ამ ოთახში, შევეგროვდებით პარტიულ კრებაზე. ახლა კი

ადგილებზე! პირადი მაგალითი, პირადი მაგალითი, ამხანაგო კომუნისტებო! — რაღაც დაღლილი, ნაღვლიანი ხმით დასძინა მან და მეზობლად მოთავსებული ოპერატიული შტაბისკენ შებრუნდა.

პოზიციაზე რომ ვბრუნდებოდი, ყველაფერი წინანდელზე უფრო ადვილად და საიმედოდ მეჩვენებოდა... იმ სახელდახელო, უოქმო და უმდივნო კრებამ ათასჯერ მეტი ძალა შემმატა, ვიდრე ყველაფერმა, რაც მანამდე წამეკითხა და მომესმინა... არა, ეს ჩვეულებრივი სიტყვა — „კრება“ ვერ გამოხატავს იმას, რაც მაშინ განვიცადეთ; ეს სისხლით დაწერილი პარტიული ფიცი უწმინდესი ვალდებულება იყო ყოველი ჩვენგანისათვის...

* * *

აფეთქების ხმა ჯერ მოშორებით ისმის, მერე ჭურვები თანდათან გვიახლოვდება და როცა ბათქი ჩვენს თავზემოდ მძვინვარებს, სარდაფი იძვრის, ირყევა, ამ საზარელ გრუხუნში წამიერად რაღაც საოცარი ღუმილი დგება. ამ დროს ყველაფერი ხმაგაკმენდილია, ნესტოებში საშინელ სიმწარეს გრძნობ და მხოლოდ მაშინ, როცა ყუმბარების სკდომა და გრუხუნის ნაბიჯ-ნაბიჯ გშორდება, შვებით ამოისუნთქავ, კვლავ გესმის საზარელი ჭექა-ქუხილი, შიშით შესცქერი სარდაფის კედლებს და გულში ნატრობ: „ნეტავ გაუძლოს!.. ნეტავ არ ჩამოინგრეს!“

იმ გულისწამლებ, წამიერ ღუმილში ზოგს მთლად ებნევა დაუთარი, გასასვლელისკენ მიიწევს, ლამობს გარეთ გავარდეს, — ღია ცის ქვეშ მაინც მოგვკვდენ, ნახგრევებში ცოცხლად

არ დავიმარხო. ერთი ასეთი თანამებრძოლი ძლივძლივობით შემოვაბრუნეთ სარდაფში. „გამიშვითო“, — ღრიალებდა არა-ადაძიანური ხმით. გასასვლელთან კი ისეთი გაგანია იყო, თავი რომ გაეყო, უძალ წააწყვეტდა.

მობრუნებით, როგორც იქნა, მოვაბრუნეთ. მაგრამ გაგვიძალიანდა, მუშტები წამოგვიშინა, მაშინ ქაპრით შევკარით და სარდაფის სიღრმეში მივაგდეთ. უნებლიე შეკრთომისათვის კაცს ვერ დაძრახავ, მაგრამ ყველამ იცის, რომ ბრძოლაში შიში ღალატს უდრის. ახლა თავის თავზე გამარჯვება მტერზე გამარჯვების საწინდარია. ვინც თავის სისუსტეს ვერ დაძლევეს, ვერც დუშმანს მოერევა.

ღვთისმოსავი, თადარიგიდან ვაწვეულ დასავლეთბელო-რუსელი ჯარისკაცი პირჯვრისწერით გვამშვიდებდა:

— ნუ გეშინიათ, შენობა გაუძლებს. რუსული ნამუშევარი იაო.

სიმაგრე მართლაც საგანგებოდ ნაშენი აღმოჩნდა. სამხედრო სპეციალისტები მას მოძველებულად თვლიდნენ, სერიოზულ ანგარიშს არ უწევდნენ. მაგრამ პირველი წუთიდანვე დავრწმუნდით, რომ ეს ბებერი ბურჯი არც ისე იოლად დაი-ხოქებდა.

1911 წელს ძველი ციხე-სიმაგრის რეკონსტრუქციასა და ფორტიფიკაციას ხელმძღვანელობდა სამხედრო ინჟინერი დიმიტრი მიხეილის ძე კარბიშვევი. შემდეგ წითელი არმიის გენერალ-ლეიტენანტი, საბჭოთა კავშირის გმირი, რომელიც 1945 წელს ტყვეთა ბანაკში აწამეს ფაშისტებმა.

სიმაგრეს ირგვლივ ათი მეტრი სიმაღლის მიწის კედელი ჰქონდა შემოვლებული, ხოლო სადაც ასეთი მიწაყრილი არ ერტყა, ფართო და ღრმა არხებით იყო გარემოცული.

არხები და მდინარის ტოტები მთელ ფართობს ოთხ კუნძულად ჰყოფდა, თითოეული მათგანი დამოუკიდებელ სიმაგრეს მიაგავდა.

ციტადელს სამხრეთიდან და ჩრდილოეთიდან მუხხავეცის ორი მოზრდილი ტოტი ჩამოუდიოდა, სამხრეთ დასავლეთიდან კი — წყალუხვი ბუგი.

დანარჩენი კუნძულებისაგან განსხვავებით, ამ ხერთვისს მიწის კედელი არ ზღუდავდა. მას გარშემო უვლიდა წითელი იგურის ორსართულიანი შენობა, რომელიც უწყვეტ რგოლს წააგავდა და ამიტომ „მრგვალ ყაზარმას“ უწოდებდნენ.

ყაზარმებს ფართო სარდაფები ჰქონდა. მათ ქვემოთ მიწისქვეშა გზებიც გადიოდა.

ღრო იყო, ამ ყაზარმათა მეტრ-ნახევრიანი კედლები ყველა კალიბრის ყუმბარას უძლებდა.

სამხრეთით ციტადელს დატანებული ჰქონდა ორი კარიბჭე — ტირასპოლისა, ჩვენი ყაზარმის პირდაპირ, და ხოლმისა, ცოტა უფრო მოშორებით. ისინი აგებული იყო „მრგვალი ყაზარმის“ ზურგში, მუხხავეცის ერთ-ერთ ტოტზე.

ჩრდილოეთიდან ციტადელი სამთალოვანი ალაყაფით იყო შეკრული. სამივე კარიბჭე მდინარეზე გადასასვლელ ხიდებს იცავდა და ღრმა ხვრელებით ყაზარმებს უერთდებოდა. ამ ხიდებით ციტადელი უკავშირდებოდა სამ დანარჩენ ნაწილს, რომლებიც ყველა მხრიდან იფარავდა მას: დასავლეთ კუნძულს — ტირასპოლის კარიბჭით, სამხრეთ კუნძულს — ხოლმის კარიბჭით, ჩრდილოეთის გამაგრებულ უბანს — სამთალოვანი ალაყაფით. ცენტრალური კუნძული რომ ასე საგანგებოდ იყო დაცული, ამიტომ გაგვიკვირდა, როგორ გაჩნდა მტერი ჩვენს ყაზარმებთან ომის პირველსავე წუთებში, რა მანქა-

ნებით გადმოლახა მეზობელი ხერთვისები, ხიდები, არხები, კარიბჭეები, რომლებსაც მესაზღვრეები იცავდნენ.

მაგრამ ჩვენი ციხე-სიმაგრე მტრის ყველაზე ძლიერი სამხედრო დაჯგუფების გზაზე აღმოჩნდა, რომელსაც ფაშისტური სარდლობისაგან მოსკოვის აღება და ომის ბედ-იღბლის გადაწყვეტა ჰქონდა დაკისრებული.

გერმანელებს უნდოდათ სასაზღვრო ხაზის გარღვევისთანავე ზურგში მოქცეოდნენ ჩვენს ჯარებს, განთიადისას სიღრმეში გადასხმულ დესანტებს შეერთებოდნენ და სმოლენსკიდან ელვისებური დარტყმით აეღოთ დედაქალაქი.

მტერი ამ ოპერაციის ჩატარებას ისეთი სისწრაფით ფიქრობდა, როგორც კი წარმოსადგენი იყო მაშინდელი ტექნიკის პირობებში და შეესაბამებოდა გერმანიის იმდროინდელ სტრატეგიულ ზრახვებს.

პიტლერელთა უმაღლესი შტაბის ბრძანებაში ეწერა: „მდინარე ბუგზე სასაზღვრო ხაზის გარღვევის შემდეგ მთავარი ამოცანაა განუწყვეტელი წინსვლა დღისითა და ღამით, შეუსვენებლად, სანამ საწვავი იკმარებს. მოტომექანიზებული ნაწილების მაქსიმალური გამოყენებით სულ წინ და წინ... ფლანგებიდან საფრთხეს არ უნდა მიექცეს არავითარი ყურადღება. ზურგში დარჩენილი საბჭოთა ნაწილები განადგურებულ იქნას ერთი დარტყმით“.

ფელდმარშალ ფონ კლუგეს, რომელიც ბრესტზე შემტევემუ-4 არმიას სარდლობდა, ეჭვი არ ეპარებოდა, რომ ომის პირველსავე საათებში ხელთ იგდებდა ქალაქსაც და სიმაგრესაც. ამ მიზნის იოლად მისაღწევად მან თავი მოუყარა გენერალ შროტის საარმიო კორპუსის სამ საგანგებოდ შევსებულ დივიზიას. ერთი მათგანი, 45-ე ქვეითი დივიზია, თურმე „ფი-

ტერის“ უსაყვარლეს ნაწილად ითვლებოდა. 1939 წელს იგი პირველი შეიჭრა ცეცხლწყვილებულ ვარშავაში, 1940 წელს პირველმა გადათელა ქედმოხრილი პარიზი და ახლა ჩვენთან შემოიჭრა ცეცხლითა და მახვილით.

გენერალური შტაბის ვარაუდით, აქ თავმოყრილი ქვემეხების, ნაღმსატყორცნებისა და ბომბდამშენების მოულოდნელი ცეცხლი თავზარს დასცემდა ჩაძინებული სიმაგრის დამცველთ. ნანგრევებში შემოჭრილ ჯარს ისღა დარჩებოდა, რომ ტყვედ ჩაეგდო თავგზაარეული და გულგატეხილი გარნიზონი.

ბუჩქნარში მტრის ტანკები იდგა, საარმიო ქვემეხები რაკეტებით კვირით ადრე იყო ჩასაფრებული სიმაგრის გაღმა, ლეიანში.

რკინიგზის საბარგო ვაგონებით, რომლებსაც სავაჭრო ხელშეკრულებით გათვალისწინებული სხვადასხვა საქონელი შემოჰქონდა საზღვარზე, იმ ღამით მტერმა კბილებამდე შეიარაღებული ბატალიონები შემოგზავნა ბრესტის სადგურზე. დივერსანტებმა და საიდუმლო აგენტებმა ღამის სიბნელეში გადასჭრეს ტელეგრაფის მავთულები, მუხანათურად ამოხოცეს ქალაქში მყოფი მეთაურები და აქა-იქ მიმალულნი ჩვენს ჯარისკაცებს ზურგში ესროდნენ ტყვიას.

სიმაგრე ომისათვის მოუმზადებელი იყო. იმ საღამოს აქ ორ ქვეით პოლკს ძლივს შეაგროვებდით, სულ რაღაც 4—5 ათასი კაცი ვიქნებოდით, ისიც მცირე ჯგუფებად იყო გაფანტული საკმაოდ ვრცელ ტერიტორიაზე. არტილერია და ტანკები ქალაქარეთ გვექონდა დატოვებული, რადგან კვირას საბრძოლო ტექნიკის დათვალიერება იყო დანიშნული, მანქანები და ქვემეხები შაბათ საღამოს დაშალეს და დაზეთეს.

ღილით, როცა მტრის ჭურვებმა ველურად გადატორა მი-

ძინებული საზღვარი, მთელ ქვეყანას მოწყვეტილი აღმოვჩნდით. იმ წუთიდან, რაც ცეცხლმოდებული ლოგინებიდან წამოხტომა მოვასწარით, მტრის ჯარების ზურგში ვიმყოფებოდით.

მტერი ცდილობდა სწრაფად გამოეყენებინა მოულოდნელი თავდასხმის შედეგები. ქვემეხებისა და ბომბების გუგუნში მეავტომატთა ავანგარდებმა რეზინის ნავტიკებით გადმოლახეს ბუგი, დასავლეთ და სამხრეთ ხერთვისებს შემოესივნენ.

მესაზღვრეები, რომლებიც ამ კუნძულებს იცავდნენ, უკანასკნელ ამოსუნთქვამდე იბრძოდნენ, მაგრამ გერმანელთა დესანტი მსხვერპლს არად აგდებდა და ცდილობდა ნაპირისკენ გაჭრილიყო. მალე ორივე კუნძული მტრის მეავტომატეებით აივსო.

თავდამსხმელებს გზას უკაფავდა ძლიერი ცეცხლი და ისინი სულმოუთქმელად მიიწევდნენ ციტადელისკენ.

სამხრეთ კუნძულზე ჩვენი ნაწილები არ იღგა. იქ მხოლოდ სამხედრო ჰოსპიტალი იყო. მაგრამ უსისხლოდ არც ავადმყოფები და სამედიცინო პერსონალი თმობდა მშობლიურ მიწას. ხოლმის კარიბჭით ზოგიერთმა ცენტრალურ კუნძულზე გადმოსვლაც მოახერხა.

ჩვენს პირდაპირ, დასავლეთ კუნძულზე, მტერი ელვის სისწრაფით მოადგა ტირასპოლის კარიბჭეს. მეავტომატთა დიდმა ჯგუფმა მაშინვე გადმოლახა ხიდი და ეზოში შემოიჭრა. ხიდზე მძაფრი წინააღმდეგობა გაუწიეს მესაზღვრეთა მცირე რაზმმა და ჩვენი პოლკის ყარაულმა, რომელსაც უფროსი სერჟანტი მორდასოვი და სერჟანტი, საგარეჯოელი ნიკოლოზ ნემიზოვი, მეთაურობდნენ. ამ შეტაკებაში დაიღუპა ჩვენი

პოლკის სკოლის ოცმეთაური, კომკავშირელი ლეიტენანტი ნაგანოვი.

სანამ გონს მოვიდოდით, ამ ნაწილმა უბრძოლველად დაიკავა ცენტრალური კუნძულის ყველაზე მაღალი შენობა — საყდარი, სამრეკლოზე რადიო მოაწყო, სარკმელებში კი ტყვიამფრქვევები განალაგა.

ასე რომ, ციტადელში მტერს არაფერი რჩებოდა შეუმჩნეველი. ამასთან, ეკლესიაში გამაგრებულმა რაზმმა ჩვენი პოლკი მეზობელ ნაწილებს მოსწყვიტა და ჩრდილოეთიდან მომავალ ამხანაგებსაც გზა გადაუკეტა. საყდრიდან მეავტომატეები ზუსტ ცნობებს აწვდიდნენ თავიანთ შტაბს, ამიტომ მტრის ავიაცია და არტილერია დაუცდენლად ურტყამდა ჩვენს გამაგრებულ პუნქტებს.

ერთ ხანს, სარდაფში ჩამოსვლის შემდეგაც ვერ ვამჩნევდით ამას, მაგრამ როცა 84-ე პოლკის მიმართულებით დაზვერვის გაგზავნა განვიზრახეთ, მივხვდით, რომ ტაძარი მტრის ხელთ იყო. სარდაფში წრიული თავდაცვა მოვაწყვეთ და სათრფურებიდან განუწყვეტლივ ვცხრილავდით სასპორტო მოედანს ეკლესიის წინ, სადაც მოიერიშეთა მოძრაობაც შევამჩნიეთ. გვეგონა, გერმანელებმა აქ ჩრდილოეთ კუნძულიდან შემოაღწიეს.

პირველმა წარმატებამ თავდამსხმელებს ფრთა შეასხა; გადაწყვიტეს, ბოლომდე ესარგებლათ ჩვენი დაბნეულობით.

მტრის მეავტომატეთა ერთი ჯგუფი აღმოსავლეთისაკენ დაიძრა ციტადელის დასაპყრობად. მათთვის რომ გზა გაეხსნა, მტრის არტილერიამ, რომელიც რადიოთი გააფრთხილეს, ამ უბანზე დროებით შეწყვიტა სროლა.

მოიერიშეები უვნებლად მიუახლოვდნენ რკინის მოაჯი-

ჩიან თეთრ სასახლეს, სადაც, სხვათა შორის, 1918 წელს ხელი მოაწერეს ცნობილ „ბრესტის ზავს“. ეს შენობა პოლონეთ-გერმანიის 1939 წლის ომში შესამჩნევად დაზიანდა.

მეზობელი ყაზარმის გასწვრივ, თეთრი სასახლის კედელი ფართო ქუჩას ქმნის; მევტომატეები ყვირილით შეცვივდნენ ამ ქუჩაში და პანიკის გამოსაწვევად ტყვიით დაცხრილეს ყაზარმის ფანჯრები.

მე იმ უბანზე არ მიბრძოლია, საერთო სურათს მწერალ ს. ს. სმირნოვის მასალებით აღვადგენ. მაშინ ჩვენ ტაძრის მოპირდაპირე სათოფურთან ვიდექით, თეთრი სასახლის მხრიდან ცხარე ბრძოლის ხმაური გვესმოდა და ვცდილობდით სასპორტო მოედნის გამოთოფვით ამხანაგებისათვის მხარი დაგვეჭირა.

გათამამებული თავდამსხმელები დაუსჯელად მიიწვედნენ წინ. ეგონათ, ყველაფერი ჩაკვდა, სიმაგრე გვენებდებო.

თენღებოდა.

მუხავეცის ნაპირზე, იმ ადგილას, სადაც მდინარე ორ ტოტად იყოფა, ბოლში ბუნდოვნად მოჩანდა წყალსატუმბი კოშკი.

მაგრამ მტერმა ვერ მიაღწია იქამდე...

ყაზარმის ალაყაფი „ურას“ ყიჟინით გაიღო. ხიშტებით ეკვეთნენ და ორად გაჰკვეთეს მტრის რაზმი. ერთი ნაწილი კვლავ ტაძრისა და ტირასპოლის კარიბჭისაკენ გამოიქცა, ხოლო მთავარი ძალა, რომელსაც უკან დასახევი გზა გადაჭრილი ჰქონდა, დამცველებმა ხელჩართულ ბრძოლაში გაანადგურეს. ბევრი უიარაღო მებრძოლი დანით, აგურის ნატეხებითა და რკინის ნაგლეჯებით დაერია მტერს. ვინც ხიშტს გადაურჩა და მუხავეცის გადაცურვით მოელოდა თავდახსნას, სნაიპერებმა გაჟლიტეს.

ეს დარტყმა ჩვენმა მეზობელმა 84-ე პოლკმა აგემა მტერს. ამ პოლკის კომისარმა ეფიმ ფომინმა, რომელიც თავის სამუშაო კაბინეტში ცხოვრობდა, ბრძოლის დაწყებისთანავე ითავა პოლკის მეთაურობა და კონტრიერის ხელმძღვანელობა. დაავალა კომკავშირის კომიტეტის მდივანს სამუელ მათევოსიანს...

ძველი კომკავშირული მუშაკი სამუელ მინასის ძე მათევოსიანი მოხალისედ შევიდა წითელ არმიაში და 1939 წელს ერთად დავიწყეთ სამსახური ბრესტში. იგი ციხე-სიმაგრის დაცვის ერთ-ერთი გამოჩენილი გმირია. სამუელის დახმარებით მისი თანაპოლკელი ბევრი ქართველი მეომრის ვინაობა გამოვარკვიეთ.

ცხელ მტვერსა და ყომრალი ბოლის უზარმაზარ სვეტებში ძლივს ატანდა დღის შუქი.

საყდრის წინ მწვანე მუზარადიანი სილუეტები ამოძრავდნენ. მალე შევამჩნიეთ, რომ ისინი გამეტებით მოიწევდნენ ჩვენკენ და გვეგონა, იერიშით სარდაფის აღება ჰქონდათ გადაწყვეტილი.

ტყვიამფრქვევებმა ინტენსიური ცეცხლი გააჩაღეს სათოფურებიდან. საპასუხოდ გერმანელთა „შმაისერებიც“ აკაკანდნენ. მოიერიშეები არ შეჩერებულან, არც მიწაზე გაწოლილან, მთელი სისწრაფით მოექანებოდნენ ჩვენკენ.

გაისმა შეძახილები:

- იერიშზე!..
- ხიშტები!
- სწრაფად!

ძალიან ცოტა გვქონდა ხიშტები, მაგრამ სარდაფის სხვადასხვა მხრიდან ათობით მებრძოლი ბრძანებისთანავე ერთ-

დროულად გაიჭრა სასპორტო მოედანზე და გამოქცეული ჯგუფი, რომელიც სამიოდე ოცეული მაინც იქნებოდა, მესაზღვრეთა ყაზარმის ნანგრევებთან მოიხელთა. მტერი შეიარაღებული იყო ავტომატებით, მხოლოდ ზოგიერთს ჰქონდა შაშხანა, რომელზეც ვერც კი მოესწროთ ხიშტების წამოგება.

ჩვენს ბიჭებს, რომელთაგან ზოგი ბართა და ძალაყინით იყო შეიარაღებული, მესაზღვრეებიც შემოუერთდნენ.

„ხიშტები!“ — კარნახობს ვიღაცის ცივი ხმა. ცეცხლის სინათლეზე ელავს რუსული ხიშტის წაწვეტებული, პრიალა ფოლადი, რომლის დანახვა მუდამ მზარავდა და მეცადინეობაზე თვალს ძლივს ვუსწორებდი. ახლა კი, როცა სიკვდილი ისე ახლოს იყო, არაფერს ვგრძნობდი, რადგან ფიქრის დრო იღარ მქონდა...

გერმანელები, რომლებიც აქამდე მცირე ჯგუფებად იყვნენ დაფანტულნი, შედგნენ, ადგილზევე ერთ ბირთვად შეიკრნენ და წამოვიდნენ...

სათოფურიდან ტყვიამფრქვევებმა წუთით შეწყვიტეს სროლა.

წინ ნიშანსვეტივით მოჩანდა პაწია თეთრი საყდარი და თითქოს შორს, ძალიან შორს ისმოდა ყუმბარის ხმა...

ჩვენი მეზობლებიც სხვადასხვა მხრიდან გამოქანდნენ და დროის უმცირეს მონაკვეთში რალაც უხილავი ძალით გაერთიანდნენ.

მოიერიშეებმა ხელყუმბარები დაგვაყარეს... გვერდით ვიღაც დაეცა. აი, ვიღაც კვენისის... მაგრამ იგივე უხილავი ძალა მზრმიუცემლად გვეწევა წინ და... ჩვენამდე აღწევს მხოლოდ საშინელი, ველური „აააა!“ შიშისათვის არ გვცალია, ხელს ისე ვუჭერთ შაშხანას, ლამის კონდახი დაიმსხვრეს.

„ურა“ რისხვად ქუხს; როგორც ქარიშხალი შავ ღრუბლებს, ისე მიაქანებს მკერდამდე შემართულ ხიშტებს და ეს უფრო თავზარდამცემია, ვიდრე მძიმე ბომბების ზრიალი.

დამხვდურნი ჭერ ტყვიის სეტყვით ცდილობენ თავი დაგვალწიონ, მერე კი, საოცარია, თითქოს ადგილზე გაიყინენო, შედრკნენ და ერთ წამში ორი აზვირთებული ტალღა ერთმანეთს შეემსხვრა.

მეჩვენება, თითქოს ჩვენი ათმეთაური მეძახის: „უჩხვლიტე!..“ „მოკლედ უჩხვლიტე!..“ — „გრძლად უჩხვლიტე!..“ „მარცხნივ უჩხვლიტე!..“ „დასცხე კონდახი!..“ თითქოს ყველაფერი სავარჯიშო მოედანზე ხდება, თითქოს სავარჯიშო ფიტულს ვფატრავ, და კვლავ მეჩვენება, რომ ათმეთაური მიწონებს: „კარგია!“ „კიდევ უჩხვლიტე!“ „მარჯვნივ უჩხვლიტე!“ „მოკლედ უჩხვლიტე!..“

გერმანელებმა პირი იბრუნეს. შეთხელებულმა რაზმმა ერთი ფეხით შეგვასწრო საყდარში. ველარ გამოვედევნეთ, რადგან მესერშიტები თავს დაგვტრიალებდნენ, ძერებივით დაბლა ეშვებოდნენ, თითქოს ლამობდნენ ჭანგი ჩაესოთ და ცაში ავეტაცეთ.

შემდეგ გავიგე, რომ ამ კონტრიერიში მონაწილეობდნენ პანტელეიმონ აფხაზავა, ონისიმე ასათიანი, ალავერდა იმანოვი, ალექსი ჯარიაშვილი, პავლე შირინი. პ. გივიშვილი, ნიკა შეკოკიშვილი. მე კი არავინ შემინიშნავს, არავინ მახსოვს... იმ დღეს ისეთი განცდა მქონდა, თითქოს არაფერი მომხდარიყო, თითქოს არც კი ვყოფილიყავ. იქ. იმ პირველი იერიშიდან ხსოვნაში ჩამრჩა რალაც დანისლული სიზმარი.

მოგვიანებით ვანო კეველიშვილმა მითხრა, რომ საყდართან კონტრიერიშის დროს დაილუბა სერჟანტთა სკოლის კურსან-

ტი მაღლაკელიძე, ოცი წლის ტანაშოლტილი, ლამაზი ვაჟაკი. თუ არ ვცდები, ბევრი ჩვენგანი მაშინ მიხვდა, რომ გერმანელები ტირასპოლის კარებიდან შემოიჭრნენ ციტადელში და აქედანვე აპირებდნენ პლაცდარმის გაფართოებას. თუმცა, როგორც ვთქვი, თავდასხმის პირველ წუთებშივე ჩვენმა ნაწილებმა, მესაზღვრეებთან ერთად, ტირასპოლის კარიბჭის თაღქვეშ გაუმართეს ხელჩართული ბრძოლა იქიდან შემოჭრილ მტრის რაზმებს.

სარდაფში დაბრუნება ძლივს მოვასწარი. მტერმა კიდევ უფრო გამწარებით დაგვიშინა. კვლავ ატორტმანდა ყაზარმა. გამარჯვებული ხიშტები უმწეოდ ათრთოლდნენ სარდაფის კედლებზე.

მტერი ჯერ ჭურვებს უშენდა სიმაგრეს, მერე შეეცადა ტირასპოლის კარიბჭიდან მოიერიშეთა ახალი რაზმი შემოეგზავნა და მისი დახმარებით გამოეხსნა საყდარში გამომწყვდეული თავისი მეავტომატეები. მაგრამ ეს უკვე შეუძლებელი იყო. გზა, რომლითაც საყდარს შეფარებული თავდამსხმელები ერთი-ორი საათის წინ ციტადელში შემოიჭრნენ, ცეცხლის თარჯით გვექონდა ჩაკეტილი. კიყევატოვის მესაზღვრეებმა უკვე მოასწრეს ამ უბანზე თავდაცვის ორგანიზება. ჩვენი სარდაფის სათოფურებიც პირდაპირ გაჰყურებდა ხიდს და ტყვიამფრქვევების გაძლიერებული ცეცხლი გაუვალ ზონას ქმნიდა. რაკი აღმოვაჩინეთ ეს ხვრელი, მტერი მანამ ვერ შემოჰყოფდა აქ ცხვირს, სანამ ჩვენს სარდაფს სული ედგა.

გერმანელებმაც სხვა გზის ძებნა დაიწყეს. ჯერ ხოლმის კარიბჭე მოსინჯეს, მაგრამ იქ 84-ე პოლკის ნარჩენები დახვდათ ჩასაფრებული. მაშინ მუხავეცის ტალღებზე რეზინის ნავტიკები გამოუშვეს, სწორედ ისეთი, რომლითაც საზღვარი

გადმოლახეს ღამით. ტყვიამფრქვევებითა და ხელყუმბარებით მტერი უკუვაქციეთ და რამდენიმე ნავტიკიც ჩავძირეთ.

საყდარში გამომწყვდეული მოწინააღმდეგე ამაოდ მოელოდა მაშველ ძალას. ისინი ალყაშემორტყმულთა გარემოცვაში მოექცნენ და რადიოთილა უკავშირდებოდნენ თავისიანებს. გერმანელებმა სიმაგრეს გარს შემოუარეს და რკალი შეკრეს. მერე ცენტრალური ალყაფით ჩრდილოეთ კუნძულზე შემოიჭრნენ და ციტადელს ქალაქის მხრიდანაც დაემუქრნენ. ნახევარი სიმაგრე მათ ხელში იყო, მაგრამ დამცველთა წინააღმდეგობა მაინც ძლიერდებოდა. ვრცელი ტერიტორიის სხვადასხვა უბანზე სულ ახლ-ახალი პუნქტები ჩნდებოდა და მტერს საზრუნავი ემატებოდა.

გერმანელთა შტაბს უსიამო ცნობები მისდიოდა ბრესტის სიმაგრიდან. მტერი ზედიზედ კარგავდა ღამით ქურდულად დაპყრობილ პოზიციებს, სისხლისაგან იცლებოდა მოიერიშე ნაწილები.

გერმანელთა 45-ე დივიზიის შტაბის საბრძოლო პატაკში ნათქვამია: „სულ მალე (დაახლოებით დილის 5.30—7.30) ცხადი შეიქნა, რომ წინ გაჭრილი ჩვენი ინტანტერიის ზურგში რუსებმა შეუპოვარი და უდრეკი ბრძოლა გააჩაღეს... გამოიყენეს სნაიპერული ოსტატობა და სხვენებსა და სარდაფებში ჩასაფრებულებმა დიდი ზარალი მოგვაყენეს, განსაკუთრებით ბევრი ოფიცერი და უნტერ-ოფიცერი დაგვიხოცეს.

შუადღისას აშკარა გახდა, რომ სიმაგრეში ახლო მანძილზე ბრძოლისას არტილერია ვერ ახერხებდა მხარდაჭერას, რადგან ჩვენი ქვეითი ჯარი მეტად ახლოს მიაღვა საბჭოთა დანაყოფებს და ბუჩქნარებში, ნანგრევებსა და შენობებში ჩვენი

ხაზის დადგენა ველარ მოხერხდა. ზოგან ხაზი გადაკვეთილი ან გარემოცულია რუსების მიერ, რომლებმაც აქ თავდაცვის ბუდეები მოაწყვეს.

ჩვენმა ტანკსაწინააღმდეგო ქვემეხებმა და ჰაუბიცებმა პირდაპირი დამიზნებით სცადეს სროლა, მაგრამ არაფერი გამოგვივიდა, რადგან ზუსტი დაკვირვება არ ხერხდებოდა. ამის გარეშე კი საშიშია საკუთარი ნაწილები არ დავაზიანოთ.

135-ე ქვეითი პოლკის მეთაურმა საკუთარი გადაწყვეტილებით შეაჩერა ფრონტზე მიმავალი მოიერიშე ქვემეხების ბატარეა, მაგრამ ვერც ამან გვიშველა. პირველ საათზე სამხრეთ და დასავლეთ კუნძულებზე ბრძოლაში ჩავაბით ახალი ძალები (კორპუსის რეზერვი); მდგომარეობა ვერც ამან შეცვალა. იქ: სადაც გვეგონა. რუსები განადგურებული და განდევნილი იყვნენ, სარდაფებიდან, სახლებიდან, თავშესაფრებიდან, მიწებიდან ახალ-ახალი ძალები ამოდით და გასაოცარი სიზუსტით გვესროდნენ. ასე რომ, ჩვენი დანაკლისი დიდია.

დივიზიის მეთაური, რომელიც ჩრდილოეთ კუნძულზე იმყოფებოდა 135-ე პოლკის პოზიციაზე. პირველ საათსა და თხუთმეტ წუთზე პირადი დაკვირვებით დარწმუნდა, რომ ახლო მანძილზე ბრძოლით სიმაგრის აღება შეუძლებელია. ხოლო ორის ნახევარზე გადაწყვეტილებაც მიიღო, ძალები უკან გამოეყვანა და სიმაგრისთვის ყველა მხრიდან ალყა შემოერტყა. ამის შემდეგ, 23 ივნისს. დამით, უკან უნდა დაგვეხია და რუსების გასანადგურებლად სიმაგრისათვის ხანგრძლივი, კარგად დამიზნებული ცეცხლი გაგვეხსნა“...

სერგეი სმირნოვი შენიშნავს:

„ეს ბრძანება, რომელიც მოიერიშე ნაწილებმა 22 ივნისს

საღამოს მიიღეს, წარმოადგენს გერმანიის არმიის უკანდახევის პირველ ბრძანებას მეორე მსოფლიო ომში; მანამდე არსად დაუხევია უკან“.

სიმაგრის ტერიტორიაზე შემოჭრილი ნაწილები მტერმა გარემოცვის ხაზზე გაიყვანა.

ჩვენ შეუჩერებლივ შევუტით და მტრის მიერ მიტოვებულ ადგილები დავიკავეთ...

ერთბაშად გაქრა ომის ციებცხელებიანი პირველი დღე. არც შემიმჩნევია, როგორ გადაება გავარვარებული დღე მსურვალე ღამეს. ის და მომდევნო დღეები ჩემს ხსოვნაში ერთ მთლიან, განუწყვეტელ ხანძრად გიზგიზებს.

საღამოთი სროლა შენელდა. სარდაფი გარინდულიყო. იშვიათად თუ დაილაპარაკებდა ვინმე. ყველა მოელოდა, მაგრამ რას, არავინ იცოდა. ჯარისკაცები უძრავად იდგნენ ტყვიამფრქვევებთან.

დაჭრილები აღარ კვნესოდნენ, რაღაც უფრო მწარე ტკივილი აყუჩებდა ნატყვიარს. თავწაკრულ, ხელშეხვეულ, დასისხლიანებულ ბიჭებს თვალები უელავდათ, შეგაკრთობდა მათი შეხედვა, მათთან გამოლაპარაკება...

ყაზარმას შემაზრზენი ყრუ გუგუნე უახლოვდებოდა.

— ჩვენი თვითმფრინავებია!.. — დაიყვირა ვილაცამ და შეეცადა სათოფურში გაეყო თავი.

ჩვენც ამბრაზურებთან მივიჭერით, დაჭრილებიც აქეთკენ მობობლავდნენ.

— დამანახე, ძამიკო, ერთხელ მაინც მოვკრა თვალი! — ემუდარებოდა ამხანაგს ხელფეხწაგლეჯილი მებრძოლი, რომელსაც სათოფურთან მისვლა არ შეეძლო.

თვითმფრინავები ახლოს მოდიან, დაბლა ეშვებიან, კექა-

ქუხილი ყურთა სმენას ახშობს და... გარკვევით ვხედავთ, როგორ გვაყრიან თავზე ბომბებს. ახლავა ვამჩნევთ ფრთებზე გაბარჯლულ შავ ჯვარს.

— ჰაერი! — დაიყვირა იმავე ხმამ.

— პატრონგასაწყვეტი! — შეუკურთხა მეორემ.

— ცეცხლი!.. — გაისმა ბრძანება.

ტყვიამფრქვევის ლულა მალლა აიმართა. შავ ჯვარს გაუსწორდა და გაწიწმატებით აკაკანდა. ტყვიის ნიაღვარი ტკრციალით მიაბობს ჰაერს და სულგანაბული ელი, აბა ჰა, როდის დაენარცხება ეს შავსვასტიკიანი გარეწარი. ის კი აბუჩად გიგდებს, დაგცინის — კიდევ უფრო დაბლა ეშვება და ამბრაზურას უშენს. გულში მხურვალედ იფიცავ, რომ ამიერიდან აღარათფერს ინატრებ, ოღონდ ახლა მოარტყა, ჩამოაგდო ეს თავხედი, მაგრამ თითქოს ბამბას ესროდე — აინუნშიაც არ აგდებს შენს ტყვიას.

ჩემს გვერდით უცნობი ქალი სახენიტო ტყვიამფრქვევს უზის და ისეთი გულისყურით უმიზნებს, გეგონება, წინდის თვალი ამოჰყავსო... ტყვიის ჯერი განრისხებით ჰკვეთს ჰაერს... მესერაშიტი ჯოჯოხეთური ჭახჭახით აიჭრა მალლა, ჰაერში გადატრიალდა და თევზივით თეთრი მუცელი გამოაჩინა. მოველით, საცაა ნანგრევებში ჩაილეწებაო; ის კი ჩვენკენ მოქანება და თავხედურად გვიშენს.

როგორც მაძლარი სვავი, ეს შავჯვრიანი თვითმფრინავი კიდევ ერთ ხანს ზანტად ტრიალებს დაბინდულ სივრცეში და გულშეჭერებული ტოვებს ციტადელს.

ლამით სარდაფს ვამაგრებთ, გასასვლელებს ვასუფთავებთ, ბარკადებს ვაწყობთ, შებოლილ ფანჯრებში ტყვიამფრქვე-

ვებს ვდგამთ, მეზობელ ნაწილებს ვუკავშირდებით და მზვე-
რაებს ვგზავნით...

ამ აღმოდებულ საკირეშიც გრძნობ, რომ აბრეშუმივით
კრიალა ივნისის ცა, სადღაც შორს ვარსკვლავიანი კამარა
ბრწყინავს და მშვიდად მიცურავს ნამგალა მთვარე. აქ კი არა-
ვის სძინავს, ცხელ ბურანში თვლემს ყველა.

ნეტავ რად ვგრძნობდი იმ უცნაურ სიამეს?... რა იყო ეს!
რა ჰქვია იმ საოცარ გრძნობას, თავზარდამცემი განსაცდელის
შემდეგ რომ ეუფლება სულს. ასე მწარე რომ არის და ასე
ტკილი... როცა სიკვდილი სულ ახლო ჩაგიქროლებს, მხარს
გაგკრავს და გაქრება, როცა დაეცემი და ადგები. ვისაც ეს ირ
განუცდია, არა მგონია, ეგრძნოს სიცოცხლის ნამდვილი სიხა-
რული. ასე შერჩა მენსიერებას გახურებულ ტყვიამფრქვევ-
თან ის მშფოთვარე თვლემა, როცა სამტროდ გაშვერილი ლუ-
ლები ცივად ჩაშტერებოდნენ თვალში საბედისწერო ომის
პირველ დამეს.

გამათრთხილებლად ელვარებდა ბომბებით გადათხრილი
პირქუში ორმოები, გავარვარებული ქვა და რკინა, სარდაფის
კუთხეებს მკრთალად აშუქებდა თაფლის სანთელი. ბრესტის
სიმაგრე წითელ პირამიდასავით ანათებდა წყვილიადს.

შულამეა, მეთაური, რომელიც, არ ვიცი, რომელი ნაწი-
ლიდან შემოხიზნებია ჩვენს პოლკს, პოზიციებს ათვალეირებს,
ტყვიამფრქვევებს ანაწილებს. ტყვია-წამლის მარაგი გადა-
გვაქვს შტაბში, სადაც სიტყვაძვირი უფროსი ლეიტენანტი
პოტაპოვი თავდაცვის გეგმას ადგენს. მე ორი წელიწადი
ემსახურობ სიმაგრეში და მაინც ცუდად ვიცნობ აქაურობას.
ზოგიერთი სულ ახლახან გადმოიყვანეს ბრესტში და ახლ
არკვევს კარიბჭეების, ხიდების, ყაზარმების განლაგებას.

საგუშაგოს ნანგრევებში ბრძოლა შეუძლებელი გახდა და კიევეატოვმა მესახლვრეთა რაზმი საჩდაფში გადმოიყვანა, შეუბოვარი, დალესილი ბიჭები იყვნენ. იმ ღამით მათ ყველაზე დიდი გაჭირვება გადაიტანეს.

ახალმოსულებმა ტყვია-წამლით სავსე ყუთები შემოიტანეს, ჩვენი შტაბიდან იარაღი მიიღეს და გმირული თავდადების მაგალითი გვიჩვენეს.

მოწინააღმდეგე ყოველნაირად ცდილობდა კავშირი აღედგინა საყდარში გამომწყვდეულ მოიერიშეებთან, ეჩვენებინა მისთვის ციტადელიდან გასასვლელი გზა, ამიტომ დასავლეთისა და ჩრდილოეთის ხერთვისებიდან ეკლესიის მხარეზე განუწყვეტლივ ისროდნენ მამხალეებსა და საგეზნიშნო ტყვიებს.

ამბრაზურებიდან ფხიზლად გაეყურებდით შემზარავ სანახაობას, ვცდილობდით ზუსტად გამოგვეცნო მტრის ფანდი. იი, უთვალავი მამხალა ლაპლაპით მიაპობს სივრცეს. ჭერსულ მადლა ჰკვეთს ჰაერს. მერე ფრთადაქნილი ეშვება, თანდათან პატარავდება, ერთ ბრწყინვალე ნაპერწკლად იქცევა და ქრება. ნანგრევებად ქცეული ყაზარმები მრავალფრად ელავს მამხალეების სინათლეზე, რომელიც ხან საყდრის თავზე შეჰკრავს კამარას, ხანაც ცეცხლოვან ბილიკს ქმნის ჩვენი სარდაფის მიმართულებით. ერთმანეთში ირევა მწვანე, იისფერი, ყვითელი და წითელი რგოლები. ზოგჯერ დასავლეთიდან თანაბარ დონეზე ერთდროულად აფრინდება ხუთი მამხალა — ორი იისფერი, სამი — მწვანე. ისინი ერთდროულად ეშვებიან ერთსა და იმავე ადგილზე და ერთდროულადვე იქცევიან ხუთ მოციმციმე წერტილად. აღმოსავლეთიდან უმაღლეს უბასუხებს შვიდი მამხალის ერთდროული გაფრენა: სამი ყვითელი, ოთხი წითელი. ზოგჯერ ერთდროულად ღამის

წყვედიადს ათობით მაშხალა ააციკროვნებს. ხან კი ერთბაშად წყდება მათი კაშკაში.

მაშხალები საშიში არ არის, მაგრამ მათ მოახლოებას თან მოაქვს რაღაც გაურკვეველობა და სიცივე.

იღუმალ ენაზე ესაუბრებიან მტრის ნაწილები ერთმანეთს. დღისით დაქსაქსული ჯგუფები კავშირს ამყარებენ ურთიერთ-თან, შტაბიდან ახალ განკარგულებას იღებენ. სულ ახლოს გრძნობ მტრის სუნთქვას, განაბული რომ მოჰყვება ამ ცეცხლოვან ბილიკს. ვინ იცის, იქნებ, ჩვენკენაც მოდიან იერიშით და ამ მოლოდინში დაძაბული ათენებ ღამეს.

იმედი მაინც შიშზე ღონიერია: იმასაც ვფიქრობდით, ალბათ, ჩვენი მაშველი ნაწილები მოდიან სიმაგრის გამოსახსნელად, ნიშანს გვაძლევენო... საყდრის მხარეზე სილუეტებიც შევამჩნიეთ... ჩვენები არიან თუ მტრები?.. ვესროლოთ თუ არა?..

მეთაურთა პუნქტი ამაოდ ცდილობდა ტელეფონით დაკავშირებოდა მეზობელ ნაწილს. ხაზი კვლავ გადაჭრილი იყო.

— ალო!

— ალო!

უნაყოფოდ ჩასძახოდა ყურმილში არაქათგამოცლილი ზემდეგი. საგეზნიშნო ტყვია კი წივილით მიაპობდა ჰაერს და საყდართან ტყვიამფრქვევები კაკანებდნენ.

საყდარში ალყაშემორტყმული რაზმი, მაშხალებით რომ გააფრთხილეს, ლამობს გზა გაიკაფოს. ეტყობა, ღამის სიბნელით უნდა ისარგებლოს. მის შესახვედრად, ალბათ, სხვა ნაწილიც მოემართება. მოსალოდნელია ბრძოლა ღამით. რამდენიმე ათეული უკვე ემზადება კონტრიერიშისათვის. სასპორ-

ტო მოედანს ქარიშხლისებურ ცეცხლს ვუშენთ. ერთმანეთში ირევა მაშხალები, საგეზნიშნო ტყვიები, ტყვიამფრქვევის ჭერი. საყდრის გუმბათიდან საპასუხო კაკანი ისმის. სარდაფს-ტყვიამფრქვევების და შაშხანების ელვა აშუქებს.

ალყაშემორტყმული რაზმის ცდა ჩაიშალა, უცბად დუმული ჩამოწვა. ეს წინა ხაზზე ცუდის მომასწავებელია.

ალიონზე დროდადრო კვლავ შეიფრთხილებს მაშხალა, კვლავ გაიწივლებს საგეზნიშნო ტყვია, კვლავ დაუნდობლად პაექრობენ ტყვიამფრქვევები.

1

მზარეული ცაცხლის ხაზზე

როგორც მოგეხსენებათ, მზარეულს, კაპტენარმუსს, გადა-მწერსა და სხვა მისთანებს ჯარისკაცი ცოტა ათვალწუნებით უყურებს. არც მთლად უმიზეზოდ. ზამთრის ქარაშოტში, ყინ-ვასა და თოვლში, როცა მებრძოლი შორეულ ლაშქრობაში მი-დის, სახეგადაჟღაებული მზარეული ნაწილში რჩება და გემრიელ კერძებს მიირთმევს. ყოველ შემთხვევაში, სალაშქ-როდ მიმავალ ჯარისკაცს ასე ჰგონია. გადამწერიც კაი შვილი ბრძანდება, ოთახიდან ოთახში დაძვრება და ერთი საათით ადრე მაინც ისადილებს. კერძს ურიგოდ აიღებს და როცა კოვზს ძირამდე მოურევს, სახე გაებადრება. დალაქიც ლაღად არის და ქისაც სავსე აქვს.

ამიტომ, უნდა გამოგიტყდეთ, სხვებთან ერთად მეც მეამე-ბოდა, როცა კაპიტანი გაიფულინი ან გორნოსტაევი, რომლე-

ბი(ზვენზე შემწყნარებლად არ უყურებდნენ ამ ჯურის ბიჭებს, ზოგჯერ „დააწიოკებდნენ“ მათ, თბილი ბუნაგიდან გამოყრიდნენ და ეზოში ჩაამწყრივებდნენ.

— აი, თქვე უქნარებო, მუქთამჭამლებო! — შეახურებდა კაპიტანი. — დაგსქელეზიათ კისრები! მუხლებიდან გამოგადენთ ქონს!..

მოგეცათ ლხენა, გააჯირით-გამოაჯირითებდა ყაზარმის ეზოში; ხან დააწვენდა, ხან მუცლით ახონებდა. არ მოეშვებოდა, სანამ ლაზათიანად არ გაიქელებოდნენ. ამ მოულოდნელი „თავდასხმებით“ ოფიცერი თვითონაც სიამოვნებდა და ჩვენც გულს მოგვეფხანდა.

მაგრამ ეს ხდებოდა კვირაში ერთხელ ან ორჯერ. შემდეგ კი ყველაფერი ძველებურად მიდიოდა და „კისერგასქელეზულები“ კვლავინდებურად განაგრძობდნენ „ცხიმის დაგროვებას“.

ჩვენი პოლკის უფროსი მზარეული, რომელიც განსაკუთრებით არ მეპიტნავენოდა, ერთხელაც არ დამინახავს მის ძმაკაცებთან ერთად შეფუცხუნებული, რალაც ოინბაზობით მულამ ახერხებდა თავის დაძვრენას.

ეს იყო ოცდაათ წელს გადაცილებული, შავგვრემანი და მუცელგამობერილი კაცი. ასეთ შავგვრემანებს რუსებში იშვიათად როდი შეხვდებით. თითქოს მზისგან შერუჯულაო, ბრინჯაოსფერი დაჰკრავდა.

პოლკის პირადი შემადგენლობის შემოწმებისას იგი ვიქტორ ჩორნის გვერდით იდგა და მწყობრს ზემოდან გადაჰყურებდა.

მულამ პეწიანად ეცვა. არ ვიცი, ყოველდღე ახერხებდა საწყობში ტანსაცმლის გამოცვლას, ან რამდენიმე ხელი ჰქონდა

მარაგად და სუფთად ინახავდა, თუ მეცადინეობებზე რომ არ დადიოდა, იმიტომ იყო მუდამ ასე გამოწკიპული.

არ უყვარდა ლაპარაკი, არც ამხანაგებთან ყოფნა. ბევრჯერ გამიგონია, ოთახში არაყი უპოვეს, ჰაუპტვახტი არ ასცდებოა, მაგრამ, შენც არ მომიკვდე, წკიპურტიც არ გაჰკარებია.

ყოველთვის, როცა ხანგრძლივი ლაშქრობიდან დაღლილ-მოშიებულები ვბრუნდებოდით, უფროსი მზარეული ყაზარმის წინ დაგვხვდებოდა და ულაზათოდ, მაგრამ დიდი მონდობებით ეჭიმებოდა სახეკუშტ მეთაურებს.

ბიჭები მას უნდობლად უყურებდნენ. განმასხვავებელ ნიშნებს არ ატარებდა. ზოგი ამბობდა, ზემდეგიაო. სხვები კი იცინოდნენ, ზემდეგი კი არა, გენერალიაო: მის ხელში შამხანაჯრავის დაუნახავს. რომ მისცე, ლულით დაიჭერს და ქვაბს მოურევსო.

თუ ვითმენდით და თავაზიანადაც ვესალმებოდით, მხოლოდ იმიტომ, რომ არაჩვეულებრივად კემრიელ კერძებს ამზადებდა და „დამატებისთვის“ მისულ მებრძოლს კარდალს მუდამ პირამდე გაუვსებდა, ხორცის ნაჭრებსაც არ დაიშურებდა.

არ ვიცოდი, რა გვარი იყო. მივმართავდით სამხედრო წესით: „ამხანაგო ზემდეგო!“ ან „ამხანაგო უფროსო მზარეულო!“

კმაყოფილი იყო ამით.

მისი „დაგუნდავების“ ერთადერთი შემთხვევა მახსოვს:

ერთხელ, დილით, ჩვენი ნაწილი შორეულ ლაშქრობაში მიდიოდა და საუზმე ექვსი საათისთვის უნდა მოემზადებინა, ვერ მოასწრო, ხუთი წუთით დაავვიანა, — ხორცი გამომდგარყო ძნელად მოსახარში. ჩაიგდო ხელში კაპიტანმა გორნოს-

ტაევმა და კუდით ქვა ასროლინა, სულ „არის, ამხანაგო კაპიტანო!“ — აძახებინა.

— გეტყობა, გაწყინა რუსულ ღუმელზე ვორაობამ. — დამუქრა გორნოსტაევი. — მე შენ გიჩვენებ სეირს! რატომ მეცადინეობაზე არ დაბრძანდები? მუცელი რომ გაგიტხელდება, მაშინ გაიგებ. როგორ უხდა კერძის დაგვიანება. მალე წამოგადგებ მაგ თბილი ბუნაგიდან!..

გამოჩვიმული და აწურული უფროსი მზარეული ნაწყვეტ-ნაწყვეტი სიტყვებით ცდილობდა თავის გამართლებას.

— ამხანაგო კაპიტანო... მე, მე ავადმყოფი გახლავართ... ექიმის ცნობა მაქვს... გული... დიახ... ცოტა შეუძლოდ გახლავართ... ამიტომაც... თორემ...

ვინ იცის, იქნებ, მართალსაც ამბობდა უფროსი მზარეული, იქნებ, მართლაც შეუძლოდ იყო...

გორნოსტაევს, ცხადია, ცნობა არ მოუთხოვია, ისეთი კაცისათვის, როგორიც ის გახლდათ, სიტყვას ფარატინა ქაღალდზე მეტი ძალა ჰქონდა.

ბატალიონს სხვა მზარეულები გაჰყვნენ საზაფხულო ბანაკში. ზემდეგი სიმაგრეში დარჩა, მგონი, სასურსათო საწყობის გამგელად.

სამზარეულო, საწყობები და სანიტარული ნაწილი მოთავსებული იყო მრგვალი ყაზარმის ჩრდილოეთ ნაწილში.

ეს კუთხე უთენია გააცამტვერა მტერმა. დილით, შტაბის შენობიდან რომ გადავხედეთ, მიწასთან იყო გასწორებული და იმ მხარეზე მზრჩოლავი ნანგრევებილა მოჩანდა.

პირველ დღეს იქიდან ამბის მომტანიც არ გამოჩენილა. დარწმუნებული ვიყავით, რომ იქ ვერც ერთი სულიერი ვერ გადარჩებოდა. მაგრამ მეორე დღეს, ალიონზე გამოგვეცადა

წელში ოთხად მოკეცილი უფროსი მზარეული. რომელსაც ზურგზე სავსე ტომარა წამოეკიდა, ხელში ავტომატი დაეჭირა და ერთი ნაკლული ფუთაც ილღიაში ამოეჩარა.

მზარეულმა ქოშინით ჩამოათავა კიბე, ზურგიდან ფრთხილად მოიხსნა სავსე ტომარა და ცრემლმორეულმა განწირული ხმით დაიძახა:

— ამხანაგებო, მომეხმარეთ, საწყობი იწვის! რაღაცეების გადარჩენა კიდევ შეიძლება!..

მინახავს ბრძოლებში ათასნაირად შეცვლილ-შეშფოთებული კაცი, მაგრამ მზარეულის მაშინდელი სახე არ დამავიწყდება.

თვალეზადმოკარკლული, ცოფმორეული მზარეული იმ გლეხს ჰგავდა, რომელსაც მთელი სარჩო-საბადებელი ეწვის და ცოლ-შვილიც აღმოდებულ სახლში დარჩენია გამომწყვდეული.

გაშმაგებული, სასოწარკვეთილი, საბრალო და, ამასთან, რაღაც თავისებურად მიმზიდველი იყო იგი. ეტყობოდა, ჩვენმა დანახვამ მხნეობა შეჰმატა, თითქოს ზღვაში იხრჩობოდა და უეცრად ხმელეთზე გამოირიყაო.

ძლივს იბრუნებდა სულს.

— ჩქარა, დროს ნულარ ვკარგავთ, მოგვასწრებენ, დავიღუპებით!..

გაჰყვიროდა გაოფლიანებული მზარეული, რომელსაც პირველად დაგუნახე ჩამოგლეჯილ-გაჭუჭყიანებული ტანსაცმელი და აბურძგნილი თმა. ცალ ფეხზე ჩექმა ჩაეცვა, მეორე, შიშველ ფეხზე კი ტოლადი ჩამოსჩაჩოდა და გასისხლიანებული ცერი მოუჩანდა.

მზარეულმა სულზე მოგვისწრო.

მართალია, მებრძოლებს პირველ დღეს შიმშილი არ გვიგვრძენია, მაგრამ ბავშვები დაჟინებით მოითხოვდნენ საჭმელს, სარდაფში კი ერთი ლუკმა პურიც არ აღმოჩნდა.

მეორე დღეს რაღაც საშინელ ხურვებას ვგრძნობდით. ისე ვიყავით გაფიცებული, რომ საჭმელი სრულებით არ გვახსოვდა, მაგრამ მზარეულის დანახვაზე უცებ მოგვშივდა.

ვერაფრის კითხვა ვერ მოვასწარი, ავტომატშემართული მზარეული სარდაფიდან გავარდა. თან გაჰყვა რამდენიმე მებრძოლი.

გარეთ გუშინდელზე მძლავრად ბობოქრობდა ომის ხანძარი. მესერშიტები უფრო თავხედურად სერავდნენ სივრცეს.

მეავტომატებმა კვლავ გადმოლახეს გარეკედელი, ჩრდილოეთ კუნძულზე შემოიჭრნენ და ციტადელს შემოუტიეს.

მტრის რაზმები მუხავეცის ნაპირზეც გადმოვიდნენ და სამთალოვანი ალაყაფის ხიდთან, ხშირ ბუჩქნარში პლაცდარში შექმნეს.

შეტევა განახლდა.

ტყვიის წივილში დროდადრო გაისმოდა ნალარის ხმა, რაც შეტევის მაუწყებელი იყო. დასცხეს დაფდაფებს. ხან აქ, ხან იქ ტალღებივით გადადიოდა: „აააა!“ „ურააა!“..

ხელჩართული ბრძოლები მძვინვარებდა ხოლმის კარებთან, სადაც ფომინის მებრძოლები დაუხვდნენ მოიერიშეებს. მტერი რამდენჯერმე შეეცადა სვასტიკიანი ალამი აღემართა ჰოსპიტლის მთავარ შენობაზე, მაგრამ დამცველებმა ძირს დასცეს, ტყვიით დაფლითეს...

რადგან მოწინააღმდეგე ჩრდილო კუნძულზე შემოიჭრა, ახლა აქედანაც გვემუქრებოდა საფრთხე. სასურსათო საწყო-

ბი და სამზარეულო, საითკენაც მზარეული და მისი ჯგუფი გაიქცნენ, სწორედ ამ მზარეუბე იყო.

ყველაფერი ნამსჯერევებად იყო ქცეული, ირგვლივ ყველგან ცეცხლის ალი გიზგიზებდა. ისინი კი დატვირთულნი მოვიდნენ, ბარგი კიბესთან დატოვეს და საჩქაროდ გაბრუნდნენ გადარჩენილი პროდუქტების გადმოსატანად.

და აი, ალყაშემორტყმულ სარდაფში გაჩნდა თეთრი პური, ნატეხი შაქარი, ბურღული, კონსერვი, ახალთახალი სამხედრო ხალათები, გალიფეები, ჩექმები, განმასხვავებელი ნიშნები... სურათ-სანოვაგისა და ტანსაცმლის გამოჩენამ იმედი შემოიტანა. ასე გვეგონა, მაშველი მოვიდა, სამშობლომ ხელი გამოგვიწოდა. ახალ ტანსაცმელსა და ჩექმებს საამო სურნელი ჰქონდა და ეს ისე მძაფრად ვიგრძენით, როგორც არასდროს.

ჯერ დაჭრილები, ბავშვები და ქალები დავაპურეთ, შემდეგ დანარჩენებმაც მივიღეთ ულუფა.

სასწრაფოდ ჩავიცვი ახალი გალიფე, ხალათი და ჩექმები. სახელოზე პოლიტხელის ვარსკვლავი დავიკერე. ხარბად მივეტანე თეთრი პურის დიდ ნაჭერს, ძეხვსა და რამდენიმე ნატეხ შაქარს. თითქოს მშიოდა, ჭამა მინდოდა, მაგრამ არ შემეძლო, გული მერეოდა. ვცადე შაქარი მაინც მომეწუწუნა, მაგრამ არც ეს ძალმიძდა, ზიზღით გადავაფურთხე, მთელი ჩემი ულუფა ჯიბეში ჩავიყარე, მალიმალ ხელს მოვავლებდი და შიმშილსაც ნაკლებად ვგრძნობდი. სხვებსაც კრიჭა შეჰქროდათ. პირში ლუკმა არ ჩაუდვიათ, მხოლოდ ბალები ილოდნებოდნენ უგულოდ.

მარაგი უფროსმა მზარეულმა ჩაიბარა, თვითონ ანაწილებდა ყველაფერს, გარბი-გამორბოდა, სურსათის შესანახად უში-

შარ ადვილს დაეძებდა, კითხულობდა, ვინ რომელი ხაწილი-დან არისო და უკვირდა, რომ წესრიგი არ იყო სარდაფში.

წამდაუწუმ ფუხფუხსებდა, სიტყვას ძლიეს იკავებდა, ეტყობოდა, სათქმელი დაპგროვებოდა, მაგრამ ვის ეცალა სალა-ყბოდ!

მზარეული კი ქოთქოთობდა:

— გამოწეღვიძა და რას ვხედავ. ყველაფერს ცეცხლი უკი-ღია. იწვის, ინგრევა. მაშინვე საწკობს ვეცი. ტომრები, ყუთე-ბი, პაკეტები ერთი კუთხიდან მეორეში გადავიტანე. ხანძარი კი ფეხდაფეხ მომდევს. დავიღალე. არაქათი გამომელია. დან-ხმარე კი არავინ ჩანს, არავინ! გამქრალან ბიჭები, თითქოს მი-წამ ჩაყლაპაო, ნანგრევებში თუ მოპყვენენ საწყლები!.. ჰო, იმას ვამბობდი: ვყვირი და ჩემი ყვირილი არავის ესმის. ცეცხლს ვაქრობ. ლადარიდან ყუთები გამომაქვს, გავსულეღდი კაცი. ამ დროს სადღაც ახლოს სროლა მესმის. ავტომატს ხელი და-ვაველე და სადარაჯოზე ვდგები. ვისვრი და ვისვრი. არავინ ჩანს, ვერც ის გამირკვევია, ვინაა დაბუღებული სარდაფში — ჩვენები თუ ისინი! ამ დილით, როგორც იყო, მივხვდი... ჰოდა, კიდევ მოვალწიე თქვენამდე...

ვიღაცამ გულგრილად შენიშნა:

-- ამხანაგო ზემდეგო, ხალათი რაღაც გაგწითლებიათ, მგონი...

ზემდეგმა კისერზე ხელი მოისვა, გაწითლებულ თითებს დააკქერდა და გაკვირვებით თქვა:

— ჰმ! სისხლსა ჰგავს! მგონი, მოურტყამს იმ წყეულს!..

უნდოდა როგორმე შეეთვალე რებიანა ჰრილობა; კისერს იღრეცდა, მაგრამ ვერაფერი დაინახა.

— ეჰ, გაკაწრულია! — თქვა მან და რაღაც ჰინჭით შეი-

ხვია, ავტომატი მოიმარჯვა და საიერიშოდ გამწადებულ ერთ-ერთ რაზმს შეუერთდა, მაგრამ ახალგაზრდა ლეიტენანტმა ირონიულად უთხრა:

— თქვენ საით, ამხანაგო! სამზარეულოს მიხედეთ, გეთაყვა. ამ საქმეს (ხიშტი უჩვენა) დიდი ცოდნა სჭირდება. ავტომატი მწყობრის უიარაღო ბიჭებს უბოძეთ. აი, მაგალითად, ამას, — ლეიტენანტმა. რომელიც ის იყო სარდაფში შემოვიდა და, ეტყობოდა, არ იცოდა უფროსი მზარეულის თავდადასავალი, თითქმის ძალით ჩამოართვა იარაღი.

გულდაკოდილი მზარეული ცოტა გადალიანდა, მაგრამ ბედს დაემორჩილა, უკმაყოფილოდ შეხედა ლეიტენანტს, მერე ხელი ჩაიჭნია და თავის საქმეს მიუბრუნდა.

უფროსი ლეიტენანტი გორიანის ბრძანებით პოლიტმუშაკებმა და აგიტატორებმა მზარეულის გმირობა ყველა პოზიციაზე გააცნეს მებრძოლეებს, ხოლო საღამოს პარტიულმა კრებამ მზარეული კომუნისტური პარტიის კანდიდატად მიიღო.

* * *

ტელეფონისა და ტელეგრაფის ხაზები, როგორც აღვნიშნე, მტერმა ომის დაწყებამდე გადაგვიჭრა, რადიოსადგურებიც განადგურებული აღმოჩნდა.

სარდაფის კუთხეში მიკუნჭული რამდენიმე მეკავშირე თავგამოდებით ცდილობდა მოსკოვთან, დღეიწიის, კორპუსისა და არმიის შტაბებთან დაკავშირებას, მაგრამ ბატარეები არ გვეყოფნიდა, რომ მიმღებს ნორმალურად ემუშავა. საათში ერთ სიტყვას თუ დაიჭერდა და ისიც, ვინ იცის, ვის მიერ

გადმოცემულს. ყველა ტალღაზე გერმანელთა მჭახე ბრძანებები ისმოდა. რადიოტალღებზეც ისეთივე ომი იყო გაჩაღებული, როგორც დედამიწაზე. მეკავშირეები მაინც გულმოდგინედ განაგრძობდნენ თავიანთ საქმეს, მიწაზე გართხმულნი ყურს არ აშორებდნენ მისუსტებულ მიმღებს, რომელიც ხან გულისწამლებად წრიბინებდა, ხან გაკაპასებული წიოდა, ხანაც მომაკვდავივით ხრიალებდა.

როგორც იქნა, შუადღისას მოსკოვი დავიჭირეთ. რადიომიმღებთან გარინდულ ზემდეგს ძლივს ესმოდა დიქტორის ხმა. მან მხოლოდ საბჭოთა მთავრობის განცხადების ზოგიერთი წინადადება მოისმინა.

— ომია! მთელ საზღვარზე გადმოსულან!..

— ომია!... ომი!..

— ომი დაწყებულა!..

ბრძოლით ვიყავით გათანგული და მაინც გაგვიკვირდა, ომის დაწყება რომ გავიგეთ.

ნაწყვეტ-ნაწყვეტი ტექსტი, რომლის ჩაწერაც ჩვენმა მეკავშირემ მოასწრო, სანამ ძალაგამოლულ მიმღებს ხმა ჩაუწყებოდა, იმედიანი იყო. უფროსმა ლეიტენანტმა პოტაპოვმა დაჭრილები რადიოაპარატთან მოაყვანიხა, მიღებული ცნობა წაუკითხა და გაამხნევა, საცაა მაშველი ნაწილები მოვლენო.

მტრის ცეცხლი უცებ შეწყდა, სადღაც, სულ ახლოს, დანჯღრეული რუსულითა და აგდებული ტონით ვიღაც აჯლავუნდა:

→ ყურადღება! ყურადღება! მოისმინეთ გერმანიის იმპერიის „ფიურერის“, შეიარაღებული ძალების უმაღლესი მთა-

ვარსარდლის ადოლფ ჰიტლერის ოცდაორი ივნისის ბრძანება შეიარაღებული ძალებისადმი...

საბჭოთა ქვეყანას ხელშეკრულების დარღვევას აბრალე-
ბდნენ და ამას გვეუბნებოდნენ ჩვენ, ვერაგული თავდასხმის
უშუალო მოწმეებს.

ერთბაშად დაიქუხა სარდაფმა. ერთი მოსხლეტით დაიცა-
ლა ყველა ტყვიამფრქვევი, ავტომატი და შაშხანა...

მკვახე პასუხით ნირწამხდარი მტერი უმაღ ახალი გაბო-
როტებით დააცხრა ყაზარმებს, მაგრამ ახლა აღარავინ ძრწო-
და სარდაფში; ზიზლით ვიყავით გაცოფებული, ასეთმა ზიზლ-
მა შიში არ იცის.

პოლკის ხელმძღვანელობა ყოველნაირად ცდილობდა და-
კავშირებოდა მეზობელ ნაწილებსა და ქალაქში მყოფ შტაბს,
მაგრამ მტერიც არ თვლემდა. ღაბით მთელი ხაზი შუშხუნე-
ბით და პროექტორებით იყო გაჩირაღდებული, კარიბჭეებს
მტრის გუშაგები დარაჯობდნენ.

კომკავშირელმა რადისტმა მიხაილოვსკიმ და რამდენიმე
მებრძოლმა აირწინალები ჩამოიცვეს, მილები ერთმანეთს გა-
დააბეს, ბოლოზე ხის ტივტივა დაამაგრეს, ფეხზე აგურები
მიიბეს და მუხავეცის ლამიან ფსკერზე დაეშვნენ. კარგა მან-
ძილი გაიარეს და, ის იყო სიმაგრის ფარგლებიდან უნდა გა-
სულიყვნენ, რომ, მოულოდნელად, წყალქვეშა დაბრკოლებას
წააწყდნენ: გერმანელებს რკინის ღობით გადაეხლართათ მდი-
ნარე. ამოჰყო თუ არა თავი ჩვენმა მზვერავმა. მტერმა უმაღ
თვალი ჰკიდა, პროექტორი მიანათა და ტყვია დააყარა. რკი-
ნის ჯებირთან თავდამსხმელებს საგანგებო საგუშაგო ჰქონდათ
მოწყობილი. წყალქვეშა მზვერავები უშედეგოდ დაბრუნდნენ
ნაწილში.

84-ე პოლკის კომისარი ეფიმ ფომინი რაღაც იღბლად გადარჩენილი რადიოგადამცემით დიდხანს ცდ-ლობდა ჩვენი შტაბებისათვის ეცნობებინა სიმაგრეში შექმნილი მდგომარეობა, მაგრამ დაშიფრული ტექსტები უპასუხოდ რჩებოდა. ბოლოს მტრის თვალისაახვევად კომისარმა ღია ტექსტი მოაშადა: „ლაპარაკობს ციხე-სიმაგრე. ჩაბმული ვართ ბრძოლაში. საბრძოლო მასალა საკმაოდ გვაქვს. დანაკლისი უმნიშვნელოა. მოველით მითითებებს! გადავდივართ მიღებაზე!“

ამ ტექსტს განუწყვეტლივ იმეორებდა რადისტის, მაგრამ პასუხი არ ჩანდა.

ვფიქრობ, არაფერია ომში ისე საშიში, როგორც ვითარების გაურკვეველობა. მაშინ მეომარი ხელ-ფეხშეკრულსა ჰგავს. მტერი ათასგვარ ხმას ავრცელებს და ჭორი ელვის სისწრაფით ედება ყველას.

ვილაცამ თქვა:

— გვიღალატეს, ბიჭებო! პოლკოვნიკი მატვეევი მტრის მხარეზე გადასულა, ომის დაწყებისთანავე ჩაპბარებია გერმანელებს!...

მალე ახალი ცნობა გავრცელდა: მატვეევი და მისი ოჯახის წევრები ომის დაწყებამდე ამოუხოცავთ დივერსანტებსო.

საღამოს სულ სხვა ხმა დაირხა:

პოლკოვნიკი ქალაქის გარეუბანში იბრძვის. განთიადისას დიდი რაზმი შეუდგენია, იერიშზე გადასულა და ახლა ხიშტ-შემართული მოუძღვის თავის ნაწილს, საცაა სიმაგრეშიც შემოვთაო.

ამასვე ამბობდნენ კომკავშირის კომიტეტის მდივან ოსა-დჩიზე.

პოლკის მეთაურის ნამდვილი თავგადასავალი მე მხოლოდ

1959 წელს გავიგე. საბჭოთა კავშირის გმირმა. მაიორმა გავ-
რილოვმა მიაშობო, რომ ომის წინ, დივიზიის ზოგიერთ ნაწილ-
თან ერთად მატვეევი ჩვენი პოლკის ერთი ბატალიონით სას-
როლეთზე იმყოფებოდა. მტერი რომ შემოიჭრა, დივიზიის
მეთაურის ბრძანებით პოლკოვნიკი იერიშზე გადავიდა, მედგ-
რად მიუძღოდა წინ თავის ათასეულს და ხელჩართულ ბრძო-
ლაში დაიღუპა.

როგორც აღვნიშნე, ამ ცნობამ იმავე დღეს შემოაღწია სი-
მაგრეში; ჩანს, იმ ბრძოლის რომელიღაც მონაწილემ მოახერ-
ხა ჩვენთან მოსვლა; სამწუხაროდ, არ ვიცი, ვინ იყო.

ამ ბოლო დროს გამოირკვა, რომ პოლკოვნიკ მატვეევის
რაზმში, რომელიც ხიშტით მოიკვლევდა გზას სიმაგრისაკენ,
ქართველებიც იბრძოდნენ. მათ შორის განსაკუთრებით თავი
გამოიჩინა მიხეილ მუმლაძემ.

მტერს არც ქალაქი დანებებია უბრძოლველად. განსაკუთ-
რებით მძაფრი შეტაკება მოხდა ბრესტის სადგურზე, სადაც
ზემდეგ ბასოვის მეთაურობით საბჭოთა ჯარისკაცების მცირე
ჯგუფი მთელი კვირა უმკლავდებოდა გერმანელებს.

ჩვენი პოლკის სკოლას, რომელსაც კაპიტანი ალექსანდრე
ჯიჯიშვილი მეთაურობდა, ომმა ქიმიური დასახლების მახლობ-
ლად, პოლიგონზე მოუსწრო. ოცმეთაურის მოადგილის —
გენადი ჭანტურიძის გადმოცემით, გადარჩენილ კურსანტებს
ზემდეგი ტუტიაევი ჩადგომია სათავეში. რაზმი ჯერ ქალაქში
შეჭრილა და დიდი ზარალი მიუყენებია მტრისთვის, შემდეგ,
ჩრდილო-აღმოსავლეთის მხრიდან სიმაგრეში შემოსვლა უც-
დია. მიწაყრილთან გაჩაღებულ ბრძოლაში ეფრეიტორებს —
ყაბარდოელებს უჩიავესა და ბალაჩიევს ხელისტყვიამფრქვე-
ვით ორი თვითმფრინავი ჩამოუგდიათ. კურსანტებმა სიმაგრე-

ში შემოსვლა ვერ შეძლეს, მაგრამ თითქმის ორი კვირა იბრძოდნენ ჩრდილოეთის კარებთან.

პოლკის სკოლის სერჟანტი, საგარეჯოელი ნ. მ. რემიზოვი, რომელიც 21 ივნისს, ღამით, ყარაულის უფროსის მოადგილე იყო ტირასპოლის კარიბჭესთან, მტრის რაზმებთან შეტაკების შემდეგ, მეორე ბატალიონის მეთაურის, უფროსი ლეიტენანტი მამჩიკის ჯგუფს შეერთებია და ხელჩართული ბრძოლებით გზა გაუყვლევიან ქიმიური დასახლებისაკენ, სადაც თავისი ნაწილი ეგულებოდა. რამდენიმე დღის შემდეგ ეს რაზმი ქალაქიდან გასულა და ჩვენი პოლკის ნარჩენებთან გაერთიანებულა.

* * *

24 ივნისს, იერიშზე მიმავალმა ასათიანმა მომადახა, ჩვენი პარტიული კომიტეტის მდივანს ივანე პოჩერნიკოვს თავი მოსუქლავსო.

იმავე დღეს ეს ცნობა სხვებმაც დაადასტურეს. თანაც დაუმატეს: პოჩერნიკოვმა ჯერ ცოლი მოკლა და მერე თავი მოიკლაო.

ამ ამბავმა ისეთი შთაბეჭდილება მოახდინა, რომ მას შემდეგ გონებიდან აღარ მშორდებოდა. შემდეგ, თამარ ჯიჯიშვილს პირველი შეხვედრისთანავე პოჩერნიკოვების ამბავი გამოვკითხე.

აი, რა მიაშბო მან:

—პოჩერნიკოვები და ჩვენ ახლო მეზობლები ვიყავით: მერვე კორპუსში ჩვენ ვცხოვრობდით, მეცხრე კორპუსში — ისინი, მეორე სართულზე ეკავათ ერთი ოთახი.

ივანე ჩემი ქმრის განუყრელი მეგობარი იყო და შურა (ალექსანდრა) პოჩერნიკოვა ხშირად მოდიოდა ჩვენსას. მოიყვანდა თავის პატარებს — ალიკოსა და ნინას, მთელ დღეს მხიარულად ვატარებდით: ვმასლაათობდით, ვსაქმიანობდით. ზოგჯერ მე გადავიდოდი იმათსას. ალიკო ჩვენი თამაზის ტოლი იყო, გოგონა კი ერთი წლით უფროსი იქნებოდა.

სანატრელი ოჯახი ჰქონდათ. შურა მეტად კეთილშობილი, სათნო ქალი იყო. ხშირად მეტყოდა ხოლმე: არაჩვეულებრივი ქმარი მყავს, ბედნიერი ვარო. იმ გაზაფხულზე, ოფიცერთა სახლში ჭრა-კერვა შეისწავლა და შვილებს დიდი გულმოდგინებით უყერაუდა პაწაწინა შარვალ-კაბებს.

საცხოვრებელი კორპუსები ციტადელთან ერთად დაბომბეს. მაშინვე შიშველ-ტიტველნი დერეფანში გამოეცვივდით. პოჩერნიკოვები ჩვენს პირდაპირ ცხოვრობდნენ და გარკვევით მოჩანდა, რა ხდებოდა იქ...

შურა საცვლებისამარა მიიჭრა შვილებთან, ვანიამ ბავშვის ტანსაცმელს დაავლო ხელი და ცოლს ვაუწოდა. ქალმა საჩქაროდ მოამზადა კაბა ტიტველი გოგონასათვის გადასაცემლად, მაგრამ ბომბის დაცემისაგან სახლი ორად გაიპო და გრილით წამოსულმა კედელმა დედას ხელიდან გამოსტაცა შვილები. ბავშვები აგიზგიზებულ ნანგრევებში ჩაიმარხნენ, უმწეოდ ხელგაწვდილი მშობლები კი წითლად მოლაპლაპე ნაპრალთან დარჩნენ, გაოგნებულნი და თავზარდაცემულნი. ეს მოხდა ომის პირველსავე წუთებში.

სხვათა შორის, იმავე კედელმა დაიტანა საბჭოთა კავშირის გმირის სოტნიკოვის მეუღლე კლარა, მასთან სტუმრად მყოფი ფეხმძიმე ქალი, ლეიტენანტ ვინოგრადოვის ავადმყოფი

დღდა და ბევრი სხვა. ანანიაშვილის ოჯახი რაღაც სასწაულით გადაურჩა ცოცხლად დამარხვას.

კედელი რომ ჩამოინგრა, ივანე პოჩერნიკოვს ყუმბარის ნატეხი მოხვდა მარჯვენა საფეთქელში და სახე ბალიშივით გაუხდა. შურას ფეხი მოამტვრია ნამსხვრევმა.

ერთ ხანს ორივენი რეტდასხმულივით მიჩერებოდნენ ერთმანეთს. პოჩერნიკოვს გოგონას ფეხსაცმელი შერჩენოდა ხელში. მალე შურა აალებულ, კედელჩამორღვეულ ოთახში შებრუნდა, შეიღების ალბომი და ბიჭის შარვალი გამოიტანა. ერთ ხანს დერეფანში იდგნენ და ბავშვის ტანსაცმლით ხელში, უხმოდ, სახეშეშლილი შეჰყურებდნენ ერთმანეთს, მერე უღონოდ ჩაიკეცნენ კიბის საფეხურებზე. კარგად მახსოვს: შურა ზემოთ, მეოთხე საფეხურზე იჯდა, ივანე — პესამეზე.

წინა ღამით მზვერავეები ჩვენი კორპუსის სხვენზედაც ყოფილიყვნენ ჩასაფრებულნი. გათენდა თუ არა, სახელოაკეცილი, ავტომატომარჯვებული ჰიტლერელები ოთახებში შემოვარდნენ; მამაკაცებს დაეძებდნენ თურმე. დერეფანში მხოლოდ ქალები და ბავშვები რომ დაგვინახეს, მაშინვე კარადებს ეცნენ, წიხლით გადააყირავეს, საწოლები გადააქოთეს, ყველაფერი არივ-ღარიეს. ჩვენთან და ივანოვებთან რომ დაამთავრეს ჩხრეკა, პოჩერნიკოვების დერეფნისაკენ გაემართნენ.

ფაშისტებს რომ მოჰკრა თვალი, გასისხლიანებული, სახედასიებული ივანე ფეხზე წამოვარდა და რევოლვერი დაახალა. წინმიმავალი ახმახი გერმანელი უსულოდ გადავარდა ნანგრევებში, მეორე ჰიტლერელმა გაქცევა სცადა, მაგრამ კომისარმა ზურგში დაახალა ტყვია... ამის შემდეგ რამდენიმე გასროლა კიდევ გაისმა და კიბესთან ჩოჩქოლი ატყდა... ივანე დარ-

წმუნდა, რომ ხსნა აღარსად იყო... რევოლუერშიც ორად ორი ტყვია დარჩენოდა: ერთი ცოლს ესროლა და მეორე შუბლში მიირტყა...

* * *

სარდაფი ყურმოკრული ცნობებით საზრდოობდა და ტყუილი და მართალი ერთმანეთში იყო არეული.

ყოველგვარ დავალებას მოხალისეები ასრულებდნენ. მათვე, მტრის განუწყვეტელ ცეცხლში, პირველსავე დღეს შესძლეს 84-ე პოლკთან კავშირის დამყარება, საიმედოდ გაჭიმეს მავთულის ხაზი, რომელიც მეორე ბატალიონის სადგომთან გადიოდა და ჩრდილოეთიდან უერთდებოდა მეზობელ ნაწილს. მეკავშირეები მიწაში ღრმად სდებდნენ მავთულს, რომ ადვილად არ დაზიანებულყო, მაგრამ მაინც ხშირად წყდებოდა და მეკავშირეები ყუმბარების გრიალში წამდაუწუმ გამოდიოდნენ დაზიანებული მავთულის მოსაძებნად და შესაკეთებლად.

მთელი სარდაფი ზეიმობდა მეზობელ პოლკთან დაკავშირებას.

იმავე საღამოს საყურადღებო ტელეფონოგრამა მივიღეთ: — ტყვეების ჩვენებით, მტერს განზრახული აქვს განთიადზე სამმხრივი დარტყმით შეავიწროვოს გარემოცვის რკალი, უშუალოდ ალყა შემოარტყას სარდაფებს, საბოლოოდ გათიშოს მებრძოლი ნაწილები და სარდაფებში შემოჭრით დაამთავროს სიმაგრის აღება.

ცნობაში აღნიშნული იყო მტრის განლაგების პუნქტები და

შეტევის მიმართულებანი, რაც დიდად დაეხმარა ჩვენს შტაბს.
ასე უკავშირდებოდნენ ერთმანეთს სიმაგრეში გაფანტუ-
ლი ნაწილები.

* * *

სასაზღვრო ხაზის სხვა ადგილებზეც ჩვენი მეომრები მედ-
ვარ წინააღმდეგობას უწყევდნენ მუხანათურად შემოჭრილ
მტერს.

ამას წინათ გოგია გულისაშვილისაგან გავიგე, თუ როგორ
იბრძოდნენ ჩემი თანაპოლკელები (მათ შორის ბევრი ჩემი
ნამოწაფარი) ბრესტის სასაზღვრო რაიონის ერთ-ერთ გამა-
გრებულ უბანზე, 222-ე მსროლელთა პოლკის ნაწილებთან
ერთად.

ასეულს, რომელშიც მსახურობდნენ გ. გულისაშვილი,
ლ. გახუტელაშვილი, მ. ოთიაშვილი, ი. პატარაშვილი, გ. სოზა-
შვილი, ნ. დიღმელაშვილი, გ. მეზვრიშვილი, ს. მარიდაშვილი,
გ. დათიშვილი, შ. ქვათაძე, პ. საცერაძე, ძმები კაპანაძეები,
გრ. კვეტენაძე, ს. სონიშვილი, მ. მეკოკიშვილი... — ომმა
ბუგის ნაპირებზე, თეთრ კარვებში მოუსწრო.

— მტერმა მოულოდნელად დაგვაყარა ყუმბარები, —
გადმომცა გოგია გულისაშვილმა. — გერმანელები საჩქაროდ
გადმოდრიოდნენ მდინარეზე, წინ მოიწევდნენ...

სამასიოდე მეტრის დაშორებით რკინა-ბეტონით ნაგები სა-
ცეცხლე წერტი გვქონდა. მტერს კარგად გაეთვალისწინებინა
მისი მნიშვნელობა და მისასვლელი გზა ცეცხლით დაეხშო.

პირველ დარტყმას მეთაურთაგან მხოლოდ ლეიტენანტი

ბორისენკო გადაურჩა. ფინეთის ომიდან ის ცალხელა დაბრუნდა და ბატალიონში სამეურნეო ნაწილს განაგებდა.

ბორისენკომ სასწრაფოდ მოაგროვა გადარჩენილი მებრძოლები: ი. პატარაშვილი, ს. სონიშვილი, ნ. მეკოკიშვილი და სხვები.

— ტყვიამფრქვევის წერტი ახლავე უნდა დავიკავოთ! ვის შეუძლია წასვლა? — მკაცრად შეათვალიერა მან დაჭრილი მემომრები.

— მე წავალ, ამხანაგო ლეიტენანტო! — სიტყვის დამთავრებაც არ დააცალა ფშაველმა იოსებ პატარაშვილმა. მეთაურს თვალეები გაუბრწყინდა. პატარაშვილს მეკოკიშვილი და ლისიუკი გაჰყვნენ.

ისინი ხოხვით გაემართნენ საცეცხლე წერტილსაკენ, რომელსაც მტერი უახლოვდებოდა.

— დაგვიხსენით და დაგვიხსენით! — მიამახა ბიჭებს ლეიტენანტმა.

მას იმედი ჰქონდა, რომ გადარჩენილ ჯარისკაცებს თავს მოუყრიდა, უკან დაიხევდა და იქ რომელიმე სხვა ჯგუფს შეუერთდებოდა; შემდეგ გაძლიერებული ნაწილით კონტრიერიშზე გადავიდოდა და საცეცხლე წერტილსაც დაიხსნიდა.

— თუ ვერ მოგვისწრებთ, შინ მაინც გააგებინეთ ჩვენი ამბავი! — დაიყვირა ი. პატარაშვილმა და ტყვიასავით გავარდა.

ლეიტენანტი ღურბინდით გასცქეროდა ბრძოლის ველს.

— მოკლეს! — ჩაილაპარაკა მან, როცა ერთი მებრძოლი გულადმა გაიშხლართა მიწაზე.

მალე მეორეც დაეცა.

მიწას გაკრული პატარაშვილი სწრაფად მიიწევდა წინ. მაგ-

რამ მოწინააღმდეგემ მაინც შეამჩნია და ძლიერი ცეცხლი დაუშინა. ფშაველი ფეხზე წამოვარდა, თვალის შევლება ძლივს მოვასწარით, რომ საცეცხლე წერტთან დაეცა, — განაგრძობს გ. გულისაშვილი.

— დალახვროს ეშმაკმა! ესეც მოკლეს! — სასოწარკვეთით წამოიძახა ლეიტენანტმა, მაგრამ სიტყვა დამთავრებული არ პქონდა, რომ ჩვენი ტყვიამფრქვევი მრისხანედ ალაპარაკდა და მტერს გზა გადაუკეტა. ~~გთქვამოვ~~ გადავეხვიეთ ერთმანეთს.

იმ წაპს ყველანი ვირხოვეცისაკენ დავიძარით. გზად სასიკვდილოდ დაჭრილ გიორგი სოზაძევილს მოვკარი თვალი. შეველა აღარ შეიძლებოდა.

ლამე ტყეში გავატარეთ. სხვადასხვა ნაწილებიდან გადა-რჩენილ ჯგუფებთან გავერთიანდით და გარიჟრაჟზე კონტრიერიშზე გადავედით. რამდენიმე დღეს არ დამცხრალა ბრძოლა. ბოლოს გერმანელებმა ზურგიდან წამოუარეს საცეცხლე წერტს და ალყა შემოარტყეს, მაგრამ პატარაშვილის ტყვიამფრქვევის კაკანი მანამ არ შეწყვეტილა, სანამ ფაშისტებმა ბენზინი არ შეასხეს და ხელყუმბარებით ცეცხლი არ გაუჩინეს ჯიხურს. ასე დაიღუპა თავდადებული ფშაველი მეტყვიამფრქვევე: რომელმაც საზღვრისპირა ბუნკერიდან დიდი ზარალი მიაყენა მტერს. სხვები ხელჩართულ ბრძოლაში დაეცნენ. იქ მყოფთაგან გიორგი გულისაშვილის, გრიგოლ კვეტენაძის და შოთა ქვათაძის გარდა არავინ გადარჩენილა.

მეტად მძიმე მდგომარეობაში აღმოჩნდა ჩვენი პირველი ბატალიონი, რომელიც ომის წინა დღეს ლესნაიას რაიონში დავტოვე. მებრძოლებს ზედ მდინარე ბუგის ნაპირზე, თეთრ კარვებში ეძინათ და ადვილი წარმოსადგენია, რა მოუვიდოდათ პირველ საარტილერიო თავდასხმისთანავე; ფაშისტებმა



მეორე ასეულის მებრძოლთა ჯგუფი. დვანან: მარცხნიდან — ივანე მანუკაძე, ვადაკორია, აკაკი შევარდნაძე. სხედან: რომან ორაგველიძე, დავით ჩხაიძე, სევერაან ხელაძე.

ერთი დარტყმით გააცამტვერეს იქაურობა და არც გამოუღვიძიათ, ისე დაიღუპნენ: ბუკუ კალატოზი, შოთა კვეტენაძე. შალვა გოგეშვილი, დავით ნეპიერიძე, ბეგლარ ავალიანი, ვ. კილაძე, ლვინჯილია და... ვინ გაიხსენებს, ვინ ჩამოთვლის ყველას... შემთხვევით თუ ვინმე გადაურჩა იმ საზარელი განკითხვის დილას!.. ჩვენი ასეულის მეთაურს — უმცროს ლეიტენანტ კოლესნიკოვს სამი თვის შემდეგ ბილაპოდლიასკაში შევხვდით, მაგრამ ისეთ ვითარებაში, რომ არაფრის შეკითხვა არ შეიძლებოდა... არ ვიცო, რა ბედი ეწია ზემდეგ ლიტვინს... მიხაკო ფირცხალაიშვილმა და პირველი ასეულის პარტორგმა

ვანო კეველიშვილმა მოახერხეს უკანდახევა და რეგულარულ ნაწილებთან შეერთება.

ჩვენი ბატალიონის ერთმა ოცეულმა, რომელიც სასაზღვრო ხაზის მახლობლად ასაფეთქებელ ნივთიერებათა დიდ საწყობს იცავდა, მთელი დღე შეინარჩუნა თავისი პოზიცია და მტერს მნიშვნელოვანი ზარალი მიაყენა. სერჟანტმა აკაკი შევარდნაძემ და საგარეჯოელმა პავლე სტრუჩალინმა დაზვის ტყვიამფრქვევით რამდენიმე საათს შეაკავეს მტრის იერიში სტრატეგიულად მნიშვნელოვან გზატკეცილსა და რკინიგზის ხაზზე.

* * *

ბრესტში მცხოვრები მეთაურები ომის დაწყებისთანავე გაიქცნენ სიმაგრისაკენ, თავიანთ ნაწილებთან შესაერთებლად, მაგრამ ქალაქიდან გასვლა ძალიან ძნელი იყო.

აღექსანდრე ხარაბაძის გადმოცემით, ციხე-სიმაგრის გზაზე ხელჩართულ ბრძოლაში დაეცა 84-ე პოლკის ლეიტენანტი მამია გელბახიანი. მას 21 ივნისს მეუღლის ოჯახში ეძინა, ქალაქიდან ექვსი კილომეტრის დაშორებით. იქვე, ჩასაფრებული მტრის ნაწილებთან ბრძოლაში, მძიმედ დაიჭრნენ 125-ე პოლკის უფროსი ლეიტენანტი ინჯია და ლეიტენანტი აბდულა უსუბოვი.

სერგო ინჯია 125-ე პოლკის მე-2 ბატალიონის მე-6 ასეულის მეთაური იყო. იმ დროს მას უკვე დიდი მხედრული გამოცდილება ჰქონდა — მონაწილეობდა ხასანის, ფინეთისა და დასავლეთ ბელორუსიის განთავისუფლებისათვის ბრძოლებ-

ში. მასთან ერთად 22 ივნისს, დილით, სიმაგრეში შემოაღწია ჩვენი პოლკის ოცმეთათრმა ვალოდია უგრეხელიძემ.

უფროსი ლეიტენანტი ივანე უჩიძეც ქალაქში ცხოვრობდა ცოლ-შვილით. ომის დაწყებისთანავე იგი ციხე-სიმაგრისა-ენ გაეშურა თავის ნაწილში, მაგრამ არავინ იცის, მიაღწია იქამდე თუ გზაში დააღუპა.

მოსახლეობის შედგარმა წინააღმდეგობამ შტაბს საშუალება მისცა დაეწყო საშესდრო მოსამსახურეთა ოჯახების ევაკუაცია. მაგრამ ბრესტადან გასვლა თათქმის შეეძლებელი იყო. ქალებითა და ბავშვებით სავსე ეშელონები ფაშისტებმა მოსპეს. როცა ეძლეო უჩიძემ თავისი ოთხი ბავშვი — ვენერა, იური, თამარი და ცისანა ავტომანქანასთან მიიყვანა, მტერმა გაძლიერებული შეინა ამ უბანს. ეკვლაფერი აირია, ბომბების ვრცელი ნივთები მოულოდნელად დაიძრა. დედამ გრძნობა დაკარგა და მოწიფი, რომ მოვიდა, შვილები მოიკითხა. ორი წლის თამარი აღარსად იყო. უგზოუყვლოდ დაიკარგა.



მტერი ჩვენს სერთვისსაც იოლად გადათელავდა. ჩრდილოეთ კენ უღსე რომ წაწყდომოდა შეუზოვარ წინააღმდეგობას. პირველი გასროლისთანავე გაფრილოვმა მეთაურთა საეროო საცხოვრებელში დატოვა ავადპოფი ცოლი და პატარა შვილი. ტანთაუტმელი გაიქცა შტაბისაკენ, რომ გადაერჩინა პოლკის საბრძოლო დროშა და საიდუმლო დოკუმენტები, მაგრამ მუხავეცის მეორე ნაპირს რომ მიატანა, შტაბი უკვე იწვოდა.

განთიადის ნისლში, ბულსა და მტვერში დაბნეული მებრძოლები მიმორბოდნენ. გავრილოვი აჩერებდა მათ. ასე შეაგროვა რამდენიმე ათეული და სიმაგრის ჩრდილოეთის გასასვლელისაკენ წაიყვანა. 44-ე პოლკს, რომელსაც იგი მეთაურობდა. საბრძოლო განგაშის შემთხვევისათვის იქ ჰქონდა მიჩენილი ადგილი. ეს გზა გადაჭრილი აღმოჩნდა. ბუჩქნარში ჩასაფრებული მეთაურობები გზას ფნიზლად უთვალთვალედნენ. მტრის რაზმებს ჩრდილოეთის კართან უკვე მიწის ზღუდეც ეკავათ. რომელიც ქალაქის მთავარ გასასვლელს წარმოადგენდა. ამ ადგილს ომის პირველ წუთებშივე ასობით მებრძოლი მაწყყდა სიმაგრის სხვადასხვა უბნიდან, მათ შორის მეთაურებიც იყვნენ. გავრილოვმა ისინი თავის მცირე რაზმს შეუერთა. ასეულებად დაჰყო, ჩრდილოეთისა და ჩრდილო-აღმოსავლეთის მიწაყრილთან განალაგა.

აღმოსავლეთის ფორტი გავრილოვის რაზმის თავდაცვის მთავარ ბურჯად გადაიქცა. აქ იდგა 393-ე ცალკეული საზენიტო-საარტილერიო დივიზიონის მცირე გარნიზონი, რომელსაც სათავეში ჩაუდგა უფროსი ლეიტენანტი შრამკო.

გავრილოვის რაზმი უკვე მზად იყო, როცა მტერმა გარეკედელსა და დასავლეთის ფორტზე იერიში მიიტანა.

125-ე პოლკში იბრძოდნენ და სიმაგრის ჩრდილოეთ მხარეს იცავდნენ: სერგო ქიტიაშვილი, იოსებ რთველიძე, კოლია ნიუარაძე, გიგლა ბურდიაშვილი, გოგია მოსიაშვილი, აგეო სურუმოვი, ბიცუევი...

ძლიერი ბრძოლები გაჩაღდა კობრინის კართანაც, სადაც 98-ე ტანკსაწინააღმდეგო საარტილერიო დივიზიონი იბრძოდა.

სიმაგრის ვრცელ ტერიტორიაზე მიმობნეული ჩვენი გამაგ-

რებული პუნქტები შეუპოვრად დახვდნენ შემოსეულ მტერს და ჯერ არავინ იცოდა, საით გადაიხრებოდა ბედის სასწორი.

ვიცოდით მხოლოდ, რომ ომის გრიგალმა მუხანათურად გადაიჯირითა საზღვარი და სადღაც შორს, აღმოსავლეთისაკენ მიიქარგა. საზღვარზე ანთებული სიმაგრეა დარჩა. გადათელილ მიწაზე განუწყვეტლივ მიედინებოდა მტრის ახალ-ახალი კოლონები, ისმოდა აღმოსავლეთს მიმავალი უცხო ტანკების რახრახი, იტყოდი, მთელი დასავლეთი აქეთ დაძრულაო.

სამშობლოზე ფიქრი გვავიწყებდა განსაცდელს.

* * *

ის დღე წყნარად გათენდა. მზის ამოსვლაც შევამჩნიეთ. ნაცრისფერ ბოლქვებში ალაგ-ალაგ ცის სილურჯე გამოკრთა. ნანგრევებს ნელა შორდებოდა კვამლის ბადე... გრილმა ნიავმა თითქოს სარდაფშიც შემოაღწია, ოცნება გამოაცოცხლა, ნაზი გაზაფხული და შორეული სიმშვიდე მოგვაგონა...

მაგრამ მყუდროება ხანმოკლე გამოდგა.

დილის გარინდება მექანიზებული ბატალიონის მხრიდან ტყვიამფრქვევის კაკანმა დაარღვია. ჩვენებმა მაშინვე უპასუხეს. მოწინააღმდეგე დაცლიდა რამდენიმე ჯერს და მიყუჩდებოდა. სამაგიეროს რომ მიიღებდა, უფრო ხანგრძლივად დააწვებოდა სასხლეტს: ასე გაგრძელდა ერთ ხანს. მერე უმცროს მეთაურთა სკოლის ჩასასვლელთან ტყვიამფრქვევა უსასოღო შეიტკრციალა და დადუმდა. მტერმა უმაღლესი განუწყვეტელი ცეცხლი დაუშინა ჩასასვლელს, მაგრამ სარდაფი პაუზს აღარ იძლეოდა.

მახლობელი კუთხიდან ლეიტენანტის ბრძანება გაისმა:

— ვის შეუძლია მემიზნე შეცვალოს? ჩქარა!

ორ მებრძოლთან ერთად იქით გავიქეცი.

ვხედავ: საკინძეჩამოგლეჯილი მიმწოდებელი იატაკზე გაწვლართულ ურალელს პოზიციიდან მიათრევს.

— წაიყვანეთ სანპუნქტში! — მშვიდად წარმოთქვა ლეიტენანტმა, როცა ახალმა მემიზნემ ტყვიამფრქვევთან ადგილი დაიკავა და კარგა ხნის წვალუბის შემდეგ მოწინააღმდეგეს ჯერი მიაგება.

— აღარ ღირს, ამხანაგო ლეიტენანტო!

— წაიყვანეთ მაინც!

ორმა მებრძოლმა ურალელს ხელი ჩაავლო და შეეცადნენ ფეხზე წამოეყენებინათ, მაგრამ ჭაბუკას დამძიმებული თავი ფილაქანს დაეხალა.

— აღარ ღირს წაყვანა! სადეთქელში მოურტყამთ...

— ჯრუტი ბიჭი იყო! — ჩაილაპარაკა მწითურმა სერჟანტმა. — თავი სულ გარეთ ჰქონდა გამოყოფილი. ჩვენები მოვლენო. პირველი მივეგებებიო...

მიმწოდებელმა უკმაყოფილოდ გადმოხედა სერჟანტს.

— ნუ ამბობთ მაგას, ის ძალიან გულადი... — სათქმელი ვეღარ დაამთავრა. სიტყვა ყელში გაეჩხირა.

ექვანი საჩქაროდ მოვიდა, ხელი შევაშველე და ქერა ბიჭი რომელსაც საფეთქელთან სისხლის ნაკადი შედედებოდა, სამეთაურო პუნქტთან სახელდახელოდ მოწყობილ სანიტარულ ნაწილში მივიტანეთ.

სარდაფის ეს ნაწილი დაჭრილებით იყო სავსე. კრილობა ზოგს ბინტით ჰქონდა შეხვეული, ზოგს ტოლადებით, ზოგსაც ხალათის ნახევით. მოწყალუბის დები, რომელთა შორის ჩვენ

პოლკის სამხედრო ფერშალი ვალენტინა რაევსკაია: ე იყო, და-
ჭრილებს იარაღს უხვევდნენ. მაგრამ დასახარებელთა რიცხვი
ყოველ წუთს მატულობდა, ბინტი და წამალი კი მალე გამოი-
ლია. აღარც დახეული თეთრეული და ფეხსახვევები ჰყოფნი-
დათ... ყოველი მხრიდან შემოგვიჩიოდნენ:

— ძმობილო, ერთი ყლუპი წყალი!.. ღვთის გულისათვის...
გულგრილად უნდა ჩაგვევლო გვერდით, რადგან არსად არ
იყო წვეთი წყალი, მარტო თანაგრძნობით კი რას გააწყობდი...
გარშემო მდინარე გვივლიდა და უწყლოდ კი ვიტანჯებო-
დით... ძალიან რომ გაჭირდა, ზოგან სარდაფის იატაკს დაუ-
წყეხ თხრა, იქნებ ჭკას რასმე წავაწყდეთო.

ერთხელ სარდაფში რამდენიმე კარდალა წყალი გაჩნდა.
წვეთწვეთობით გავუნაწილეთ ბავშვებსა და დაჭრილებს.
ერთმა ყლუპმა მწყურვალენი უფრო გააბელა და კვლავ ყო-
ველი მხრიდან ისმოდა გათანგული მომაკვდავების მუდარა:

— ძმობილო, ერთი წვეთი წყალი... ღვთის გულისათვის.

აი, კედელს მიყრდნობია მუცელში დაჭრილი სერჟანტი,
რომელიც ოცი წლით მაინც დაბერებულა ამ სამ ღღეში და,
ექიმის სიტყვით, მალე მოკვდება, რადგან შიგნეულობა დას-
ჩირქებია. იგი წამდაუწუმ კითხულობს:

— რაო, მოდიან ჩვენები?..

— ჯერ არაფერი ისმის.

დაჭრილი გინებით იოხებს გულს. სანუგეშოს აბა, რას
ეტყვი!..

სხვა დროს სარდაფის იმ კუთხეში იშვიათად მივდიოდი,
მაგრამ ახლა ურალელის დატოვება მიმიძიდა.

ურალელს ხელი წავავლე და კუთხეში მივათრიე. იქ კილაც
ხალათის კალთაში ჩამებლაუჭა:

— ჩვენიანი ხარ?

— ჰო!

) — ძმობილო, ღვთის გულისათვის, მესროლე... მომასვენე...
ალარ შემიძლია...

ხმა არ გამიცია.

— გევედრები, ძმობილო! კაცი არა ხარ? ალარ შემიძლია
მეტი!

ორივე ფეხი მოგლეჯილი ჰქონდა. კისერშიაც გაევლო
ტყვიას.

მომაკვდავის ხელი ძლივძლივობით მოვიშორე და სირბი-
ლით გავეცალე იქაურობას. მან ზიზღით მომამახა:

— ლაჩარო!

სულთმობრძავნი ნერვულად მოითხოვდნენ, რომ გვამები
დაუყოვნებლივ გაგვეტანა სარდაფიდან.

ურალელი ისევ თავის ტყვიამფრქვევთან მიიტანეს.

— გაჩიჩქნეთ მიწა, იქნებ ჩაფლათ, სანამ სიწყნარეა, —
თქვა ლეიტენანტმა.

ორმა მებრძოლმა ძლივს აათრია კიბეზე ქერა ბიჭი. ჩვენი
ყაზარმის შესასვლელთან ნახევრად შიშველმა მებრძოლებმა
სამარის გათხრა დაიწყეს, მაგრამ მოწინააღმდეგემ ტყვია და-
გვიშინა. მებრძოლები ცდილობდნენ ჩქარა ჩაეფლათ ბიჭი კო-
ჭებამდე ამოჩიჩქნილ საფლავში და ფაციფუცით აყრიდნენ.
მიწას.

მანც ვერ მოათავეს საქმე...

ციტადელს ნაცნობი გუგუნის უახლოვდებოდა: კუთვით
მოდიოდნენ მომაკვდინებელი ტვირთით დამძიმებული ბომბ-
დამშენები.

მებრძოლებმა საჩქაროდ მიატოვეს ურალელის საფლავი და სარდაფში ჩაცვივდნენ.

— იწყება! — წაილაპარაკა ერთმა მათგანმა და მოწყვეტით დაჯდა კუთხეში.

არავინ გახშიანებია. სუნთქვაშეკრულნი ველოდით გარდუვალ საშინელებას. აღარ კენესოდნენ დაჭრილები, აღარ ტიროდა ორი წლის გოგონა სარდაფის კუთხეში, უფრო მაგრად ეკვროდა შეშინებულ დედას. მსროლელებმა საცეცხლე პოზიციებიდან ორიოდე ნაბიჯით უნებურად უკან დაიხიეს.

მოპიკირე „იუნკერსები“ წივილით დააცხრნენ სიმაგრეს. ცვივოდა მძიმე ფუგასური ბომბები. სადღაც, სულ ახლოს, ვულკანისებური გუგუნი გაისმა. მას მოჰყვა მეორე, მესამე, მეოთხე აფეთქება...

გადარჩენილნი თავქუდმოგლეჯით გარბოდნენ იმ ადგილიდან, სადაც შემზარავად ბრუნავდა კეკილი.

არავინ იცოდა, რამდენი დღე გრძელდებოდა დაბომბვა, რა დრო იყო, ან რომელი რიცხვი. მაგრამ უნდა გვეთმინა, რადგან სხვა გზა არ იყო. მტერს ჩვენი მოთმინება უფრო ახელებდა, ვიდრე ჩვენ მისი ბომბები. რა დასამალია, გვეშინოდა, ყოველ აფეთქებაზე მიწას ვეკვროდით, მაგრამ მყისვე წელში ვიმართებოდით და რაღაც დარცხვენით გადავხედავდით ერთმანეთს, თითქოს ბოღიშს ვიზღვოდით ამ აღაშინაური სისუსტისათვის და იმავე წამს ახლო მივდიოდით სათოფურებთან, უფრო ყურადღებით ვათვალიერებდით ბრძოლის ველს.

როცა დაბომბვა შესუსტდა, ყაზარმას შავსვასტიკიანი მზვერავი თვითმფრინავები შემოესივნენ. ისინი სულ დაბლა მოფრინავდნენ, თითქოს ფრთებით ეხებოდნენ ნანგრევებს, ტყვიამფრქვევებით ცხრილავდნენ სათოფურებს. ჩვენს სარ-

კმელს რომ მოუახლოვდა, ერთ მათგანს ტყვიამფრქვევთან გარინდულმა სერჟანტმა ცეცხლი გაუხსნა. გერძანელი საჩქაროდ გაბრუნდა და ჩვენი ადგილის დაბომბვაც განახლდა.

სერჟანტმა ტყვიამფრქვევი დაბლა ჩამოდგა და გაინაბა. დაბომბვა მალე შეწყდა და სათოფურთან ისევ განოჩნდა შავსვასტიკიანი თვითმფრინავი. სერჟანტმა ვერც ახლა მოითმინა, კვლავ დააყარა ტყვია. მახლობლად ძყოფმა დაჭრილმა ქალმა მეტყვიამფრქვევეს უკმაყოფილო თვალები მიაპყრო. მზვერავს არც ახლა გაუცია ხმა, მაშინვე გაგვერიდა, მაგრამ მტრის არტილერიამ დაუყოვნებლივ განაახლა სროლა.

— აკი ვთქვი, ეს შეჩვენებული ჩვენ დაგვეძებს-მეთქი! — კენესით აღმოხდა დაჭრილს.

ის იყო სათოფურთან „მესერშმიტი“ გამოჩნდა, რომ ერთბაშად აუტეხეს სროლა ტყვიამფრქვევებიდან და შაშხანებიდან. შავსვასტიკიანი ჰაერში გადაყირავდა და წონასწორობადაკარგული თვითმფრინავი ძირს დაეშვა.

— მოხვდა! — დაიყვირა დამმა.

— მუხავეცში ჩაიმსხვრა! — დაუდასტურა ვილაცამ და თვალები სიხარულით გაუბრწყინდა.

— ძლივს არ მოვარტყი!.. — კმაყოფილებით ამბობდნენ დამი, სტუკალენკო, ჩორნი და ზემდეგი, რომლებიც ამ სათოფურებიდან ისროდნენ. ყველას სჯეროდა, რომ მისი ტყვია მოხვდა მიზანში. მეც ასე მჯეროდა.

სულ მალე ამბრაზურებთან სხვა თვითმფრინავი გამოჩნდა. იგი თავხედურად ზვერაავდა ჩვენს პოზიციას, სტვენითა და განგაშით თავს გვაცხრებოდა, თითქოს დაგვეცინისო...

— ეჰ, სად არიან ჩვენი შავარდნები! — წაიჩურჩულა ცრემლმორეულმა დაჭრილმა ქალმა, — უჩვენებდნენ სეირს!..

ერთხელ მართლაც გამოჩნდა წითელვარსკვლავიანი თვით-მფრინავი. მის დანახვაზე ამოძრავდა, გამოცოცხლდა საზღაფი. ისეთი „ვაშას“ ძახილით შევეგებეთ, რომ ეჭვი არ გვებარებოდა, ხმას მივაწვდენდით ჩვენს მფრინავს. სააპორტო მოედნის თავზე საჰაერო ბრძოლა გაჩაღდა. უთვალავ მტერთან შერკინებაში „ჩაიკას“ ტყვია მალე გამოელია. გულის ფანცქალით შევეყურებდით ამ უთანასწორო ბრძოლას. შავსვასტიკიანები მალე მიიწვედნენ. სურდათ დაეტყვევებინათ უიარალოდ დარჩენილი „ჩაიკა“, მაგრამ ის ჯიქურ გაექანა მტრისაკენ, გამეტებით დაეჯახა ერთ-ერთ მანქანას, დაიმსხვრა და მტერიც დაღწა.

ასე გავხდით დიდი სამამულო ომის პირველი საჰაერო ტარანის მოწმენი.

გმარჯვებულ შავსვასტიკიანებს ტყვია დავაყარეთ. შავი მანქანები სადღაც ბუგის გაღმა ნაპირზე ჩაიკარგნენ. არც სხვა უბნებზე აპარჰაშებდნენ მტრის თვითმფრინავებს. ბომბდამშენი, რომელიც მეზენიტეებმა ჩამოაგდეს, მეთაურთა სახლების მახლობლად ჩაიშუსრა.

საჰაერო იერიში ერთბაშად შეწყდა. ყველაფერი დადუმდა. უდაბნოდ ქცეული სიმაგრე ივნისის მზეში ალაპლაპდა.

დუმილი ფაშისტური რეპროდუქტორის ხრიალმა დაარღვია. რუსულად ლაპარაკობდა: მაგრამ ხმა უცხოვ, გულამაზრზენად გაისმოდა:

— თქვენი მდგომარეობა უნუგეშოა. ალყაში ხართ გამომწყვდეული. ველარავინ გიმველით. ჩვენმა ჯარებმა დაიკავეს რიგა, ვილნიუსი, მინსკი... ახლა მოსკოვთან არიან... თქვენ ასეული კილომეტრებით ხართ მოწყვეტილი ფრონტს. დახოცეთ კომისრები, რომლებიც გაიძულებენ იბრძოლოთ და დაგვნებდით.

შაშხანების ქუხილმა ხმა ჩააწყვეტინა დიქტორს.

მტერს პასუხი არ გაუცია. მცირე ხნით მიყუჩდა. შეწყდა თუ არა ჩვენი სროლა, უფრო მკაფიოდ განაგრძო:

— თქვენი წუთები დათვლილია. რისი იმედი გაქვთ?

სარდაფმა კვლავ დაიქუხა. ომში არ არსებობს კამათის სხვა საშუალება. რეპროდუქტორის მუქარას აღარავინ უგდებდა ყურს. ორმოცდაათამდე მებრძოლი საყდარზე იერიში-სთვის მოემზადა. სარდაფმა სიმღერით გაგვაცილა.

ბრძოლის სიმღერა რისხვასავით გაისმა ჯურღმულში. აგუგუნდა სარდაფი, უნებურად ჩვენც ხმა შევუწყვეთ. იქნებ მყურება? რა არის ეს, საიერიშოდ რომ გვეძახის: „ამურის ტალღები“, „კახოვკა“ თუ „მოსკვა მაისკაია?“. ალავერდა იმანოვმა და ნიკა აბზიანიძემ კლარნეტსა და ტრომბონში ჩაჰბერეს, მაგრამ სარდაფიდან გასვლაც ვერ მოვასწარით, რომ ისინიც ჩვენ შემოგვიერთდნენ...

ალგაზრის მასწავლებელი

სარდაფში გამაგრებული სამასიოდე კაციდან უმრავლესობა ჩემი თანაპოლკელი იყო, მაგრამ ნაცნობებს მაინც იშვიათად ვხვდებოდი.

გელაშვილის ბატალიონი თუმცა საზაფხულო სამუშაოთა რაიონში ჩარჩა, ქართველები სიმაგრეებშიც ბლომად იყვნენ. თავდასხმის შემდეგ კი ბევრი მათგანი აღარ მინახავს, ახლაც არ ვიცი, რა ბედი ეწია მათ.

კაკაბელი ბიჭიც პირველი წუთიდანვე თვალთავან დამე-
ქარგა. ბევრის თავგადასავალი თანდათან ირკვევა. მაგალითად,
ბრესტის მუზეუმის მასალებიდან ჩანს, რომ აღმოსავლეთის
ფრონტზე გამირულად დაიღუპა რადისტი ვანო ზედგინიძე.

ორგანიზებული ნაწილებიდან ჩვენთან იბრძოდნენ მეკავ-
შირეები, ნალმმტყორცნელები, მუსიკოსები და ტანკსაწინააღმ-
დეგო ბატარეის არტილერიისტები.

ყველას თავისი საქმე ჰქონდა. ერთნი ტყვიამფრქვევს არ
სცილდებოდნენ, მეორენი გამუდმებით გარეთ ტრიალებდნენ.
ზოგი დაზვერვაზე მიეშურებოდა, ზოგი გუშაგად იღვავ, სხვე-
ბი კი საიერიშოდ მიდიოდნენ და უკან მობრუნების შემდეგ
სადმე მივარდნილ კუთხეში იბრუნებდნენ სულს.

აფხაზავა პირველ დღესვე შევნიშნე — სარდაფის ბნელ
კუთხეში იჯდა გარინდებული. მეორე დილითაც იქ შე-
ვამჩნიე — არ ვიცი რომელიმე ოპერაციიდან იყო დაბრუნე-
ბული თუ მთელი დღე-ღამე ასე გაატარა. მის ამხანაგებს მან-
ლობელ სათოფურებთან ეჭირათ პოზიცია და შეიძლება თვი-
თონაც მათთან ერთად იბრძოდა.

24 ივნისს, დილით, როცა მტერი გააფთრებით ბომბავდა
სიმაგრეს და სათოფურებიდან შემოპირილი სინათლე სახეში
გვცემდა, პანტელეიმონს კვლავ იმ ადგილზე მოვკარი თვალი.
გამიკვირდა. მივედი და გამოველაპარაკე.

— მორჩა! — წარმოთქვა გულგრილად და გასისხლიანე-
ბული ხელი ვიწრო, შექმუხნილ შუბლზე გადაისვა.

სათოფურში ბომბის ნამსხვრევი შემოიჭრა წივილით. უნე-
ბურად თავი დაეხარე და რამდენსამე ხანს ასე ვიყავი. პანტე-
ლეიმონი არ განძრეულა. ისევ ისე კუშტად მზირალი იჯდა.

გულმა რეჩხი მიყო, სიფრთხილე ცუდად არ ჩამომართვას-
მეთქი, და დაბნეულად ვუთხარი:

— ბომბებს ნუ ეხუმრები, პანტელეიმონ, თავი უნდა მოა-
რიდო ნანსხვრევებს...

პანტელეიმონმა უპასუხოდ არ დამტოვა, ბომბების გუგუნ-
ში ერთმანეთის ხმა არ გვესმოდა. ტუჩების მოძრაობაზე ვა-
ტყობდი, რომ ლაპარაკობდა. თითო-ოროლა სიტყვას ვიჭერ-
დი: „დედა“... „საქართველო“... „არამზადები“... „არ შევარ-
ჩენ“...

„საქართველო“... „არამზადები“... „არ შევარჩენ“...

პანტელეიმონი ღელავდა, ხელებს იქნევდა, ვილაცას ემუქ-
რებოდა. უცებ გაცოფებული ზეზე წამოვარდა და გამძვინვა-
რებულმა ისე დაატრიალა დოლაბივით მუშტები, იფიქრებ-
დი, მისი რისხვისაგან ზანზარებს სარდაფით.

ეს დღე გადაწყვეტი იყო სიმაგრის დაცვაში. გერმანელებ-
მა მთელი ძალები მოაყარეს მოწინავე ხაზს. გამთენიისას და-
წყებულ იერიშს ბოლო არ უჩანდა.

შუადღისას ჩრდილოეთ კუნძულზე ტანკებიც გამოუშვეს.
ერთი მათგანი გავრილოვის მებრძოლებმა დააზიანეს, რამდენ-
ნიმე კი წინ გამოიჭრა, მეთაურთა საერთო საცხოვრებელს
ჩამოუარა, სამთაღოვანი კარიბჭის ხიდზე გადმოგრუნუნდა და
ცენტრალურ კუნძულზე გაჩნდა. მანქანებმა სასპორტო მოე-
დანი გადმოთელეს, სწრაფად დაემშენენ ჩრდილოეთიდან და
თვალის დახამხამებაში სათოფურებთან აღმოჩნდნენ. სარდაფ-
ში უკვე გვესმოდა მუხლუხების გრუნუნის. სულ მალე მეწი-
ნავე ტანკმა შტაბის მთავარ შესასვლელს დააყარა ჭურვები,
მას დანარჩენი ტანკებიც წამოეწივნენ. ცოტაც და, მტერი
წელში გატეხნა სარდაფს. მოიერიშე ტანკისტებს ტყვიამფრქ-

ვევებით უნდა დავხვედროდით, მაგრამ სათოფურებთან მისვლა და მიზანში სროლა შეუძლებელი იყო.

როგორც კი გაიხსია — „ტანკები მოდიანო!“, აფხაზებმა ყურები ცქციტა. დაკვესებული თვალები შემომბანათა და გარეთ გავარდა.

მიღწეულ-მოღწეულ ეზოში წელგამართული გარბოდა. აღარც ტყვის ზუზუნი ესმოდა, არც ნამსხვრევების წივილი... წამოზრდილი ხშირი შავი თმა გაბურქვნილი. დაუბანელი. გამხდარი სახე ჩასტეტკოდა; უქამრო, დაჰმუქნილი ხალათი მაღალ მუხლებზე სცემდა და ორმეტრიანი ნაბიჯით მიჰროდა პოლკის საარტილერიო პარკისაკენ. სადაც ომის წინ მისი ბატარეის ტანკსაწინააღმდეგო ქვემეხები იდგა. ზემდეცმა თვალის დახამხამებაში მიიჭრინა საწყობთან, რომელიც აგრესიზებულ ნანგრევში იყო ჩამარხული. ხანძარში შეჭრილი ვაფთაცოებით დატრიალდა: სტაცა ხელი ერთ ქვემეხს — გტეხილი აღმოჩნდა. მეორეს ღელა კაპლუნვოდა. მესამე ნაწილ-ნაწილ იყო დამსხვრეული. ყველაფერი მინგრეულ-მოცინეული დასედა. მაგრამ მაინც შეუბოვრად მიარღვევდა ცეცხლს. მაინც გამმაგებით დაეძებდა იარაღს. „ეს მთელი უნდა იყო-სო“, დაიყვირა. როცა პარკის კუთხიდან 45-მილიმეტრიანი ბატარა ზარბაზანი გამოათრია. მოფარებულ ადგილზე ჭურჭლებით სავსე ყუთსაც წააწყდა. მაშინ უჩვეულო ძალა იგრძნო აღზავამ და ძვირფასი ნადავლით ყაზარმისაკენ გამოექანა.

პანტელეიმონი ღონიერი იყო. ეს ნახევარტონიანი ქვემეხი ილღიაში შეეძლო ამოეჩარა, ახლა კი ორიც რომ ეპოვა. არ დატოვებდა. ყაზარმასთან ერთ-ერთი ლეიტენანტი ამოუდგამხარში.

სიმაგრის ამ ორმა დამცველმა, რომლებიც მაშინ პირველად

შეხვდნენ ერთმანეთს, სასწრაფოდ გააგორეს ქვემეხი. ამასობაში ტანკი სროლას განაგრძობდა. სხვა მანქანები ცდილობდნენ გასულიყვენ ტირასპოლის კარიბჭესთან. ზემდეგმა ახლდა შეამჩნია, რომ ქვემეხი დაზიანებული იყო — პანორამა ჰქონდა ჩამოგლეჯილი. ამიტომ ლულა პირდაპირი დამიზნებით მიუშვირა მუხლუხებს.

აფხაზავა ზუსტი მსროლელი იყო. ორი წელიწადი გულმოდგინედ სწავლობდა ქვემეხს და საუკეთესო არტილერისტად ითვლებოდა.

ლეიტენანტმა სწრაფად მიაწოდა ჯავშანმკრელი ყუმბარა. აფხაზავამ ქვემეხი გატენა. ახლა მთავარია სიმშვიდე. კარგად იცის ზემდეგმა, რომ გულდაღერებით ნასროლი მუდამ მიზანში ხვდება. ქვემეხის დაზვა ჯერ დაიწია, მერე წინ გასხლტა და ჭურვი სრული მუხტით გასტყორცნა. იმწამსვე მუხლუხებთან რუხი ბოლი ავარდა.

— არის! — შეჰყვირა ზემდეგმა.

ტანკისტები ასეთ დახვედრას არ მოელოდნენ. გვიან შეამჩნიეს, რომ ქვემეხი მათ ცხვირწინ იდგა, ღია პოზიციაზე. კოშკურა მოაბრუნეს და თავგამოდებულ მებრძოლებს ტყვიამფრქვევის ტუჩი მიაგებეს. მაგრამ არტილერისტები უკვე მზად იყვნენ მეორე გასროლისათვის. დუელი სისწრაფეს უნდა გადაეწყვიტა და სანამ ფაშისტი დამიზნებას მოასწრებდა, ქვემეხმა მეორედ დაიქუხა, ტანკი შეანჯღრია და კოშკურა გადაღუნა. მტრის მანქანამ უკან გაბრუნებაც ვერ მოახერხა. აფხაზავამ ფიცხლად ჩაუშვა სავაზნეში ახალი ყუმბარა და კიდევ ორჯერ მოარტყა ტანკს, რომელიც უნიათო თუხთუხით შემოტრიალდა და ჩაქრა. დანარჩენმა მანქანებმა უმაღლესი

ამოიძუეს, მაგრამ პანტელეიმონი არ ეშვებოდა, კვალდაკვალ ადევნებდა ჭურვებს...

შეუძლებელი იყო სარდაფის ყველა სათოფურიდან ამ უთანასწორო შეტაკებისათვის თვალის დევნება. ქალაქის მხარეზე მყოფნი ხმაგაკმენდილი უყურებდნენ არტილერიისტების იერიშს და როცა გაისმა: ერთი ტანკი განადგურებულია, დანარჩენები უკან იხევნო, — შვებით ამოვისუნთქეთ.

ქვემეხიდან პირველი გასროლის კვამლი ჭერ კიდევ არ გაფანტულიყო, რომ პოლკის საარტილერიო პარკსა და ჩვენს პოზიციას გერმანელებმა ნალმები დააყარეს.

ჭურვები ამბრაზურებთან სკდებოდა, წივილით ფანტავდა წვრილ-წვრილ ნამსხვრევეებს, მაგრამ თავდაპირველები ზეიმობდნენ. ტანკის განადგურება დიდი ამბავი იყო ალყაშემორტყმული სიმაგრისათვის. მტერი ყოველ წუთს ჩვენს დამხობას ელოდა, აქ კი ახალ-ახალი იარაღი ჩნდებოდა, ახალი გმირები იბადებოდნენ.

დალეწილი ტანკი კარგა ხანს ეგდო ეზოში, შემდეგ გადაბმული ცეცხლის საფარქვეშ ბუქსირით გაათრიეს ფაშისტებმა.

არტილერიისტებს ღია ადგილზე მოუსწრო დაბომბვამ. ტანკებს დადევნებული ზემდეგი ყუმბარის ნამსხვრევემა წააქცია. ლეიტენანტმა საჩქაროდ წამოაყენა და ორივენი გაშმაგებით მივარდნენ მძიმე ქვემეხს, რომ სანგარში შემოეთრიათ. ლეიტენანტმა მხარზე ჩამოკიდებული მოიყვანა ამხანაგი. მას მარცხენა მკლავზე მძიმე იარა ალმოაჩნდა. რამდენიმე წვრილი ნატეხი წვივსა და ბარძაყშიც მოხვედროდა, მაგრამ მაინც მხნედ გამოიყურებოდა და სიხარულიც კი ეტყობოდა.

ყველანი გარს შემოვეხვით, მივულოცეთ.

რამდენიმე წუთის წინ თითქმის არავეინ იცნობდა, ახლა კი

გმირად თვლიდნენ. ასეთი თავდადება უკვალოდ არ იკარგება! არაფერი არ იწვევს ისეთ გულწრფელ თაყვანისცემასა და სწრაფ აღიარებას, როგორც გამბედაობა და თავდადება. იგი ალამაზებს ადამიანს როგორც საკუთარ, ისე სხვის თვალში.

გასისხლიანებული ზემდეგი თავდახრილი იდგა სანიტარ ქალთა შორის, რომლებიც კაბის ნახევებით სათუთად უხვევდნენ ჭრილობას. ეს უძინარი, შიმშილისა და ნერვიულობისაგან ილაგაგაწყვეტილი ადამიანები მზრუნველად ევლებოდნენ თავს აფხაზავას, რომელსაც უსახლვრო რისხვა და გამოუცნობი მტკიცე გადაწყვეტილება აღბეჭდოდა სახეზე.

იარა რომ შეუხვია, ფერმკრთალმა, დასუსტებულმა ფერ-შალმა ქალმა პანტელეიმონი სარდაფის ყველაზე სიმაღლეზე თავშესაფარში მიიყვანა დაჭრილებთან და სთხოვა, ფარჯის ნაგლეჯებისაგან მომზადებულ ლოგანზე მოესვენა.

აფხაზავამ იუკადრისა და სამარქაფოდ შენახული იარაღისაკენ გაიწია. მებრძოლთა ნახევარზე მეტი, რომელთაც სახელდახელოდ ჰქონდათ შეხვეული ჭრილობები, გამმაგებით იბრძოდნენ, მაგრამ კარგი არტილერიისტი მაინც ძვირად ფასობდა ასეთ დროს და არ უნდოდათ აფხაზავას ვამკება სარდაფიდან; უკმაყოფილო ზემდეგი დაჯაგულ წარბებს ქვემოდან დიდრონ თვალებს აბრიალებდა, მოუსვენრობდა და ბუნღუნებდა:

— რაღას უნდა მოვუცადოთ, ვითომ! ამ ჭურღმულში რას ველოდო?..

გამძვინვარებული პანტელეიმონის დაკავება ვერავინ შეძლო, გარეთ გავარდა და საყდრის იერიშზე მიმავალ ჯგუფს შეუერთდა.

სათოფურიდან გაცეურებულით სასპორტო მოედანზე გამ-

ლილ რაზმს. წელში მოხრილნი მიიწევდნენ წინ. რაღაც წინა-გრძობით შეუცდომლად ატყობდნენ, სად დაეცემოდა ჭურვი და მაშინვე მიწას ეკვროდნენ. ხიშტომარჯვებულ აფხაზავას დაჭრილი ხელი ჯანსაღისათვის შეეშველებინა და მძლავრად უჭერდა ცივ რკინას, წელში გამართული გარბოდა საყდრისაკენ და პირველი შეიჭრა მრგვალ კარებში, მტრის მეავტომატეები რომ იცავდნენ.

ნათქვამია, გამბედავს ბედი სწყალობსო: აფხაზავა ამ იერიშსაც გადაურჩა, უვნებელი დაბრუნდა ეკლესიიდან, მაგრამ ახლა წინანდელზე უფრო პირქუში და მიუკარებელი ჩანდა.

იმ დღეს ჩრდილოეთ კუნძულზეც გაჩაღებულიყო სატანკო ბრძოლა. გავრილოვს კარიბჭეში შემოჭრილი ტანკების მოსპობა მეზენიტეებისათვის დაევალებინა. ერთ-ერთი მძიმედ დაჭრილი ლეიტენანტი თურმე შეუსვენებლივ უშენდა მტრის მანქანებს. მეწინავე ტანკი, მან რომ დააზიანა, შესასვლელ გვირაბში გაჭედილიყო და დანარჩენებისთვის გზა გადაეკეტა. ლეიტენანტი უთანასწორო ბრძოლაში დაეცა.

გავრილოვმა დაავალა შტაბის უფროსს, კაპიტან კასატკინს, გაეფორმებინა ბრძანება დალუპული ლეიტენანტის წარსადგენად საბჭოთა კავშირის გმირის წოდებაზე.

ბრძანება გაუფორმებიათ, მაგრამ დაკარგულა და ახლა ლეიტენანტის გვარიც უცნობია.

აქამდე უცნობად იხსენიებოდა ზემდეგი აფხაზავაც, რომელმაც პირველი ტანკი მოსპო ბრესტის სიმაგრეში.

აღარ მახსოვს როდის მოხდა ეს ამბავი.

გერმანელები ყველა სახის იარაღიდან გვიშენდნენ. მოედანი გაყრუებული იყო ტყვიის ზუზუნით, ნამსხვრევების წივილით.

ასეთ დროს შემოტევას არ ველოდით და ძალიან გაგვიკვირდა, მეთვალთვალემ რომ დაიყვირა, „ვილაც მოდისო“.

უცნობს მრგვალი ყაზარმის ნანგრევებთან მოკვარი თვალი. იგი ერთ წამს შედგა, მოედანი შეათვალიერა და დაურიდებლად წამოვიდა ჩვენკენ. იარაღი არ ჰქონდა, ტიტველი იყო. მხოლოდ მოკლე საბანაო ტრუსები ეცვა. ამ საშინელ გაგანიაში ასე მშვიდად მომავალი კაცი შეშლილი გვეგონა.

შუა გზაზე შედგა; ნანგრევებიდან რალაც აიღო და გულგრილად დაუწყო სინჯვა.

გარეთ თითის გაყოფაც არ შეიძლებოდა, ეს მაღალი, ზორბა ვაყვაცი კი არხეინად მოაბოტებდა და უვნებლად მოადგა სარდაფს.

ახალმოსული მესაზღვრე აღმოჩნდა. შაბათ საღამოს დასაველეთ კუნძულზე მდგარა გუშაგად. მტერი რომ შემოიჭრა, რამდენიმე ამხანაგთან ერთად ბეტონის პატარა მღვიმეში გამაგრებულა. ფაშისტებს ალყა შემოურტყამთ, მაგრამ არტილერია ვერ გამოუყენებიათ, რადგან ყუმბარებს ამაღლებული მიწის ზედაპირი იკავებდა, ქვეითები კი ახლო მანძილზე ვერ მოდიოდნენ საფართან.

— ტყვია-წამალი რომ გვქონდეს, დიდხანს გავუძლებთ, — გვითხრა მესაზღვრემ. — თქვენი სარდაფებიდან ისეთი ცეცხლია გაჩაღებული, გეგონება მაშველი ნაწილები იყვნენ მო-

სული. ამხანაგებმა „ღრმა ზურგში“ გამომგზავნეს ვაზნების-თვის.

მესაზღვრეს ვუსაყვედურეთ, რომ ასე გაუფრთხილებლად გადმოიარა მოედანი. მან ცოვად მოგვიგო:

— თავი დაჰანებეთ, თუ ძმა ხარ! ბევრი ყოყმანი კაცს წაანდენს. ტყვია ტახტის ქვეშაც გიპოვის და დამიჯერეთ, იქ უარესია... სამი დღეა ცეცხლში ვართ, მაგრამ თითიც არ გაგვკაწვრია.

აღარავინ შესიტყვებია, რადგან ეს გრძნობა ყველა მებრძოლისათვის ნაცნობი და გასაგებია. მებრძოლში არის ცოტა ბედისწერის რწმენა, ცოტა თავდაჯერება და ძალზე ბევრი გამბედაობა. რაკი გადარჩი ერთხელ, ორჯერ, ათჯერ... გადაურჩი ყუმბარას, ტყვიას, რატომღაც გგონია, რომ ველარაფერი მოგერევა.

მცირე მარაგიდან მესაზღვრეს ნახევარი ყუთი ვაზნა და რამდენიმე ხელყუმბარა მივეციით. მაგრამ უკან გაბრუნება ჯერ არ შეიძლებოდა, — მუხავეციის ნაპირი ცეცხლში გახვეულყო, მეორე მხარეზე ბუზიც ვერ გაფრინდებოდა. საჭირო იყო დაცვა, მით უფრო, რომ მესაზღვრე ახლა ხელცარიელი აღარ იყო, მძიმე ტვირთი უნდა გადაეტანა წყალგაღმა.

ახალმოსულმა ზუსტად გაგვაგებინა, საიდან გვრტევდნენ მტრის ნაწილები, სად იმყოფებოდა მათი სამეთაურო პუნქტი და ქვემეხები. მესაზღვრეთა თვალს არაფერი გამოორჩენოდა, მიუღგომელ მღვიმეში გამომწყვდეულებს ფხიზლად ედევნებინათ თვალყური მოწინააღმდეგის მოძრაობისა და განლაგებისათვის.

ბოლოს დასძინა, კარგი იქნებოდა ერთი ნაღმსატყორციეც გვექონოდა. შვეული ცეცხლით ძირფესვიანად ნოვთხრალით მტრის საცეცხლე წერტებსო.

ომის წინ ნაღმსატყორცნები ბლომად გვექონდა, მაგრამ ყაზარმაში ვინახავდით და ნანგრევებში ჩაილეწა. პირველ დღეს იქ ვერაფერი ვიპოვეთ, ხოლო შემდეგ აღარავის უფიქრია ამაზე. ახლა კი ისევ დავფაცურდით, რადგან გარდუვალი საჭიროება ჯიუტი მაძიებელია.

ასათიანმა მთელი ათეული შეუსია ნანგრევებს; თვითონაც გაპყვა და ვერც მესაზღვრე მოიცილა. ისინი დიდხანს ჩიჩქნიდნენ ასეულის ყოფილ სადგომს და ერთგან დაშლილი ნაღმსატყორცნის ნაწილებს წააწყდნენ. დიდი გაჭირვებით შეაგროვეს დაუხანგული, გაღუნული, მიწით ამოვსებული დეტალები, შემოზიდეს სარდაფში და რამდენიმე საათს წვალობდნენ, სანამ ამ დაზიანებული ნაწილებისაგან ბატალიონის ნაღმსატყორცნს აღადგენდნენ. ნაღმებით სავსე ყუთი აქამდე უსარგებლოდ იდგა სარდაფის ერთ კუთხეში.

დაბომბვა კვლავინდებური გააფთრებით გრძელდებოდა, როცა ასათიანმა, აფხაზავამ, მესაზღვრემ და რამდენიმე სხვა მებრძოლმა ნაღმსატყორცნი ცენტრალური შესასვლელის მალა აათრიეს და ღია პოზიციაზე დადგეს.

სიმწრით შეკეთებული იარაღი იქაც გაჭირვებულდა, ხან ნაღმი არ ჩადიოდა ლულაში, ხან სამიზნე ნიშანს არ იღებდა. მაგრამ მაინც არ მოეშენენ და ნაშუადღევს ნაღმსატყორცნმა პირველად დაიქუხა, პირველი ჭურვი გაგზავნა ბუგს გაღმა. ამის შემდეგ ერთგულად გვიწევდა ბომბდამშენის მაგივრობას. ჩვენი ნაღმები მრგვალი ყაზარმის თავზე მიფრინავდა და სასტიკად სჭიდა უშიშარ ადგილზე ჩასაფრებულ მტერს. მალე შევიტყვეთ, რომ ამ იარაღმა დიდი ზარალი მიაყენა გერმანელებს. რამდენიმე ჭურვი მტრის სამეთაურო პოზიციაზე აფეთქებულიყო, ერთი-ორი ქვემეხს დასცემოდა და მთელმა გათვლა გამოეყვანა მწყობრიდან.

როცა მოწინააღმდეგის თვითმფრინავმა ნაღმატყორცნის ადგილმდებარეობა აღმოაჩინა და ყუმბარები დააყარა, გათვლამ ნანგრევებს მოათვარა იარაღი და ახალი პოზიციიდან განახლა სროლა. მაგრამ გერმანელებმა ეს ადგილიც დაბომბეს და ჩვენები იძულებული გახდნენ მიეტოვებინათ ნაღმატყორცნი.

დაბინდდა თუ არა, მესაზღვრემ გულა-ნაბადი აიკრა და სარდაფიდან გავიდა. არ ვიცი, მშვიდობით გააღწია თუ არა ციტადელიდან, მოახერხა თუ არა მდინარის გადალახვა, დახვდნენ თუ არა ამხანაგები მღვიმეში... იგი მხოლოდ რამდენიმე საათს იყო ჩვენთან, მაგრამ ახლაც თვალწინ მიდგას, როგორ მოაბიჯებს ეს მაღალი, მზით დამწვარი, ტანშიშველი ზორბა ვაჟკაცი ტყვიით, ნამსხვრევებითა და ცეცხლით მოკირწყლულ მოედანზე. მოაბიჯებს მშვიდად, გულგრილად, წარბსაც არ იხრის. იქნებ არც იყო მისი მოქმედება სწორი, იქნებ საჭირო იყო სიფრთხილე, იქნებ ვალდებულებაც იყო თავი მოერიდებინა ყურთან მოზუზუნე ნამსხვრევებისათვის და გადმოხონებულ იყო სარდაფში, მაგრამ ის კი არასოდეს დამავიწყდება, რა ზეგავლენა მოახდინა ჩვენზე მისმა გამოჩენამ: უფრო გაგვათამამა ყველა, უფრო აშკარად დაგვანახვა, რომ უშიშარს ტყვიაც გაუბრბის და საცა გგონია. ბელურა ვერ გააქრებაო, ვეფხვიც გაეტევა.

ასევე შეუპოვრად იბრძოდნენ ჩვენთან მყოფი სხვა მესაზღვრეებიც; ამ მწვანექუდიანმა ჭაბუკებმა პირველი დარტყმა ადემეს მუხანათურად შემოჭრილ მტერს.

მახლობელ საგუშაგოზე ომის პირველ დამეს ორი გერმანელი ჯაშუში შეიბყრეს. დაკითხვის შემდეგ მსტოვრები საკანში მოათავსეს და მცველი დაუყენეს. სულ მალე მტერმა სა-

ზღვარი ჭადმოლახა. მეავტომატეები საგუშაგოს მოადგნენ. მესაზღვრე-მცველი თავგამეტებით იგერიებდა მოიერიშეებს. დაპატიმრებულმა მსტოვრებმა რომ გაიგეს, გერმანელები მოდიანო, საკანში ღრიანცელი ატეხეს, აქ ვართ დამწყვდეული, დავიხსენითო. წაქეზებული ჰიტლერელები გაშმაგებით მიიწევდნენ საკანისაკენ. ამასობაში მესაზღვრეს ვაზნები შემოეღია და როცა დარწმუნდა, რომ მტერს ვეღარ შეაჩერებდა... შემოჭრილ ფაშისტებს სამი გვამი დახვდათ.

ვინც ერთხელ მაინც მდგარა საბჭოთა საზღვარზე, ადვილად გაიგებს ამ ადამიანთა გულისთქმას!.. სასაზღვრო ზონაში ახლა ყველანი ისე ვგრძნობდით თავს, როგორც ალყაშემორტყმული გუშაგი პოსტზე, როცა ერთი ვალდებულია ასს გაუმკლავდეს...

...უფროსი მზარეული დიდხანს ვერ გავაჩერეთ სარდაფში. ხან სასურსათო საწყობის ნანგრევებში გაგვეპარებოდა, იქნებ კიდევ ვიპოვო რამეო, და, ზოგჯერ, დახანძრული კონსერვის ქილითა და შერუჯული შაქრის ნატეხებით ბრუნდებოდა. ხან წყლისთვის გარბოდა და როცა ცარიელი კარდალით მოდიოდა უკან, დარცხვენილი თვალს ვეღარავის გვისწორებდა.

სურსათის მცირე მარაგი მალე გამოეღია, „ღროებითი საწყობის“ ყარაულობა მობეზრდა და, ბოლოს, საყარაულოც რომ აღარაფერი დარჩა, მზარეული მესაზღვრის მიერ გადაძალულ ნაღმსატყორცთან მივიდა და შეკეთება დაუწყო. მაგრამ იმ ადგილას მტერმა ისევ დააყარა ყუმბარები და იმ წუთიდან მზარეულიც გაქრა. „ყუმბარა დაეცაო“, — თქვეს.

ასეთი სიკვდილი სანატრელად მიაჩნდა ყველას. მხოლოდ დაჭრა იყო საშინელება. დაჭრილების საქმე ცუდად მიდიოდა

მძიმედ დაშავებულნი სისხლის მოწამვლით ახოცებოდნენ, ხოლო წყურვილს სიგიჟემდე მიჰყავდა ყველა.

სიზმარში თუ ცხადში წყალი გველანდებოდა. ბურანში ვხედავდით წყალუბვ მდინარეებს, ტბებს, თვალუწვდენ ოკეანეებს და ზმანებას თავს რომ დავაღწევდით, არც მდინარე იყო სადმე, არც ოკეანე — მშრალი ენა მიჰკვროდა სასას.

მძიმედ დაჭრილი სიკვდილს ამჯობინებდა ასეთ წამებას.

— მშვიდობით, ამხანაგებო! შური იძიეთ! — ხშირად ისმოდა დაჭრილთაგან. ამ სიტყვებს მოჰყვებოდა სროლა. მაგრამ ზოგს თავის მოკვლის ძალაც არ ჰქონდა, იარაღის აწევაც არ შეეძლო.

მტერმა იცოდა, რომ ასეთ პირობებში დიდხანს გაძლება შეუძლებელი იყო და ათასგვარ ხრიკს იყენებდა სიმაგრის გასატეხად.

ერთხელ სათოფურს ჰატარა გოგონა მოადგა. ეზო ცეცხლში იყო გახვეული და ბავშვი სასწრაფოდ ჩამოვიყვანეთ სარდაფში. ზოგიერთებმა მაშინვე იცნეს ჩვენი პოლკის მუსიკალური ოცეულის ზემდეგის, ივანე ზენკინის, თორჰეტი წლის ქალიშვილი ვალია.

ფაშისტებმა ის დედასთან ერთად დაატყვევეს, მაგრამ მშობლებს მაშინვე ჩამოაშორეს და სიკვდილის მუქარით ჩვენთან შემოგზავნეს. გერმანელები წინადადებას გვაძლევდნენ, იარაღი დაგვეყარა.

პოტაპოვმა ყურადღებით მოუსმინა ვალიას და ურჩია, დედასთან გაბრუნებულყო, მაგრამ გოგონამ სარდაფში დარჩენა ამჯობინა და ბოლომდე იბრძოდა სხვა ბავშვებთან ერთად.

ცეცხლი სიმაგრის მთელ ტერიტორიაზე მძვინვარებდა. იმ დღეს ჩრდილოეთ და ცენტრალურ ხერთვისებზე ხელჩართული ბრძოლებიც გაჩაღდა. ჩრდილოეთის სამთადოვან ალაყაფთან სისხლისმღვრელი შეტაკება დაიწყო. 84-ე პოლკი მედგრად იცავდა ამ მნიშვნელოვან უბანს და ფაშისტებს დიდი ზარალი მიაყენა.

ამავე დროს, გერმანელებმა კვლავ შემოუტიეს ტირასპოლის კარიბჭეს, სადაც პირველი წუთიდანვე ცდილობდნენ გაბატონებას. მაშინ ჩვენმა ტყვიამფრქვევებმა ცეცხლის ჯებირებით გზა გადაუღობეს მოიერიშეებს და ისინი იძულებული გახდნენ სხვა უბანზე მოესინჯათ ძალა. ამ რამდენიმე დღეში ფაშისტები საბოლოოდ დარწმუნდნენ, რომ ციტადელს ვერ აიღებდნენ, თუ დასავლეთ კუნძულიდან არ გაარღვევდნენ კარიბჭეს. მოულოდნელი დავდასხმით მოპოვებული წარმატებები მტერს ხელიდან ეცლებოდა. ჩვენ კი ახალ-ახალ პოზიციებს ვეუფლებოდით. მოწინააღმდეგეს გადაეწყვიტა, რადაც არ უნდა დასჯდომოდა, ჩარხი თავისკენ შემოებრუნებინა.

ამიტომ გაგვიკვირდა, ნაშუადღევს მზვერავეებმა რომ გვაცნობეს — გერმანელები ციხე-სიმაგრეს ტოვებენო.

ჩარდაფიდანაც შევამჩნიეთ ეს.

აჭამდე ჩუმად ჩასაფრებული მტრის დანაყოფები თითქმის აშკარად გარბოდნენ გაღმა. მიდიოდნენ მევტომატეები, მენაღმეები, საგულდაგულოდ შენიღბული მზვერავეებიც კი. ვხედავდით, როგორ გროვდებოდნენ პატარ-პატარა ჯგუფებად, როგორ უახლოვდებოდნენ მუხავეცს. ეს იყო დაბნეული, მოულოდნელი უკანდახევის სურათი. სულ ქვემოთ, რკინიგზის

ზიდთანაც შევამჩნიეთ, რომ თავდამსხმელები ნავტიკებით გადადიოდნენ ბუგზე. „მაშ, იქიდანაც ემუქრებათ რაღაც საფრთხე!“ — ვფიქრობდით ჩვენ. „ყველაფერს ტოვებენ, გარბიან. ჩანს, ვიღაც მოსდევთ“.

რაც გულით გვსურს, მუდამ ადვილად ვიჭებთ. ასე მოხდა ახლაც: ერთ წამში მთელ სარდაფს მოედო აღფრთოვანებული შეძახილები:

— ჩვენები მოდიან, ჩვენები!

— ფაშისტები ალყაშემორტყმული არიან, საბჭოთა ტანკები მოადგნენ ბუგს!

— გარბის გარეწარი!

— აჰყუწე!..

— არ გაუშვათ!..

აზავთდა, ამობოქრდა სარდაფი. ყველამ იარაღს წამოავლო ხელი. მძიმედ დაჭრილებიც ახმაურდნენ, აყვირდნენ... მომაკვდავნიც კი ფეხზე წამოდგომას ლამობდნენ. აღარავინ ითხოვდა წყალს, აღარ ისმოდა გოდება, მუდარა: „მესროლეთ, ღვთის გულისათვის!“ ყველას უნდოდა სიცოცხლე.

— ჩვენები მოდიან!

— დასცხეთ მტერს!

მთელი სარდაფი ერთ მძლავრ მუშტად შეიკრა. ათასმა ფიქრმა. მოგონებამ და ოცნებამ გაიელვა ერთ წამში. გამარჯვების იმედმა აღგვაფრთოვანა და ექვისთვის ერთი ბეწო აღვილიც აღარსად დარჩა. ან ვინ გაბედავდა იმ საზეიმო წუთებში დაეჭვებას! საკუთარი თავალით დანახული ხომ უფრო გკვერთდა, ვიდრე მოსმენილი ან დაწერილი.

სასწრაფოდ ამოვირბინეთ სარდაფიდან და მუხხვეცის ნაპირისაკენ გავქანდით. ყველაზე ძლიერ ჯგუფს გავყევით ტი-

რასპოლის კარიბჭისაკენ. ჩემთან იყვნენ: ასათიანი, პ. აფხაზაძე, ა. ჭარიაშვილი, პ. გიბიშვილი, გ. გერასიმენკო და ათობით სხვა მებრძოლი. ზოგს ავტომატი მოემარჯვებინა, ზოგი ხიშტს ალაპლაპებდა. ზოგი ტყვიამფრქვევით მიიწევდა წინ.

სარდაფში დარჩნენ თავდაცვის შტაბი, დაჭრილები და ქალები. პოტაპოვმა ძლივძლივობით მოახერხა სათოფურებთან და ჩასასვლელებთან შეთვალყურებების დატოვება.

ერთი ამოსუნთქვით შემოვუარეთ პირველი ბატალიონის ყაზარმას, გადავირბინეთ შუაგამყოფი ქუჩა, მრგვალ ყაზარმასთან გავედით და მტრის ჩამორჩენილ ნაწილს, ნავში ჩაჯდომას რომ ელოდა, მუხავეცის ნაპირზე მივუსწარი.

ფაშისტების დანახვაზე შევძახეთ:

— ურააა! ააა! ააა!

მრისხანე ყიყინითა და აელვარებული ხიშტებით მეხდაცემული გერმანელები მდინარეში შეცვივდნენ, მაგრამ ჩვენც ფეხდაფეხ შევყევით და ხელჩართულ ბრძოლაში ამოვყლიტეთ.

ეს მოხდა თვალის დახამხამებაში. ასე რომ, მეორე ნაპირიდან მტერმა ვერ შეძლო კარიბჭესთან დახელოებული რაზმის გადარჩენა.

შეტაკების შემდეგ ყველანი მუხავეცის ნაპირზე შევგროვდით. რაღაც უცნაურად ვიყავით აღგზნებულნი. იმ სიხარულის მსგავსი რამ არასოდეს განმიცდია.

ანგარიშმიუცემლად ვჩოჩქოლებდით. არ ვიცოდით, რა გვექნა. მაშინდელი ჩვენი განწყობილება და ლაპარაკი ისე მიაშიტი იყო, რომ გადმოცემაც მიჭირს.

— გაიხედეთ რკინიგზის ხიდისაკენ! დიდი ამბავია! — ყვიროდა ერთი.

— აფუსფუსდნენ, ერთად გროვდებიან.

— გარბიან... გარბიან...

— ჩანს, სადღაც ახლოს ჩვენებმა ბუგი გადალახეს! ამ ავა-
ზაკებს ემინიათ, გარემოცვაში არ მოვხვდეთო და გარბიან.

— ტყუილა კი არ გვემუქრებოდნენ რალიოთი, დაგვენბდი-
თო. ეტყობა, იცოდნენ, რაშიც იყო საქმე და ჩქარობდნენ.

— ესენი უმიზეზოდ არ გაიქცეოდნენ... ურტყამენ ჩვენე-
ბი, ურტყამენ, ძმაო!..

— დავეწიოთ!

— ჰკა მაგას!

ყველას მოედო წინსვლის, შეტევის დაუოკებელი ცეცხლი.
მტერი აშკარად თავს არიდებდა ბრძოლას. ჩვენი ტყვიამ-
ფრქვევების ჭერს ერთი გასროლითაც არ პასუხობდა.

თავდამცველთა ჯგუფები კი ამ დროს მდინარესთან მიიჭრ-
ნენ და აფუსფუსდნენ. ყველას უნდოდა მალე გადაეცურა სა-
ზღვარი, პირველი შეჭრილიყო მტრის ტერიტორიაზე, იქ შე-
გებებოდა ჩვენს ნაწილებს. მაგრამ ტირასპოლის ხიდი ჭერ კი-
დევ ჩაკეტილი ჰქონდა მტერს და მოწინააღმდეგის ზურგში
შელწევა მხოლოდ ბუგის გადაცურვით შეიძლებოდა. ამიტომ
ათობით იარაღშემართულმა მებრძოლმა მდინარეში შეტოპა.
ცალ ხელში ავტომატი ეჭირათ, მეორეთი კი ტალღებს მია-
პობდნენ.

გარკვევით დავინახეთ, როგორ გადავიდნენ ისინი მტრის
მიერ დაპყრობილ ნაპირზე და ბუჩქნარს შეერივნენ.

დარჩენილებმა ათასგვარი შეკითხვები დამაყარეს. ახლა
ყველაფერი აინტერესებდათ, რამდენ ხანს გასტანდა ომი, რა
ბედი ეწეოდა დამარცხებულ გერმანიას, რა სასჯელს მიიღებ-
და ასეთი ვერაგული თავდასხმისათვის ჰიტლერი.

სხაპასხუპით ვპასუხობდი ჩემ გვერდით მდგომ შექალაქა-
) ვებულ ბელორუსს, მხარზე ხელს ვუთათუნებდი და სიხარუ-
ლისაგან ვხარხარებდი. თუმცა სადღაც, სულის სიღრმეში,
ვგრძნობდი, რომ ამ სიცილში იყო რაღაც არაბუნებრივი.

ის იყო კარიბჭეზე იერიშისთვის გავემზადეთ, რომ კვლავ
ჩამოინგრა ცა, კვლავ იგრიალა ბუფს გაღმა ნაპირმა და ცეცხ-
ლის ტალღა დაეძგერა სიმაგრეს.

გვიანლა მივხვდით, რომ მოწინააღმდეგის სარდლობამ გა-
ნზრახ გაიყვანა თავისი ნაწილები და ისეთი შთაბეჭდილება
შეგვიქმნა, თითქოს უკან იხევდა. ამით მან ორი კურდღელი
დაიჭირა: ჭერ ერთი, სარდაფიდან ღია ადგილზე გამოგვი-
ტყუა და მეორეც, სიმაგრის დაბომბვა გაიადვილა.

საქმე ის არის, რომ აქამდე ჩვენი და მტრის პოზიციები
ერთმანეთში იყო შეჭრილი და გერმანელებს ეშინოდათ და-
ბომბვის დროს საკუთარი ნაწილებიც არ დაეზიანებინათ.
ახლა, რაკი თავიანთი ძალები წყალგაღმა გაიყვანეს, უფრო
მოუერიდებლად შეეძლოთ დაებომბათ სიმაგრის ყოველი კუნ-
ჭული. ასეთი ხანგრძლივი ცეცხლი აუცილებელ საჭიროებად
მიაჩნდათ, რადგან ჩვენი ნაწილების განლაგება მათთვის ბო-
ლომდე ამოუცნობი დარჩა.

მტრის სარდლობა ჩქარობდა, მისი აზრით, სიმაგრისთვის
ბრძოლა გაჭიანურდა. გერმანიის ტანკები სწრაფად მიიწევ-
დნენ სმოლენსკ-მოსკოვის მიმართულებით. არმიას, ავიაციას,
არტილერიასა და ქვეით ჯარს ახალ-ახალი ძალა ესაჭიროებო-
და შეტევის გასავეითარებლად და ზურგის გასამაგრებლად.
ამიტომ იმ გაღამწყვეტ დღეს ბრესტში ავიაციის დამატებითი
შენაერთები გამოიწვიეს. ბელორუსიის ფრონტზე მიმავალი
უმაღლესი სარდლობის არტილერიის ორი პოლკიც გზიდან

დააბრუნეს და დროებით აქ განალაგეს. მტრის გეგმით, უსიამოვნო გარემოცვა ერთი მძლავრი დარტყმით უნდა დაითავრებულიყო.

ციხე-სიმაგრის ზემოთ ცა შავი სვასტიკებით დაიფარა. სეტყვასავით წამოვიდა მძიმე ბომბები. ეს შემოტევა ჩვენთვის ისევე მოულოდნელი იყო, როგორც პირველი თავდასხმა.

დაფეთებულნი წამოვიშალეთ. თავპირისმტკრევით მივირბინეთ მრგვალ ყაზარმასთან და სარდაფში დაბრუნება ვცადეთ. მაგრამ გზა გადაჭრილი აღმოჩნდა. ფართო ქუჩას მტერი ბომბითა და ყუმბარით ხნავდა, რომ თავშესაფარში არ ჩავეშვით და ღია ადგილზე ამოვეყლიტეთ. ამიტომ ჭურვები ნამეტნავად ჩვენს პატარა მონაკვეთს ურტყამდა მუხავეციას ნაპირსა და სარდაფს შუა. გზას რომ მივაწყდით, გამუდმებულმა ჩაქექმა ცეცხლმა პირველი ათეულები ჰაერში აიტაცა და დაფლითა. ღია ცის ქვეშ დარჩენილნი ამას არ ერიდებოდნენ, გადარბოდნენ საბედისწერო გზაზე და უმრავლესობა იქვე იღუპებოდა. მხოლოდ ზოგიერთი ასწრებდა იმ საშინელი სიკვდილის ზღურბლზე გადაარბენას, მაგრამ ჩვენ ველარ ვხედავდით, აღწევდნენ თუ არა ისინი სარდაფამდე, რომლის ჩასასვლელები და სათოფურები მტერს განუწყვეტელი ცეცხლით დაეხშო. ორმოვებით სავსე გზა მოფენილი იყო ერთმანეთში ათქვეფილი კაცისა და ცხენის ნაფლეთებით.

ფიქრის დრო აღარ იყო, გაულწეველი გზიდან პირი ვიბრუნეთ და გავიფანტეთ მრგვალი ყაზარმის ნანგრევებში, სადაც საჩინიბოები იყო მოთავსებული.

ამ შენობას არ ჰქონდა ღრმა სარდაფები. ახლა, ალაგ-ალაგ სახურავი მთლად გადაგლეჯოდა; აგურის კედლები ზოგან ჩამონგრეულიყო, ზოგან გარღვეულიყო და ყუმბარისა თუ ბომბის ყოველ აფეთქებაზე ტორტმანებდა.

რამდენიმე მეტროპოლიტან ერთად, რომელთა შორის ხანში შესული ბელორუსი ჯარისკაციც იყო, აზრმიუცემლად ავიჭერი მეორე სართულზე, იქ ნიშისმაგვარ რაღაც ამონაშენს ამოვეფარე და ასე, თითქმის ღია ცის ქვეშ სულგაკმენდილი ვუსმენდი ყუმბარების გაუთავებელ გრუხუნს. რაღაც ალღოთი ვგრძნობდით, რომელი ყუმბარა ან ბომბი დაეცემოდა ჩვენს ყაზარმას, რომელი აფეთქდებოდა გზაზე, რომელი დაანგრევდა კედელს, რომელსაც უმწეოდ ვეკვროდით.

მინდოდა მომეგონებინა ყველაზე ლამაზი, ყველაზე კარგი რამ ჩემი ცხოვრებიდან, მაგრამ არ შემიძლო. მსურდა გამეხსენებინა მშობლიური სოფელი, დედა, ძმები, მაგრამ აზრი არ მემორჩილებოდა. „მორჩა!“ „მორჩა!“ — ჩამძახოდა იდუმალი ხმა, აღარაფერზე შემიძლო ფიქრი. მხოლოდ უაზროდ ვითვლიდი: ერთი... ორი... სამი... ათი... ასი... რამდენიმე საათი გავიდა ასე, ბომბებისა და ყუმბარების გრიალი წუთითაც არ ცხრებოდა. ახლა უკვე ვეღარც ვითვლიდი... ბელორუსი ჯარისკაცი ჩუმად რაღაცას ბუტბუტებდა:

ვიღაც კი ბუზღუნებდა:

— სიკვდილია ბრძოლაში უკავშიროდ ყოფნა!.. თითქოს ყველაფერს საკუთარი თვალით ხედავ, და მაინც არ იცი, რა ხდება შენს ირგვლივ.

როცა არტილერიის ცეცხლმა მუხავეციის ნაპირიდან ოდნავ წინ გადაინაცვლა, მცირე შვება ვიგრძენით. იმავე წუთს ქვემო სართულზე დაიყვირეს:

— ამხანაგებო! ოსევ მოძვრებიან!..

აშკარა იყო, ამ ჯოჯოხეთურ ცეცხლს ყველა ვერ მოედრიკა. გრძელი ყაზარმის სხვადასხვა ადგილას შეფარებული წვრილ-წვრილი ჯგუფები თვალყურს ადევნებდნენ მტრის

მოდკაობას. მათ შეამჩნიეს, რომ ტირასპოლის ხიდიდან ფაშისტები კოშკურაზე გადმოვიდნენ, მრგვალ ყაზარმას გამოჰყვნენ. გერმანელები ნახანძრალზე მოაბაჯებდნენ, ცეცხლი სულ სიღრმეში გამოდიოდა და ისინი მის ნაკვალევს მოსდევდნენ.

— იერაშზე! — გაისმა ვილაცის გააფთრებული ხმა.

ფიცხლავ. ყველა კუნჭულიდან გამოცვივდნენ იარაღმომარჯვებული დამცველები, ბურანში: მყოფნი მიიწევდნენ ტირასპოლის კარიბჭისაკენ და ყაზარმის ბოლოში კვლავ დაიწყო ჩხვვა, ყვირილი, ტყვიის წივილი, გოდება.

ბომბებისა და ყუმბარების გრიალს ისევ შეერია შემზარავი „აა!“, „ააა!“, „ურააა!“..

მტრის მეავტომატეებმა ვერც ახლა შეძლეს დაეკავებინათ საწყისი პოზიციები საყუარზე იერაშის მისატანად და უკან დაიხიეს. უფრო მეტიც. წინანდელი პოზიციაც დაკარგეს. რადგან მრგვალ ყაზარმას ჩვენ დავებატრონეთ.

ბომბებისა და ყუმბარების ცეცხლმა ჯერ მუხავეცის ნაპირისაკენ დაიწია, და მერე ერთი მოსხლეტით შეწყდა.

გაირინდა შემოგარენი.

სულს. სხეულს გადარჩენის სიბარული დაუფულა. მაგრამ დიდხანს არ გაგრძელებულა ასე. მყუდროება გაკვეთა რეპროდუქტორის მკახე ხმამ:

— თქვენი მდგომარეობა უნუგეშოა. ჩვენმა ჯარებმა ასეული კილომეტრით უკან ჩამოიტოვეს საზღვარი და ძლევამოსილად მიიწვევენ მოსკოვისაკენ. თქვენ აღარავის ახსოვხართ. არავინ იცის თქვენი ამბავი. რისთვის იბრძვით. რა მიზანი გაქვთ? განწირულნი ხართ ყველა! ღიად ვტოვებთ ტირასპოლის ხიდს, შეგიძლიათ დაუბრკოლებლივ გადმობრუნა! დრო — ათი წუთი. ვადის გასვლისთანავე განვაახლებთ ცეცხლს! სი-

მაგრეში არავინ გადაარჩება ცოცხალი, უაზროდ ნუ ილუპავთ თავს!..

გულში ახალი ძალით იფეთქა რისხვამ, სიძულვილმა. საკუთარი თავიც მეზიზღებოდა იმ დროს. თავმოყვარეობა მტანჯავდა. ყოველთვის ჩემი თავის დიდი იმედი მქონდა. ოდნავ რომ გავეკენწლე ვინმეს — შეგეშინდაო, ცოცხალი ვერ გადამირჩებოდა; ახლა კი თვითონვე ვგრძნობდი, როგორ ამიკანკალდა ქვედა ყბა... მტერი ახლა თითქოს ნიშნს მიგებდა, ჩემი ადამიანური სისუსტით სარგებლობდა. ამ მღვრიე და დაულაგებელმა ფიქრებმა რაღაც უცნაური გრძნობა გამოიწვია. ეს იყო ჭიუტობაც, სიკერპეც, შურისძიების წყურვილიც. ეს იყო სურვილი — დამესაჯა ისიც და ჩემი თავიც. გულში ვიმუქრებოდი: „აბა, მოდი! აბა, შეასრულე შენი მუქარა!“, „ვნახოთ, გავუძლებ თუ არა!“, „შევაიმოწმოთ, მართლა ჯაბანი ვარ, თუ ეს თრთოლა უნებური იყო!“ „ვნახოთ, ვინ უფრო ძლიერია, ჩემი ადამიანური სისუსტე თუ მე!..“

გადავხედე ამხანაგებს: კუშტი, ნებაგაუტეხელი, ჭიუტი სახეები ჰქონდათ... ის კი, გადამთიელი, მკაცრად და დამცინავად იმეორებდა: „ვადა ათი წუთი“... თითქმის მაშინვე დაადგინა:

„გავიდა ერთი წუთი!..“

„გავიდა ორი წუთი!..“

„გავიდა სამი წუთი!..“

რა სწრაფად გადის ეს დაწყევლილი დრო. სულ ცოტაა და, ცეცხლი განახლდება, ისევ წამოვა ცეცხლის ნიაღვარი, ისევ ატორტმანდება ყაზარმის დარღვეული კედლები, ისევ შემეკუმშავს გულს სიცოცხლის წადილი. კედლები კი ძლივს-

და დგას. ასე მგონია, პირველი აფეთქებისთანავე იგრიალებს და ქვეშ მოგვიყოლებს. სუნთქვა მეკვრის.

„გავიდა ცხრა წუთი!“ — ძლივს მესმის მესაფლავის სატანური სისინი:

„დარჩა ერთი წუთი!..“

ყველანი ტირასპოლის კარებისაკენ წავედით. კედელს მოვეფარეთ და ხიდი ნიშანში ამოვიღეთ. სულ ერთი იყო, საიდან გამოჩნდებოდა ავის მოსურნე — იქიდან აქეთ თუ აქედან იქით.

ხილზე ჭაჭანება არ იყო. არც იქიდან გადმოდიოდა ვინმე, — არც აქედან.

„დარჩა ნახევარი წუთი!..“ — ერთხელ კიდევ დაისივლა იმედგაცრუებულმა, ზიზღით სავსე გადამთიელმა.

დიქტორის უკანასკნელი სიტყვები ათასობით ბომბმა და ყუმბარამ შემოაცილა სიმაგრეში. კვლავ შეინჯღრა და აზრიალდა შენობა, მაგრამ ჩვენ მოვასწარით ჩრდილოეთისაკენ უკანდახევა.

მტერმა დაპირება შეგვისრულა. მეტი გაბოროტებით დააცხრა სიმაგრეს.

მართალია, უფრო სუსტად, უფრო შორიდან, მაგრამ მაინც მესმოდა ის შემპარავი შინაგანი ხმა: „ჩამოინგრევა ეს შენობა და ნანგრევებში მოჰყვები! იქნებ, არც მოკვდევ ერთბაშად, მაშინ?..“

მტრისადმი ზიზღს, შეურაცხყოფილ თავმოყვარეობას თავისი გაჰქონდა და გულში დაჟინებით ვიმეორებდი: „არა, აქედან არ წავეალთ! აქ დავრჩებით!“

განუწყვეტელ ბრძოლაში მიიწურა ის საშინელი დღე.

მტერს სიამოვნებდა, რომ მრგვალ ყაზარმაში ამოგვეკეტა. სარდაფში აღარ ვვიშვებდა. მცირე პაუზის დროსაც, როცა რეპროდუქტორი თავს დაგვიჩხაოდა, შუაგამყოფ ქუჩას თვითმფრინავები დარაჯობდნენ. ისინი განუწყვეტლივ სერავდნენ სივრცეს და ერთ კაცსაც რომ გაველო, ტყვიამფრქვევის კაპანით მოსდევდნენ.

მოსალამოვდა და დაბინდებასთან ერთად დაბომბვაც შესუსტდა. იშვიათად, ნერვების ამშლელად თუ გაიშხილებდა თითო-ორიოლა ყუმბარა ან ნაღმი... მაგრამ ვგრძნობდით, უკვე ვძლიეთ იმდღევანდელი ჭანსაცდელი.

გვიხაროდა, რომ დუშმანისათვის გოჯიც არ დაგვითმია. პირიქით, მათ მიერ დაკავებული პოზიციათა გამოვგლიჯეთ ხელიდან. საერთოდ, საღამოთი მუდამ უფრო იმედიანად ვიყავით, მდგომარეობაც ისე მძიმე აღარ გვეჩვენებოდა და მტერსაც ნიშნს ვუგებდით...

როცა ყუმბარებს თავზე გაყრიან, ფიქრობ, ქვა ქვაზე არ დარჩებაო, მაგრამ დამთავრდება თუ არა ბრძოლა, სინარულით ამჩნევ, რომ კიდევ რაღაც გადარჩენილა, კიდევ არის სიცოცხლე, კიდევ შეიძლება შერკინება და რაღაც ველური ყინით გინდა გაახელო მოსისხლე, ასე მოუთმენლად რომ მოელის შენს დაცემას.

დაღამდა. მტრის თვითმფრინავები მაინც დარაჯობდნენ გზაჯვარედინებს.

მრგვალ ყაზარმაში ორმოცამდე მებრძოლი დავრჩით. სხვები ან სარდაფში დაბრუნდნენ, ან ქუჩის გადარბენისას დაიღუპნენ. ზოგიერთმა ბუგი გადასერა, დასავლეთ კუნძულზე გავიდა და აღარ ვიცოდით მათი ამბავი. იქიდან მერეც გვესმოდა კანტიკუნტი სროლა. როგორც ჩანს, მესაზღვრეები

კიდევ იბრძოდნენ. შესაძლოა, მათ გაღმა გასული ბიჭებიც შეუერთდნენ. ასე რომ, სარდაფი თითქმის ღრმა ზურგში მოექცა.

მრგვალი შენობა ტირასპოლის კარიბჭიდან საბრძოლო მასალის საწყობამდე — მთლიანად დავიკავეთ. გადამწყვეტ უბნებზე გუშაგები დავაყენეთ, რომ მუხხვეცისა და ბუგის გამოღმა ნაპირისათვის ეთვალთვალათ.

მოგვიანებით ასათიანი დაუბრუნდა თავის ნაწილს. რამდენიმე ხნის შემდეგ იქიდან გამოგზავნილმა შეკავშირემ თავდაცვის შტაბის ბრძანება გადმოგვცა, რომ მრგვალ ყაზარმაში დავრჩენილიყავით, მდინარის ნაპირი და ტირასპოლის კარიბჭე დავგვეცვა, ხიდი ჩავგვეკეტა.

გამთენიისას უფროსმა ლეიტენანტმა გორიაჩიმ გამომიძახა. ქუჩა გადავირბინე და სარდაფში ჩავედი. ერთი შეხედვით გტყობოდა, გარნიზონი განახევრებულიყო.

— თავდაცვა შეუძლებელი გახდება, თუ სარდაფებში ჩავიკეტებით, — თქვა გორიაჩიმ. — ყველაფერი უნდა ვიღონოთ, რომ მტერი სარდაფებამდე არ მოვუშვათ, თორემ გვიანლა იქნება. პოლკის მთელი ტერიტორია ჩვენმა რაზმებმა უნდა დაიკავონ. ზემოთ, შტაბის შენობის ნანგრევებში, სნაიპერები დავაყენეთ; ორი ათეული მოტომექანიზებული ბატალიონის პოზიციებზე გავგზავნეთ; ერთი ოცეული ჩრდილოეთით — სანიტარული ნაწილის უბანზე გამაგრდა. თქვენც უსათუოდ უნდა შეინარჩუნოთ მრგვალი ყაზარმა ტირასპოლის კარიბჭიდან საწყობამდე. ძნელია, მაგრამ უსათუოდ უნდა შეინარჩუნოთ.

— შევინარჩუნებთ! — ვუპასუხე მე.

— თუ აუცილებელია, ერთ ოცეულსაც მოგაშველებთ.

-- ჯერჯერობით აუცილებელი არ არის.

— გევალებათ: არ დაუშვათ ბუგზე დესანტის გადმოსმა, მიზანში ამოიღეთ ტირასპოლის კარები და სარდაფები მუხავეცის მხრიდან დაიცავით. მაშველი ნაწილების იმედი აღარ გვაქვს. ომი, ალბათ დიდხანს გაგრძელდება... ზოგიერთი მოითხოვს, რკალი გავარღვიოთ და სიმაგრიდან გავიდეთ... არ ვიცი, როგორ მოვახერხებთ ამას! — ცოტა იჭვნეულად ჩაილაპარაკა გორიაჩიმ. — მე ვფიქრობ, ჩვენ უკანასკნელ ამოსუნთქვამდე აქ უნდა დავრჩეთ და მტერს რაც შეიძლება მეტი ზარალი მივაყენოთ, შევასუსტოთ მისი შემტევი ნაწილები!.. მაგრამ, შესაძლოა, გარღვევაც განვახორციელოთ... ამიტომ, თუ დრო მოიხელთოთ, ორიოდე სიტყვით აუხსენით მეზრძოლებს, როგორ უნდა იმოქმედონ სიმაგრიდან გასვლის შემთხვევაში...

იმ დღეს ყველასათვის აშკარა გახდა, რომ ბრძოლა სამკვდრო-სასიცოცხლო იქნებოდა. მართალია, არ ვიცოდით, რა ხდებოდა ზურგში, დიდ მიწაზე, მაგრამ ვგრძნობდით, ომი დიდხანს გასტანდა და ჩვენც ხანგრძლივად მოგვიწევდა მტერთან გამკლავება.

ამიტომ, სიმაგრის სხვადასხვა ნაწილებიდან მეთაურები ცენტრალურ სარდაფში შიკრიბნენ მოსათათბირებლად.

თათბირის მონაწილეებმა დაახასიათეს თავიანთ უბნებზე შექმნილი მდგომარეობა და ამოირჩიეს ერთიანი ხელმძღვანელობა. სიმაგრეში მეზრძოლი ნაწილების მეთაურად დაინიშნა 44-ე პოლკის კაპიტანი ზუბაჩევი, ძველი კომუნისტი, სამოქალაქო ომის მონაწილე, პოლიტიკურ დარგში მის მოადგილედ — პოლკის კომისარი ფომინი, ხოლო შტაბის უფროსად — უფროსი ლეიტენანტი სემიონენკო, რომელმაც აფხა-

ზავასთან ერთად გაანადგურა ციტადელში შემოჭრილი მტრის ტანკები.

საშუალო მეთაურებს დაევალოთ მეომართა აღრიცხვა და ოცეულებად დაყოფა.

ეს იყო № 1 ბრძანება, ქალაქის ნახევებზე რომ ჩაწერა ლეიტენანტმა ვინოგრადოვმა. ბრძანების მიზანი იყო ერთიანი ხელმძღვანელობის შექმნა და შეთანხმებული მოქმედების ორგანიზაცია.

თათბირი ბოლომდე აღარ დასცალდათ. როგორც კი დაბომბვა შეწყდა, მტრის მეავტომატენი იერიშზე გადმოვიდნენ და მეთაურებმაც თავიანთ ნაწილებს მიაშურეს.

ბრძოლა გაცხარდა. მდგომარეობა ყოველ წამს იცვლებოდა. საჭირო ხდებოდა ძალთა სახელდახელო გადაჯგუფება.

ბრძანება ვერ შესრულდა, მაგრამ ციტადელის ცენტრში მაინც გარკვეული წესრიგი დამყარდა (ამ ბრძანების ფურცელი ომის შემდეგ სიმაგრის ნანგრევებში იპოვეს).

იმ დამით წუთით არ მომიხუჭავს თვალი. გულში ათასმა ფიქრმა, ათასმა დავიწყებულმა წვრილმანმა გაიღვიძა. საამო იყო წარსულის ყოველი მოგონება, იმ მშვიდობიან დღეებში განცდილი ყოველი სიხარულიცა და წყენაც...

მდინარეს დროდადრო პროექტორის სინათლე სერავდა.

შუალამისას ბეჭობიდან ვილაც გადაეშვა წყალში. ჩქაფანი გაისმა და მუხავეცმა, ვით სანდო მოწმემ. ხმა გაკმინდა. დაუყოვნებლივ აკაკანდნენ „შმაისერები“. ტყვიის სეტყვა გაკაპასებით უტყლამუნებდა მდინარის ზედაპირს. წყვილია ისევ და ისევ კვეთდა ნისლისფერი შუქი, ტყვია ზუზუნით მიჰყვებოდა მას და ტყაპატყუპით ცვიოდა წყალში. ვილაც მაინც მიაპობს ზვირთებს... იქნებ, გააღწიოს!..

ბურანში გაილია ის უძილო ღამე... სროლა მინელდა. მტერთან ახალი შეტაკების მომასწავებელმა დუმილმა დაისადგურა.

მეომრები გარინდებული დაჰყურებდნენ ტყვიამფრქვევებს.

ნათელი და ბნელი ომისა

მეორე დღეს იფულდასმით დავათვალთვრეთ მრგვალი ყაზარმა, სადაც ჩვენი რაზმი განლაგდა. ომამდე აქ საჯინიბოები იყო, პირველი სართულის თავლებში სხვადასხვა ნაწილის ცხენები ება და მათი მომვლელებიც აქვე რჩებოდნენ ხოლმე ღამით.

დაბლა არავინ შეგვხვედრია; მეორე სართულის მოფარებულ კუთხეებში თივის ზვინულები შევამჩნიეთ და საეგებიოდ გადავქექეთ. ერთ ადგილას რამდენიმე კაცს წავაწყდით, ბუჩოში მიშალულებს მშვიდად ეძინათ. დაჭრილები გვეგონა და ფრთხილად გამოვადვიძეთ... ჯარისკაცები ზანტად წამოდგნენ და თავჩაქინდრულნი თვალს ვერ გვისწორებდნენ. დიდხანს ვეკითხებოდით, რას აკეთებდნენ აქ, მაგრამ ისე დაბნეულად პასუხობდნენ, რომ თითქმის ვერაფერი გავიგეთ.

— ჩავრჩით... ცხენებს ვყარაულობთ... — ამოღეჭა ერთმა.

— ჩვენები მოვლენ და დავახვედრებთ... — წაიბუტბუტა მეორემ.

— დასწყევლოს ღმერთმა, ისეთი გრუხუნია, ფეხს ვერ გადადგამ... — ცოტა დარცხვენით დაიკვნესა მესამემ.

მალე დავრწმუნდით, რომ ეს ჭელები დარეტიანებული იყვნენ განუწყვეტელი დაბომბვისაგან და რაკი ახლოს მეთაური არ იყო, არ იცოდნენ, როგორ მოქცეულიყვნენ — აქ დარჩენილიყვნენ თუ დაეტოვებინათ ცხენები და სხვა ნაწილს შეერთებოდნენ. შვიდი დღე-ღამე გაეტარებინათ აქ ეჭმელ-უსმელთ, ჭერი თავს ენგრეოდათ, მაგრამ მშვიდად ეძინათ.

ცოტა შევახურეთ, მერე ორიოდე სიტყვით მდგომარეობა ავუხსენით და დაღუპულ ამხანაგთა ავტომატები მივეცით.

— ახლა მე ვუჩვენებ იმ წყეულებს! — გულგრილად ჩაილაპარაკა ერთმა და იარაღი ჩაბლუჯა. დანარჩენებს არათფერი უთქვამთ, მაგრამ იარაღს მაგრად ჩასჭიდეს ხელი. ეს ჯარისკაცები ბოლომდე დარჩნენ ჩვენთან, გულდაგულ იბრძოდნენ და ციხე-სიმაგრეს შესწირეს თავი.

ყველა თავისებურად ხვდება განსაცდელს. ზოგი თვითონ პოულობს გამოსავალს, ზოგსაც მეთაური და გზის მაჩვენებელი სჭირდება. ამ ბიჭების გასაოცარი გულგრილობა აჯასტურებდა, რომ ისინი უდრტვინველად ხვდებოდნენ სიკვდილს. ასეთი კაცი დაუფასებელი განძია ომში. ერთი შეძახილით ან შეხედვით შეიძლება მისი ანთება. განვლილ დღეებში დამცველთა რიგები შესამჩნევად შემცირდა, ზოგი ნანგრევებში ჩაიმარხა, ზოგი ტყვიამ განგმირა, ზოგიც მძიმედ იყო დაჭრილი. ამიტომ თვითეული მეზრძოლის შემომბატებას ფასდაუღებელი მნიშვნელობა ჰქონდა.

აქ ხომ მიწის ყოველი გოჯი ასჯერ და ათასჯერ იყო გადახნული, ჰაერს კვლავინდებურად ცხრილავდა ტყვია. აფეთქებათა გრიგალი სულ უფრო ხარბად ნთქავდა ყველაფერს. ჩვენს ზემოთ ავტობატალიონის მანქანები იწვოდა და რეზინის უსიამო სუნი სულს გვიხუთავდა, ცოტა ჩრდილოეთით,

გადაბუგული ტანსაცმლის საწყობი ხრჩოლავდა. ეს სუნი ისეთი აუტანელი იყო, რომ ვისაც კი ჰქონდა, აირწინაღს იკეთებდა.

მოგვიანებით ცეცხლი სარდაფშიაც შეიჭრა.

დაცვის შტაბმა გადაწყვიტა, ქალები, ბავშვები და მძიმედ დაჭრილები ტყვედ გაეგზავნათ. სხვა გზა არ იყო; რამდენიმე დღეა მათ ლუკმა არ ჩაუდგიათ პირში, წვეთი წყალი არ დაუღევიათ. ეს გადაწყვეტილება ლეიტენანტმა კიჟევატოვმა გამოაცხადა. სხვათა შორის, ასეთი რჩევა პეტია კლიპასაც მისცეს. მაგრამ იუკადრისა, წითელარმიელი ვარ და აქედან ფესსაც არ შოვიცვლიო. ბოლოს და ბოლოს, პატარა მუსიკოსმა თავისი გაიტანა. მასთან ერთად დარჩნენ ვალია, კოლია ნიკოლაევი და ბევრი სხვა.

სიმაგრეში დარჩენილნი გარემოცვის გარღვევაზე ვოცნებობდით.

ჯერ კიდევ 25 ივნისს, ღამით, ცენტრალური კუნძულის ჩრდილოეთ ნაწილში განლაგებულმა მებრძოლებმა მიიღეს შეერთებული ჯგუფის სარდლობის ბრძანება: ლეიტენანტმა ვინოგრადოვმა 100-120 მებრძოლისაგან შეადგინოს ავანგარდული რაზმი, 26 ივნისს, დღისით, გაარღვიოს რკალი და გაიჭრას ქალაქის მიმართულებით.

უკეთუ ეს ოპერაცია წარმატებით დაგვირგვინდებოდა, ამით სწრაფად ისარგებლებდნენ გარნიზონის მთავარი ძალები.

თერთმეტ საათზე რაზმი საწყის პოზიციებზე შეგროვდა — ციტადელის სამთალოვან კართან. მტერმა შეამჩნია ეს შეჯგუფება და ყუმბარები დაუშინა. შუადღისას ვინოგრადოვმა იერიშის ნებართვა მიიღო ზუბაჩევისა და ფომინისაგან. მეორე ეშელონის დანაყოფებმა სარდაფის სარკმლებიდან მტერს

ტყვიამფრქვევები დასცხეს, რითაც ისარგებლეს გამრღვევი რაზმის მებრძოლებმა, ხიდი გადაირბინეს, გაანადგურეს კედელთან გამაგრებული მტერი და აღმოსავლეთით გაიჭრნენ. მაგრამ მთავარი ძალები დროულად ველარ მიჰყვნენ მათ. გარღვევის ადგილი მაშინვე გადაკეტა მტერმა.

სალამოს შვიდი საათი იქნებოდა, როცა განახევრებულმა რაზმმა მოსკოვის გზატკეცილზე ბრესტის სამხრეთ გარეუბანს მიატანა. მტერმა ღია ველზე მიუსწრო და ტანკები მიუსია. ვინოგრადოვი და რამდენიმე მებრძოლი იქვე შეიპყრეს. დანარჩენები კი ბრძოლაში დაიღუპნენ.

კომისარმა ფომინმა და უფროსმა ლეიტენანტმა ბიტკომ ღამით სცადეს მუხნავეცის გადალახვა, მაგრამ მტერი მაშნალებით, შუშხუნებით და საგეზნიშნო ტყვიით ანათებდა მდინარეს.

გაიძვა ბრძანება: „წინ!“ მებრძოლები ერთბაშად შეცვივდნენ წყალში; იარაღშემართულნი უხმაუროდ მიტოპავდნენ ლამიან ფსკერზე; მაშხალის შუქზე მტერი მათ ადვილად პოულობდა. ჩასაფრებულ ფაშისტებს ახალ-ახალი ძალები გამოჰყავდათ მდინარეში შეჭრილ რაზმებთან საბრძოლველად. გადარჩენილნი უკანვე ბრუნდებოდნენ — მდინარის გამოღმა... ასე გრძელდებოდა რამდენიმე ღამეს ზედიზედ.

27 ივნისს სიმაგრის დამცველებმა ახალი იერიში მიიტანეს საყდარზე. ამ ბრძოლაში ერთ-ერთ რაზმს ონისიმე ასათიანი მეთაურობდა.

ხელჩართულ ბრძოლაში ჩვენებმა გაიმარჯვეს; ფაშისტები გამოდევნეს ეკლესიიდან. მტრის ერთმა ნაწილმა ტირასპოლის კარიბჭეს მიაშურა, მაგრამ ასათიანის რაზმს ჩვენც წამოვეშველეთ; პასუხად დასავლეთ კუნძულებიდანაც შემოიჭრ-

ნენ მტრის დამხმარე ჯგუფები და კარიბჭის შესასვლელთან, ხიდის თავში, სისხლისმღვრელი შეტაკება გაჩაღდა.

ალარ ისმის ყუმბარების გრიალი. ტირასპოლის კარიბჭესთან ხელჩართული ბრძოლაა. მტერი ლამობს ხიდზე გადაატაროს თავისი მოიერიშეები, ხოლო ჩვენ გვინდა, არა მარტო საყდრიდან გამოქცეული რაზმი მოვსპოთ, არამედ ხიდზე გადმოსულ, კარგად დასვენებულ მაშველ ნაწილებსაც გავუსწორდეთ. ერთმანეთში არეულა ხიშტების ჩახაჩუხი, ყვირილი, გინება, ღუგლუგათა ცემა. ფეხქვეშ ვთელავთ მკვდრებსა და დაჭრილებს, უგონოდ მივიწევთ ერთმანეთზე.

მტერმა იძალა. საყდრიდან გამოქცეულმა რამდენიმე მოიერიშემ თავი დააღწია ჩვენს მახვილს. გერმანელების რაზმებმა ორივე მხრიდან ცოცხალი კედლით გადაკეტეს კარიბჭეში გადასასვლელი და ტყვიამფრქვევები ჩადგეს. ჩვენი მეზრძოლების მცირე ჯგუფი, დაახლოებით ხუთი-ექვსი კაცი, რომელთაც, ბრძოლაში გააფთრებულთ, ყველაფერი დავიწყებოდათ. ხიდის მეორე თავში გაჭრილიყვნენ და გარემოცვაში მოჰყვნენ. მათ შორის იყო ონისიმე ასათიანიც. ონისიმემ ორი გენერალი განგმირა ხიშტით და გვიანდა იგრძნო, რომ ამხანაგებს მოწყვეტილი, მწვანე მუზარადიანებსა და მოკლენიშტიანებს მოემწყვდიათ ალყაში.

* * *

ძველი მოგონებები ნამსხვრევებს ჰგავს. იგი, როგორც მიწის სიღრმეში ჩალეწილი ძვირფასი ნივთი, ნამსხვრევთა მრავალი ფენითაა დაფარული. რესტავრატორები ბევრს წვა-

ლობენ ასეთი ისტორიული ძეგლების აღსადგენად, ცდილობენ, ნაწილი ნაწილს მიუხადაგონ, ააწყონ და გაამთლიანონ. ხშირად ზოგიერთ ნაწილს ველარ პოულობენ და მას სხვა დეტალით ცვლიან, რაღაცას უმატებენ, რაღაცას აკლებენ.

~~ამ მხრივ, მემუარისტი რესტავრატორს მაგონებს ისიც ცდილობს ნამსწვრევთაგან შექმნას მთელი და თუ რომელი საშე ნაწილს ვერ იპოვის, რითიმე შეავსოს იგი, მიხატვებით მაინც აღადგინოს წარსული.~~

იმ წარსულის მხოლოდ მკრთალი რამ ხაზი გახსოვს ხშირად, გაცრეცილი ჩრდილი. ეს ბუნდოვანი გაეღვება უფრო ნაწყვეტ-ნაწყვეტ ზმანებასა ჰგავს, ვიდრე მთლიან სურათს. სხვათა შორის, ასე ჩამრჩა ხსოვნაში ონისიმე ასათიანის ნაწყვეტ-ნაწყვეტი ნაამბობიცი; მაგრამ მკითხველი მთლიან ნახატს მოითხოვს და მეც ვეცდები შეძლებისდაგვარად აღვადგინო იგი.

* * *

ვიღაცამ მკლავზე თოფის კონდახი დაჰკრა, ხიშტიანი შაშხანა დააგდებინა, მეორემ რევოლვერის ტარი ჩასცხო თავში და პოლიტხელი ძირს დასცა. იგი მყის წამოიღვა; მაგრამ დაბარბაცდა და კვლავ უღონოდ მიენარცხა ხიდის ანჯამებს.

ირგვლივ გაძლიერებული დაცვა იდგა, ყოველ ნაბიჯზე ჯარისკაცები გამოჯგიმულიყვნენ. დარეტიანებულ ასათიანს კინწისკვრით მიათრევდნენ ხიდზე.

— ხელები მალლა! — დასჰყვივლეს უცებ და ონისიმემ უნებურად ასწია ხელები. მის სმენამდე ბუნდოვნად აღწევდა ციხე-სიმაგრესთან ატეხილი ბრძოლის გუგუნი.

ამ თავზარდამცემი დაბომბვის დროს ყაზარმის კედლებს არ შევფარებოვართ. ჩვენი ტყვიამფრქვევები გაცხარებით ურტყამდა ტირასპოლის ხიდს, სადაც მტრის დამკვრელი ნაწილები იყო თავმოყრილი. ვშიშობდით, მოწინააღმდეგეს არ ესარგებლა ხელჩართულ ბრძოლაში მოპოვებული წარმატებით და ძლიერი ცეცხლის საფარქვეშ არ შემოჭრილიყო... ასე რომ, მტრის მუჯღუგუნებთან ერთად ჩვენი ტყვიაც ზუზუნით მიაცილებდა სახეშეშლილ, რეტდასხმულ ონისიმეს. თითქოს საუკუნე გაგრძელდაო ეს ორწუთიანი გზა... ხაფანგში გამომწყვდეულს ყოველ ნაბიჯზე ჩასძახოდა იდუმალი ხმა: „ნუთუ ჩვენების ტყვიით უნდა მოვკვდე?..“

გაოგნებული ასათიანი ხიდის ბოლოში მიიღო კოჭლმა ფელდფებელმა, რომელიც „ვალტერს“ ატრიალებდა და სახედალმეჭილი უცაცხანებდა:

— ლოს! ლოს! შნელ, დუ ზაუ! — გასწი! გასწი, ^{შე} მაკე ღორო!

რეტდასხმულს თავის თავისთვის ანგარიში ვერ მიეცა, ვერ მიმხვდარიყო, რა მოხდა ამ ორიოდ წუთში. სულ ახლოს ისმოდა ტყვიის წივილი, მაგრამ ონისიმე გუმანით ხვდებოდა, რომ ეს მისთვის საშიში აღარ იყო. ეს შეგრძნება უცნაურ სიმშვიდეს ჰგვრიდა და რაღაც გამოურკვეველ შვებას აძლევდა...

უცნაური ძილ-ღვიძილი დიდხანს არ გაგრძელებულა. უცბად ვიღაცამ წიხლი წაჰკრა და როცა თვალი გაახილა, მის წინ კვლავ ის ფეხკოტიტა ფელდფებელი დაინახა. ფაშისტი ცხვირთან პისტოლეტს უტრიალებდა. წიხლს ურტყამდა და გაუგებარ ენაზე რაღაცას უყვიროდა.

შემდეგ გერმანელმა უბე გაუჩხრიკა; ორივე ჯიბეში ერთ-

დროულად ჩაუყო ხელები, იქ თეთრი პურის გამხმარი ნაფხვენები და შაქრის პაწია ნატეხი აღმოჩნდა.

— ოჰო! აი, თურმე რას მიირთმევს ეს ვაჟბატონი!..

დაიდრიალა და უმალ მრავალმნიშვნელოვნად დაუმატა — „დიდი ნადირი ჩავიგდეთ ხელში“.

ფელდფებელი უფრო აბობოქრდა, კოჭლ ფეხზე შედგა, რევოლვერი მოუღერა და ჩხრეკა განაგრძო. ჯიბეში წითელვარსკვლავიანი პატარა ლილიც უპოვა და ამაზე მთლად გაგიჟდა...

ასათიანს ახლა ყრუდ ესმოდა ბომბების ქუხილი. „იუნკერსების“ ახალ-ახალი ტალღა თავს აცხრებოდა ყაზარმის ნანგრევებს. ბომბები წივილით ენარცხებოდნენ მიწას. ჰაერში აქრილი ბული ცეცხლოვან სვეტებად იკლაკნებოდა.

ონისიმე უაზროდ გაჰყურებდა ამ გაგანას... ფელდფებელმა შეამჩნია ასათიანის გაცბუნებული სახე, ცხვირზე ხელი წაავლო, შეანჯღრია და უთხრა:

— ხედავ?!.. ეს არის გერმანია! — ამ სიტყვებზე მუშტი მედიდურად გაიშვირა იუნკერსებისაკენ, ზარზეიმით რომ დაქროდნენ სივრცეში. მერე წამით შეჩერდა, ასათიანის ჩამოგლეჯილ, ჭუჭყიან სამოსს კოჭლი ფეხი დაადგა და ზიზლით დაუმატა: — და ეს არის რუსეთი!

ონისიმე მიხვდა, რას ეუბნებოდა ეს კოჭლი გადამთიელი და გულში მწვავე ტკივილი იგრძნო. ამ ტკივილმა მთელ სხეულში დაუარა და თვალებიდან ბურუსი შემოაცალა. მან მრისხანე მზერა ესროლა ირგვლივ მყოფთ. სახეზე ხელი მოისვა, შუბლი დაიზილა, თვალეები მოიფშენიბა. მხოლოდ ახლა მიხვდა, სადაც იმყოფებოდა, მაგრამ ჯერ კიდევ ვერ გამოკვეულიყო კარგად...

ონისიმეს გვერდით ვილაც წოწოლა ჯარისკაცი ავტომატს წმენდდა. ტყვე ანგარიშმიუცემლად მიაშტერდა იარაღს. მე იარაღი აღარა მაქვს, — გაიფიქრა მან, — ამიტომ, როგორც სურთ, ისე მომექცევიან. ჩემი აღარავის ეშინია, არაფრად მაგდებენ... იარაღი რომ მქონდეს!.. — ონისიმე თვალებით ჭამდა ავტომატს, სხვას აღარაფერს ხედავდა. ოღონდ ავტომატი, შაშხანა, თუნდაც უბრალო დანა ჰქონოდა ახლა!..

ონისიმე ცდილობდა ძალა მოეკრიბა, გარკვეულიყო თავის მდგომარეობაში. მაგრამ კოჭლმა ფელდფებელმა გამოფხიზლება აღარ აცალა. უცებ საყელოში სწვდა და ბექობისაკენ დაითრია.

— დუ, საკრამენტ! შენ ეი, წყეულო! რა ბრძენივით ჩაფიქრებულხარ, აქეთ მოდი!

ასათიანს არ ესმოდა, რას ეუბნებოდა ეს პირქუში გადამთიელი. ფელდფებელი გაბრაზდა.

— აქ დადექი, შე ტურტლიანო, და თქვენებს გადაეცი, იარაღი დაჰყარონ!

ონისიმე გაკვირვებით მიაჩერდა დორბლმორეულ ფელდფებელს და ვერ მიხვდა, რას მოითხოვდნენ მისგან.

გერმანელმა თარჯიმანს გამოუძახა. ასათიანს არ შეუმჩნევია მისი მოსვლა. უცებ საშინელმა წრიპინა ხმამ ცივად ჩასძახა:

— მიკროფონთან მიდი და ალყაშემორტყმულ ამხანაგებს მოუწოდე, იარაღი დაჰყარონ! უთხარი, რომ არავითარი საფრთხე არ მოელით ტყვეობაში!

ონისიმე არ განძრეულა და თარჯიმანმა დამარცვლით გაუმეორა:

— მიაღე პირი მიკროფონს!.. უთხარი თქვენებს, ბრძოლა შეწყვიტონ. იარაღი დაყარონ... თორემ დაიღუპებიან!..

ასათიანს სახე აუჭრელდა, თავზარდაცემული მიშტერებოდა აღმოდებულ სიმაგრეს. ახლა უფრო მკაფიოდ, უფრო ნათლად ხედავდა ყველაფერს; ესმოდა, როგორ ისროდნენ მისი ამხანაგები, შეჰყურებდა წყლის პირას მხოხავ გერმანელებს, შეშინებული რომ ეფარებოდნენ ქვებს და მდინარესთან მისვლას ვერ ბედავდნენ. თვალწინ ეხატებოდა დიდი, მრისხანე ბრძოლის სურათი...

ხეიბარი ფელდფებელი მოთმინებით ელოდა პასუხს; ონისიმემ თარჯიმანს შეხედა. ეს პატარა, ჩოფურა კაცი მის გვერდით იდგა კისერწაგრძელებული. ასათიანი გამოერკვა. ზიზღით მიმოავლო თვალი გარშემოხვეულ ჯარისკაცებს.

წეამჩნია: ჯარისკაცება გამომცდელად შეჰყურებდნენ. ფელდფებელმა ველარ მოითვინა, რევოლვერი მოუღერა და მიკროფონთან მიაგდო:

— ჩქარა, ეშმაკის კერძო! მაჯლაჯუნავ! არ გინდა ამხანაგები გადაარჩინო?! ჩქარა მიდი! — დაუღრინა და ფერღებში წიხლი ჩააწილა.

ონისიმე დაიძაბა, მოკლევ თმა აებურძგნა, ხელები მალლა აიშვირა და სასოწარკვეთით დაუყვირა:

— მესროლეთ! მესროლეთ!

იმ წამს ფელდფებელისაკენ გაიწია, მუშტები მოიქნია და ზიზღით დაიდმუვლა:

— მესროლეთ! მომკალით, თქვე წყეულებო!

ფელდფებელი გაფითრდა. ჯარისკაცები უფრო ახლოს მივიდნენ მიკროფონთან და ფელდფებელს მოეჩვენა, რომ ისინი თანაგრძნობით მისჩერებოდნენ ტყვე წითელარმიელს.

— რა უნდა? — გაკვირვებით იკითხა ფელდფებელმა.

— მომკალითო, ითხოვს...

ფელდფებელს სახე აემღვრა.

— ახლავე მოუწოდოს, იარაღი დაჰყარონ, თორემ!..

ყველა მიაჩერდა გაბურძგნილ ონისიმეს, რომელიც ხმას აღარ იღებდა.

— წაიყვანეთ! — დაიყვირა მოთმინებადაკარგულმა გერმანელმა, რევოლვერმომარჯვებული მივარდა ონისიმეს და თავ-პირი დაუსისხლიანა.

ოდნავ გონს რომ მოეგო, ონისიმე ყურადღებით დააკვირდა ჯარისკაცებს და ახლავდა დაინახა, რომ ბევრი მათგანი ხის ტოტებითა და ბალახებით შენიღბულიყო. სახეც შეეღებათ, ლაწვები მურით მოეთხუპნათ, ალბათ, ჩვენს შესამინებლად, პანიკის გამოსაწვევადო, — გაიფიქრა. — ნამდვილ ეშმაკებსა ჰგვანან, მაგრამ ვანა გონივრულია ასეთი ხერხი? იერიშზე გადმოსულ მტერს სახეში ვინ უყურებს?!.

ონისიმემ ისიც შეამჩნია, რომ ნავეებით განუწყვეტლივ გადმოჰქონდათ მოკლული მწვანე მუნდირიანები. „მაშ, მტერს არაფერი აქვს სასაცილო, არც სიმაგრეს აქვს სატირალი“... ფიქრობდა იგი.

შეზინდა. ფელდფებელმა და რამდენიმე უნტერ-ოფიცერმა ონისიმე ცალკე გაიყვანეს, თვითონ განზე დადგნენ და ერთ ხანს საეჭვოდ ჩურჩულებდნენ, მერე აფუსფუსდნენ, ერთმა ონისიმესთან მიიღბინა, თავი აუწია, შეანჯღრია. დანარჩენები მუქარით აყუფდნენ. შემდეგ პისტოლეტები ააჩნაკუნეს და ნაბიჯებით მანძილი გადაზომეს. ონისიმე შეშფოთებით თვალს აყოლებდა უნტერ-ოფიცერს, რომელიც ადგილს ტკეპნიდა და დიდხანს დაბეჯითებით უმიზნებდა. გერმანელმა

იარაღი დაუშვა, ტყვესთან მივიდა, მხრებში ისე გაასწორა, თითქოს სურათის გადაღებას უპირებსო. მერე თავის ადგილს დაუბრუნდა, მარცხენა ფეხი უკან წადგა, მარჯვენა ოდნავ მოხარა და რევოლვერი ისევ დაუმინა.

გაისმა მხიარული ყიჟინა და ონისიმემ კვლავ იგრძნო, როგორ შეეკუმშა გული.

ბექობზე ფელდფებელმა ამოირბინა და უნტერ-ოფიცერს რაღაც დაუყვირა.

ონისიმე სასწრაფოდ წინ გაიგდეს. ფელდფებელი ყვირილით მისდევდა უკან.

— კამერადი ამოიყვანე, აბა, ჩქარა!

ჯარისკაცებმა ავტომატი დაუმინეს და თავდაღმართზე უბიძგეს.

— ჩქარა! ჩქარა! დაჭრილი უნტერ-ოფიცერი ამოიყვანე! ქვასთანაა!

ონისიმე თავდაღმართზე დაეშვა. გზადაგზა ჯარისკაცები თავს სწევდნენ, უგეზოდ მიშავალს ხელს ჰკრავდნენ და ასე ბიძგებით მიაქანებდნენ ნაპირისაკენ, რომელიც ჩვენი ტყვიამფრქვევების ცეცხლში გახვეულიყო.

ონისიმემ სწრაფად ჩაირბინა ნაპირზე. აქაც მუჯლუგუნითა და ყვირილით შეხვდნენ:

— ჩქარა! ჩქარა!

ხიდქვემოთ წამოფერდებულ კორდთან შეუხვია. ნაპირი თვალს მოეთარა. საღამოს მოძალებულ ბინდში ქვათა ჩრდილები მოჩანდა მხოლოდ, ხოლო მაღლიდან მრისხანედ უშენდა ტყვიამფრქვევი, ლოდები ისხლეტდა ტყვიას და წივილით მისრიალებდა წყლის ზედაპირზე.

აქლოშინებული ასათიანი გრძნობდა, როგორ უცემდა გუ-

ლი, როგორ ეკვროდა სუნთქვა და გზააბნეული აცეცებდა თვალს. ზემოდან კი გაათორებული ყიჟინა ესმოდა: „კამერად, კამერად, ჩქარა!“

უცებ სიბნელიდან რაღაც ლანდი წამოიმართა და, სანამ ონისიმე რასმე მოიფიქრებდა, ზურგზე მოახტა. იმწამს ყელზე საზარელი ხელების მოჭერა იგრძნო, ეგონა, მახრჩობენ, მუხლებზე მარწუხებს მიჭერენო. ვიღაცამ დამცინავად ჩასძახა:

— ჩქარა! ჩქარა! წყეულო!

მაგრამ ტყვე არ ინძრეოდა.

— შნელ, შნელ! კამერადი ამოიყვანე!

— შნელ, შნელ! პანლური მაგას! — იძახდნენ ზემოთ დარჩენილი გერმანელები.

ცოცხალი ტვირთი ქვეწარმავალივით დაიკლაკნა და ფერდებში წიხლი დაუშინა. მაშინ სასოწარკვეთილმა ტყვემ ელვისებური სისწრაფით წამოიღო კისრულით ზურგზე აკიდებული დაჭრილი ფაშისტი. სანამ გერმანელი დაყვირებას მოასწრებდა, ხელი დაავლო ვეება ლოდს და გამეტებით ჩასცხო თავში. ზემოდან სულ უფრო გაათორებით ისმოდა ყიჟინა:

— შნელ, შნელ! ამოსცხე მაგას!

იმავე წუთს სულ ახლოს გაისმა ავტომატის ჯერი, მოახლოებული ნაბიჯის ხმა, რიყეზე ჩექმების ბრაგაბრუგი.

გონმოსული ტყვე ერთი ნახტომით გადაეშვა მდინარეში, რომელიც უცებ გადაანათა პროყექტორებისა და მაშხალების შუქმა. ონისიმე გამეტებით მიარღვევდა ტალღებს და გრძნობდა, როგორ ეცლებოდა ღონე, როგორ უღუხნდებოდა მკლავი.

მდინარეს ათასობით ტყვია წკეპლავდა, ბორგავდა წყალი.

ორივე მხრიდან გაშმაგებით ესროდნენ ნაპირს... მტრის არტილერიამაც ცეცხლი გაუხსნა ჩვენს ყაზარმებს.

ონისივე ტყვიის თქეშში მოიკვლევდა გზას. მოიწევდა აღმოდებული სიმაგრისაკენ, სადაც შეიძლება ნანგრევთა შორის ცოცხლად დამარხვა ელოდა, მაგრამ ძალას მატებდა ის დიდო სიზარული, რომ კვლავ ჩადგებოდა სამშობლოს დამცველთა რიგებში. შევამჩნიეთ, ვილაც ჩვენკენ-მოცურაუდაც ცეცხლი მაშინვე წყლიდან მტრის პოზიციებზე გადავიტანეთ და ერთ წითელარმიელთან ერთად, კედელ-კედელ ნაპირს მივუახლოვდი.

იგი ნაპირზე გამოსვლისთანავე დაეცა. ჭურვებისა და ბომბების გრიალში ცოცხალ-მკვდარი ასათიანი ძლივს შემოვიყვანეთ ყაზარმაში.

გონს მოვიდა თუ არა, იაჩალი მოითხოვა. ავტომატი რომ მივეცი, გულში ჩაიხუტა, ბავშვივით აზლუქუნდა. მთელი დამე იარაღჩახუტებულმა გაატარა და ტყვიის წივილში ჩურჩულით მიყვებოდა თავის უცნაურ თავგადასავალს. იგინებოდა, დასავლეთისკენ მუშტებს იქნევდა.

მეორე დღეს სიმაგრეს მძიმე ბომბები დააყარეს, ათი საათის განმავლობაში სულმოუთქმელად გვიშენდნენ. ჭურვები გაშმაგებით თხრიდა სანაპიროს...

ჰაერის რყევისაგან ბევრს ცხვირიდან და ყურებიდან სისხლი სდიოდა.

ქალაქში მყოფი გერმანელები სახლის სახურაეებიდან გვითვალთვალეზდნენ თურმე და მცხოვრებლებს ეტრაბაზებოდნენ: „პოიტე კაპუტ ფესტუნგ!“ — დღეს თეთრ დროშას გამოკიდებენო...

17 ჰაერში ტრიალებდა ძირფესვიანად ამოთხრილი ასწლოვანი ხეები, მაგრამ თეთრი ღრღმა შაიხც არ ჩანდა.

ნაშუადღევს დაბომბვა შეწყდა და რეპროდუქტორი აროხროხდა:

— უკვე ავიღეთ მოსკოვი... აზრი აღარ აქვს თქვენს ბრძოლას. აღტაცებული ვართ თქვენი მამაცობით და გთავაზობთ „საპატიო კაპიტულაციას“. გარანტირებულია კარგი დამოკიდებულება, კვება, დაჭრილთა მოვლა. მოსაფიქრებლად ერთ საათს გაძლევთ!

— ხედავთ, როგორ დაგვიტკბენ? — თქვა ბელორუსმა, — ეტყობა, არც ჩვენ ვისვრით ბამბას!..

რეპროდუქტორი კი მონოტონურად იმეორებდა:

— გავიდა ათი წუთი!..

— გავიდა ნახევარი საათი!..

ამოიწურა ვადა.

— თქვენ არღვევთ ომის წესებს, — ახლა უფრო მკაცრად განაცხადა გერმანელმა, — ალყაშემორტყმული სიმაგრე, როცა მას დახმარების იმედი აღარ აქვს, ვალდებულია ჩაბარდეს მოწინააღმდეგეს. თქვენ ბარბაროსულად ღუჯავთ ქალებსა და ბავშვებს, აიძულებთ აიტანონ ომის საშინელებანი, ნუ დაგავიწყდებათ, რომ მთელი ევროპა ჩვენია!

შემდეგ დიქტორმა დიდი რიხით ჩამოთვალა გერმანიის მიერ დაპყრობილი სახელმწიფოები, ლუქსემბურგიც არ დაივიწყა.

— ამრიგად, ომი დამთავრებულია, — განაგრძობდა ის. — ბარბაროსული მოქმედებისათვის დაისჯებით ყველა. დამატებით გაძლევთ თხუთმეტ წუთს! ღიაა ტირასპოლის კარი. ამ ვადის გასვლისთანავე მიწის პირიდან აღვგვიტყვი ციხე-სიმაგრეს.

ჩამოვარდნილ მყუდროებას დროდადრო ცივი ხმა არ-
ღვევდა:

— გავიდა ხუთი წუთი!..

— გავიდა ათი წუთი!

— დარჩა ორი წუთი!

ადგილიდან არავინ დაძრულა.

იერიშის მოსაგერიებლად ვემზადებოდით.

მტერმა ახლაც ზუსტად შეგვისრულა დაპირება, ურიცხვი
ბომბი დააყარა სიმაგრეს.

მდუმარედ ვიჭექი ყაზარძის მორყეულ კედლებთან და
ფიქრები არ მასვენებდა: „გამოდის, რომ ჩვენ და ლუქსემ-
ბურგი ერთნი ვართ... ცოტა მოითმინეთ! მარტო ჩვენი სიმაგ-
რე უფრო მეტად შეგახურებთ, ვიდრე მთელი ლუქსემბურ-
გი!..“

კარგად ვიცოდით, რატომ მოუხშირა მტერმა ასეთ მოწო-
დებებს, ონისიქემ გვიამბო, გერმანელთა პოზიცია გვაშებით
არის მოფენილი, ბუგზე ნავებით გადააქვთ ცხედრებიო. შემ-
დეგ, როცა 1941—1942 წლების გერმანულ გაზეთებს ვათვა-
ლიერებდი, თვითონაც დაერწმუნდი ამაში: თითქმის ყველა
ნომერში რამდენიმე განცხადება იყო შავი ჯვრითა და წარწე-
რით: „გეფალენ ინ ბრესტ-ლიტოვსკ“ — „დაიღუპა ბრესტ-
ლიტოვსკში“.

მტერი არ ისვენებდა. მისი თვითმფრინავები ხან ბომბს
გვაყრიდა თავზე, ხან დასტა-დასტა ფურცლებს.

84-ე პოლკში ათობით ასეთი ნაბეჭდი ქაღალდი შეაგრო-
ვეს თავდამცველებმა. ზემდეგმა მეერმა თვითნებულ მათგანზე
ღორი დახატა და გერმანულად მიაწერა: „ფაშისტური ღორი
ვერ დაეპატრონება საბჭოთა ბოსტანს“. კომკავშირელებმა

ტყვე გერმანელი მოიყვანეს, თავით ფეხებამდე ააწებეს ეს ფურცლები და ასე გაისტუმრეს თავისიანებთან. ჩრდილოეთ კუნძულზე რეპროდუქტორის ერთ-ერთი მოწოდების პასუხად სისხლით წარწერილი დიდი ტილო გააკრეს მიწაყრილის კედელზე: „გავწყდებით, მაგრამ ციხე-სიმაგრეს არ დავთმობთ!“

ც ხ ე ნ ი

გვიან შევამჩნიეთ, რომ მრგვალი ყაზარმის სამხრეთ კუნძულს მტერი რატომღაც უფრთხილდებოდა. შუაწელი და ჩრდილოეთი მხარე ძირფესვიანად იყო დანგრეული, ხოლო კარიბჭეს მიყრდნობილი ნაწილი თითქმის ხელუხლებლად გადარჩენილიყო. ფაშისტები ალბათ შიშობდნენ, ხიდი არ ჩაიქცეს და შემოსასვლელი არ ჩაიკეტოსო. უწინ, დაიწყებოდა თუ არა და დაბომბვა, ჩრდილოეთისკენ გავრბოდით, ახლა კი, პირიქით, სამხრეთის სწორედ ამ ნაწილში ვიყრიდით თავს. აქ ყუმბარაც ნაკლებად ეცემოდა და მტერიც ისე გვყავდა გამოთოფილი, რომ ხიდზე ადვილად ვერ გაიქაჭანებდა.

მაგრამ თვალის მოხუჭვა ერთი წამითაც არ შეგვეძლო, მოიერიშეები ხან კვამლის საფარქვეშ მოიპარებოდნენ, ხან გაშლილი მწყობრით მოდიოდნენ. დროდადრო ნავტიკებითაც ცდილობდნენ მდინარის გადმოლახვას. ბოლოს და ბოლოს, მტერმა, როგორც იქნა, შეიგნო, რომ ხიდზე იოლად ვერ გადმოვიდოდა. ამიტომ უფრო მდინარეს მიეტანა. მაგრამ ყაზარმის გამონგრეულ ადგილებში ფხიზლად დარაჯობდნენ გუ-

შაგები და ტყვიამფრქვევები შეუჩერებლად კაკანებდნენ ჩვენი საყრდენი პუნქტების დასაცავად. ინტქმებოდა ვაზნები და მალე მთელი მარაგი შექოელიათ.

ყველა მხრიდან ტყვია-წაშალს მოითხოვდნენ მეომრები და აღარ ვიცოდით, რა გველონა. საბრძოლო მასალათა საწყობის ნანგრევები ათასჯერ გვქონდა ფრჩხილებით გადათხრილი და იქ ველარაფერს ვპოულობდით. პოტაპოვის განკარგულებით სარდაფის მარაგიდან მიღებული ერთი ყუთი ვაზნა გვითავდებოდა, ორიოდე ხელყუმბარას კი განკითხვის დღისათვის ვინახავდით.

— ამხანაგო მეთაურო! — მომმართა ერთ საღამოს მომცრო ტანის სერჟანტმა, — ნება მომეცით, ერთი ათეულით კომპზე მივიტანო იერიში. იქ იმათი ორა ტყვიამფრქვევი დგას და ერთი წუთით არ გვასვენებს. ეტყობა, ზედმეტი ვაზნა აქვთ.

ისე ცოტანი დავრჩით, რომ ათი კაცის ალაღებდზე გაშვება გვეძნელებოდა. ხუთნი წავიდნენ, ამათგან ოთხი დაჭრილი იყო. მართლაც, რაღაც ოციოდე წუთში „მგ 34“ სისტემის ტყვიამფრქვევი და კარგა ბლომად ვაზნა მოიტანეს, თან დატყვევებული ფელდფებელიც მოგვეგვარეს.

გერმანელი მძიმედ იყო დაჭრილი. აღარაფერში გამოგვადგებოდა. დაკითხვისას შევატყვე, რომ საშინლად ეშინოდა სიკვდილისა. როცა დაინახა, საკუთარი დაჭრილებისთვისაც ვერ მოგვევლო და მასაც სააქაო პირი აღარ უჩანდა, მუდარა დაგვიწყო. გვარწმუნებდა, მამაჩემს დადი ადგილი უჭირაეს არმიაში. ნუ მომკლავთ, იქნებ გადაგიხადოთ სამაგიერო.

შომშლიმა ყველაფერი დაგვაფიწყა, აღარც ტკივილს ვგრძნობდით, აღარც უძილობას. მგლებივით დავეძებდით საკბილოს. წინა დღეებში, ერთ-ერთი შეტევის შემდეგ კარბ-

ჰესთან მოკლულ გერმანელს ზურგჩანთა ავართვით და იქვე გავხსენით. შიგ მთელი ბუფეტი აღმოჩნდა: თხლად დაჭრილი თეთრი პური, ძეხვი, ნამცხვარი, ბუტერბროდი, რამდენიმე კენიწი შოკოლადი, კბილის პასტა და ზოგი სხვა რამ.

— საქორწილო პურ-მარილია, ბიჭებო! — დაიყვირა ერთმა ამხანაგმა და მოკლულის წელზე გამობმულ ჭრელ თერმოსს დასწვდა.

ძლივძლივობით გავხსენით. ერთ ნაწილში ცხელი ყავა იყო, მეორეში რომი.

„ეს მძიმედ დაჭრილებს გავუნაწილოთ“, — გაუბედავად წარმოთქვა ვილაცამ.

მაგრამ პასუხად სიტყვა არავის დაუძრავს.

თერმოსს რომ ვართმევდით, მეზრძოლი გაძალიანდა, ხელი მოუჭირა. „ავადმყოფისააო“, რომ შევახსენეთ, ათრეული ნაბიჯით მიუტანა მომაკვდავ ამხანაგებს.

ამ შემთხვევიდან მოყოლებული ყოველი ბრძოლის შემდეგ მტრის გვამებზე სანადიროდ მივდიოდით. მაგრამ ასეთი ალაფით აღარასოდეს დავბრუნებულვართ. მტერი ყოველნაირად ცდილობდა, ბრძოლის ველიდან სასწრაფოდ გაეტანა მკვდრები. უცნაური იყო: ერთ მკვდარს ზოგჯერ რამდენიმე მეომარს სწირავდნენ. თუ გვამს ვერ გაათრევდნენ, რაც ზედ ჰქონდა, იმას მაინც შემოხსნიდნენ და წაიღებდნენ. ათასში ერთხელ თითო-ოროლა ორცხობილას ან ნამცხვარს თუ წავაწყდებოდით და იმასაც დაჭრილებს ვუგზავნიდით. ჩვენ კი შიმშილით თავი გვისკდებოდა და მუხლი გვეკეცებოდა.

ერთხელ, როცა მოიერიშე თვითმფრინავები განუწყვეტლივ თავს დაგვტრიალებდნენ და საშინელი ნგრევა გრძელდებოდა, შიმშილმა გარეთ გამომაგდო. „უნდა ვიშოვო რა-

მე!.. — დაგადუგით მომძახოდა გული. — უნდა გიშოვო აუცილებლად!..“

საჯინბოებზე მიდგმულ პატარა ფარდულში შეევარდი: ცხენის ხორცი ვიპოვო იქნებ... გუშინ სადღაც აქედან მთელი ბარკალი მოიტანეს ბიჭებმა. თუმცა ყარდა, ძალზე გახრწნილი იყო, მაგრამ ერთი წიწქნაც არ დაგვრჩენია...

ახლომახლო დახოცილი ცხენების მთელი გროვა აღმოჩნდა. გამიხარდა. დავადგი ფეხი ერთს, მაგრამ მძორი ისე ჩათუთქულ-ჩამყაყებულყო, შიგ ჩავეფალი. გავსინჯე მეორე, მესამე, მეოთხე... ყველა საშინლად გახრწნილიყო.

კარს რომ მივადექი, წვივში ყუმბარის ნამსხვრევი მომხვდა. ვიგრძენი, სისხლი თქრიალით წამოვიდა და ნაკელში ჩავჯექი; ხელის ფათურათ მოვძებნე ჭრილობა და უნებურად გავზომე. არ უნდა ყოფილიყო დიდი, სისხლი კი მაინც შეუჩერებლივ მოდიოდა. მკრთალ სინათლეზე ძლივს გავარჩიე წითლად შეღებილი ხელი. რამდენიმე ხანს ასე ვიყავი, სხეულში კი უცნაური ჟრჟოლა მივლიდა.

ხალათის ნახევით იარას რომ ვიხვევდი, სულ ახლოს თითქოს რაღაცამ გაიფაჩუნა. ავიხედე, მაგრამ ვერაფერი შევამჩნიე... დალახვროს ეშმაკმა, მაინც სულ მეჩვენება, მარტო არა ვარ... ცოტა ხნის შემდეგ ისევ მკაფიოდ მომესმა რაღაც ზუნთქვის მსგავსი, მივიხედ-მოვიხედე კვლავ არავინ ჩანდა.

ჭრილობა შევახვიე და ის იყო, უნდა წამოვმდგარიყავი, რომ ზურგში რაღაც სითბო ვიგრძენი, თითქო შემეხო ვიღაც, მაშინვე კედელზე მიყუდებულ ავტომატს ვეცი და ელდანაკრავივით შემოვბრუნდი.

მკრთალ სინათლეში ცხენის გრძელი და მორჩილი თავი გამოისახა. ჩავაშტერდი. აღტაცებით კანაღამ შევყვირე: „არის

ხორცი-მეთქი!..." გაწვდილ ხელზე ცხენმა კვლავ მომადო სველი ტუჩი. სიამოვნება და სითბო ვიგრძენი.

წვივგრძელი, თეთრქაჩაჩიანი ცხენი გაუნძრევლად იდგა ბაგასთან. რომ იტყვიან, რწყილივით გასუსულიყო. თითქოს ვილაცას ემალებოდა, თითქოს ვილაცას ელოდა.

ფიქრისთვის არ მეცალა. ვეება გერქანული დანა ვიშიშვლე. პირუტყვთან მივედი. ცხენი არ განძრეულა. თავი ჩაქინდრა და კედლისაკენ იბრუნა სახე. დანა ხელში გამეყინა.

ტანი ჭრილობებით ჰქონდა დასერილი. დაგლეჯილ მუხლზე სისხლი შეხმობოდა, გვერდები გადატყავებოდა, დასჩირქებოდა.

ჩვენს თანამებრძოლს ფერდები ჩვენსავით ჩასცვივნოდა. მუცელი გაქრობოდა. გრძელი, შავი, გაზინთული ფაფარი აბურძგნოდა. არც ლაგამი ჰქონდა, არც აღვირი, არც სხვა რამ საბელი, მაგრამ ფეხს მაინც არ იცვლიდა. ან კი საღ უნდა წასულიყო!..

წინიდან რომ მოვუარე, შუბლზე იარა დავუნახე. ხორცი ღრმად ამოჰგლეჯოდა... გავირინდე, პირუტყვისადმი რალაც უცნაური მოკრძალება ვიგრძენი, იქნებ ცხენიც მიჩიხვდა, თავი ასწია, ნაღვლიანი თვალები შემომმაგება. ჩვენი თვალები ერთმანეთს შეეხვდა. მისი ფართოდ გახელილი, მეჩხერწამწამიანი თვალები სავსე იყო ღრმა სევდით; მუდარით, სასოწარკვეთით მომჩერებოდა. მეგონა, საცაა ცრემლი წასკდება-მეთქი.

ვერ გავუძელი საყვედურით სავსე მის მზერას და მეც დავდუნე თავი... სინდისის ქენჯნა ვიგრძენი... ადამიანებს შეგნებით გადაგვაქვს ჩვენი შეჭირვება, ცხენი კი უენოდ იტანჯება, უცეცხლოდ იწვის. ორივე ხელი კისერზე მოვხვიე. მომენდო.

შუბლზე გამიხახუნა თავი. შემდეგ წყნარად გადამადო მხარზე კისერი და იმედითა და ამაყი სიამოვნებით გაყუჩდა.

რამდენიმე წუთს ასე ვიყავით. სათუთად ვუსვამდი ფაფარზე თითებს, ცხვირზე ხელს ვუცაცუნებდი, თვალის ქუთუთობებსა და ყურებს ვფხანდი. პირუტყვი ისე გაინაბა, რომ იტყოდი, მთლად დაავიწყდა თავისი უბედურებაო. უნებურად მოიცვალა ადგილზე შეყინული ფეხი, უფრო ახლო მოვიდა, ტანით მომეკრა.

ბომბების გუგუნე და ყუმბარების ბათქი არ ცხრებოდა. ჭურვები ველური ხარხარით მოაცილებდნენ ერთმანეთს. ჩვენს წინ, გზაზე, ახალი თხრილები ჩნდებოდა. თავლა ცეცხლის კორიანტელში ეხვეოდა. კედლები თრთოდა მოახლოებული საშიშროების წინაშე. თრთოდა ცხენიც. ყოველ აფეთქებაზე უკრთოდა კუნთები, შემდეგ ბავშვივით დაუვლიდა ყრყოლა, აძიგდიგდებოდა. როგორც კი იგრძნობდა აფეთქების სიახლოვეს, თავს მწუხარედ ასწევდა და ისევ გარინდებოდა.

პირუტყვს თავი ავუწიე. ერთხელ კიდევ ჩავხედე ცრემლიან თვალებში, ვეჩურჩულებოდი, ვაშხნევებდი, არ ვაცა, მას, თუ ჩემს თავს...

ჭერი ჩამოინგრა. ჭერი ჩვენს სადგომზე მიდგა. ცხენი უკვე აღარ კანკალებდა.

ყუმბარები კარგა ხანს გაშმაგებით ღრღნიდა მდინარის ნაპირს... მერე ცეცხლმა სარდაფისკენ გადაინაცვლა, მაშინ ცხენმა მშვიდად ამომხედა და თავი მომიახლოვა. იმწამს მეორე კუთხეში მივედი, ორიოდ ბლუჯა გადაარჩინალი თივა ავიდე და პირთან მივუტანე. რამდენიმე ღერი მოწიწუნა, ზანტად

დაუწყო ხრამუნი. აუტანელი შიმშილი ვიგრძენი. მშრალ ხახა-ში თივის ღერი ჩავიდე და გავკვნიტე. ახლადა გამახსენდა, რისთვის მოვედი აქ. დანა ნერვულად შევათამაშე, მაგრამ სანამ დაკვრას მოვასწრებდი, ცხენმა წინანდებურად გადამადო თავი. ზურგზე კვლავ ვიგრძენი თბილი, მთრთოლვარე სუნთქვა. იარაღი ხელიდან გამივარდა. დაწვდი, ელვის სისწრაფით მივიჭერი ლეშთან, ბარკალი მოვაქერი და გამოვიქეცი.

დაჭრილებს რომ ჩამოვუარე, ვიღაცამ კალთაში მტაცა ხელი:

— ამხანაგო, მეგობარო, მესროლე, გევედრები!..

ეს იყო გაფითრებული, დაჩიავებული ახალგაზრდა კაცი... ნაბიჯს აფუჩქარე, რომ ამათთვისაც დროზე გამომეგზავნა ცხენის აყროლებული უმი ხორცი.

მებრძოლები სვავებივით მიესივნენ ლეშს. დაბდღვნეს, დაგლიჯეს, დაინაწილეს. ჯერ ხარბად დაუწყეს თქველეთა, უკანასკნელ ნაჭრებს კი უხალისოდ ლეჭავდნენ.

— აყროლებული ყოფილა! — ზიზღით დაიძახა ვიღაცამ, ბოლო ლუკმა გამოაპურჭყა და გინებაც მიაყოლა.

— ერთი ახლა ცოცხალი ცხენი მოგვცა! — მშიერი კაცის სინარბით ინატრა აფხაზავამ. — საკვირველია, რომ ერთიც არ გადარჩა.

ბოლო დღეებში ძალზე მოტყდა პანტელეიმონი. ლოყები ჩაუცვივდა, თვალები ჩაუქრა. ეტყობოდა, ბევრს ფიქრობდა და თავს ველარ ერეოდა. რამდენჯერმე შევაძჩნიე, ხმამალლა ოხრავდა.

უნებურად თვალი გავუსწორე და პირი დავალე სათქმე-

ლად. მაგრამ მერე თავი შევიკავე, არ დავურღვიე ოჯახზე ფიქრი...

— წამოდი ერთი, რა გაჩვენოთ! — შეწუხებული ხმით გვითხრა ერთხელ აფხაზავამ.

მე და ასათიანი გაუყევით.

ერთ ნანგრევთან შედგა, წაქცეულ ძელქვეშ გახრწნილი გვამი დაგვანახა და უსიტყვოდ მოგვაჩერდა. ვერაფერი გავიგე. ასეთი გვაშებით ციხე-სიმაგრე იყო მოფენილი. ნაბიჯს ვერ გადადგამ, დაღუპულ ამხანაგს რომ არ გადააბიჯო.

ონისიმეს გაკვირვება გამოეხატა სახეზე. დაიხარა. თითქოს ცხვირი დაადო ცხედარს და თქვა:

— ის არის!

მაინც ვერაფერს მივხვდი.

გამშრალი თვალიდან ონისიმეს ორად ორი ცრემლი ჩამოუგორდა.

— ვინ ის, კაცო?

— კაკაბელი ბიჭი!..

მაშინვე ჩაეიჩოქე და ცხედარს დაკვირვებით ჩავაცქერდი. ის იყო — მოუსვენარი, გულმართალი კაკაბელი.

სვეტი მშუცელში დასცემოდა, თავშიც ჰქონდა ჭრილობები, ყვრიმალზე სისხლი შეხმობოდა, წელში მოდრეკილი იდო. თითქოს გასწორებას ლამობს და ეს ძელი არ უშვებსო. მარჯვენა ფეხი ხისთვის გამოედო, გეგონება, სარმის გამოკვრა უნდაო.

— დავმარხოთ საწყალი!..

ძელს მივცვივდით და ნჯღრევა დავუწყეთ. მაგრამ ხე ათასგვარი ნანგრევ-ნამუხრევით იყო ჩახერგილი. ოფლში გავიწურეთ. ჯიუტი სვეტი მაინც არ ეშვებოდა თავის მსხვერპლს.

— თავი დავანებოთ! სულ ერთია, დაუმარხავი ყრია ყველა! — თქვა ონიჰიმემ, — ხომ ხედავ, როგორ გვიშენენ, ვერც მოვასწრებთ.

პანტელეიმონმა უკმაყოფილოდ შეხედა მას.

— დაუმარხავს ნუ დავტოვებთ, ბიჭებო, ერთმანეთს...

განვაგრძეთ თხრა. როგორც იქნა, სვეტს თავი ავუწიეთ და ჩვენი ამხანაგი საშინელი კაკანათიდან გამოვათრიეთ.

ამხანაგები წამოგვეშველნენ.

ახლომახლო ოცამდე გვამი შევაგროვეთ. ყაზარმაში შემოვიტანეთ და ერთ ადგილას დავასვენეთ, მერე ზედ კედელთან, მდინარის მხარეს, საძმო საფლავის ჩიჩქნას შევუდექით... მტერმა ალბათ შენიშნა ჩვენი მოძრაობა და სროლას მოუხშირა. იძულებული გავხდით საქმეზე ხელი აგვედო, მით უმეტეს, რომ მეკავშირემ პოლკის შტაბიდან მნიშვნელოვანი დავალება მოგვითანა: მთელ ციტადელს ალყა უნდა გაერღვია.

როგორც ვთქვი, აქამდე სიმაგრიდან გასვლის ყოველგვარი ცდა მარცხით მთავრდებოდა. მტერს რკინის მარწუხებში ჰყავდა გამომწყვდეული გარნიზონი. თავდახსნის ერთადერთი გზა გარღვევა იყო. ამიტომ ჩვენს შტაბს მეტად რისკიანი გადაწყვეტილება მიეღო. საქმე ის არის, რომ ჩრდილოეთიდან ქალაქისაკენ გაჭრა ყოვლად წარმოუდგენელი გახდა, რადგან გერმანელებმა იქ მოუყარეს მთავარ ძალებს თავი. ჩვენს უბანზე დაწოლა კი შედარებით შესუსტდა. ამასთან, დასავლეთისა და სამხრეთის მიმართულებით გარღვევას მტერი არ მოელოდა და იქ სამარქაფო ნაწილებიღა დატოვა.

— უფროსმა ლეიტენანტმა პოტაპოვმა გადაწყვიტა, ესარგებლა ამ გარემოებით. მისი ბრძანებით, ჩვენს მთავარ ძალებს უნდა გადაელახათ ტირასპოლის ხიდი, გადაეცურათ ბუგის ტო-

ტი, გასულიყვენენ სამხრეთ ხერთვისზე, ხოლო იქიდან — ბრესტის სამხრეთით მდებარე სამხედრო ქალაქში, სადაც ომის წინ საბჭოთა სატანკო და საარტილერიო ნაწილები იდგა. ეს გადაწყვეტილება პოტაპოვმა ომის პირველსავე დღეს მიიღო: სხვათა შორის, ამ მიზნით დაზვერვაზეც გამგზავნა ოცდაორ იენისს.

ნაშუადღევს დაბომბვა შეწყდა და, ჩვეულებისამებრ, რეპროდუქტორი ახრიალდა:

— ღიაა ტირასპოლის ხიდი... ნახევარი საათი ვადა.

— გავიდა ხუთი წუთი!

— გავიდა ათი წუთი!

ამჯერად ჩვენებმა ისარგებლეს შესვენებით, სარდაფიდან ამოირბინეს და მრგვალ ყაზარმაში შემოგვიერთდნენ.

ის ხმა კი აგდებულად, მკახედ განაგრძობდა:

— დარჩა ხუთი წუთი!

— დარჩა ორი წუთი!

ამოიწურა თუ არა დრო, მტერმა გაათკეცებული ძალით დაგვიწინა. ყველანი ყაზარმის სამხრეთით, ზედ კარაბჭესთან შეგქუჩდით. აქედან უნდა შევკრილიყავით ხილზე და ხიშტებით გაგვერღვია გარემოცვა.

ჩვენს ჯგუფს, რომელიც რამდენიმე დღე იცავდა მრგვალ ყაზარმას და ამ ადგილს კარგად იცნობდა, არიერგარდის როლი დაეკისრა. ჯერ საწყის პოზიციაზე უნდა დაგრჩენილიყავით. თუ მტერი შეგვაპჩნევდა და ცეცხლს დაგვიშენდა, დაუყოვნებლივ უნდა გაგვეცა პასუხი, ხოლო როცა მთავარი ჯგუფი ხილს გადაირბენდა. ჩვენც უნდა მიეყოლოდით.

გაისმა ბრძანება: „გარღვევაზე!“

ძირითადი ჯგუფი მაშინვე ხილზე აიჭრა.

მტერმა ერთ ხანს ვერ შეამჩნია ჩვენების მოძრაობა, მაგრამ როცა მეწინავე ნაწილმა მდინარის მეორე ნაპირზე შედგა ფეხი, ტყვიამფრქვევები დაუშინა.

იერიშზე გადასული რაზმის ერთი ნაწილი ბუჩქებში გაიფანტა და იქიდან სამხრეთ-აღმოსავლეთისაკენ წავიდა.

სერგეი სმირნოვის გადმოცემით, დასავლეთ ხერთვისზე, ბუჩქნარებში, პეტია კლიპამ და კოლია ნოვიკოვმა მესაზღვრე შენიშნეს. იგი ნაპირთან იწვა და ხელის ტყვიამფრქვევი ჰიტლერულებისაკენ ჰქონდა მიმიზნებული. ერთ მხარეზე აურაცხელი ცარიელი მჭიდვე ეყარა, მეორეზე ტყვიამფრქვევის დისკები და სათადარიგო ვაზნები ჰქონდა შემოწყობილი.

პეტია და კოლიამ საჩქაროდ მიირბინეს მესაზღვრესთან. ბუჩქები მოფენილი იყო მის მიერ დახოცილი ფაშისტებით. მესაზღვრემ მძიმედ წამოსწია თავი. ბიჭებს ელდა ეცათ, საზარელი შესახედავი იყო. გამხდარს, გაჯაგრულს, თვალები ჩაშავებოდა. უძილოს, უჭმელ-უსმელს, მხოლოდ ერთი აზრი უტრიალებდა თავში — არ გადმოეშვა საზღვარზე მტერი; მან არც იცოდა, რომ უკვე ათასი კილომეტრით მაინც იყო დაშორებული ფრონტს.

წამოდით, სთხოვეს ბიჭებმა, მაგრამ მესაზღვრემ მოკლედ მოუჭრა:

— მე აქედან არსად არ წავალ!

პატარა მეომრები მაშინვე გადაეშვნენ ბუგში, მაგრამ მტერი ყველა მხრიდან შეესია ნაპირს და ტყვიამფრქვევები დაუშინა. განგმირული მეზრძოლები მდინარეში იძირებოდნენ. გადარჩენილებს ფაშისტი მეავტომატეები და ძაღლები იჭერდნენ.



მარცხნიდან: ალავერდი იმანოვი, პოდპ. კლიპა და პეტია
კლიპა.

როცა პოლკის მეწინავე ნაწილებს გერმანელებმა გზა გადა-
უჭრეს, ჩვენ მრგვალ ყაზარმასთან ვიყავით ჩასაფრებულნი.
მაგრამ გაისმა თუ არა გრიალი, მაშინვე ხიდის თავთან მივირ-
ბინეთ და ტყვია დავაყარეთ მოწინააღმდეგეს. ცვდილობდით,
მტერი სიმაგრეში არ შემოჭრილიყო და კარიბჭეს არ დაატ-
რონებოდა. ფაშისტთა ცალკეულმა ჯგუფებმა მაინც მოასწ-
რეს ხიდზე გადმორბენა და ციტადელში გამაგრდნენ. მათთვის
გზა რომ მოგვეჭრა, რამდენიმე ათეულით გავედით ხიდზე და
მოპირდაპირე მხარე დავიკავეთ. ამით გარღვევაზე გასულ ნა-
წილებსაც გავუმაგრეთ ზურგი: უკან გამობრუნებული ამხა-
ნაგები, რომლებმაც ხიდამდე მიაღწიეს, უშიშრად გავატარეთ

სიმაგრეში, სადაც ზოგი ჩვენ შემოგვეხიზნა და ზოგმაც სარდაფს მიაშურა.

ფაშისტებმა გააფთრებით დაგვაყარეს ყუმბარები და დიდი ზარალი მოგვივიდა. სწორედ მაშინ, 29 ივნისს, დაიღუპა ჩვენი პოლკის თავდაცვის უფროსი — ალექსანდრე ეფრემის ძე პოტაპოვი. ხელჩართულ ბრძოლაში დაეცა მესაზღვრეთა რაზმის მეთაური ანდრეი კიჟევატოვი. დღემდე არ ვიცი, რა ბედი ეწია თავდაცვის კომისარს. ჩვენს პარტიულ ხელმძღვანელს უფროს ლეიტენანტ გორიაჩის; მოახერხა სიმაგრიდან გასვლა, თუ საშუალოდ დარჩა მის ნანგრევებში. მეორე დღეს, სარდაფში რომ ჩავედი, გორიაჩი იქ აღარ დამხვედრია...

ფაშისტთა ნაწილები ცენტრალურ მოედანზეც გაჩნდნენ, სარდაფებში შეჭრას ლამობდნენ, მაგრამ პოლკის სკოლის ჩასასვლელი, სადაც პირველ დღეებში ურალელი იბრძოდა, ახლაც შეუღწეველი იყო მათთვის და მეორე ბატალიონის მხრიდან ცდილობდნენ გზის გაკაფვას. ბარიკადებით გამაგრებული და ტყვიამფრქვევის ცეცხლით კარგად დაცული „ურალელის პოზიცია“ ივლისშიაც წარმატებით განაგრძობდა წინააღმდეგობას, მიუხედავად იმისა, რომ გერმანელებმა აქ მსწრაფლმსროლელი ქვემეხები და ცეცხლმფრქვევებიც გამოიყენეს. მართალია, ჩრდილოეთის ღია ნანგრევებიდან მტერმა მოახერხა სარდაფში შესვლა, მაგრამ სიღრმეში შეტევის განვითარება ვერ შეძლო და დიდი ხნის განმავლობაში იძულებული ხდებოდა. მოიერიშე ჯგუფები სალამოობით უკან გამოეყვანა. ამ დროს მრგვალი ყაზარმის სხვადასხვა ადგილას ჩასაფრებული ჩვენი მებრძოლები დიდ ზიანს აყენებდნენ მტერს. ფაშისტებს რამდენიმე კვირის განმავლობაში უხდებოდათ ერთი და იგივე ადგილის „გაწმენდა“.

29 ივნისს, როცა ტირასპოლის კარიბჭესთან მტრის ორი ტანკი გამოჩნდა, გადაწყვიტეთ, შეუმჩნევლად გავცლოდით მოწინააღმდეგეს და ჩრდილოეთით დაგვეხია, მაგრამ ვიქტორ ჩორნი ჩამოგვრჩა და ყაზარმის ჩამონგრეულ კედელთან აიტუზა. ხელყუმბარების შეკვრა ეკავა და ფერდაკარგული, ჩამომტყნარა, საცოდავად ძიგძიგებდა. როცა ერთმანეთის გვერდით მოგვრუხუნე მანქანები კედელს გაუსწორდა, პოლიტხელმა ხელყუმბარების შეკვრა ერთ-ერთ მათგანს მუხლუხობებში ჩაუგდო. გაისმა მძლავრი აფეთქება. ნანგრევები შუკვამლში გაეხვია და წამიერად ჩორნიც დავკარგეთ თვალდან. რამდენიმე შებრძოლთან ერთად მყისვე მასთან მივიქყერი. ვიტია გაქვავებული იღვა. ვტაცეთ ხელი და ძლივძლივობით გამოვათრიეთ ტყვიის ქარაშოტადან. დღესაც ვერ გამოვიდა, რა თავზარი დაეცა იმ გოლიათ კაცს. ცოტა მანძლი რომ გამოვირბინეთ, თავგანწირულად დაიყვირა: „სამშობლოსათვის, ამხანაგებო!“ ეს სიტყვები მას, ალბათ, ყუმბარებთან ერთად უნდა გადაესროლა. საბრძოლო მათაათა საწყობის მიმართულებით ვიხვედით უკან და ამ არეულ-დარეულობაში რამდენიმე ამხანაგიც დავკარგეთ, მათ შორის, ჩვენი თავდაცვის უბნის მეთაური უმცროსი ლეიტენანტი. ჩვენთან დარჩნენ: ო. ასათიანი, პ. აფხაზავა, პ. შირინი, ა. ჯარიაშვილი, ვ. ჩორნი, ბ. სტუკალენკო, ა. იმანოვი, ს. ბარსუკოვი, ბ. სტეფანოვი, ნ. აბზიანიძე, კურენოი, პრონინი, ზაბაღუევი. გ. გერასიმენკო, ა. მეითხანოვი, ატახანოვი, ნაზაროვი, გიბიშვილი და სხვა.

საბრძოლო რაზმი, ჩვენი პოლკის მე-3 ბატალიონის მე-9 ასეულის უფროსი სერჟანტის, საგარეჯოელი პ. მ. შირინის მეთაურობით, ტირასპოლის კარიბჭესთან მტრის განლაგებაში შეიჭრა და ტყვიამფრქვევებით დიდი ზარალი მიყენა.

მას შემდეგ, რაც გარღვევას ცდა მარცხით დამთავრდა, საქმე მეტისმეტად გართულდა. აღარ ვიცოდით, სარდაფში წავესულიყავით თუ მრგვალი ყაზარმის ნანგრევებს დავბრუნებოდით. ვერც კი გამოგვერკვია, ვინ ბატონობდა სარდაფში — მტერი თუ მოყვარე... თუ ჩვენ პოზიციას დავტოვებდით, მაშინ ტირასპოლის კარიბჭე გერმანელებისთვის უნდა დაგვეთმო. ისინი თავისუფლად შემოვიდოდნენ ციტადელში და სიმაგრის დამორჩილებაც გაუადვილდებოდათ. ბოლოს და ბოლოს, ვამჯობინეთ მრგვალ ყაზარმაში დარჩენა.

უჩვეულოდ მყუდრო ღამე იყო. სიმაგრეში სამარისებური დუმილი ჩამოწვა. არ გვასვენებდა ხვალინდელ დღეზე. ფიქრი. მთელი ღამე ვბორგავდით. გარშემო მოგიზგიზებდა ცეცხლი და ზაფხულის თაკარა სიცხე სულს გვიხუთავდა; გვამებდა სუნი გავწამებდა. ამ საშინელებამ ყველა გასაჭირი დაგვაიწყო. ცხვირზე ხელს ვიჭერდით, მაგრამ საშველი არსაიდან იყო.

ციხის ნანგრევებზე

ღუბნაზავა დილიდანვე ცუდად გახდა. ჯერ იყო და, გაუთავებელი ხველა აუტყდა. თავი რომ შეეკავებინა, მიწაზე დაემხო, წელში მოიკაკვა და მუცელზე ხელები მოიჭირა. რამდენიმე წუთს ასე ეგდო გახურებულ ნანგრევებში. რადგან არ კენესოდა, გვეგონა, ავადმყოფობამ გაუარაო, მაგრამ მალე ფეხზე წამოვარდა, რამდენიმე ნაბიჯი გადადგა, გაწვრილებული კისერი წაიგრძელა და თმაგალიძული თავი კედელს მიაცრდნო. განზე დადგმული ფეხები აუცახცახდა, და ძალა უკვე არ შესწევდა, რომ თავი შეეკავებინა.

ასათიანმა სცადა იატაკზე დაესვა ამხანაგი, მაგრამ კედელს ვერასგზით ვერ მოგლიჯა. ზემდეგს პირზე დუჟი მოსდგომოდა და უმწეოდ ხიხინებდა. უცებ თავი ასწია, დამპალი ხორცის ნაჭრები, დაუღეჭავი ბალახი გადმოანთხია და მუხლი მოეკვეთა. დიდხანს ალებინებდა. დასიცხული ბორგავდა და კანკალებდა, ხელში გვაკვდებოდა ავადმყოფი. გულწასული კუთხეში გადავიტანეთ და ფარაჯის ნაგლეჯებზე დავაწვინეთ. ბელორუსმა ჯარისკაცმა ჩამოფხრეწილი ხალათი გახადა, ორი კვირის წინათ შეხვეული ჭრილობა გაუხსნა, ჩაშავებულ. დაჩირქებულ იარას თითებით დაუწყო ჩიჩქნა.

ავტომატის კაკანი სულ ახლოს იშმოდა. ციხის ნანგრევებში მტრის რაზმები დაეხეტებოდნენ. თავშეფარებულ ჯგუფებს დაჟებდნენ. ჩვენ იშვიათად ვუპასუხებდით. ამიტომ ფაშისტებმა დანამდვილებით არ იცოდნენ. სად ვიმალბოდით. ტყვია მაინც არ ენანებოდათ, მიადგებოდნენ სარდაფის ჩაასვლელს, ან სათოფურს და ისროდნენ. ხელყუმბარები აფეთქებდნენ. ჭუჭრუტანებში ავტომატის ლულას გაჰყოფდნენ და ალაღბედზე აკაკანებდნენ. სარდაფში ჩამოსვლას კი ვერ ბედავდნენ. მრგვალი ყაზარმის ნანგრევებში რამდენიმე კაცი იმალებოდა. ერთადერთი ტყვიამფრქვევი ჭქონდათ. დღისით ისინიც ჩუმად იყვნენ, მაგრამ საღამოს, როცა მტრის რაზმები ტირასპოლის ხიდზე გადადიოდნენ, ზურგში ურტყამდნენ და მომხვდურთა ჯგუფები საკმაოდ შეთხლებულნი უბრუნდებოდნენ თავიანთ ბუნაგს.

ციხის ნანგრევები იღუმალებით მოცულ საშინელებად იქცა. ვერ გაიგებდი, საიდან მოგადგებოდა მხეცი, საიდან გაგრაავდა კბილს. არ იცოდი, სად იყო მტერი და სად მოყვარე. ყოველ კედელთან, ყოველ ჩამონგრეულ ქვასთან. სარდაფის

კუნძულში. იდუმალა ძალა მიმალულიყო. ეს გავარვარებული ნანგრევები აღარც ჩვენ გვეკუთვნოდა და აღარც მათ. ისინი, მცირე რაზმებად დანაწილებულნი, დღისით აქ დაძვრებოდნენ, დამით კი დარჩენას ვერ ბედავდნენ, შიშით მიიძურწებოდნენ დასავლეთ კუნძულზე. ცენტრალური ხერთვისი კვლავ ჩვენს ზედა იყო. ყველგან გრძნობდი ჩასაფრებულ ამხანაგს, რომელსაც ძნელად გადაურჩებოდა დუშმანი თუ სადმე მოახლევდა. ნანგრევები არ ნებდებოდა. საყდრიდანაც ისმოდა ტყვიის ტკრციალი, თეთრი სასახლიდანაც, დასავლეთ და ჩრდილოეთ კუნძულებიდანაც.

დღისით უკვე იშვიათად გვბომბავდა მტერი, ეშინოდა ციტადელში გაფანტულ თავისი რაზმები არ დაეზიანებინა, ხოლო შებინდებისას, როცა მოიერიშენი ნანგრევებს სტოვებდნენ, არტილერია ძველებურად უშენდა და ნოპიკირე თვითმფრინავები მძიმე ბომბებს აყრიდნენ პოლკის სარდაფს. ამ დროს მრგვალ ყაზარმაში ვიპალებოდით, მტრის ცხვირწინ. კარიბჭის ეს კუთხე ერთადერთი ადგილი იყო, რომელსაც კვლავ უფრთხილდებოდა.

პანტელეიმონი მთელი დღე ცნობადაკარგული ეგდო კუთხეში, დაბინდებისთანავე ფრთხილად დავაწვინეთ მუშაშაზე და მრგვალი ყაზარმისაკენ წავიყვანეთ. თუმცა მისავათებულაყო დეკაცია, გადაყვანა მაინც გაგვიჭირდა. ჩონჩხადქცეულ მებრძოლებს მუხლი ეკეცებოდათ, ძლივძლივობით მილასლასებდნენ ნანგრევებში. ხან ფეხს წამოჰკრავენენ ქვებს და თუ ვინმე არ მიეშველებოდა, წელს ვეღარ აითრევდნენ. მხოლოდ იარაღი გადაგვქონდა ადგილიდან ადგილზე. სხვა აღარაფერი გვებადა.

შემადრწუნებელი სანახავი იყო კვამლით შებურულ ნან-

გრევეებში მიმავალი ჩვენი ქარავანი. ტანისამოსშემოგლეჯილნა, ფეხშიშველნი აჩქარებით მივაბიჯებდით გათანგულ მიწაზე. რაც შეიძლებოდა სწრაფად უნდა გავცლოდით სარდაფს, რადგან ვიცოდით, საღამოთი მტერი დაბომბვას განაახლებდა. დაბომბვა მაშინ დაიწყებოდა, როცა მტრის უკანასკნელი რაზმი ციტადელს დასტოვებდა. ამიტომ მათ მოჰკაობას ბეჯითად ვადევნებდით თვალს.

იმ ღამით მტერმა არც ტირასპოლის კარიბჭესთან მოგვასვენა. ჯერ იყო და ხიდზე გადმოსვლა სცადა, მაგრამ ჩვენმა ტყვიამფრქვევებმა განზრახვაზე ხელი აადებინა. მოგვიანებით ზოგიერთმა ნაწილმა ნავტიკებით გადმოსურა ბუგი. მზვერავმა მაშინვე თვალი ჰკიდა, მაგრამ ისე ცოტანიდა დავრჩით, რომ დესანტის მოგერიება აღარ შეგვეძლო. გადაუწყვიტეთ უხმოდ გავცლოდით იქაურობას. ავადმყოფს ხელი დავავლეთ და ილაჯგაწყვეტილებმა ჩრდილოეთისაკენ გავწიეთ. უკან ჩამოვიტოვეთ საბრძოლო მასალის საწყობი. მოკვეთილი ხიდი და მოტომექანიზებული ბატალიონის ნაგებობათა უკან ჩამოინგრეულ კოშკს შევეფარეთ.

ეტყობა, დესანტმა გულდასმით შეამოწმა ჩვენი მიტოვებული ადგილი და რაკი წინ აღარავინ ელოებოდა, მცირე ჯგუფებად განაწილდა და ნანგრევების გასაჩხრეკად გამოეშურა.

ერთმა ჯგუფმა ჩვენამდეც მოაღწია. გაფანტულად მომავალი შვიდი-რვა ჯარისკაცი ხმამაღალი მასლაათით გვიახლოვდებოდა. გატრუნულნი კედელს ავეკარათ. სიჩქმეს არღვევდა მხოლოდ აფხაზავა. მას ისევ აუტყდა ხველა და ხრიალი. ვილცამ ჩვარი ამოიღო და ავადმყოფს სახესთან აუფრიალა. არ ვიცი, ამან უშველა თუ არა. — ზემდეგი გაუტჩდა.

ყაზარმის ეს ნაწილი მიწასთან იყო გასწორებული; მტერმა ზედმეტად ჩათვალა მისი გაჩხრეკა. ჯარისკაცები მოვალეობას ასრულებდნენ მხოლოდ. სხვადასხვა მხრიდან უვლიდნენ ყაზარმას. ისე კი დარწმუნებული იყვნენ, რომ ტირასპოლის კარიბჭიდან ისევ სარდაფში ვიყავით გადაბარგებული.

თითქმის ნახევარ საათს ვიყავით ასე განაბული. ბოლოს, როგორც იქნა, თეთრად აზვინულ ნანგრევებზე უკან გამობრუნებული ჯარისკაცების ოდნავ მოხრილი ჩრდილები დავლანდეთ. ისინი უკვე განაწილებული გვყავდა. ერთს ორი-სამი უნდა მივხტომოდით და გაგვეგულა. ავტომატები უზრუნველად ძირს დაეშვათ გერმანელებს. რამდენიმე ნაბიჯით რომ გაგვეცდნენ, ზურგიდან ვეძგერეთ. ზარდაცემულებმა დაკნავლებაც ვერ მოასწრეს. ტყვედ მხოლოდ ერთი, წინამძვეალი წამოვიყვანეთ. გვამებს ასართმევი ავართვით, მერე მუხავეცის ნაპირზე ჩავათრიეთ და ზემოდან ჟალტამი წავაფარეთ.

ნადავლი მცირე აღმოჩნდა: რამდენიმე გაკვნიტა შოკოლადი, ცოტა ძეხვი და ნამცხვარი. თერმოსები ცარიელი ჰქონდათ. წვეთ-წვეთობით, ძლივს შევგაროვეთ ნახევარი ჭიქა ნელთბილი ყავა და ავადმყოფს დავალევიეთ. შოკოლადიც იმას დავუთმეთ. ჩვენ კვლავ ბალახბულახი ან მძორი უნდა გვეძებნა.

ტყვე შტაბს-ეფრეიტორი გამოდგა, სასიკეთო ვერა გვითხრა რა. გვარწმუნებდა: თავს ტყუილად იღუპავთ, ფიურერის ბრძანებით, ზოგიერთ დივიზიას გზიდან აბრუნებენ. სულ ერთია, ბრძოლას მაინც ვერ მიუსწრებენ, სანამ ფრონტზე მივლენ, მოსკოვი დაეცემაო. უკანგამობრუნებულებს გული სწყდებათო... ახლა ინგლისში გადავალთ, ამერიკასაც მალე წამოვაჩოქებთო!..

შტაბს-ეფრეიტორი საზეიმო ხმით გვიყვებოდა ყოველივეს,

თითქოს ჩვენც მოვალე ვიყავით, გაგვეზიარებინა მისი სიხარული.

გერმანელის დაკითხვა რომ დავიწყე, აფხაზავამ იმ დღეს პირველად წამოსწია თავი, ცნობისმოყვარეობით გადმომხედა. სანუგეშო, აბა, რა უნდა მეთქვა! ენაჭარტალა ტყვე სულ „კაპუტ რუსლანდს“ გაიძახოდა და ეს მძიმე ტკივილი ავადმყოფს უფრო სტანჯავდა.

თავი ისე დავიჭირე, თითქოს არც შემემჩნიოს პანტელეიმონის გამოხედვა. შტაბს-ეფრეიტორს ჯიბეები გავუჩხრიკე. ერთგან გაზეთის ფურცელში გახვეული პატარა შეკვრა ვუპოვე. შიგ ხუთქიმიანი წითელი ვარსკვლავ-აბზინდები აღმოჩნდა. ტყვეს გაკვირვებით ავხედე. ომის სუვენირიაო, განმიმარტა.

გაზეთის შრიალი რომ გაიგონეს, ამხანაგები მომცვივდნენ. ავადმყოფიც გამოცოცხლდა, ყველანი გარს შემომეხვივნენ. შიმშილიც გადაავიწყდათ, დალღაც და საფრთხეც. მაშინ ყველაზე მეტად ვიგრძენი, რა ყოფილა ჩვენი დროის კაციათვის ეს ნაბეჭდი ფურცელი, ახალ-ახალი ამბები რომ მოაქვს და სიცოცხლესავით მოგვენატრა იმ დღეებში. მაგრამ ეს ალბათ მტრის გაზეთი იყო. მაინც გვინდოდა გაგვეგო, რას წერდნენ ისინი, რა ხდებოდა ქვეყანაზე, სიმაგრის მიღმა, თუგინდ ჩვენი პოლკის შენობის იქით. ამ გაზეთის ნაგლეჯში იქნებ გვეპოვა სიმართლის ნატამალი. მაგრამ სიბნელეში ვერას ვხედავდი. შორეული ცეცხლის შუქზე ისღა შევამჩნიე, რომ გერმანული გაზეთი იყო. შტაბს-ეფრეიტორი უხამსად წაეპოტინა გაზეთის ნაგლეჯს, მაგრამ ონისიმემ ვეღარ მოითმინა და ყური აუწია. გულმოსულმა ტყვემ გასასვლელისაკენ გაიწია და ხმაბალა დაიყვირა:

— ჰილფე! მომეშველეთ!

იმ წამსვე ყელში ვეციო.

ნანგრევებში ახლა ფაშისტები დაძრწოდნენ. იქნებ გაიგონეს კიდევ შტაბს-ეფრეიტორის ყვირილი? სხვა გზა არ გვექონდა! სასწრაფოდ უნდა ავბარგებულიყავით და ახალი თავშესაფარი გვეძებნა.

აფხაზავა ორი არტილერიისტის დახმარებით, როგორც იქნა, წამოდგა. სახიფათო ადგილი უხმაუროდ დაეტოვებინა და უფრო ჩრდილოეთით გაეწიეთ. გავცდით ყოფილ სასადილოს, მივედით სანიტარულ ნაწილთან და აქ, ღია ცის ქვეშ, ნანგრევთა ორმოში გავიჩინეთ.

ჯოჯობეთური ღამე იყო, ფეხს ვერ წადგამდი წინ, განუწყვეტლივ კაკანებდნენ ტყვიამფრქვევები და ავტომატები; მათ შაშხანების ქუხილი პასუხობდა.

თხრილში გაშლართული ავადმყოფი ბორგავდა, კბილებს ანრჭიალებდა; კენესოდა...

ამ გაგანიში ზოგჯერ ქურდულად აიხედავ და, თვალს შეავლებ ივლისის კამკამა ცას, ვარსკვლავებით მოჭედის... მაგრამ უმალ უბრუნდები დახანძრულ ნანგრევებს და თვითუღი წუთის გახანგრძლივებაზე ზრუნავ...

გარიყრაქზე, როცა ის იყო სროლა მინელდა და ერთი პირი ძილი აღმურიან სიმაგრესაც მოეკიდა, ჩრდილოეთის მხრიდან ჩვენი პოლკის სარდაფში ჩავასწარით, შედარებით უშიშარი ადგილი მოვნახეთ და იმწამსვე გაზეთს ვეციო.

სინათლე ოდნავ ატანდა სათოფურში და სიტყვებს დიდის გაჭირვებით ვარჩევდი. პირველად თვალში მომხვდა უზარმაზარი წითელი ასოებით დაბეჭდილი ანშლაგი: „გეგენიუბერ შტეენ ნოინ მილიონენ სოლდატენ“.

ოცი წელიწადი გავიდა მას შემდეგ. მაგრამ ეს სტრიქონი,

ის გაზეთი და ყველაფერი, რაც შიგ ეწერა. მკაფიოდ მახსოვს. არაფერი წამიკითხავს ისეთი ველური სიხარბით, არც ისეთი მღელვარე მსმენელები მყოლაა ოდესმე. სათაურიდანვე ეკელაფერი ნათელი გახდა. ამხანაგებს ვეხვეოდრი, ვულოცავდრი, მათ კი ჯერ არ იცოდნენ, რაში იყო საქმე და გაკვირვებით შემომყურებდნენ.

საოაურის გადათარგმნამ არ დამაკმაყოფილა და რაღაც უსიამო გრძნობაც აღმიძრა, ამიტომ სხაპასხუპათ დავიწყე ანოკითხული ცნობების განმარტება:

— ძმებო, მტერი ვერ მალავს, რომ საბჭოთა არმია იბრძვის და ომი გრძელდება. ჩვენს ქვეყანას უკვე მოუსწრია ჯარის გაწვევა და ფრონტზე მისი გამოყვანა. ქურღული თავდასხმის შედეგად დაზარალებული დივიზიები ახალი ნაწილებით შეუკვლია. ამ გაზეთიდან ჩანს, რომ მტრის პირისპირ ცხრა მილიონი წითელარმიელი დგას. ჩვენი თვალუწვდენი სამშობლო იბრძვის და შეუძლებელია მისი წამოჩოქება. ამაში ჩვენც გვიღვეს წილი, ჩვენც ვაკავებთ იმ ძალებს. რომლებიც მტერს თავისი გეგმის სწრაფი განხორციელებისათვის წინა ხაზზე ესაჭიროება...

გაზეთის ნახევი კიდევ რამდენჯერმე გადავიკითხე და მტრის პროპაგანდისტული სტატიებიდან ბრძოლის ნამდვილი სურათი აღვადგინე.

ერთ წერილს სათაურად ჰქონდა: „დი ბოლშევიკენ ინ ფესტუნგ ფონ ბრესტ-ლიტოვსკ ლაისტენ აინენ ჰეფტიგენ ვადერ-შტანდ“. — „ბოლშევიკები მძაფრ წინააღმდეგობას გვიწვევენ ბრესტის ციხე-სიმაგრეში“...

სხვა ადგილას გაზეთი საყვედურობდა, რომ უკან დახევისას

საბჭოთა ჯარები სპობდნენ ხიდებს, ტრანსპორტს, სწვავდნენ პურის მარაგს, აჩალებდნენ პარტიზანულ ბრძოლას და ამით ხელს უშლიდნენ გერმანიის არმიის წინსვლას.

პირველად გავიგეთ, რა ხდებოდა დედა სამშობლოში. მივხვდით, ჩვენები იბრძოდნენ და ვგრძნობდით — გაიმარჯვებდნენ კიდევ.

— ცოტაც გავუძლოთ, ბიჭებო, და წამოგვეშველებიან!.. — იმედინად თქვა შეჭალარავეებულმა ბელორუსმა

— ხელს რომ გამოგვიწვდიდნენ, მთელ წელიწადსაც გავუძლებდით!.. გავიცანით უკვე, რა შვილებიც ბრძანდებიან... — გაეხმიანა მეორე.

— ეჰ, ჩვენები ვერასოდეს გაიგებენ, რომ აქ ვიბრძოდით. ერთ დღესაც იქნება, ჩამოივლის ფოსტალიონი და ჩამოარჩებს უწყისებს — ესა და ეს კაცი უგზოუკვლოდ დაიკარგაო. სხვა არაფერი, — თქვა ნაღვლიანად მესამემ.

ამ სიტყვებზე აფხაზავა წამოდგა, სათოფურთან მივიდა და გაფიცვებული სახე დილის ჰაერს მიუშვირა. მაგრამ ქარს საშინელი სიმყრალე და შემხუთველი მხურვალეება შემოჰქონდა სარდაფში და ავადმყოფმა მაშინვე პირი იბრუნა.

— მისკდება ეს წყეული თავი! — მთელი დღე-ღამის განმავლობაში პირველად ამოიდგა ენა აფხაზავამ.

ონისიმემ პერანგი გაიხადა და მეგობარს თავზე შემოახვია. ზემდეგი იხვეწებოდა, — „მაგრად, მაგრადო“. ერთ მხარეს ასათიანმა ჩაავლო ხელი, მეორეს — ბელორუსმა და ისე გააწიეს, იტყოდი, თავი უნდა მოგლიჯონო.

კარგად რომ ინათა, მტერმა ისევ შემოუტია ციტადელს. ბომბებთან ერთად ბენზინიანი ავზები და გავარვარებული სითხით სავსე ყუთები გადმოგვაყარა.

ნაშუადღევს ბომბსა და ჭურვებს მტრის მოიერიშენი შემოჰყვნენ. ჩასასვლელები ღია იყო, რადგან სხვა მცირე ჯგუფებიც ჩვენსავით ადგილიდან ადგილზე გადადიოდნენ და თვითეთლს მხოლოდ თავისი უბნის დაცვადა შეეძლო.

გერმანელებმა ადვილად დაიკავეს ჩასასვლელები და სათოფურები; მერე რაკი წინააღმდეგობას აღარ წააწყდნენ. მთელი სარდაფი გარემოიკვეს. გასაქცევი აღარსად გვქონდა; მტერს მუჭში ვყავდით გამომწყვდეული, მაგრამ ჩამოსვლას ვერავინ ბედავდა; ზედმეტ მსხვერპლს ერიდებოდნენ.

მზად ვიყავით უკანასკნელი გაბრძოლებისთვის, მაგრამ ახლომახლო ჯერ არავინ ჩანდა და არც ჩვენ ვისროდით. ვგრძნობდით, ეს გაურკვეველობა და იღუმალება უფრო აშინებდა მტერს; მართლაცდა, ძნელია ბნელ სარდაფში ჩასვლა, თუ იქ ავტომატით და ტყვიამფრქვევით შეიარაღებული მოწინააღმდეგეა ჩასაფრებულნი. ამიტომ მტერმა ჯერ ხელყუმბარები ჩამოყარა სათოფურებიდან, მერე კი ცეცხლმფრქვევებით გადაანათა სარდაფი. იფშენებოდა კედლები, ბორგავდა ჭურღმული და ხანძარი. სარდაფის ქვედა სართულისაკენ მიგვერეკებოდა. ფეხდაფეხ მოგვდევდა გერმანელებს ყვირილი:

— რუსო, ჩაგვბარდი!

სიღრმეში მივიწევდით, გასასვლელს ვეძებდით. გაგვეგონა, სიმაგრეს მიწისქვეშა გზების მთელი ლაბირინთი აქვსო, მაგრამ ჩვენთან არავინ იყო გზის ზუსტი მცოდნე. ასათიანი ჯიუტობდა, პირველსავე ბილიკს გავყვეთ. ვინძლო ხვრელა რასმე წავაწყდეთ და ალყას თავი დავაღწიოთო. სხვები არწმუნებდნენ, ასე ბრმად სიარული არ შეიძლება, რუკა არ გვაქვს, გზას არ ვიცნობთ, ყოველ ნაბიჯზე მოსალოდნელია, მტერს ჩავუვარდეთ ხელშიო. ასეთი შემთხვევისათვის ონისი-

მეს ხელყუმბარა ჰქონდა შემონახული. ბუგი რომ გადმოცურა, იმ დღეს იშოვა. ამბობდა, მხოლოდ მაშინ ავაფეთქებ, თუ მტრის პირისპირ აღმოვჩნდები, მეც დავიღუპები და იმათაც მოვსპობო.

ხანძარს გუგუნე გაჰქონდა, ჩასასვლელს ცეცხლის ენები ლოკავდა, მაგრამ ქვის კედლებში ცეცხლი ადვილად მაინც ვერ იკაფავდა გზას. მხურვალეობა და ნატისუსალი სულს გვიხუთავდა, თვალის გახელა გვიჭირდა...

ჩემ გვერდით რამდენიმე ამხანაგი დაეცა.

— გარღვევაზე, გასასვლელისკენ! — თავგანწირულად დაიყვირა აფხაზებამ.

ანგარიშმიუცემლად შევევარდით მხრჩოლავ ბოლქვებში და სარდაფი სიგრძივ გადავჭერით... კვალდაკვალ მოგვეყვა კარაბინების ქუხილი, გაისმა ხელყუმბარების აფეთქება, შეკვივლება, რომელიც ერთი მოწყვეტით ჩაკვდა. შემდეგ სადღაც, უფრო მოშორებით, ტყვიამფრქვევი აკაკანდა და შაშხანებმა დაიგრიალეს.

ჩვენი ჯგუფიდან ათიოდე კაცი გადარჩა. აფხაზავა ჩვენთან იყო, ზემდეგი, თითქოს ცეცხლში გამოვლამ უშველაო, ახლა უკეთ გრძნობდა თავს.

~~სხვებთან ერთად ხანძარში გამტრბენისას ონისიმე ასათიანიც დავკარგეთ.~~

ღამე პოლკის შტაბის ნანგრევებში გავატარეთ, ყველანი ერთ კუთხეში ვიყავით შეყუჟულნი და ძილი არ გავგვარებია...

მტერი ნელ-ნელა, მაგრამ ჩიუტად იკავებდა ციტადელს.

აქ დიდხანს დარჩენა შეუძლებელი იყო. დილით მოწინააღმდეგე აუცილებლად მოუბრუნდებოდა სარდაფებს და, ცხადია, ჩვენც გვიპოვიდა. საყდარში გადასვლაც რომ მოგვეხერხე-

ვინა, — ეს ჩვენი პოლკის ტერიტორიაზე ხელის აღებას ნიშნავდა. ამ უბანზე კი აქა-იქ კიდევ იბრძოდნენ პატარა-პატარა ჯგუფები და იმედო გვექონდა, მათ შევუერთდებოდით. ამიტომ ვამჯობინეთ, დროებით ისევ მრგვალ ყაზარმას შევფარებოდით ტირასპოლის კარიბჭესთან.

დილით ხილზე მტრის ნაწილები გამოჩნდნენ. რამდენიმე ტანკსაწინააღმდეგო ქვემეხს მოათრევდნენ. გავიტრუნეთ, არ გვინდოდა ფაშისტებს შევემჩნიეთ. მათ შეუჩერებლივ გასწიეს ჩრდილოეთისკენ და კარგა ხანს აღარავინ შეგვეინიშნა. შუადღისას დავინახეთ, რომ მეავტომატეთა ერთი ათეული პირდაპირ ჩვენკენ მოემართებოდა. არ ვიცი, აღმოგვაჩინეს თუ ნანგრევთა შორივ „წმენდას“ ატარებდნენ. მაშინვე უხმაუროდ წამოვიშალეთ და წელში მოხრილნი კედელ-კედელ ჩრდილო-აღმოსავლეთისაკენ გავყევით ყაზარმას. ალაგ-ალაგ კედელი შენგრეულიყო და მდინარის მეორე ნაპირიდან გუშაგებმა თვალი შეგვასწრეს. მეავტომატეთა ჯგუფი საჩქაროდ დაიშალა და ყაზარმის მხრიდან გვიყელა. ალყა ისეთ ადგილზე დავიწროვდა, რომ სხვა გზა არ გვექონდა, რაღაც სასწაულით გადარჩენილი კიბით მეორე სათუღლზე ავირბინეთ, სხვადასხვა მხარეს გავიფანტეთ და გამოშვერილ ნიშებს ამოვეფარეთ. მოიერიშენი ფეხდაფეხ ამოგვეყვინენ.

კიბე რომ ავთავავეთ, აფხაზავა აღმოსავლეთისკენ გაიქცა, მე — დასავლეთისკენ. ამოსასვლელი უმაღლ დაიკავა მტერმა და რაკი შეატყო, მახეში გაგვაბა, ახლა ყველა მხრიდან დავიარა. პანტელეიმონმა უკან დაიხია, მაგრამ ამ ადგილზე იატაკი ჩანგრეული აღმოჩნდა და ერთურთს ნაპრალი გვაშორებდა.

მოიერიშენი უხმოდ წამოეპარნენ ზემდეგს. როცა პანტე-

ლეიმონმა მოახლოებული მტერი შეამჩნია და ავტომატი დაუშინა, ისინი ნიშებთან მიიმალნენ და ხელყუმბარები დააყარეს. აფხაზავა იძულებული იყო განუწყვეტლივ ესროლა და ვაზნები მალე გამოელა.

— რუსო, ჩაგვბარდი! — უყვიროდნენ უიარაღოდ ღარჩენილს.

მაგრამ ზემდეგი ჩაბარებას არ აპირებდა. აღარც ისროდა. მაშინ ავტომატშემართული სამი მოიერიშე საშინელი ღრიალით დაეძგერა. სანამ ზემდეგს ხელს ჩაავლებდა, ურთი მათგანი ჩვენ განვეგმირეთ, ორს გამგელებული პანტელეიმონი დაეტაკა და ავტომატები დააყრევინა, სროლა აღარ შემეძლო — არ ვიცოდი, მტერს მოხვდებოდა თუ მოყვარეს. არც მიშველება ხერხდებოდა, რადგან ჩაქცეული იატაკი გვთიშავდა; ისლა დაგვრჩენოდა, მტრის ჯარისკაცები არ ამოგვეშვა ამოსასვლელ კიბეზე.

ზემდეგმა ერთმანეთს მიანარცხა მოიერიშენი და უშველებელი მარწუხივით შემოაჭდო რკინის მკლავები. გერმანელები ცდილობდნენ, თავი გაეთავისუფლებინათ, სასოწარკვეთით იბრძოდნენ და სამივენი, ერთ ბურთად შეკრულნი, ძიბგილით უახლოვდებოდნენ ჩანგრეულ იატაკს, რომელიც მძლავრად ირყეოდა მათი ჯაჯგურისაგან.

სამივენი ბეწვის ხიდზე ეკიდნენ... პანტელეიმონის მარწუხი მტკიცე იყო, მაგრამ ორი დასვენებული, მაძლარი მოიერიშე სულ უფრო ჯაბნიდა ავადმყოფს.

თავი რომ შეემაგრებინა, ზემდეგმა სცადა მუხლით მიყრდნობოდა კედელს. გამოჩნდა მისი განწირული. შეშლილი სახე, თავზარდამცემი სანახავი იყო ეს ვეება, თეთრი პერანგით თავწაკრული პირქუში კაცი. დაღლილი ზემდეგი მოიერიშეებმა

ადვილად მოგლიჯეს კედელს; ცალი ფეხი ნაპრალზე ეკიდა, მაგრამ მკლავებით მახრჩობელასავით ჩასჭიდებოდა მტერს და ახლა ძალაუნებურად ისინი იმაგრებდნენ.

— რუსო, ჩაგვბარდი!

— რუსო, ჩაგვბარდი! — ისმოდა კიბესთან მიმალული მოიერიშეების ძახილი.

ავტომატი ერთ ბირთვად შეკრული ნეტოქეებისაკენ მიგმართე, მაგრამ შერყეულმა იატაკმა ერთი საწარლად დაიხრიალა და სამივენი თან ჩაიტანა. დანჯღრეული კედელიც უმაღლესად მოიხრიალა და ერთბაშად წარმოქმნილი ნანგრევთა გორაკი მეორე სართულს ამოსწვდა.

ეს მოხდა სწორედ იმ ადგილას, სადაც რამდენიმე დღის წინ კაკაბელი ბიჭის გვამი ვიპოვეთ.

გერმანელებმა ქვემეხი მოაყენეს შენობას და ცეცხლის რკალში გამოგვიმწყვდიეს.

ყუმბარების ქუხილი გაძლიერდა, მორყეული კედელი კვლავ გრუხუნით დაენარცხა დედამიწას.

უდაბნოდ ქცეულ თეთრ ნანგრევებს ქარ-ცეცხლმა გადაუარა და ჰაერში კვამლის სვეტები აღმართა.

იმ დღეს, როცა ჩვენი რაზმი დაიღუპა, 333-ე პოლკის აარდაფებიდან კვლავ მოისმოდა ტყვიამტრქვევების კაკანი და ხელყუმბარების გრიალი. ჩვენი საკუთარი სარდაფები ჩვენთვისვე რაღაც გასაოცარ საიდუმლოებად იქცა. ახლა, როცა ამ სტრიქონებს ვწერ, ბოღმისაგან გული მეღევა, რომ არ ვიცი, რომელი ამხანაგი იბრძოდა იქ იმ დროს, სანამდე შეძლო მშობლიური პოლკის ღირსების დაცვა და როგორ დაამთავრა თავისი ლეგენდარული სიცოცხლე. ასე მგონია, რაც ჩვენ ბრესტის სიმაგრეზე ვიცით, ძალიან მცირე ნაწილია იმ

დიდი ტრაგედიისა და ზღაპრული სიმამაცისა, საზღვრისპირა სიმაგრის სარდაფებსა და ნანგრევებში რომ დატრიალდა. ამბობენ, ჩვენი პოლკის ტერიტორიაზე მთელი ზაფხულის განმავლობაში გრძელდებოდა ბრძოლაო, — და ეს სავსებით სარწმუნოდ მიმაჩნია. აგვისტოში, როცა მე ბრესტის დასავლეთით, პოლონეთის ტყეებში მივიკვლევდი გზას, სიმაგრიდან კვლავინდებურად ისმოდა ყრუ აფეთქების ხმა.

ჩაუგებელი ხმალი

სიმაგრე ბრძოლას განაგრძობდა.

ნანგრევებში ჩასაფრებული პატარა რაზმები მოსვენებას არ აძლევდნენ მტერს, ყოველი კუთხე და უბანი ხელიდან ხელში გადადიოდა; მოიერიშეები ფრთხილობდნენ, სარდაფში ჩასვლას ვერ ბედავდნენ, თავზე ხელაღებულ დამცველებს ერიდებოდნენ.

განსაკუთრებული გააფთრებით გრძელდებოდა ბრძოლა აღმოსავლეთის ფრონტზე, რომელსაც გავრილოვის ჯგუფი იცავდა. ივლისის დამდეგიდან გერმანელებმა აქ მოაყარეს მთავარი ძალა, დიდი წვალებით დაიკავეს ჩრდილო-აღმოსავლეთის კედლები და დასავლეთ ფრონტის დამცველი ასეული გავრილოვის ძირითად ნაწილს ჩამოაშორეს. გადარჩენილი ორი ასეული გავრილოვმა აღმოსავლეთ ფრონტში შეაგროვა და აქ ხანგრძლივი თავდაცვის კერა შექმნა.

ფაშისტური სარდლობის ერთ-ერთ პატაკში, რომელიც სერგეი სმირნოვს აქვს მოყვანილი თავის წიგნში, ნათქვამია:

„აღმოსავლეთის ფორტში ქვეითი ნაწილების“ შესვლა შეუძლებელია. ტყვიამფრქვევისა და შაშხანების ბრწყინვალედ ორგანიზებული ცეცხლი ღრმა სანგრებიდან და რკალისებური ნაგებობის ეზოდან უმოწყალოდ სპობს ჩვენს მოიერიშეებს. ერთი გზა დაგვრჩენია: შიშშილითა და წყურვილით ვაიძულოთ რუსები, ჩაგვბარდნენ. ამიტომ ყოველგვარ ძალას გამოვიყენებთ, რომ მოვქანცოთ და გამოვფიტოთ ისინი. ერთი წუთითაც არ შევწყვეტთ გამაღიზიანებელ სროლას მძიმე ნაღმსატყორცნიდან. ეს განუწყვეტელი ცეცხლი საშუალებას არ მისცემს რუსებს გადაირბინონ სანგრიდან სანგარში ან გამოვიდნენ ეზოში. ახლოს მივუყენებთ ტანკებს, რომლებიც პირდაპირი დამიზნებით დაუშენენ მათ პოზიციებს“.

ერთი დღის შემდეგ შტაბმა აღიარა, რომ ამ ღონისძიებებმა უნაყოფოდ ჩაიარა: „ტანკებიდან და მოიერიშე ქვემეხებიდან განვაგრძობდით აღმოსავლეთ ფორტის დაბომბვას, მაგრამ ვერაფერს გავხდით. დივიზიის მეთაურის განკარგულებით, კავშირი დავამყარეთ საავიაციო ნაწილთან, რომელიც მუხხავეცის ნაპირზე იმყოფება.

მფრინავთა დასკვნით, ფორტის დაბომბვა შესაძლებელი იყო. დაბომბვის წინ, სპარტილერიო ცეცხლის საფარქვეშ, ჩვენი ნაწილები მიწაყრილის გარეთ გამოვიყვანეთ, და ეს ოპერაცია შეუძინველად ჩავატარეთ, რომ რუსები ფორტიდან არ გაპარულიყვნენ. სამწუხაროდ, მეტად ღრუბლიანი დღე დაგვიდგა, რამაც ხელი შეუშალა დაბომბვას. სასწრაფოდ აღვადგინეთ სალტისებური ალყა და ღამით მტრის პოზიციების გასანათებლად რუსული პროექტორი გამოვიყენეთ; მაგრამ ჩვენს მხარეზე ოდნავ მოძრაობასაც კი მოწინააღმდეგე სროლით პასუხობდა.

მეორე დღეს თვითმფრინავებმა აურაცხელი ნახევარტონიანი ბომბები დააყარეს ფორტს. ამ თავდასხმამაც უშედეგოდ ჩაიარა. ასევე უნაყოფო გამოდგა ფორტის ბობოქარი დასეტყვა ტანკებიდან და მოიერიშე ტყვიამფრქვევებიდან, თუმცა ალაგ-ალაგ ძლიერი ნგრევა შეიმჩნეოდა.

მალე ახალი შეტევაც მოვამზადეთ: ბენზინით, ზეთითა და ქონით სავსე კასრები ფორტის სანგრებში ჩავყარეთ და ცეცხლგამჩენი ტყვიებით ავაფეთქეთ“.

ჩალეწილი ფორტი ხანძარში გაუჩინარდა, ხოლო მიწაყრილზე იმწამსვე ახრიალდა რეპროდუქტორი, რომელიც იმუქრებოდა, მოითხოვდა, დაუყოვნებლივ დაგვნებდითო და ვადას გვინიშნავდა.

ამ მძიმე წუთებში საბჭოთა მეომრები პარტიულ განცხადებებს წერდნენ, პარტიაში მიღებას ითხოვდნენ.

გავრილოვმა კრება მოიწვია და ათობით შებრძოლი პარტიაში მიიღეს.

ამასობაში ვადაც ამოიწურა და თვითმფრინავებმა ბომბები დააყარეს ფორტს.

ორტონიანი ბომბის აფეთქებამ მთელი ქალაქი შეარყია, ფორტი მიწასთან გააწორა. მტრის ასეულები უმალ შემოიჭრნენ აღმოდებულ ნანგრევებში, მაგრამ გავრილოვი ვერ იპოვეს.

რამდენიმე მებრძოლთან ერთად მაიორმა მიწის კედლის ბნელ კაზემატში ნოასწრო შესვლა, სახელდახელოდ მოაწყო სამეთაურო პუნქტი და გრანატები დაუშინა მტერს.

გერმანელები კარგა ხანს დარჩნენ ფორტში, გავრილოვსა და მის თანამებრძოლებს კი ვაზნები უთავდებოდათ. ამიტომ უფრო საიმედო ადგილი გამოძებნეს, მიწაყრილის სიღრმეში

დაუმთავრებელი გვირაბი იპოვეს და შეუმჩნეველ, ვიწრო სოროებს შეეფარნენ. სანამ გერმანელები სიმაგრეში იქნებიან. აქ ღაერჩებოთ, მერე ტყეში გავიჭრებით, პატრუზანებს შევუერთდებითო, ფიქრობდნენ. მთელი დღე თითებით ჩიჩქნიდნენ მიწას. რომ გასასვლელი გაეფართოებინათ: ამონათხარს ზურგს უკან ყრიდნენ და გამოსაბრუნებელ გზას იხშობდნენ. ფაშისტები იმ სოროებსაც მიაღვნენ, გულდასმით გასინჯეს, ხერელები ავტომატებით გამოთოფეს, მერე ყური მიუღვეს, ხომ არავენააო და წავიდნენ. გავრილოვი და მისი ამხანაგები რამდენიმე დღეს დარჩნენ აქ; სინათლე არსაიდან შემოდისოდა, საჭმელი არ ჰქონდათ, წყურვილის მოსაკლავად ცივ აგურს ლოკავდნენ.

როცა მომხვდურთა ხმა საბოლოოდ მიწყდა, პისტოლეთითა და რამდენიმე გრანატით შეიარაღებული გავრილოვი გარეთ გამოვიდა. კაზემატის მახლობლად ტყვიამფრქვევის კაკანი შემოესმა. ყური მიუგდო, იცნო „დეგტიაროვის“ ტკრციალი; მალე რუსული ლაპარაკიც გაარჩია.

მიწაყრილზე თორმეტი საბჭოთა მეომარი აღმოჩნდა. მტრის იერიშის დროს ისინიც კაზემატებს შეჭვარებოდნენ; დღისით ხერელში იმალებოდნენ, ღამით კი მტრის განცალკევებულ ჯგუფებს ტყვიამფრქვევის ცეცხლით ხვდებოდნენ. გავრილოვს იმედი ჰქონდა, რომ ამ ჯგუფს ბელორუსიის ტყეებში გაიყვანდა, მაგრამ არც ეს მოხერხდა. რადგან სიმაგრის გარემოცვა გრძელდებოდა. ერთ დღეს აქ გერმანელი მეავტომატეები შემოიჭრნენ და მიმალული ჯგუფი ადვილად აღმოაჩინეს.

ღონემიხდილი შაიორი კუთხეში თვლემდა, როცა სულ ახლოს გაიგონა:

— რუსო. ჩაგვბარდი!

თავდამცველებმა ხელყუმბარები ააფეთქეს, მაგრამ რამდენიმე ფაშისტმა მაინც მოასწრო კაზემატიდან გაქცევა. მტრის მამველმა ნაწილებმა ფორტს ალყა შემოარტყეს. მოიერიშე ქვემეხებიდან ცეცხლი გახსნეს და მიწაყრილიდან ეზოში გრანატები ჩამოყარეს. გავრილოვი და მისი ორი თანამებრძოლი კვლავ ვიწრო ხვრელს შეეფარნენ.

მართალია, მტერმა ღამით კაზემატის გაჩხრეკა ვერ გაბედა, მაგრამ დამცველებს აქ მაინც აღარ ედგომებოდათ.

სოროდან რომ გამოვიდნენ, ფორტის გასავლელთან კოცონის გარშემო თავშეყრილი ჯარისკაცები შეამჩნიეს. გერმანელები ალბათ გათენებას უცდიდნენ, რომ დილით ისევ გადაექოთებინათ იქაურობა. აუცილებელი იყო ამ ალყის გარღვევა; თავდამცველებმა ერთმანეთი გადაკოცნეს და გაისმა გავრილოვის ბრძანება: „ცეცხლი!“ ერთდროულად იგრილა სამმა ხელყუმბარამ... გავრილოვს ბუნდოვნად ახსოვს, როგორ გადაირბინა მტრის ხაზი; გონებაში ჩარჩა გრანატების გრიალი. გუშაგთა ჩოჩქოლი, ტყვიის წივილი და ჩამქრალი კოცონის ადგილზე დამკვიდრებული მყუდროება. ისე გარბოდა, მიწასაც აღარ გრძნობდა ფეხქვეშ; თან მიჰყვებოდა შემაშფოთებელი ხმაური, ნაბიჯების ხმა და გრძნობა, რომ საცაა ვიღაც წამოეწევა.

გზა რომ გადაირბინა და სული მოითქვა, თავზე ტყვიამფრქვევის ჯერმა გადაუბრინა. ეს უცნობი თავდამცველი ისროდა მახლობელი „დოტიდან“. მაიორი მიწას გაეკრა, მღვერები უკან გაბრუნდნენ.

ათიოდე წუთის შემდეგ ყველაფერი მიწყნარდა. გავრილოვი ხოხვით გაჰყვა სიმაგრის გარეთა კედელს, ხელის ცე-

ცებით სადღაც კარი იპოვა და თავისი პოლკის საჯინიბოში აღ-
მოჩნდა. უნდოდა არხგაღმა გასულიყო, მაგრამ გერმანული
ლაპარაკი შემოესმა, ვილაცამ ასანთს გაჰკრა და წყვდიადში
პაპიროსიც აციმციმდა. მაიორი უკან გამობრუნდა, ამბრაზუ-
რებიანი კაზემატი მონახა და იქ ნაგვის გროვაში შეიმალა. პა-
ერისთვის პატარა ჭუჭრუტანა დაიტოვა, თავზე ბუჩო წაიფარა
და გვერდით დაიწყო უკანასკნელი ხელყუმბარა და რევოლ-
ვერი. ასე გაატარა მთელი დღე. ნაშუადღევს იქაც შევიდნენ
გერმანელები, მაგრამ ზვინისათვის ყურადღება არ მიუქ-
ცევიათ.

ღამით გავრილოვი არხის ნაპირზე გავიდა და დამპალ
წყალს დაეწაფა. მერე ხუთი დღის უჭმელი საჯინიბოში სა-
ქონლის კომბინირებულ საკვებს წააწყდა და მაგრად მიაძღა.
მეექვსე დღეს მუცლის ტკივილისაგან ტუჩებს იკბენდა და
კვნესას ძლივს იკავებდა. მალე სიცხემ გონი წაართვა და უნე-
ბურმა გმინვამ გასცა. გერმანელები მაშინვე შემოცვივდნენ
კაზემატში. მათ ხმაურზე ღონემიხდილი მაიორი გამოფხიზლ-
და, ძალა დაუბრუნდა და პისტოლეტი მოიმარჯვა. ფაშისტებ-
მა უმალ შეამჩნიეს იგი და ნაგავს ფეხით დაუწყეს ქექვა.
მაიორმა სიმწრით წამოიწია, გაჭირვებით დააწვა სასხლეტს
და იარაღმაც იქუხა. შეშინებული გერმანელები გარეთ გაც-
ვიდნენ; გავრილოვი კი ფეხზე წამოდგა და უკანასკნელი
ბრძოლისთვის მოემზადა.

ამბრაზურაში ტყვიამფრქვევის ლულა გამოჩნდა და იმ-
წამსვე აკაკანდა.

გაისმა ნაცნობი შეძახილი:

— რუსო დაგვენბდი!

მაიორმა ორივე ხელყუმბარა გაისროლა. გერმანელები გა-

იქცნენ, მაგრამ ნახევარი საათის შემდეგ ისევ მობრუნდნენ. გავრილოვი რევოლვერით ელოდა მტერს. ფაშისტებმა ჯერ ზურგიდან წამოუარეს ავადმყოფს. მერე ამბრაზურიდან გრანატები ჩამოყარეს და გონდაკარგული მეთაური ხელთ იგდეს.

გავრილოვი 23 ივლისს მიიყვანეს მახლობელ ბანაკში. სახედაჩეხილმა, გაბანჯვლულმა და გააფთრებულმა მაიორმა თავისი მამაცობით მტრებიც გააოცა. გერმანელებმა მას სიცოცხლე აჩუქეს და, რადგან ჭამა არ შეეძლო, ხელოვნური კვებით მოასულიერეს...

სართიჭალელი ი. რთველაძის გადმოცემით, რომელიც ომის დაწყებამდე ჩვენს პოლკში მსახურობდა, მასთან ჩრდილოეთის ფორტებთან იბრძოდნენ 125-ე პოლკის მეთაურები და ჯარისკაცები: კოლესნიკოვი, ლაბაჩოვი, გრიშინი, არხიპოვი, კ. ნიჟარაძე, გ. ბურდიაშვილი, გ. მოსიაშვილი, ა. ხერუმოვი, ბიტუევი და სხვ.

ს. ინჯიასაგან გავიგე, რომ ივლისის ბოლოს სამხედრო ტაძართან ხელჩართულ ბრძოლაში დაიღუპა ჩვენი პოლკის ოცეულის მეთაური ვალოდია უგრეხელიძე.

ბრესტის სიმაგრე მაინც არ ნებდებოდა. მიუვალ ადგილებში მიმალული მეომრები ყოველ ნაბიჯზე ტყვიითა და ხიშტიით ხვდებოდნენ მტერს. როცა ფაშისტური ურდოები მოსკოვსა და ლენინგრადს უტევდნენ, შორეულ საზღვარზე ჩამორჩენილი მებრძოლები გააფთრებით იცავდნენ საბჭოთა მიწის ყოველ მტკაველს.

გაბოროტებულმა მტერმა არხები გახსნა და წყლით ამოავსო დაუმორჩილებელი სარდაფები.

ივლისის ბოლოს გარემოცვა საგრძნობლად შესუსტდა. ნანგრევებს შეფარებულმა ზოგიერთმა დამცველმა, რომელ-

თა შორის მიხეილ მუმლაძეც იყო, ისარგებლა ამით და სიმაგრიდან გასვლა მოახერხა. მეც თავი დავედწიე მტრის აღწყას და იმავე წელს პოლონელ პარტიზანებს შევეუერთდი. დაიწყო მტრის ზურგში განსაცდელითა და ხიფათით სავსე გზა, რაც აღწერილი მაქვს წიგნებში: „პიასტის ნამუხლარზე“ და „მაკიზარებთან“.

* * *

გერმანელებს სურდათ მარადიული საიდუმლოების ფარდა გადაეხურათ ნანგრევებისათვის. წყლით სავსე სარდაფებში დაეპარხათ დამცველთა თავგანწირულების ამბავი, სამარადეამოდ მოესპოთ ამ უმაგალითო ბრძოლის ნაკვალევი, რომელიც ჩრდილს აყენებდა მათ სამხედრო დიდებას. ისინი მალავდნენ, რომ პატარა საბჭოთა სიმაგრის დაპყრობა უფრო ძვირი დაუჯდათ, ვიდრე ზოგიერთი სახელმწიფოს დამორჩილება.

ბრესტის ეპოპეა დიდხანს იყო საიდუმლოებით მოცული.

საზღვრისპირა სიმაგრის გმირობაზე 1941 წელს მხოლოდ ყრუ ხმა აღწევდა სამშობლომდე: შორეული რეისიდან დაბრუნებული მფრინავები ზღაპარივით ჰყვებოდნენ. ბრესტის რაიონში აფეთქებების ხმა გავიგონეთო. დანამდვილებით კი არავინ იცოდა რაიმე. იმ დაძაბულ დღეებში სიმართლის გაგება შეუძლებელი იყო. რამდენიმე ხნის შემდეგ საიდუმლოებას ფარდა აეხადა: მტერი საქუთარმა დოკუმენტებმა გასცა.

1943 წელს ორიოლის ფრონტის ერთ-ერთ უბანზე ჩვენმა ჯარებმა გაანადგურეს გერმანელთა 45-ე დივიზია. რომლის არქივში აღმოჩნდა „საბრძოლო პატაკი ბრესტის დაკავების

შესახებ“. ამ დოკუმენტში თვითეული დღის ბრძოლა ცალკეა აღწერილი და ყოველ სტრიქონში ჩანს მტრის გაოცება და შიში: „შემაშფოთებელი იერიში ციხე-სიმაგრეზე, სადაც გამაგრებული არიან მამაცი დამცველები, დიდ სისხლად გვიღირს“; „ბრესტ-ლიტოვსკში რუსები იბრძოდნენ თავზარდამცემი სიმტკიცითა და შეუპოვრობით. მათ ცხადჰყვეს საბჭოთა არმიის ბრწყინვალე სამხედრო მომზადება, დაამტკიცეს, რომ აქვთ წინააღმდეგობის გაწევის განსაცვიფრებელი ნებისყოფა“.

ომის დაწყებიდან სამი წლის შემდეგ, 1944 წლის 28 ივლისს, ჩვენმა არმიამ ბრძოლით გაათავისუფლა ბრესტი. საბჭოთა მეომრები ვააოცა სიმაგრის ნანგრევებმა. ტყვიით დახრული ლოდები, დასეტყვილი კედლები, გადარუჯული ნათქვენები და წყალში ჩაძირული სარდაფები რაღაც მრისხანე სიდიადის ელფერს აძლევდა იქაურობას, ცხადყოფდა იქ დატარილებულ ტრაგედიას.

აღლადდნენ ქვებიც: ალაგ ფანქრით, ალაგ ხიმტით, ზოგან ფრჩხილით ამონაკაწრი წარწერები მითიურ ფრაგმენტებს მიაგავდნენ:

„ვიყავით ხუთნი, — წერია ტირასპოლის კარიბჭეზე, — სედოვი, გრუტოვი, ბოგოლიუბი, მიხაილოვი, სელიანოვი. 1941 წ. 22 ივნისს მივიღეთ პირველი ბრძოლა. გავწყდებით, მაგრამ არ დავთმობთ აქაურობას!“

ჩვენი პოლკის შერუჯულ, ჩამონგრეულ კედლებზე შემორჩენილია ქართული წარწერებიც: „არჩილ ძაგოშვილი. ივლისი, 1941 წ., დათო სულხანიშვილი. საგინაშვილი. ახალკაცი. ყურბანოვი სოინ...“

დასავლეთ ყაზარმების შიგნით კედელზე ფრჩხილებით

ამოკაწრულია: „1941 წ., 26 ივნისი. ოთხნი ვიყავით, გვიჭირდა, მაგრამ სულთ არ დავცემულვართ. მოვკვდებით, როგორც გმირები“.

საყდრის კედლებზე წარწერილია: „აქ ვიყავით სამი მოსკოველი: ივანოვი, სტეპანჩიკოვი, უნტიაევი. ამ საყდარს ვიცავდით და შევფიცეთ ერთმანეთს, რომ აქედან არ წავიდეთ. 1941 წ., ივლისი“. ქვემოთ ასეთი მინაწერია: „მარტოლა დავრჩი. უნტიაევი და სტეპანჩიკოვი დაიღუპნენ, გერმანელები უკვე საყდარში არიან, უკანასკნელი ხელუშობარაღა დამრჩა, ცოცხალი არ ჩავბარდები... ამხანაგებო, აიღეთ ჩვენი სისხლი. 1941 წ.“

20 ივლისს სამხრეთ-დასვლეთ კედელზე ვილაცას სისხლიანი ხელით წაუწერია: „კვდები, მაგრამ არ ვბარდები. მშვიდობით, სამშობლოვ!..“

ამ ბოლო ხანებში ნანგრევებში იპოვეს საგანგებოდ დაფლული საბრძოლო დროშები, ბრძანება № 1 და სხვა რელიქვიები.

ბელორუსიაში მრავალი ლეგენდაა ბრესტის სიმაგრეზე, ხალხმა ბევრი სიმღერა და ლექსი მიუძღვნა საზღვრის გმირ დამცველებს. ჩვენს თვალწინ ლეგენდად იქცა სინამდვილე. ერთ მათგანს სმირნოვი ასე გადმოგვცემს:

1942 წლის ზამთარში ოკუპანტებმა ქალაქის მცხოვრებნი სიმაგრეში შერეკეს ნანგრევების გასაწმენდად. დამლაშობით ისინი ამჩნევდნენ დამცველთა აჩრდილებს. უცნობის მრისხანე ხელი ყოველ დილით სისხლით აწერდა კედლებზე: „სიკვდილი გერმანელ დამპყრობლებს!“

იმავე წლის აპრილში ერთი ებრაელი მუსიკოსი გერმანელმა ოფიცრებმა სიმაგრეში წაიყვანეს. 333-ე პოლკის სარდაფის ხვრელი დაანახვეს და უბრძანეს:

— ჩადი! იქ დღემდე იმალებიან რუსები! უთხარი, დაგვ-
ნებდნენ!.. იცოდე. თუ ვერ დაარწმუნებ, ტყვია არ აგცდება!..

ძრწოლაატანილი მუსიკოსი სარდაფში ჩავიდა. გაჰყვა
ბნელ, ვიწრო მიწისქვეშა ხვრელს. მიდიოდა ხელგაწვდილი,
რომ მტრად არ მიედოთ და არ მოეკლათ უცნობებს. უცბად
დაიქუხა სარდაფმა. მოქალაქე შეშინებული დაეცა მიწაზე.
ვიღაც მიუახლოვდა, ხელი შეახო და მისუსტებული ხმით
უთხრა:

— ნუ გეშინია, მოდი! ეს უკანასკნელი ტყვია მქონდა, ჰა-
ერში ვისროლე.

მუსიკოსმა ძლივს ამოათრია ჯანგაწყვეტილი მეომარი. სი-
ნათლე რომ მოხვდა. უცნობმა თვალი დახუჭა და ნანგრევებ-
ში ჩაიკეცა.

ვერ გაიგებდით, ვინ იყო ის: მეთაური თუ რიგითი მეზრ-
ძოლი, ყმაწვილი თუ მოხუცი. ტანს დამპალი ძონძები უფა-
რავდა, სახეს — საშინელი ჯაგარი. მაინც არ სურდა მტერს
შეემჩნია მისი სისუსტე. წამოდგომა სცადა. მაშინ ფაშისტებმა
კონსერვის ქილა მიაწოდეს. მაგრამ მან ზიზღით გაჰკრა ხელი:

— მე გამოვედი, რათა საკუთარი თვალით მეხილა თქვენა
უძლურება!..

არავინ იცის, ვინ იყო, ან რა ბედი ეწია მას.

* * *

დღეს ბრესტის სიმაგრეში დაარსებულია ლეგენდარულ.
დაცვის მუზეუმი, რომელსაც ასი ათასობით საბჭოთა და
უცხოელი მოქალაქე ნახულობს.

ბევრი დაეცა აქ ვაჟკაცური სიკვდილით, ბევრმა ასახელა თავისი ხალხი, მათ შორის ბევრი იყო ქართველი. უცნობია ბევრის გვარი. მაგრამ ძმათა საფლავზე აღმართული ობელის-კი საუკუნოდ უკვდავყოფს მათ წმინდა ხსოვნას. ისინი ჩვე-ულგვარი საბჭოთა ადამიანები იყვნენ, უყვარდათ სიცოცხ-ლე, მაგრამ საბჭოთა ხალხის დიადი საქმისათვის ბრძოლაში არც ერთი წუთით არ შემდრკალან, არც ერთი ნაბიჯით არ დაუხვევიათ უკან.

მწერალმა სერგეი სმირნოვმა უმდიდრესი მასალა შეაგრო-ვა ბრესტის გმირულ დაცვაზე, დასამახსოვრებელი სახეებით გააცოცხლა ლეგენდარული ბრძოლის ეპოპეა და გულმოდ-გინე შრომით ამოხსნა მისი მრავალი საიდუმლოება. წიგნი-სათვის — „ბრესტის სიმაგრე“ 1965 წელს მას ლენინური პრემია მიენიჭა.

დოკუმენტური და მხატვრული ნაწერებით, სპექტაკლე-ბითა და კინოფილმებით ახლა მთელი ხალხი იცნობს დიდი სამამულო ომის ამ ღირსშესანიშნავ ეპიზოდს.

1965 წელს, საბჭოთა ხალხის დიდი საწამულო ომის დამ-თავრების ოცი წლისთავზე, სსრკ უმაღლესი საბჭოს პრეზი-დიუმის ბრძანებულებით, ბრესტის ციხე-სიმაგრეს მიენიჭა „გმირი ციხე-სიმაგრის“ სახელი. საბჭოთა კავშირის გმირის წოდება მიენიჭა ლეიტენანტ ანდრეი კოჟევ-ტოვს. დიდი სამა-მულო ომის დაწყებისა და ბრესტის სიმაგრის დაცვის 25 წლისთავზე, საზეიმო ვითარებაში გაიხსნა „სამარადისო დი-დების ძეგლი“ და „ბრესტის გმირთა პარკი“.

1960 წ. გაზეთებში გამოქვეყნდა ნარკვევები ბრესტის გმირული დაცვის მონაწილე ქართველებზე. ამასთან დაკავში-

რებით მრავალი ბარათი მივიღე ბრესტელი მეგობრების
თჯახის წევრთაგან და ამ წერილებიდან პირველად გავიგე ზო-
გიერთი ამხანაგის ამბავი.

* * *


კაპიტანმა ალიოშა ხარაბაძემ, რომელიც ახლა თბილისში
ცხოვრობს, ბევრი საყურადღებო ცნობა მომაწოდა თანაპოლ-
კელებზე. კერძოდ, მისგან გავიგე, რომ ჩვენი პოლკის ყო-
ფილმა მეთაურმა ტერენტი ურთქმელიძემ 1942 წელს დაას-
რულა სიცოცხლე ქერჩის ფრონტზე.

ბატალიონის მეთაურის, იაკობ (იაშა) გელაშვილის სახელს
ოსვენციმის საკონცენტრაციო ბანაკის მსხვერპლთა სიაში წა-
ვაწყდის; ერთ-ერთი ჩანაწერი იუწყება, რომ ეიხმანის ჯალა-
თებმა მას 1941 წლის დეკემბერში მოუღეს ბოლო. ეს ჩანა-
წერები ამ ორი წლის წინათ ჩამოიტანა თბილისში პოლონე-
თის კულტურის მოღვაწეთა დელეგაციამ.

ლეიტენანტი გიორგი ანანიაშვილი 1941 წლიდან ბელორუ-
სიის პარტიზანთა რაზმებში იბრძოდა და უნდა ვიფიქროთ,
რომ იქ დაიღუპა.

სერგო ბაშალეიშვილის მეუღლე მარიამი ანბეტის რაი-
ონის სოფელ ოჟიოდან მწერს: „სერგო გმირულად დაიღუპა
1943 წლის 7 ივლისს და დასაფლავებულია ტაგანროგში.
ჩვენმა ვაჟებმა სწავლა დაასრულეს და ღირსეულად ემსახუ-
რებიან სამშობლოს, წმინდად ინახავენ მამის ხსოვნას“...

ასობით ქართველიდან, 1939 წლის შემოდგომაზე ერთად
რომ ჩავედით ბრესტის სიმაგრეში, ათიოდე კაცილა დავბრუნ-
დით უკან...



მიხეილ ფირცხალაიშვილი.

მიხეილ ფირცხალაიშვილი, რომელმაც ბრესტის რაიონში მიიღო საბრძოლო ნათლობა, შემდეგ უკრაინაში მუსრავდა ფაშისტებს და ომი მანჭურიაში დაამთავრა იაპონელ სამურაებთან შერკინებით, ამჟამად ანასეულის საბჭოთა მეურნეობაში იღწვის ჩაის უხვი მოსავლისათვის. დაჯილდოებულია ორი წითელი ვარსკვლავის, სამამულო ომის მეორე ხარისხის ორდენებით, მედლით მამაცობისათვის და სხვ

ალექსი ჯარიაშვილი.

ჩვენი ასეულის ზემდეგი გიორგი ბარბაქაძე ზემო საქარის კოლმეურნეობის მოწინავე ბრიგადირია.

333-ე პოლკის მუსიკოსი, პეტია კლიპას განუყრელი მეგობარი, ალავერდა იმანოვი, თბილისში მუშაობს შოფრად. მისი მეგობარი, თელაველი ნიკა აბზიანიძე ტყვედ ჩავარდნის მე-

ორე დღეს ბრესტთან თოფის დუგლუგებით მოკლეს ფაშისტებმა.

ნ. მ. რემიზოვი და პ. ვ. სტრუჩალინი გარდაბნის რაიონის სოფელ კრასნოგორსკის კოლმეურნეობაში მუშაობენ.

გოგია გულისაშვილიც თბილისში ცხოვრობს; ხიშტებით დაგლეჯილი, ცოცხალ-მკვდარი ბრძოლის ველზე უპოვნიათ პოლონელ გლეხებს და გადაურჩენიათ. გარეჯელი მუღამ უსაზღვრო მადლობით იგონებს თავის მხსნელებს — პოლონელ პატრიოტებს — ადამ რაზმოვსკის, იზაბელა და მანია ჯიხოვსკებს, რომლებთანაც გულთბილი მიმოწერა აქვს.

პირველი ასეულის ყოფილი პარტორგი ვანო კველიშვილი თელავის რაიონის სოფელ კურდღელაურში ცხოვრობს.

აღექსი ჯარიაშვილი ბილაპოდლიასკის ტყვეთა ბანაკიდან 1942 წელს ყირიმში გაგზავნეს, სულ მალე პარტიზანებთან გაიქცა და კოტელნიკოვის შენაერთში სხვა ქართველებთან ერთად (დ. ჭანტურიძე, ი. სამაშვილი, ლ. ლოდობერიძე) გმირულად ებრძოდა ოკუპანტებს. ამჟამად ის გარდაბნის სახელმძღვანელო მექანიზატორია.

* * *

ამ ცოტა ხნის წინათ ქართველ მეთაურთა ოჯახების თავგადასავალიც გამოვარკვიე. თამარ ჯიჯაშვილი თბილისში ცხოვრობს და კარდეოლოგიის ინსტიტუტში მუშაობს. მან დაწვრილებით მიაშბო ყველაფერი.

— ლოგინიდან წამოხტომა და თამაზის ხელში აყვანა

ძლივს მოვასწარი, — მითხრა მან, — რომ უფროსმა ლეიტენანტმა კოსოვმა და ლეიტენანტმა ტკაჩენკომ, რომლებსაც თვალის დახამხამებაში აესხათ იარაღი, ეზოდან ამოგვძახეს, ფეხი არ მოიცივალოთ, ახლავე საევაკუაციო მანქანებს გამოვგზავნითო. ამ სიტყვებზე ციტადელისაკენ გაიქცენენ, მაგრამ, როგორც ჩანს, გზაშივე დაიღუპნენ.

ღილით ოთახში ორი ახმახი გერმანელი შემოგვივარდა.

თვალი მოჰკრა თუ არა თამაზმა მათ, სურათებისა და მამის ნაამბობის მიხედვით მაშინვე იცნო ისინი და დედას შესტირა:

— დედიკო, ჩემო საყვარელო დედიკო, ფაშისტები მოვიდნენ, ყელს ამოგვჭრიან, ამოგვხოცავენ!

თამარმა შვილი მაგრად ჩაიხუტა გულში, იარაღმომარჯვებულ მტერს მოარიდა. გერმანელებმა ჯერ მამაკაცი მოიკითხეს, მერე ყველაფერი მიანგრ-მოანგრიეს, ტახტქვეშ ავტომატი ააქაჯანეს, კარადები წიხლით გადააბრუნეს და მოპირდაპირე დერეფანში გაცვივდნენ.

თამარი მაშინვე გაეხმაურა კარის მეზობლებს — კოლია და კლარა ივანოვებს, მაგრამ არავინ უპასუხა. პირველი დაბომბვისთანავე მათ ხელი დაუვლიათ პატარა ლიანასათვის და გამაგრებულ საწყობში შევარდნილან. ივანოვს უფიქრია, ცოლ-შვილს უშიშარ ადგილზე დავტოვებ და პოლკში გავიქცევიო, მაგრამ გამოუყვია თუ არა გარეთ თავი, ჩასაფრებულ მზვერავებს დაუჭერიათ და ერთ წითელარმიელთან ერთად დასახვრეტად გაუყვანიათ. ამის შემყურე კლარა და ლიანა სახეს იხოკდნენ. მერე რომელიღაც ოფიცერი მისულა, ბრძანება შეუცვლია და ივანოვი სადღაც წაუყვანიათ. ფერდაკარგული გოგონა კლარამ ისევ ზემოთ აიყვანა, თამართან.

ქალები, ბავშვები და მოხუცები კიდევ კარგა ხანს იდგნენ ქვემო სართულის დერეფანში, მაშველ ნაწილებს ელოდნენ... ბრძოლა ამ უბანზეც გრძელდებოდა; საცხოვრებელ კორპუსებს განუწყვეტლივ ეცემოდა ყუმბარები.

შუადღისას დერეფანში ორი დაჭრილი წითელარმიელი შემოვიდა ხოხვით; ერთს კოჭიდან თქრიალით მოსდიოდა სისხლი, მეორეს მკლავზე ჰქონდა იარა. თამარი უმალ შევარდა აღმოდებულ ოთახში. ზეწარი გახია და ორთავეს შეუხვია ჭრილობა. თუმცა მისუსტებული იყვნენ, მაინც საბრძოლველად გაიწიეს და ეზოში გაცოცდნენ.

შენობიდან გასვლა უფრო და უფრო გაძნელდა. დერეფანში გამომწყვდეულებს სხვენიდან და სახლის კუნჭულებიდან ფაშისტები უთვალთვალებდნენ და სულ მცირე მოძრაობასაც ავტომატის ჭერით პასუხობდნენ.

პოლკის ფერშალი — ვალენტინა სერგის ასული რაევსკაია, რომელიც ციტადელისაკენ მირბოდა, მძიმედ დაჭრეს მარჯვენა მკლავში.

ის ღამე ქალებმა ვაი-ვიშით გაატარეს. ბეტონის კიბეებ-ქვეშ ერთად შეფარებულიყვნენ ნადია კოსოვა, მარუსია ტკაჩენკო, კატია გორნოსტაევა 14 წლის ქალიშვილით, კლარა ივანოვა თავისი გოგონათი და სხვ. დედის მკერდში ჩახუტებულ თამაზს ეძინა, მხოლოდ ახლოს დაცემული ყუმბარის აფეთქებაზე შეხტებოდა და წუთით გაახელდა თვალს.

ერთ საღამოს, ასე ექვს საათზე, გერმანელებმა ორი უცნობის პირით ულტიმატუმი წამოუყენეს მეთაურთა ცოლებს — თუ ახლავე არ გამოხვალთ თავშესაფრებიდან, სახლებს ცეცხლს წავუკიდებთ და დიდიან-პატარიანად ამოგწვავთო. ერთ ხანს გაჯიუტდნენ ქალები, მტრის ხელში ჩაგარდნას სიკვდი-

ლი ერჩინათ, მაგრამ როდესაც ფაშისტებმა კორპუსებს ცეცხლგამჩენი ყუმბარები დააყარეს, მიხვდნენ, რომ ჰიტლერელები არავის დაინდობდნენ და ბავშვები დაენანათ.

გერმანელებმა თოფის კონდახებით გამორეკეს ისინი დერეფნებიდან და ღამით, სიმაგრის ქვემოთ, რკინიგზის ხილთან მიიყვანეს. ხიდი საკმაოდ გრძელია და შპალებიც კარგა მანძილით იყო ერთმანეთს დაშორებული. დედები ზურგზე წამოკიდებული ბავშვებით სწრაფად გადარბოდნენ შპალებზე და შიშობდნენ, წყალში არ ჩაცვენილიყვნენ.

ფეხი შედგეს თუ არა მეორე ნაპირზე, ვიღაც გერმანელმა მოირბინა და იმავე გზით უკან გამოაბრუნა ყველა.

აქ, ჩვენს მხარეზე, სასაზღვრო ნაწილის ორი ნაგებობა მოჩანდა, — ერთი პატარა, მეორე — ცოტა უფრო მოკრძო.

ორასამდე ქალი და ბავშვი იმ პატარა მიწურში ჩაკეტეს და გუშაგები დაუყენეს.

მეორე დღეს, პატიმრები გარეთ რომ გამოიყვანეს და მწკრივად დააწყვეს, მოგრძო ნაგებობის სარკმელში თამარმა და კლარამ თვალი მოჰკრეს დატყვევებულ კოლია ივანოვს. ლიანას ხელით კლარამ რამდენიმე ნატეხი შაქარი გაუგზავნა ქმარს. მაგრამ პატიმარმა არ მიიღო, თქვენ გქონდეთ, მე აღარაფერში გამომადგებაო. ოჯახის წევრები ხელების ქნევითა და წივილ-კივილით ემშვიდობებოდნენ ერთმანეთს.

125-ე პოლკის პირდაპირ, გაღმა, საბარგო მანქანაზე საზენიტო ტყვიამფრქვევები იდგა და გარშემო დახოცილი მებრძოლები ეყარა. ჩრდილოეთის ალაყაფთანაც გროვად ეყარა მკვდრები. როგორც ჩანს, ჩვენი მეომრები ღამობდნენ გარემოცვის გარღვევას და ხელჩართულ ბრძოლაში დაიღუპნენ.

მეთაურთა ოჯახები იმავე დღეს ბრესტის საპყრობილეში

მიიყვანეს. ამდენ წვალებასა და ხეტიალში ბავშვები ისე დაიტანჯნენ, რომ თამაზი ციხის პატარა ეზოს დანახვამაც კი გაახარა თურმე და დედას მიაძახა: „შეხედე, რამხელა მინდორიაო“. საპყრობილეში ორი კვირა გაატარეს, საქმელს არ აძლევდნენ და გამოხრულ ძვლებს დაეძებდნენ ბნელ სოროებში.

ივლისის ბოლოს ციხის კარი გააღეს და ქალებს გამოუცხადეს: რუსეთი ჩვენს ხელთაა. ახლა სადაც გსურდეთ, იქ წადითო. კარგად იცოდნენ, რომ მშვიერ-მწყურვალნი, ძუძუმწოვარა ბავშვებით შორს ვერ წავიდოდით და რა ენაღვლებოდათო, — დასძინა თამარმა.

თამარი და კლარა ერთმა მოხუცმა ვეტეჟიმმა შეიხიზნა, მაგრამ ფაშისტებმა იქიდანაც მალე გამოყარეს.

— მახლობლად რაღაც საიდუმლო დაწესებულება ჰქონდათ და არ ეჭაშნიკებოდით იქ ჩვენისთანა არასაიმედო ხალხის ყოფნაო, — თქვა თამარმა.

ქუჩაში გამორეკილებმა დროებით ერთ მიტოვებულ ოთახს შეაფარეს თავი, მაგრამ ფაშისტებმა მალე იმ ჯურღმულიდანაც აუკრეს გულა-ნაბადი.

ბოლოს, თამარი. კლარა ივანოვა, ტატინა ანოშკინი (რომელსაც თან ჰყავდა 16 წლის ვაჟი ბორია) და ნესტორ ბოკერიას მეუღლე ლუდა. გაპარტახებულ შენობას შეეფარნენ მუხავეციის ნაპირზე (საბჭოს ქ. №2). თამარი და კლარა ერთ ოთახში დაბინავდნენ.

ნინო ანანიაშვილი და მარო გელაშვილიც იქვე ახლოს ცხოვრობდნენ, ხშირად ხვდებოდნენ და, რაც შეეძლოთ, ეხმარებოდნენ ერთმანეთს.

— გამოუცდელები იყვნენ, რუსული სრულებით არ იცო-

დნენ და ძალიან უჭირდათ საწყლებს, — ამბობს თამარი, — ხუმრობა ხომ არ იყო, იმ ჯოჯოხეთში ორ-ორი ბავშვის მოგლა... ერთი ცალი კარტოფილიც კი მამასისხლად ფასობდა. პურზე ფიქრს ვინ გაბედავდა, იგი გერმანელებსაც სანატრელი ჰქონდათ. შვილები შიმშილით გვეხოცებოდნენ.

სხვა გზა აღარ ჰქონდათ, მახლობელ სოფლებში სამათხოვროდ დაიწყეს სიარული. თამარი და კლარა ერთად დადიოდნენ, გლეხებს მუშაობაში ეხმარებოდნენ.

— ხალხს ძალიან ვებრალებოდიოთ, — განაგრძობს თამარი, — რომ გაიგებდნენ, ბრესტის სიმაგრიდან ვიყავით, გაშტერებული შემოგვეყურებდნენ, პირვარს იწერდნენ, არ სჯეროდათ, რომ იმ უბედურებას ცოცხალი გადაურჩა ვინმე. არაფერი ენანებოდათ, მაგრამ რა ჰქონდათ ბეჩავენს!.. ფაშისტები ახალდადებულ კვერცხებსაც კი იტაცებდნენ საბუღრებიდან, სულ „იაიკას“ და „მლეკოს“ გაჰყვიროდნენ და დედლებს წინასწარ უსინჯავდნენ კურტუმს. ბელორუსი გლეხები მაინც გვინაწილებდნენ საკუთარ ლუკმას.

— გახსოვს, დედი, რა გულმოწყალებდ გვიმასპინძლებოდა ერთი ჭალარა გლეხი და მისი ცოლ-შვილი? — გააწყვეტინა საუბარი თამაზმა.

— ჰო, შვილო! სოფელ ხმელიოვოში ძალიან კარგი ხალხი იყო! — მიუგო დედამ და დაუმატა: — თამაზი ხუთი წლის იყო მაშინ, მაგრამ ყველაფერი ახსოვს. თუმცა, საკვირველია, გაჭირვება, რომელიც იქ გადავიტანეთ, ახლა მაინცადამაინც აღარც გვაგონდება, მაგრამ ვისაც სიკეთე რამ გაუკეთებია ჩვენთვის, ყველა გვახსოვს. როგორც ჩანს, სიამეც უფრო ადვილად ივიწყებს კაცი, ვიდრე სიკეთეს!..

...იმ ხანებში პარტიზანებთანაც გავაბით კავშირი. მათ შორის ბევრი ბრესტელი იყო და, თუ არა ჩვენ, სხვას ვის უნდა ნდობოდნენ!.. იმათი მითითებით ჩვენთან ხშირად მოდიოდნენ რკინიგზელები — ვანია და ვიქტორი; ათასგვარ დავალებას გვაძლევდნენ. ერთხელ ხელყუმბარის ბეგთარები (კორპუსი) შეგვიკვეთეს; ბევრი ვეცადეთ, მაგრამ ქალაქში ვერსად აღმოვაჩინეთ; შემდეგ მაგისტრატში წავედით და ციხე-სიმაგრეში შესვლის ნებართვა ვითხოვეთ.

* * *

ადგილობრივ ხელისუფალთ ვარწმუნებდით, რომ მთელი ჩვენი სარჩო-საბადებელი ნანგრევებში დაიძარხა და შიშველტიტველი ბავშვები სიცივით გვეხოცებოდა. მართლაც, ზამთარი მოახლოვდა. ჩვენ ერთი ბალიში, ერთი უბრალო საბანიც არ გავაჩნდა. იმედი გვქონდა, რომ გატიალებულ სახლებში რაღაც ნაგლეჯებს მაინც წავაწყდებოდით...

ფაშისტები დიდხანს არ გვაძლევდნენ სიმაგრეში შესვლის ნებას, იქ პარტიზანები იბრძვიან და, ესეც არ იყოს, ყველაფერი გადაბუგულია, ვერაფერს იპოვითო. არც ადგილობრივი მცხოვრებლები გვირჩევდნენ სიმაგრეში შესვლას, რომელზედაც ათასგვარი უცნაური ლეგენდა იყო გავრცელებული.

სექტემბრიდან გერმანელები თვითონვე შეუდგნენ სიმაგრის ტერიტორიის გაწმენდას, მაგრამ ყველა ადგილებში შესვლას მაინც ვერ ბედავდნენ და ერთ დღეს მეთაურთა ოჯახის წევრები ძალად მიგვრეკეს მაგისტრატში; დაგვირიგეს ბარი, წერაქვი და დაგვემუქრნენ, თუ კარგად არ იმუშავებთ, გერმანიაში გაგრეკავთო...



სიმაგრე გერმანელი გუშაგებით იყო გარემოცული. ცენტრალურ ალაყაფთან სათითაოდ გაგვისინჯეს საშვეები და საგულდაგულოდ გაგვიჩხრიკეს...

მოწიწებით შევდგით ფეხი გმირულ მიწაზე. ირგვლივ შემზარავი ღუმილი სუფევდა. სროლა აღარსაიდან ისმოდა. ერთ ხანს მღუმარედ ვიდექით, მერე ჩვენს ოთახებთან მივიტყვრით ქვითინით. ყველაფერი ნაცარტუტად იყო ქცეული. როგორც ძვირფას განძს, ისე ვაგროვებდით დამწვარ-დანახშირებულ ჩვრებს. მუშამბის ნაფლეთებს, ათასნაირად დაჭყლეტილ ქვაბებს.

— აი, ეს ნაჭერი, — მიმითითა თამარმა მისი ტახტის წინ გაფენილ დაჩვრეტილი ხალიჩის ნაგლეჯზე, — ჩემს ოთახში ვიპოვე მაშინ. ვერ აგიწერთ, როგორ გამიხარდა! მთელ აღმოჩენას უღრიდა! თვალწინ დამიდგა ქმარ-შვილთან გატარებული ბედნიერი დღეები და თავი ველარ შევიკავე, ავქვითინდი... ძლივს ამოვათრიე ნანგრევებიდან, გავრეცხე, და განუშორებლად თან ვატარებდი. ის იყო ჩვენი საბანი და ლეიბი, ზეწარიც და ბალიშიც, ძალიან დიდი სამსახური გამიწია და, როგორც ხედავთ, ნიშნად დამსახურებისა, ახლა საწოლთან მიფენია.



მეცხრე კორპუსის კიბეზე ისევ ისე ეყარა ვანია და შურა პოჩერნიკოვების გვამები. ხანძარს ნახევრად შეეტრუსა მათთვის სახე და ტანსაცმელი. ამის დანახვაზე გული ჩაგვეყდა, ყველაფერს თავი დავანებეთ, იქვე ბალჩაში, კარგა ღრმა

სამარე გავჭყერით და ორი განუშორებელი მეგობარი შეილებთან ანლოს დავმარხეთ... თვალწინ მიდგას მათი ლამაზი სიცოცხლე, გასაოცარი სიკვდილი და მიტოვებული, უბრალო საფლავი...

თავიანთი მკვდრები ფაშისტებს უკვე გაეტანათ სიმაგრედან და ჩვენი მებრძოლებილა ეყარნენ ზვინ-ზვინად. გვამების მთები იდგა ეკლესიასთან, სასპორტო მოედანზე, ტირასპოლის ხიდთან და 333-ე პოლკის სარდაფებთან. მათ დასამარხად ფაშისტებმა ებრაელები შემორეკეს ნანგრევებში. მათგან გავიგეთ, რომ გერმანელები კიდევ ვერ ბედავდნენ ყველა სარდაფსა და მღვიმეში თავის შეყოფას.

გუშაგები ფრთხილად გვდარაჯობდნენ. ტირასპოლის კარიბჭესთან, მის მეზობელ „მრგვალ ყაზარმასთან“ და ზოგიერთ სხვა ადგილთან მისვლას გვიკრძალავდნენ.

გაგონილი გვქონდა, „ორბეს“ საწყობებში ბევრი რამ არის გადარჩენილიო და ჩვენც, უმთავრესად, ამ ადგილს ვუტრიალებდით.

ერთხელ მე და კლარამ იქით გავწიეთ: თუ საპონს ან ტანსაცმელს ვიპოვიდით, ადვილად გადავცვლიდით პურსა და კარტოფილზე...

ერთგან ამოზნექილი სილა შევამჩნიეთ. ზემოთ ჰინჭის ნაგლეჯიც მოჩანდა. ორივე იმ ადგილს მივცვივდით და აჩქარებით დავცხეთ წერაქვები. ჯერ რაღაც სხვა ქსოვილს წავაწყდით, მერე ფარაჯის კალთებს წავაფრინდით, რაც ძალა შეგვწევდა გამოვწიეთ და ჯარისკაცის გვამი კი შეგვგრჩა ხელში...

თავი შემალული ჰქონდა ფარაჯის აწეულ საყელოში, რომელსაც ხელებით ჩაფრენოდა.

— ქართველია, შენი თანამემამულე! — მითხრა ტირილით კლარამ.

თმაგაპარსული, შავგვრემანი ბიჭი გაუხრწნელი იდო სილაში. უპატრონოდ დარჩენილი ძმასავით დავიტირეთ, საფლავი უფრო ჩავალრმავეთ და დავმარხეთ...

იმ ხანებში „ორბესთან“ საპნის საწყობს წავაწყდით; რომ გამოგვეტანა, სულს მოვითქვამდით, მაგრამ სიმაგრიდან მოსვლისას ფაშისტები მოუერიდებლად გვჩხრეკდნენ და ბევრი რამის ერთად გამოპარება შეუძლებელი იყო. საპონს მაინც ხელყუმბარის კორპუსები ვამჯობინეთ და ერთმანეთის დახმარებით ძლივძლივობით ვაპარებდით ძველმანებში გახვეულ იარაღს. ღამით ეს ხელყუმბარები ვიქტორთან მიგვქონდა საიდუმლოდ...

მეთაურთა ოჯახის წევრთაგან, ვისაც კი ფეხზე დგომა შეეძლო, ქალი თუ ბავშვი, მოხუცი თუ ახალგაზრდა, პარტიზანებთან გარბოდა.

გავრილოვის ცოლ-შვილი ბრესტში ჩვენს მეზობლად ცხოვრობდა. კატია გავრილოვა ავადმყოფი ქალი იყო, ცხოვრება ჩვენზე უფრო უჭირდა და, რაც შეგვეძლო, ვეხმარებოდით. მისი ერთადერთი შვილი კოლია მაშინ 12 წლისა იქნებოდა. ისიც ავადმყოფობდა; შიმშილისა და მოუვლელობისაგან საწყალი ძალიან დაჩიავდა. ერთ დღეს ხმა გავარდა, კოლია დაიკარგაო. ვიფიქრეთ, მეტისმეტად დასუსტებული იყო და მდინარეში ბანაობისას დაიხრჩობოდა-თქო. ვერ წარმოიდგენთ, როგორ გავვიკვირდა, როცა გავიგეთ, ავადმყოფი ბიჭი პარტიზანებთან გაიქცაო... ცხრა-ათი წლის ბალღებსაც ტყისკენ ეჭირათ თვალი და ფაშისტები სულ უფრო მეტი ეჭვითა და უნდობლობით გვეკიდებოდნენ.

1941 წლის ერთ წვიმიან დღეს თამარ ჯიჯიშვილი და კლარა ივანოვა უთენია ადგნენ და შორეულ სოფელში წავიდნენ პურის სათხოვნელად.

ცხოვრება ძალიან გაძნელდა. ბავშვებს რამდენიმე დღე არაფერი ჩაედოთ პირში.

დედას შეებრალა და წასვლის წინ არ გააღვიძა თამაზი. შუბლზე ფრთხილად აკოცა და სასთუმალთან ერთი ცალი მონარშული კარტოფილი დაუდო. სახედაღარულმა კლარამ, რომელიც ორიოდე თვის წინათ ულამაზეს ქალად ითვლებოდა ქალაქში, შიმშილით დაოსებულ გოგონას ერთი ნატეხი ორცობილა მიაჩეჩა ხელში, მაგრამ მაშინვე გადატეხა და უფრო მოზრდილი ნაჭერი თამაზს დაუტოვა.

დედებმა ფრთხილად გაიხურეს კარი და პატარა ლიანამ მაშინვე მილულა თვალი. ოთახში დამშეული ობოლი ბავშვების სუსტი ფშვინვაღა ისმოდა.

ექვს საათზე ეზოში ესესელებმა შემოაბიჯეს. სახელოებზე გაფარხხული არწივები ეხატათ. ჩაჭყლეტილი ქუდის წინაფარზე მკედრის თავის ქალა მოუჩანდათ. ამპარტავნული, მიუკარებელი შესახედაობა ჰქონდათ. მათ დანახვაზე კაი ვაჟკაციც შეეკრთებოდა და უნებურად თვალს მოარიდებდა.

ფაშისტები გაუფრთხილებლად შეცვივდნენ ოთახებში. ვინც დაიხელთეს, დიდიან-პატარიანად, ეზოში ჩარეკეს, ერთ კუნჭულში შეაქუჩეს და ბინებში მორიგი ჩხრეკა დაიწყეს. ამჯერად კი, როგორც ეტყობოდა, ვიღაცა იყო დასმენილი. გერმანელები გაცხარებით დაეძებდნენ რალაცას... და აი, თამარის ძველმანებში ალექსანდრე ჯიჯიშვილის ფოტოსურათი

იპოვეს: ეს იყო ქმრის ერთადერთი სამახსოვრო, რაც თამარ-
მა ბრესტის სიმაგრიდან გადაარჩინა.

ალექსანდრე ჯიჯიშვილი კაპიტნის ფორმაში იყო გადაღე-
ბული. მარჯვენა ფეხი წინ წაედგა, ხელში პისტოლეტი ეკავა
და ბეჯითად უმიზნებდა წელში მოკუზულ ფაშისტს.

ამ ფოტოს თავისი ისტორია აქვს. 1940 წელს, ალექსანდ-
რე ჯიჯიშვილმა პისტოლეტით სროლაში პირველი ადგილი და-
იკავა სამხედრო ოლქში და სურათი საგაზეთოდ გადაუღეს.

ფოტოსურათზე აღბეჭდილ ფაშისტ-სამიზნოში ესესელებ-
მა იოლად ამოიცნეს თავი და ოჯახის უფროსი მოიკითხეს.

დახეულ შარვალში გამოკნაჭული, ფეხშიშველი, ნამძინა-
რევი თამაზი აბუზული იდგა კედელთან შექუჩულ ხალხში.
გვერდით მასავით ფერწასული ლიანა ატუზულიყო. ესესელ-
მა ბავშვი უფროსს წარუდგინა.

ობერშტურმფიურერმა პირველად გახსნა კრიჭა:

— ვინ არის ეს კაცი?

თამაზი უხმოდ იდგა.

გერმანელმა ღიმილით მოჰკიდა ხელი, სურათი აჩვენა და
შეკითხვა გაუმეორა.

ბიჭუნა არც ახლა განძრეულა. უხმოდ, ჯიუტად შეჰყურე-
ბდა ოფიცერს.

— მამაშენია?

თამაზს თვალი აუთამაშდა და თავი დაღუნა.

ოფიცერმა ეს თანხმობის ნიშნად ჩათვალა და ჩვენების
ჩამორთმევა განაგრძო:

— ბატკა, კომისარ?

თავჩაქინდრული ბიჭი დუმდა.

— დედა სად არის? — კვლავ ჩაეკითხა ესესელი.

თამაზი სულ უფრო დაბლა ხრიდა თავს და ოფიცერს მოეჩვენა, რომ ბავშვი ტიროდა. გერმანელებმა ხალხი ეზოდან გარეკეს.

ხუთი წლის თამაზ ჯიჯიშვილი ქვიტყარის გალავანთან დააყენეს. აყლაყულდა შარფიურერმა ბიჭს ერთი ხელი მკერდზე დააჭირა, მეორე წელზე, თავი მაღლა აუწია და ასე გაასწორა.

— განძრევა — არა! — ჩაულაპარაკა დამტვრეული რუსულით და აქეთ-იქიდან ორი ხიშტიანი ესესელი ამოუყენა.

ჩხრეკა დამთავრდა.

ფოტოსურათი ობერშტურმფიურერმა წაიღო.

ეზოში სამნილა დარჩნენ: ქვის კედელთან მდგარი თამაზ ჯიჯიშვილი და ორი შეიარაღებული ფაშისტი.

ცრიდა.

ყინულივით ცივი წვეთები უწყებლავდა ბიჭს შიშველ ტანს. თმა აბურძგნოდა, დაწითლებული ხელ-ფეხი შეშუპებოდა. მონისლული მოგონებები უტრიალებდა თავში... მაშა დიდი ხანია აღარ მოსულა... დღეს აღარც დედიკო ჩანს... ნეტავ, სად წავიდა, რად დატოვა ამდენ ხანს მარტო?

ბიჭუნა ვერ ხედავდა, მაგრამ ბუნდოვნად გრძნობდა წინ გაშვერილ, დასველებულ ხიშტებს, ხოლო დარაჯები უგულოდ დასცქეროდნენ გაჭიუტებულ ტუსაღს...

ნაშუადღევს, როცა მეზობლები დაბრუნდნენ, თამაზი ისევ ისე თოფქვეშ იდგა. შეშფოთებულმა ქალებმა ჯერ გუშაგებთან გამოლაპარაკება სცადეს, მაგრამ მათ ახლოს არავინ მიუშვეს. რამდენიმე მოხუცი ქალაქის კომენდატურაში გაიქცა და დაჩოქილებმა შეავედრეს ოფიცერს უპატრონო, ავადმყოფი ბიჭი. საქმის გადაწყვეტა მაინც ვაჭიანურდა, მთხოვნელებს ერთი გერმანელი მეორესთან გზავნიდა, მეორე — მე-

სამესთან და ამ გაგზავნ-გამოგზავნაშიც კარგა დრომ განვლო.

— ჰერ ობერშტურმფიურერ! — მოახსენა გუშაგმა თამაზის გასათავისუფლებლად მისულ ოფიცერს. — ეს ბიჭი, უსათუოდ ბოლშევიკის შვილია! არ უტირია, წარბიც არ შეუხრია, როგორც დატოვეთ, ისევ ისე დგას.

გერმანელმა, რაც შეეძლო, ალერსიანად გადაჰხვია მკლავი გახევებულ ბიჭს. თამაზი სულ გაფითრდა, რაღაც უცნაურად აიფხორა, შეინჯღრა და ოფიცერს ხელი ძირს ჩამოუყარდა. როცა გერმანელმა რამდენიმე ცალი კანფეტი ჩასჩარა ჯიბეში, პატარა ბრესტელმა კიდევ უფრო შეკრა კოპები.

— ხედავ, რა მაგარია? — შურიანად წაილაპარაკეს გერმანელებმა და გაწბილებულნი გავიდნენ ეზოდან.

მეზობლებმა თამაზი ოთახში შეიყვანეს, გაათბეს, მიუაღერსეს, საჭმელი მიაწოდეს, მაგრამ ბიჭი ხმას არ იღებდა, ენაჩავარდნილი იდგა.

თამარი და კლარა გვიან დაბრუნდნენ ხმელიოვოდან, ცოტა პური და კარტოფილი ჩამოუტანეს ბავშვებს.

— დედიკო, დეიდა თამარა! თამაზიკო ფაშისტებმა დახვრიტეს და ახლა დამუხჩებულისა!..

ზარდაცემულმა დედამ გულში ჩაიკრა შვილი და რამდენიმე დღეს არ მოშორებია. ეალერსებოდა, უვლიდა, მეზობლების რჩევით, რაღაც წამლებს ასმევდა... როგორც იქნა, ამოდგმევინა ენა.

მას შემდეგ ოცდაექვსი წელი გავიდა. ახლა თამაზ ჯიჯი-შვილი ოცდათერთმეტი წლისაა, მაგრამ კარგად ახსოვს, როგორ დააყენეს ქვიტკირის კედელთან, როგორ უთოშავდა სხეულს თოვლჭყაპი და როგორ ელოდა პურის სათხოვნელად წასულ დედას...

ბრესტში დარჩენილი ქალები დიდხანს ელოდნენ ქმრებს. ყველა გამვლელ-გამომვლელს მათ ამბავს ეკითხებოდნენ, მაგრამ ზოგი რას ამბობდა, ზოგი რას!..

1941 წლის შემოდგომაზე გიორგი ანანიაშვილი გაძოჩნდა, იგი პარტიზანთა დავალებით მუშაობდა და ზოგჯერ ანლომან-ლო სოფლებშიაც გადმოდიოდა. ცოტ-ცოტას ცოლ-შვილსაც ეხმარებოდა.

— სექტემბერში, — გადმოგვცემს თამარ ჯიჯიშვილი, — ხმელიოვოში ვიყავი პურის სათხოვნელად. იქ ერთი გლეხისას გოგი ანანიაშვილი დავლანდე. მაშინვე გავეხმიანე, მაგრამ თავი მომარიდა. მაინც არ მოვეშვი, ქოხში შევედი და ჩემი ქმრის ამბავი გამოვკითხე. ალექსანდრეს გომელში შევხვდიო, — მიპასუხა ენის ბორძიკით. — დამინახა თუ არა, თქვენი ამბავი მკითხა. მე დარწმუნებული ვიყავი, რომ სიმაგრეში არავინ გადარჩენილა ცოცხალი და ასეც ვუთხარი... იმავე დღეს ფაშისტებმა გარემოცვაში მოგვიმწყვდიეს. ალექსანდრე ბატალიონს მიუძღოდა. მტერმა ახალი ძალები მოაყარა, ჩვენ კი ტყვია-წამალი გაგვითავდა და ვინც გადარჩა, სხვადასხვა მიმართულებით გავიფანტეთ. მე და კაპიტანი შოვნაძე ერთად მოვხვდით; დამით გლეხებმა სამოქალაქო ტანსაცმელი მოგვცეს და შეგვიფარეს. შოვნაძემ მითხრა, ჯიჯიშვილი ისე მძიმედ დაიჭრა, ვერ გადარჩებოდაო.

შევატყვე, ანანიაშვილმა დაბეჯითებით იცოდა ჩემი ქმრის დაღუპვის ამბავი, მაგრამ აღარ ჩავეძიე.

უფრო დაწვრილებით მეუღლის თავგადასავალი თამარმა გაიგო საქართველოში დაბრუნების შემდეგ. აქ მას დახვდა

ალექსანდრეს ბარათი, მოწერილი ომის პირველ დღეებში.

ამ ბარათს თამარი თვალისჩინივით უფრთხილდება. ჩვენთან საუბრის დროსაც მოკრძალებით გამოიღო უკრიდან გაცრეცილი, მრავალგან გადაკეცილი ქაღალდის სამკუთხედი და ფრთხილად გაშალა.

ბარათი სულმოუთქმელად წავიკითხე. თვალწინ დამიდგა 1941 წლის მღელვარე დღეები, უკანდახევის მძიმე სურათი, ჩვენი ნაწილების თავგანწირული იერიშები... წარმომიდგა: გადამწყვეტი ბრძოლის წინ წუთით შეჩერებული ქართველი კაპიტანი... მოწინააღმდეგის ასეულები სულ ახლოს მოჩანან... საველე ჩანთიდან კაპიტანი ნაჩქარევად იღებს რვეულის ფურცელს, თვალს არ აშორებს მტერს და ოდნავ წახრილ მუხლზე გამალებით წერს...

ეს ბარათი გვაგრძნობინებს იმ დღეთა სუნთქვას, წარმოგვიდგენს ბრესტელთა სულისკვეთებას, ქართველი მეომრის სამხედრო შემართებას!..

„გამარჯობა დედი, ძმაო და დებო!

ეს წერილი იქნებ უკანასკნელიც იყოს... მე ბრძოლაში ვარ. დიდი უბედურება დამატყდა თავს: დამელუბა ცოლ-შვილი, ჩემი საყვარელი ბიჭი თამაზი მომიკლეს ამ წყევლებმა. სიმაგრეს, სადაც ჩვენ ვცხოვრობდით, არტილერიის ჭურვები და ბომბები დააყარეს. ლაპარაკობენ, ყველა მეთაურის ოჯახი დაიღუპაო. მე უბედური, იმ დროს იქ არ ვიყავი. 50 კილომეტრის დაშორებით გამგზავნეს. ალექსანდრესა და მის ცოლ-შვილს ვეღარ ნახავთ. ჩემი ცოლ-შვილის სამაგიეროს აუცილებლად გადავუხდი მტერს. ბატალიონს ვმეთაურობ. ბევრჯერ მომიხდება ფაშისტებთან შეტაკება. დაუნდობელი ვარ მათ მიმართ. ისინი მოპარვით დაგვესხნენ თავზე. ჩვენ არ

ვიცი... არა უშავს, გადავუხდი სამაგიეროს — რამდენიმე ფაშისტს მაინც ავუტირებ დედას.

...ეხ, ცოლ-შვილო, რა ბედნიერი ვიყავი თქვენთან!

მე ახლა ფაშისტების ზურგში ვიბრძვი. არ ვიცი, მოაღწევს თუ არა ეს წერილი თქვენამდე. ვატან კაცს, რომელიც ჩვენს ტერიტორიაზე გადადის.

უსათუოდ დავამარცხებთ მტერს! ძმებო, ვაჟკაცურად იბრძოლეთ ფაშისტების წინააღმდეგ! იბრძოლეთ, ვიდრე სული გიდგათ. უფლება არ მივცეთ ფაშისტებს, საბჭოთა მიწაზე იპარბაშონ! ასე, იყავით კარგად! გკოცნით, თქვენი ძმა და შვილი ალექსანდრე“.

მინაწერი: „ჩემი ბატალიონით თუ გავვარდი ბრესტში, მკვდრებს მაინც ვნახავ და დავმარხავ“.

„2. 7. 41. ქ. ლუნიეცი. დასავლეთი ბელორუსია“.

სამკუთხედად მოკეცილ ბარათს ზემოდან რუსულად აწერია:

„უცნობო, რომელიც ამ წერილს გახსნი! გთხოვ, თუ ადამიანის სინდისი გაგაჩნია, დანიშნულებისამებრ გავზავნო“.

* * *

ბრესტში დღითი დღე ძნელდებოდა ცხოვრება. ფრონტზე დამარცხების ჭავრს ფაშისტები ქალებსა და ბავშვებზე შურისძიებით იკლავდნენ. გამრავლდა სახრჩობელები. საბჭოთა მოქალაქეებს სრულიად უმიზეზოდ ხვრეტდნენ.

— ბრესტიდან გასვლა თითქმის შეუძლებელი გახდა, მაგრამ სხვა გზა არ იყო! — გვიამბობს თამარ ჭიჭიშვილი. — ყოველ წუთს დახვრეტას ველოდით. ქმრის მოლოდინი აღარ

შქონდა და იქ რაღა გამაჩერებდა? როგორმე ბავშვი უნდა გადამერჩინა ცოცხალი.

1942 წლის ზაფხულში თამარმა და ივანოვამ გადაწყვიტეს, რაღაც უნდა დაჯდომოდათ, დაეტოვებინათ ბრესტი და უკრაინაში, ხერსონში, გადასულიყვნენ, კლარას მშობლებთან. დარწმუნებული იყვნენ, რომ საბჭოთა არმია მალე გადმოვიდოდა იერშზე და პირველ რიგში უკრაინის აღმოსავლეთი რაიონები განთავისუფლდებოდა.

თამარმა ეს გადაწყვეტილება ნინო ანანიაშვილსა და მარო გელაშვილსაც გაუხსილა. მათ ძალიან მოეწონათ მეგობრის რჩევა, მაგრამ კარგა ხნის უოცმანის შემდეგ მაინც ბრესტში დარჩენა ამჯობინეს, — წვრილშვილი გვყავს, შორეულ მგზავრობაში ნაცადი არ ვართ და უკაცოდ როგორ გადავიკარგოთო. ჩვენი ქმრები თუ ცოცხალი გადარჩნენ, აქ გვიპოვნიან, სხვაგან როგორ უნდა გვეძიონო!.. თამარმა და კლარამ მაინც გადაწყვიტეს წასულიყვნენ. მათ რამდენიმე სხვა ქალი შემოუერთდა.

მაგისტრატის მოხელეს, ვიღაც ადგილობრივ მცხოვრებს, რომელსაც ამათი თავშესაფრის მიტაცება ეწადა, არცთუ ისე საიმედო ნებართვა დასტყუეს და დიდი ვაი-ვაგლახით აღმოსავლეთისაკენ მიმავალ საბარგო ვაგონებში შესვლა მოახერხეს...

ფაშისტები მათ ვაგონიდან ვაგონში ერეკებოდნენ. ხან ერთ სადგურზე ჩამოყრიდნენ ძირს, ხან მეორეზე, მაგრამ რამდენიმე კვირის შემდეგ მშვიერ-მწყურვალეებმა მაინც მიაღწიეს ხერსონს.

თამარმა ორი წელი გაატარა ჯერ ხერსონში, ხოლო შემდეგ მის მახლობლად, სოფელ კელეგეიაში (გლადკოვკაში).

კლარას მშობლებმა სიყვარულით მიიღეს და შეითვისეს ჯიჯი-
შვილების ოჯახი.

— წარმოუდგენელი გაჭირვება იყო ყველგან, — გადმო-
გვცემს თამარი, — ფაშისტები აფთრებივით დაძრწოდნენ
სოფლებში, წამდაუწუმ იკლებდნენ ხალხს, შიმშილი მძვინვარე-
ბდა, მაგრამ კლარას მშობლებს ერთხელაც არ შემოუხე-
დიათ ჩვენთვის შუბლშეკვრით. ერთი კარტოფილიც რომ
ეშოვათ, მე და თამაზს გვინაწილებდნენ. დიდი ოჯახი ჰქონ-
დათ და როცა კლარას მამა გამოზომილად დამზადებულ ფა-
ფას ან წვეს ჩამოარიგებდა, პირველი და ყველაზე სავსე ჩამ-
ჩა ჩვენი იყო.

თამარი მალე დაუკავშირდა ადგილობრივ პარტიზანებს და
ვალმოხდილი შეხვდა საბჭოთა ჯარის ნაწილებს, რომლებმაც
1944 წლის ზაფხულში გაათავისუფლეს ხერსონი.

იმავე წლის სექტემბერში თამარი თავისი ვაჟით საქართვე-
ლოში დაბრუნდა.

— ბეწვზე გადავრჩით! — ნაღვლიანად დასძენს თავდაღე-
ბული დედა, — განკითხვა სად იყო!.. ანანიაშვილისა და გელა-
შვილის ცოლ-შვილი, ჩვენ რომ წამოვედით, იმ შემოდგომა-
ზე დაუხვრეტიათ ბრესტში!..

ბარათს ოცი წელი დაავიანდა

1941 წლის ნოემბრის ერთ პირქუშ დამეს, როცა პოლონე-
თის ტყეები თოვლს დაეფარა და არყიანებში ქარბუქი ბრუ-
ნავდა, სოფელ ზემბრს არაქათგამოცლილი ქართველი ვაჟ-
კაცი მიუახლოვდა.

ტყე-ტყე მიდიოდა და ქარბუქში არც შეუნიშნავს, როგორ ჩამოიტოვა გზის სიახლოვით დაჩიავებული ხეები და გაშლილ ველს დაადგა. შიმშილით გონარეულს იქნებ კიდევ დიდხანს ევლო ასე და დათოვლილი გზატკეცილი ვერც გაერჩია, რომ უცბად რაღაც გუმანით არ მიმხვდარიყო, ტყე რომ აღარ ჰფარავდა... ისეთი უმწეობა იგრძნო, თითქოს იარაღი აპყარესო. გზები ფაშისტების ხელთ იყო, ჭაბუკი კი მათ გაუბრუნდა. როგორც იქნა, უკანასკნელი ღონე მოიკრიბა, გზა სირბილით გადაჭრა და დანამჭრულ ხის ფესვებს იმედით ჩაებლაუჭა.

იმ წელს ადრიანად დაზამთრდა, ნოემბერში ყინვა უკვე მძლავრად უჭერდა.

ჭაბუკმა გათოშილი ხელებით გიმნასტურაზე შეყინული თოვლი ჩამოიფერთხა და დაგლეჯილი ჩექმიდან ერთხელ კიდევ სცადა ქუსლში შერჭობილი ქაცვის ამოღება, მაგრამ დამხრალი თითები არ ემორჩილებოდა. ქაცვი ღრმად წასულიყო ხორცში. ისეთ სასოწარკვეთილებამდე იყო მისული, როცა ადამიანი სიკვდილს შერიგებია და ჩამხობილი ელის აღსასრულს. მაგრამ ბოლო თვეებში გამოვლილი ტანჯვა-წამება და თავისი მიზანი რომ მოაგონდებოდა, უნებურად გულს იმაგრებდა.

ეს ამბავი ბრესტში დაიწყო.

პოლკის სკოლა, სადაც უფროსი სერჟანტი ოცმეთაურის თანაშემწედ მსახურობდა, 22 ივნისს ციხე-სიმაგრის მახლობლად პოლიგონზე იმყოფებოდა. განთიადისას ქალაქი უკვე მტერს ეჭირა. ციხე-სიმაგრეს სალტესავით შემორტყმოდა ალყა. იღბლად გადარჩენილი კურსანტებმა მახლობელი ნაწილის კარგა შეთხელებულ რაზმს შეუერთდნენ და სამჯერ გა-

დავიდნენ ქალაქის იერიშზე, მაგრამ იძულებული გახდნენ სამჯერვე უკან დაეხიათ. შემდეგ სიმაგრის სამხრეთით გამაგრდნენ და ხუთ დღეს იგერიებდნენ ფაშისტებს. მეექვსე დღეს, ხელჩართულ ბრძოლებში დაქანცული რაზმი, რომელსაც ზემდეგი ტუტიაევი და თვითონ უფროსი სერჟანტი მეთაურობდნენ. მტერს ხელიდან დაუსხლტა და „ქიმიური დასახლების“ მიმართულებით გაიქცა.

თხუთმეტი კაციღა იცავდა 333-ე პოლკის უმცროს მეთაურთა სკოლის ღირსებას.

დღისით უღრან ტყეში იმალებოდნენ, ღამით იმავე ტყეს აღმოსავლეთით მიჰყვებოდნენ. მოწინააღმდეგის დიდ ნაწილებს გაურბოდნენ, მცირე რაზმებს — თავშესაფრიდან ესროდნენ, ხოლო პატარა ჯგუფებს პირდაპირ ესხმოდნენ თავს. თითქმის ყველა სნაიპერი იყო. მეტყვიამფრქვევე უჩიანემა, მისმა მოადგილემ ბალაჩიევმა და უფროსმა სერჟანტმა ფაშისტების სამი თვითმფრინავი ჩამოაგდეს. ისინი მთელი თვე მიიკვლევდნენ გზას მტრის მიერ დაკავებულ საბჭოთა მიწაზე, მაგრამ ფრონტის ხაზი გიგანტური ნახტომით გაურბოდა მათ. ივლისის ბოლოს, ტყის პირას საბჭოთა ფორმაში გამოწყობილ დიდ რაზმს წააწყდნენ. არეული დრო იყო.

მარტო ტანსაცმლით აბა რას გამოიცნობდი ვინ იყვნენ და მათაც საბრძოლო პოზიცია დაიკავეს. იმ „რაზმელებმა“ გაუღიმეს, რუსულად გამოელაპარაკნენ და თავშესაფრიდან რომ გამოიტყუეს, მაშინ დაუშინეს ტყვია.

შეტაკებამ ხუთიოდე წუთს გასტანა. მძიმედ დაქრილი სერჟანტი ფაშისტებმა ბილაპოდლიასკაში მიიყვანეს. ეს იყო სიკვდილის ბანაკი.

ჭრილობები დაუჩირქდა. ძველს ახალი იარებიც მიემატა — ზედამხედველთა ნამათრახალი.

სექტემბერში ეტაპით გაგზავნეს დასავლეთისაკენ. ლამით, როდესაც ვარშავას უახლოვდებოდნენ, ბიჭებმა ვაგონის ფიცრები აპყარეს, გაქანებული მატარებლიდან გადმოხტნენ და სხვადასხვა მიმართულებით დაიფანტნენ.

უფროსმა სერჟანტმა ორი დღე არხში გაატარა, მერე მთელი ღამე იარა და განმარტოებული ქონის კარზე ფრთხილად დააკაკუნა. პოლონელმა გლეხმა თავაზიანად მიიღო სტუმარი, ხოლო მეორე დილას სამშვიდობოს გაიყვანა.

მთელი თვე იარა ბუგამდე. ამასობაში კიდევ დაზამთრდა, მაგრამ ყინული საკმარისად არ იყო გამაგრებული და ჯერჯერობით მდინარის გადალახვა არ ხერხდებოდა. ხიდებს, ფონსა და გადასასვლელებს მტრის გუშაგები იცავდნენ. უფროსი სერჟანტი ტყეში დაეხეტებოდა, გადასასვლელს ეძებდა და ღელსაყრელ მომენტს უცდიდა.

სოფელში გამოჩენა სახიფათო იყო. ფაშისტები გააფთრებით ნადირობდნენ გაქცეულებზე, სახლებს ჩხრეკდნენ, ხალხს აწიოკებდნენ, მძევლები მიჰყავდათ.

ყველას ვერც ენდობოდი; ასი თუ საიმედო იყო, ერთი, შეიძლება, გადაცმული მტერი, ფაშისტების სამოქალაქო მოსამსახურე ან აგენტი გამომდგარიყო.

ამ წანწალში რა ჯურის კაცს არ გადაეყარა! ერთმა ბობოლამ, რომელმაც შეივრდომა ლტოლვილი, დაბანა, დააპურა, გაუმასპინძლდა, მერე ჭკუის სწავლებაც დაუწყო: ღმერთს მადლობა შესწირე, შვილო, რომ გადარჩი, სული გიდგია. ფრონტისკენ რაღას მიიწევ? აქ დარჩი, ჩემთან, მომენმარე, მოგეხმარები. ამასობაში ჩხუბი დამთავრდება და შინ მშვიდობით დაბრუნდებიო...

ათორდე დღევ ერთ კალატოზთან გაატარა, რომელიც საბ-

ძელში მალავდა. ერთხელ მწვანე ქალაღდზე დაბეჭდილი რა-
ღაც განცხადება მიუტანა და ჩუმაღ წაუკითხა.

ჰიტლერული მთავარსარღლობის ბრძანება იყო. „ვართე-
გაუსა“ და „საგენერალ-გუბერნატოროს“ პოლონურ მო-
სახლეობას მკაცრად აფრთხილებდნენ: ვინც გაქცეულ საბჭო-
თა ტყვეს დახმარებას აღმოუჩენს და არ გვაცნობებს, ოჯახის
ყველა წევრს სათითაოდ. ჩამოვახრჩობთ, კარ-მიღამოს გადა-
ვუბუგავთ, ხოლო სოფელს აყყრითო.

ამის შემდეგ ყოველ გზაჯვარედინზე, ყველა ფირნიშზე,
ყოველი შენობის კედელზე, ტყის განაპირა ხეებზეც კი
უფროსი სერჟანტი იმ მწვანე ქალაღდს ხედავდა და რაც შეი-
ძლება ერთდებოდა სოფელს. თავსაც უფრთხილდებოდა და
მოსახლეობაც ენანებოდა.

უკანასკნელ ხუთ დღეს ტყიდან არ გამოუხედავს, მაგრამ
მეტი ვეღარ შეძლო. ცალკე შიმშილმა დაჯაბნა, ცალკე ყინვამ
და ავადმყოფობამ.

მღინარეზე არა და არ ჩანდა სანღო ფონი. ფიქრობდა, იქ-
ნება ვისმე, ჩემს დღეში მყოფს, გადავეყაროო. იცოდა, რომ
მასავით ბევრი დაეხეტებოდა ახლა ამ გზებსა და ტყეებში...
ბევრი მის დღეში მყოფი მიდიოდა აღმოსავლეთისაკენ, რათა
მწყობრს დაბრუნებოდა. ისინი შეუპოვრად მიიწევდნენ წინ,
ეძებდნენ თავიანთ ნაწილებს, რომლებიც, ვინ იცის, სად იყვ-
ნენ ახლა... ძნელი იყო ეს გზა. ყოველ ნაბიჯზე სიკვდილი
იყო ჩასაფრებული, ყოველი მოსახვევიდან მტრის თვალი
იმზირებოდა.

დაბინდდა თუ არა, უფროსი სერჟანტი ტყიდან შარავზა-
ზე გამოვიდა და სოფლისაკენ რამდენიმე ნაბიჯი გადადგა.

ბევრი სიარული აღარ შეეძლო. პირველსავე ეზოში შევიდა და კარზე ფრთხილად დააკაკუნა.

ორიოდე წუთის შემდეგ შუახნის ქალაჩა კაცმა კარი ფრთხილად გამოაღო და ლტოლვილი, რომელსაც მხოლოდ ერთხელ შეავლო თვალი, უსიტყვოდ შინ შეიწვია.

სტუმარი ღუმელთან მიიყვანეს, ჩქემა გახადეს და დამზრალი ხელ-ფეხი თოვლით დაუზილეს. მიართვეს წვნიანი, პური და კაოტოფილი.

ჯარისკაცი ხარბად მიეძალა საჭმელს.

ოჯახის უფროსი, მისი ცოლი, ვაჟი და რძალი კარებთან იდგნენ და ერთმანეთს ეჩურჩულებოდნენ.

სტუმარი სმენად იქცა. მართალია, პოლონური არ იცოდა, მაგრამ ალღოთი მიხვდა, რომ მასზე იყო ლაპარაკი და რაღაც მიუწევდომელი გულისხმით თითქოს საუბრის შინაარსიც გაიგო. ახალგაზრდა ქალი, რომელსაც ბავშვები კალთაში უსხუნენ, ხშირად ახსენებდა ვიღაც გლეხს, წინა დღით რომ ფაშისტებს ჩამოეხრჩოთ გაქცეული ტყვის დამალვისათვის. ბევრი იღავეს, და ბოლოს, გადაწყვიტეს: ცოდვაა! ამ უკუნეთში გარეთ ვერ გავაგდებთ, ერთი დამე მაინც გავათევინოთო.

ნავახშმევს მასპინძლის ვაჟმა სტუმარი სხვენზე აიყვანა, თივა გაუშალა და ფარაჯა წააფარა.

ხიზანი დილაადრიან გააღვიძეს, დაბამბული ჯუბა ჩააცვებს და მეზობლისას წაიყვანეს.

შავვერემანი, ულვაშა მასპინძელი სტუმრებს თბილ სარდაფში ჩაუძღვა, ჯარისკაცი დააპურა და ვინაობა ჰკითხა.

— ქართველი ვარ, არმიაში ოცმეთაურის მოადგილედ ვმსახურობდი, — თქვა სერჟანტმა.

ულვაშამ სტუმარს მხარზე ხელი დაჰკრა და უთხრა:

-- თქვენში ასეთი ზამთარი არ იცის, მაგრამ, გეტყობა, შართლა მალაროელი ხარ, ამდენი გაჭირვებისათვის რომ გაგიძლია!

სტუმარ-მასპინძელს შორის ერთბაშად დამყარდა მეგობრული ურთიერთობა. დედაბერმა ცრემლიანი ხმით შესტერია ხიზანს:

— როგორ მოხდა, შვილო, რომ შვაბებს ჩაუცვივდით ხელში! რაღა გვეშველება!

— ქურღულად დაგვესხნენ თავს, დედი, იოლ გამარჯვებას ელოდნენ, მაგრამ ვერ მიართვეს! რაკი ფრონტი შევაკავეთ, აღარაფერია საშიში!

სერჟანტმა დიდხანს ილაპარაკა ასე იმედიანად და მისი აზრები რომ უფრო დამარწმუნებელი მოსჩვენებოდათ, მასპინძლები განგებ ეკამათებოდნენ, ათასგვარ საჭოკმანო შეკითხვას აძლევდნენ.

ოჯახის უფროსმა გულისტკივილით ჩაილაპარაკა:

— შვაბები მოსკოვთან და ლენინგრადთან არიან, შვილო. ყველაფერი იმათ ხელშია, ვიღა მოერევა ახლა მათ!

ჯარისკაცს არ სწყენია ეს დაეჭვება. იცოდა, ხალხს სიშართლის გაგება სწყუროდა, გამხნევება ესაჭიროებოდა და ისიც კიდევ დიდხანს ლაპარაკობდა საბჭოთა ქვეყნის ძლიერებაზე.

— გავიმარჯვებთ, უსათუოდ გავიმარჯვებთ! — არწმუნებდა ის პოლონელებს, — თქვენს სოფელშიც მოვლენ გამარჯვებული საბჭოთა ჯარები და მაშინ მომიგონებთ. წინ კიდევ დიდი ბრძოლებია. მე დავიღუპები და ბევრი ჩემისთანა, მაგრამ გამარჯვება მაინც ჩვენია, გამარჯვება ზემბრამდეც მოაღწევს.

— მშობლები გყავთ, შეილო? — ჰკითხა მასპინძელმა თვალაკიანთებულ მოსაუბრეს.

— მყავს დედ-მამა, ექვსი და და ხუთი ძმა.

— ქართველო ვაუკაცო! — უთხრა მაშინ მასპინძელმა, — შენ ისე მტკიცედ გწამს გამარჯვება, რომ ჩვენც იმედი მოგვეცა. სულ გამარჯვებით გველოს! თუ ვინიცობაა, ბედმა გიმუხთლა, ბარათი მაინც დატოვე ამ სახლში. სადაც მუდამ გვემახსოვრები. მისწერე მშობლებს შენი ამბავი. როცა ომი დამთავრდება და ჩვენ გავიმარჯვებთ, როგორც შენ ამბობ, ამ ბარათს შენიანებს გავუგზავნით.

ამ სიტყვებით მასპინძელმა საწერი მაგიდა ღუმელთან მიდგა, უჯრიდან სედლეცის საგუბერნიო სტამბაში ოდესღაც დაბეჭდილი რუსული დავთარი ამოიღო, იქიდან ორი ფურცელი ამოხია, მერე თაროდან ჩამოიღო შინ ნაკეთები მელნით სავსე მაღალი შუშა, წვერბლაგვი კალამი და ყველაფერი ეს უცხო სტუმარს წინ დაულაგა.


ყველანი მაგიდას შემოუსხდნენ.

უფროს სერჟანტს სახე შეეცვალა, თითქოს მოსწყდაო იქაურობას და მღელვარედ დაიწყო წერა.

„14 ნოემბერი, 1941 წ.“

სალამი ძვირფას მშობლებს!

უპირველეს ყოვლისა, ამ წერილში გისურვებთ ჯანმრთელობას და კარგად ყოფნას, ძვირფასო მშობლებო, დებო და ძმებო. შეიძლება, ჩემგან მეტი წერილი ვეღარ მიიღოთ და ვერც მე ჩამოვიდე ცოცხალი. ამ წერილს მხოლოდ მაშინ მიიღებთ, როცა ომი დამთავრდება და ჩვენ გავიმარჯვებთ. 23 ივლისს ფაშისტებმა ხელთ ჩაგვიგდეს და ოთხ თვეს ტყვეობაში დავყავით. შემდეგ გამოვიქეციით, მაგრამ ახლა



მარცხნიდან: მიხეილ მუმლაძე, მწერალი სერგეი სმირნოვი,
გენალი კანტურიძე.

გამოსაუვალ გზას ვერ ვპოულობ. ძალზე დიდი საცივებია, ავადაც გავხდი დეზინტერიით და ჯერჯერობით ვერა მოვეუხერხე რა. მე მგონია, თან გადამიტანს. დავდივარ პოლონეთში, მერე და მერე რა იქნება, არ ვიცი. თანდათან ვსუსტდები. ექიმი არაა და წამალი. გამოჩენაც კი გვეშინია, ვიძალებით. მე თუ ვერ ჩამოვედი სახლში, ამ ჩემს წერილს მაინც მიიღებთ პატარა სურათთან ერთად და იმ დღიდან ცოცხლად ნულარ მიგულვებთ. ნუ დამივიწყებთ, საკურთხი ხშირად მიკეთეთ. ამ წერილის დაწერა მიჩნია ერთმა პოლონელმა, დაწერე წერილი და ჩხუბი რომ გათავდება, გაუეგზავნი შენს მშობლებსო. მე დავთანხმდი, იმიტომ რომ, როგორც მიწიდან ამოდებული,

ისე ვარ. ოთხი თვე ბლუზის ამარა გავატარე წვიმასა და სიცივეში, ცის ქვეშ. ახლა, დელაჩემო და მამაჩემო, მომიკითხეთ ყველანი, დები, ძმები, მეზობლები და კეთილები... მოსაგონებელი გადაიხადეთ, ეს წერილი რომ მიიღოთ... სიცივე რომ არ იყოს, შეიძლებოდა ნელ-ნელა წამოსვლა. ყინვა ყოველდღე მატულობს, ყოველდღე გვჭირდება ღამის გასათევის ძებნა, დავწრიალებთ სოფლებში, სად საკმელი უნდა ითხოვო და სად ღამის გასათევი. ამათაც ეშინიათ, გერმანიის ტერიტორიაა და გაცხადებული აქვთ, ვინც გაქცეულ ტყვეს სახლში შეუწევს, დავხვრეტოთ. ასე, ჩემო ძვირფასო მშობლებო, ნუ მაჯავრებთ. ჯაბანივით არ მოვკვდები.

გწერთ თქვენი შვილი გენადი ჰანტურიძე“.

ქალალდი გადმოაბრუნა და ჩაფიქრდა. უცბად რაღაც ნაღველმა შეიპყრო, მერე მსხვილი ასოებით წააწერა:

„ამ წერალს მიიღებთ ომის დამთავრების შემდეგ. მე დღეს მივდივარ აქედან. თუ გადავრჩი, ხომ ჩამოვალ და ის იქნება... ისე კი ძნელია, ძალიან ჰირს თავის გატანა...“

ჩექმის ქუსლიდან ხუთი თვის წინათ შენახული პატარა ფოტოსურათი ამოიღო და სამკუთხედად მოკეცილ ბარათში ჩადო.

ჰანტურიძემ წერილის დამთავრება ძლივს მოასწრო, რომ მასპინძელს შეატყობინეს, ზემბრში ფაშისტების საველე პოლიციის რაზმი შემოვიდა და სახლების ჩხრეკა დაიწყო.

ფერდაკარგულმა მასპინძელმა ბარათი სასწრაფოდ გადამალა, უნდოდა სტუმრის გადასარჩენად რაღაც გზა გამოენახა, მაგრამ სიტყვის თქმაც ვერ მოასწრო, რომ ჰანტურიძე სარდაფიდან ზემო სართულში აიჭრა და გარეთ გავარდა...

ამას წინათ ზესტაფონის რაიონის სოფელ ქვემო საზანოწი

კოლმეურნე ანთიმოზ ჭანტურიძეს გადასცეს პოლონეთის სახალხო რესპუბლიკის ლუბლინის სავოევოდოს სოფელ ზემბრიდან გამოგზავნილი სქელი კონვერტი. კონვერტში აღმოჩნდა ოცი წლის წინათ დაწერილი შვილის ბარათი, ფოტოსურათი და შექმნილი წერილი რუსულად:

„ბატონო ანთიმოზ ჭანტურიძე!

მართალი მოგახსენოთ, რუსული ენა კარგად არ ვიცი, ქართული კი სრულებით არ მესმის. ვფიქრობ, არც თქვენ გეცოდინებათ პოლონური.

ჰიტლერული ოკუპაციის დროს, 1941 წელს, ჩვენთან მოვიდა თქვენი შვილი გენადი და გვითხრა, ქართველი წითელარმიელი ვარო. ფაშისტების ტყვეობიდან გამოვიქეცი, ტყეში ვიმალებოდი, ახლა მძიმე ავადმყოფი ვარ და ან სნეულება მომკლავს, ან გერმანელების ტყვიაო. დაწერა ეს წერილი და გადმომცა, რომ ომის შემდეგ თქვენთვის გამომეგზავნა. სასტიკი ზამთარი იყო და თქვენი შვილი აღარ მინახავს. ვფიქრობ, პოლონეთის მიწაზე დაიღუპა.

ძალიან საშიში დრო იყო. წითელარმიელის წერილი რომ ენახათ, ჰიტლერელები დაგვბრეტდნენ და ააწიოკებდნენ ჩვენს ოჯახებს. ეს ბარათი საგულდაგულოდ შევიინახე და დღემდე ვუცდიდი თქვენი შვილის აპზავს, — მაგრამ ოცი წელი გავიდა და ვერაფერი გავიგე. ახლა გიგზავნით ამ წერილს და გთხოვთ მიპასუხოთ. მომწერეთ თქვენი ოჯახისა და საქართველოს შესახებ.

მარიამ ვერჟეისკი“.

ვერჟეისკის ოჯახიდან გაქცეულმა გენადი ჭანტურიძემ გერმანელთა საველე ჟანდარმერიას დიდი გაჭირვებით დააღწია თავი და იმ დღესვე სცადა მდინარე ბუგის გადალახვა.

მაგრამ ყინული ჯერ კიდევ სუსტი აღმოჩნდა. უფროსი სერჟანტი კარგა ხანს სოფელ ბარსუკში იმალებოდა. დეკემბრის დაძლევის კი, როცა მდინარე მთლიანად გაიყინა, სამ ამხანაგთან ერთად მტრის მიერ ოკუპირებულ საბჭოთა მიწაზე გადმოვიდა და მალე მწყობრს დაუბრუნდა — შეუერთდა პარტიზანულ ბრიგადას „ვო იმია როდინი“.

საბრძოლო დახასიათებაში, რომელსაც ხელს აწერენ ბრიგადის მეთაური ჭმირნოვი, კომისარი ობლოვაცკი და შტაბის უფროსი დიკუნოვი, ნათქვამია: „გენადი ანთიმოზის ძე ჭანტურიძე იბრძოდა პარხომენკოს სახელობის რაზმში და თავი გამოიჩინა, როგორც მამაცმა მებრძოლმა...“

მეკავშირედ ყოფნისას ამხ. ჭანტურიძემ ქ. ბელსკში ცეცხლს მისცა მტრის საშხედრო ობიექტი. მოსპო გარაჟი, სამი ავტომანქანა, საწვავის საწყობი, 54 კასრი ბენზინი, ნახშირისა და შეშის საწყობები. ამხ. ჭანტურიძე მონაწილეობდა ბელსკი-გაინოვსკის გზატკეცილზე, ფაშისტების ძირითადი მოძრაობის ხაზზე, სტრატეგიული ხიდის აფეთქებაში. იმავე უბანზე ააფეთქა მტრის სამხედრო ეშელონი — ორთქლმავალი და ექვსი ვაგონი, რის შედეგადაც მოკლული იქნა 36 გერმანელი სალდათი და ოფიცერი, დაიჭრა 40...

მილენჩიკის რაიონში ამხ. ჭანტურიძე მონაწილეობდა მტრის ალყაშემორტყმული ნაწილების განადგურებაში და ტყვედ წაპოიყვანა გერმანელი ოფიცერი და 57 სალდათი, სრული აღჭურვილობით. სოფელ ბისტრის მახლობლად იგი თავდადებით ებრძოდა გერმანელთა ჯავშნოსან ტრანსპორტიორებს და ა. შ...

ამხ. ჭანტურიძემ ყველა ამ ბრძოლაში გამოავლინა სო-

ციალისტური სამშობლოს დიდი სიყვარული და მუხანათი მტრისადმი უსანდგრო სიძულვილი...”

1945 წელს გენადი ჭანტურიძე ზესტაფონში დაბრუნდა. ყველაფერი, რაც გამოიარა, ახალ ენერგიად, სიცოცხლის დიდ საყვარულად იქცა: დაამთავრა ქუთაისის პედაგოგიური ინსტიტუტი, მხარში ამოუდგა დედ-მამას, ხელი შეაშველა უმცროს და-ძმებს და დაოჯახდა.

მთელი რაიონი იცნობს რუსული ენისა და ლიტერატურის მასწავლებელს გენადი ჭანტურიძეს, მაგრამ ყველას ადვილად როდი დაარწმუნებთ, რომ ეს წყნარი, მოკრძალებული კაცი ოცდახუთი წლის წინ ბრძოლაში ხიშტს ატრიალებდა და ბელორუსიის რკინიგზებზე ოკუპანტთა ეშელონებს აფეთქებდა.

გენადის ოჯახის წევრები, ამხანაგები, თანასოფლელები აღტაცებით ლაპარაკობენ პოლონელ მეგობრებზე, მათ სიკეთესა და თავდადებაზე.

ხოლო თორმეტი შვილის აღმზრდელი გაიანე ჭანტურიძე, რომელსაც მკერდზე გმირი დედის ოქროს მედალი უბრწყინავს, მსურვალედ ლოცავს კეთილ ადამიანებს, რომლებმაც სიცოცხლე შეუნარჩუნეს მის შვილს და ათახობით მისთანას საშუალება მისცეს ჰირნათლად მოეხადათ თავიანთი ვალი სამშობლოსა და ხალხის წინაშე.

* * *

უფროსი ლეიტენანტი სერგო ინჯია და ლეიტენანტი ვალოდია უგრეხელიძე 21 ივნისს ღამის თორმეტ საათზე დაბრუნდნენ ციხე-სიმაგრიდან ქალაქში. 125-ე პოლკის მე-

თაურმა მაიორმა დულკევიჩმა კაზემატების ფერდობზე თათბირი ჩაატარა, — ფხიზლად იყავით, შორს არ წახვიდეთ, ამაღამ გაძლიერებულ პატრულს ვნიშნავთო.

— ღამის პირველ საათზე არავითარი ხმაური არ შეგვიმჩნევია, — იგონებს ს. ინჯია. — საზღვარზე სამარისებური სიჩუმე იდგა. მე და ვალოდია გაუხდელად წამოვწექით, მაგრამ საშინელმა გრგვინვამ ერთბაშად წამოგვყარა ფეხზე... დივიზიის შტაბი უკვე აღარ არსებობდა, ყველაფერი იწვოდა. მაშინვე ციხე-სიმაგრისაკენ გავქანდით. ჩვენი პოლკის ოთხივე ბატალიონი იქ გვეგულეობდა. სადგურთან არმიის სარდალს, გენერალ პოპოვს, შევეჩხეთ. „შეაგროვეთ მებრძოლები, სადაც და რამდენსაც ნახავთ და დაუყოვნებლივ ჩაებით ბრძოლაში!“ — გვიბრძანა მან.

მე და უგრეხელიძემ ჩრდილოეთის მხრიდან შევალწიეთ სიმაგრეში. ქალაქის გზა ჯერ კიდევ არ ჰქონდა დაკავებული მტერს. იარაღის საწყობში ოთხი ასეული ნაღმსატყორცი, ხელყუმბარები და შაშხანები გადარჩენილიყო... ჩვენთან ერთად იყვნენ: ლეიტენანტი კუპა, წითელარმიელები: ზიკოვი, ოსტროვსკი, თედიაშვილი... პოზიცია დავიკავეთ რკინა-ბეტონის ცეცხლგამძლე წერტილში, სასაფლაოსთან. ჩვენს წინ პატარა სოფელი მოჩანდა. იგი ათ საათზე უკვე ხელთ იგდეს გერმანელებმა. მეორე დილით ოთხი სათვალთვალო პუნქტი მოვაწყვეთ... როცა სიმაგრეში ფაშისტური რეპროდუქტორები ახრიალდა, ზიკოვთან და ოსტროვსკისთან ერთად საკანალიზაციო მილით, ბატარეის პარკის უკან გავედით და ხაზები გადავჭერით. პროვოკაციული რადიოგადაცემები შეწყდა. შემდეგ რეპროდუქტორები სოფლის მახლობლად მოაწყვეს, მაგრამ 24 ივნისს იჭიდანაც უკუვაქციეთ მტერი... ასეულის



სერგო ინჯია.

ნალმსატყორცნები ბუგის გადმოსასვლელებს უშენდნენ
ცეცხლს და ხელს უშლიდნენ დესანტის გადმოსხმას...

24 ივნისს მტერმა ჩვენს პოზიციაზე ტანკები გამოუშვა,
მაგრამ იმ დროს უკვე მზად გვქონდა 26 ცალი ბენზინიანი
ბოთლი (ბენზინი წამოვიღეთ პოლონელი მოტოციკლეტისტის
ფრანკის ოჯახიდან, რომელიც მეზობელ სოფელში ცხოვრობ-
და)...

ვ. უგრეხელიძემ და ზიკოვმა ორი ტანკი ააფეთქეს, ხოლო როცა ეკიპაჟმა კოშკურის სარქველი ახადა, ს. ინჯიამ ავტომატის ცეცხლით მოსპო ოთხი ოფიცერი და უნტერ-ოფიცერი... მას შემდეგ ამ უბანზე ტანკები კარგა ხანს აღარ გამოჩენილა... მტერი მცირე ჯგუფებად უტევდა მდინარის მხრიდან...

27 ივნისს ს. ინჯია ყუმბარის ნამსხვრევებით თავში დაიჭრა. ვ. უგრეხელიძე, ზიკოვი, კუპა, გაბო თედიაშვილი, ოსტროვსკი იერიშის დროს დაიღუპნენ.

* * *

8 ივლისს ს. ინჯია მეორედ დაიჭრა. ამჯერად ტყვია მუხლში მოხვდა. ამხანაგებმა ფარაჯაში გახვეული გაიყვანეს სოფელში და ბელორუს გლეხებს ჩააბარეს. რამდენიმე დღე იარა ჭაობიან ადგილებში და ბრესტიდან ასი კილომეტრის დაშორებით, საპაერო სადესანტო ნაწილის ნაცნობ ოფიცერს შეხვდა. მან ს. ინჯია თვითმფრინავით ზურგში გაგზავნა. ერთ ხანს ბელოცერკოვის საველე ჰოსპიტალში მკურნალობდა. გამოჯანმრთელების შემდეგ პირველ საპაერო-სადესანტო კორპუსში ჩარიცხეს. 25 აგვისტოს ხელჩართულ ბრძოლაში მესამეჯერ დაიჭრა და როგორც ომის ინვალიდი, 1942 წლის მარტში საქართველოში დაბრუნდა. ომის დამთავრებამდე თბილისში მსახურობდა საავარიო-აღმდგენი ბატალიონის ასეულის მეთაურად.

ამჟამად სამამულო ომის ინვალიდი სერგო ინჯია თბილისში ცხოვრობს. ომგადახდილ ვაჟკაცს ბრესტში მოხვედრილი ტყვია დღესაც მარჯვენა მუხლში აქვს.

ომმა თან ბევრი საიდუმლოება გაიყოლია. თანამებრძოლი, წამის წინ რომ გვერდით გედგა, ერთბაშად გაქრა და აღარავინ იცის, რა ბედი ეწია...

ჩემი ბრესტელი ნაცნობ-მეგობრებიდან განსაკუთრებით მალეღებდა ბატალიონის მეთაურის — კაპიტან იაკობ გელაშვილის, მე-2 ასეულის მეთაურის — უფროს ლეიტენანტ გიორგი ანანიაშვილისა და მათი ოჯახების ამბავი. ზოგი რამ თამარ ჭიჭიშვილმა მიაგმო, მაგრამ 1942 წელს იგი ბრესტიდან უკრაინაში გადავიდა და შემდეგ იქ რა მოხდა, არაფერი იცოდა.

როგორც აღვნიშნე, ომის დაწყების წინ ი. გელაშვილმა და გ. ანანიაშვილმა ცოლ-შვილი საქართველოდან ბრესტში ჩამოიყვანეს. ი. გელაშვილს ქალ-ვაჟი ჰყავდა: ცხრა წლის ლენა და ოთხი წლის მელისიყი; გ. ანანიაშვილს კი — ორი ქალიშვილი: თოთხმეტი წლის ელიკო (ლენა) და შვიდი წლის მარგარიტა.

პიტლერელთა მოულოდნელი თავდასხმის დროს ი. გელაშვილი და გ. ანანიაშვილი პირველი ბატალიონის განლაგების უბანზე იმყოფებოდნენ, ბრესტიდან შვიდი-რვა კილომეტრის დაშორებით.

შინ დარჩენილმა მარო გელაშვილმა და ნინო ანანიაშვილმა რუსული ენა არ იცოდნენ და ჯერ არც ნაცნობები ჰყავდათ. ციხე-სიმაგრე რომ ცეცხლის ალში გაეხვია, გაოგნებულებმა ძლივს მოასწრეს დახანძრული სახლებიდან ბავშვების გამოყვანა და რკინა-ბეტონის კიბეს შეაფარეს თავი. მეორე თუ მესამე დღეს, სხვა მეთაურთა ოჯახის წევრებთან ერთად ისი-

ნი გერმანელებმა ქალაქის საპატიმროში გამოაწვევდიეს, ხოლო რამდენიმე ხნის შემდეგ, გესტაპოს მკაცრი მეთვალყურეობით, ომის დაშთავრებამდე ბრესტში ცხოვრების ნება დაართეს.

აი, თითქმის ყველაფერი, რაც 1961 წელს, ამ წიგნის პირველი გამოცემის დროს, მათ შესახებ ვიცოდი. ისიც ვერ გამოამერკვია, რომელი რაიონიდან იყვნენ და ჰყავდათ თუ არა ახლობელი ნათესავეები.

1965 წლის მარტში ახალქალაქის რაიონის სოფელ კოთელიიდან ნაწული ანანიაშვილის წერილი მივიღე: „წავიკითხე თქვენი წიგნი „ღღეები ბრესტის სიმაგრეში“. — მწერდა ის. — წიგნში დასახელებულ გმირებს შორის ამოვიკითხე ჩემი ბიძაც, გიორგი ანანიაშვილი... გთხოვთ, გამაგებინოთ, როდის შეხვდით პირველად მას, რამდენი ხანი იყავით ერთად და როდის დაშორდით... ხომ არ იცით, სად და როდის დაიღუპა?..“

ორიოდე თვის შემდეგ, თამარ ჯიჯიშვილმა მახარა, გ. ანანიაშვილის უმცროსი ქალიშვილი — მარგარეტა. ცოცხალი ყოფილათ და ირკუტსკიდან გამოგზავნილი ბარათი გადმომცა. წერილი რუსულად იყო დაწერილი. „რომ იკოდეთ, როგორ მინდა თქვენი ნახვა, — სწერს იგი თამარ ჯიჯიშვილს. — აქამდე ჩემი ნათესავეების ნაამბობით გიცნობდით. ახლა კი წავიკითხე ა. კალანდაძის წიგნის რუსული თარგმანი და მივხვდი, ვინ ხართ და საიდან იცით ჩვენი ოჯახის ამბავი... მე და თქვენი თამაზი ხომ თითქმის ტოლები ვართ... 31 წლისა გავხვდით, იმ ხნისა, რამდენისაც მაშინ ჩვენი დედები იყვნენ. თქვენ, ცხადია, არ შეგეძლოთ გცოდნოდათ, რომ მე სრულიად მარტო დავრჩი და, როგორც ხედავთ, ყველაფერს გავუძელი...“



გიორგი ანანიაშვილი.

გავიგე თუ არა მისამართი, მარგარიტა ანანიაშვილს ირ-
კუტსკში წერილი გავუგზავნე და ვთხოვე. დაწვრილებით მო-
ეწერა თავისი თავგადასავალი. პასუხიც მალე მივიღე.

სიზმარივით ახსოვს ბრესტში ჩასვლა... ომის პირველი წუ-
თები... სატუსალო, სადაც მხოლოდ დამარიღებულ თევზს
აძლევდნენ... აცრემლებული დედა... „შემდეგ რკინიგზის
სადგურთან, სარდაფში, ვცხოვრობდით, წაბლნარის ქუჩაზე.
არ ვიცი, მართლა ასე ერქვა იმ ქუჩას, თუ ბევრ- წაბლის ხე
რომ იდგა იმიტომ დამამახსოვრდა... ჩვენს მახლობლად, თუ
ჩვენთან ერთად, სხვა ქართველებიც ცხოვრობდნენ. ისინი

აღბათ; გელაშვილის ცოლ-შვილი იყვნენ. ჩვენ მას დეიდა მარუსიას ვეძახდით... მე შვიდი წლის ვიყავი. მამის შესახებ დიდხანს არაფერი ვიცოდით... ერთხელ, ჭიშკართან ვდგავარ (ტანსაცმლის მიხედვით ვიგონებ, რომ ზამთარი იყო), ვხედავ, ვილაც ლარიბულად ჩაცმული მამაკაცი მიახლოვდება... მაშინვე ვიცანი მამაჩემი. უცებ ქუჩის კუთხეში შეუხვია. მე მივირბინე მამასთან. გადაამკოცნა და დედის დასაძახებლად გამგზავნა. დედა შინ იყო, ჩემი უფროსი და ელიკო კი სხვაგან იყო წასული. როცა მე და დედაჩემი ქუჩაში გამოვედით, მამა იქ აღარ დაგვხვდა, მაგრამ მალე სხვა კუთხეში ამოფარებული ვიპოვეთ. მერე მდინარის ნაპირას ჩამოვსხედით: მშობლები რამდენიმე წუთს ლაპარაკობდნენ. მამა წავიდა და დიდხანს აღარ იგაპოჩენილა. დედამ, მგონი, იცოდა, სადაც იყო. იმ წელს მე, ჩემი და და გელაშვილის ქალიშვილი სკოლაში შეგვიყვანეს. მაგრამ რა სწავლა; რისი სწავლა?! გაკვეთილამდე და გაკვეთილების შემდეგ სულ ლოცვებს გვიკითხავდნენ. მალე სხვა ქუჩაზე გადაგვაბარგეს საცხოვრებლად. არ მახსოვს, რომელი ქუჩა იყო. გელაშვილები და ჩვენ იქაც ერთ სახლში ვცხოვრობდით. ერთხელ ჩვენთან მამა მოვიდა, ბავშვები მაშინვე ეზოში გაგვგზავნეს სათამაშოდ. გვითხრეს, უცხო ვინმეს თუ შეამჩნევთ, შეგვატყობინეთო... რა ბედნიერება იყო მამასთან ყოფნა!...

ერთ ზაფხულს, ბელორუსიის შორეულ სოფელში გამგზავნეს მამაჩემის მეგობართან, იგი ადრეც ბევრჯერ ყოფილა ჩვენსას. იქ მამამ მინახულა. ეს იყო ჩემი მესამე და უკანასკნელი შეხვედრა მამასთან. რა ცხადად მახსოვს მისი სახე!.. ჩვენ თივის ზვინულში ვისხედით. მხოლოდ არ მაგონდება, რაზე ვლაპარაკობდით. იმის შემდეგ მამა აღარ მინახავს...

ერთხელ, დედამ კვლავ გამგზავნა სოფელში, ნაცნობ გლეხთან და მითხრა, სალამოს ჩვენ და გელაშვილებიც მოვალთო. მაგონდება ეს გამომშვიდობება... ყველა ლაპარაკობდა, მალე მამასთან წავალთ ტყეშიო... მაგრამ აღარავინ მოსულა ჩემთან. დავრჩი ობლად, ნაცნობი გლეხის ოჯახში. იმ კაცის არც გვარი მაგონდება და არც სახელი. ის კი მახსოვს, რომ ორი ვაჟი ჰყავდა. რამდენიმე დღის შემდეგ რაღაც ფუთა გადმომცეს. შიგ ჩემი დისა და დედის ტანსაცმელი იყო გახვეული. დღესაც ვერ მივხვდარვარ, საიდან და როგორ გაჩნდა ეს ფუთა ჩემთან!.. მალე ჩემი მასპინძელი თავისი ოჯახიანად სხვა სოფელში გადასახლდა. მე კი დავრჩი ავადმყოფ დედაბერთან, თითქმის სრულიად მარტო. რა გაჭირვებებს გადატანა არ მომიხდა! უკანდახვევისას გერმანელები სოფლებს წვავდნენ. ერთხელ, ღამით, ცეცხლისაგან თავი რომ გადაგვერჩინა, სხვა სოფელში გავიქეცი. იქ პირველად გავიგე მამაჩემის აშავი. ვიღაც მოვიდა და იკითხა: „გრიშა ქართველის ქალიშვილი აქაო?“ (მამაჩემს ყველა „გრიშა ქართველს“ ეძახდა). მითხრეს, მამაშენი გერმანელებმა ჩაიგდეს ხელშიო. მაგრამ როგორ, სად. რანაირად, არ გამიმხილეს. ბრესტის განთავისუფლების შემდეგ კობრინის უპატრონო ბავშვთა სახლში გამგზავნეს. არ ვიცი, რატომ — იქ სახელი შემიცვალეს და თამარი დამარქვეს. ჩემი ნამდვილი სახელი კი მარგარიტა, კარგად. მახსოვს, დედა მაგულას მეძახდა. ქართული უკვე სულ გადამავიწყდა.

ერთხელ ბრესტში გამგზავნეს მოსწავლეთა ოლიმპიადაზე მონაწილეობის მისაღებად. იქ შევხვდა ჩემი დის — ელიკოს მეგობარი ვალია სიკორსკაია. ერთმანეთს გამოვეცნაურეთ. ოკუპაციის დროს ბრესტში ვცხოვრობდით და კარვალ ვიც-

ნობდით მათ ოჯახს. 1942 წელს ელიკოსთან ერთად გადაღებული ფოტოსურათი მაჩუქა. მათი ოჯახი ახლაც ბრესტში ცხოვრობს

1945 წელს უპატრონო ბავშვთა სახლში ქართველმა ოფიცერმა, კაპიტანმა ვლადიმერ ქინქლაძემ მომაკითხა. დიდხანს მელაპარაკა, მეკითხებოდა ბრესტში გადატანილ ომის დღეებზე. მე კი თითქმის აღარაფერი მახსოვდა. ვიცოდი მხოლოდ ჩემი გვარი, ქალაქი გორი და ბიძია არტემი, რომლის სახლთანაც წისქვილი იდგა. წასვლისას ვ. ქინქლაძე შემპირდა, შენს მშობლებსა და ნათესავებს მოვძებნიო. ორი წლის შემდეგ მივიღე მისი წერილი, — ჩემი ნათესავებისათვის მართლაც მიეგნო.

1947 წელს ვ. ქინქლაძე კობრინში მოვიდა და გორში წამიყვანა. მაშინ იგი ცოლ-შვილით სხვაგან სახლობდა. ახლანდის რაიონის სოფელ აცანაში ცხოვრობს.

საქართველოში ნათესავები მოვძებნე. ახალქალაქის რაიონის სოფელ კოთელიაში ვიპოვე მამაჩემის უფროსი ძმა ირაკლი, ქარელის რაიონის სოფელ ქვენატკოცაში კი — მეორე ბიძა — სერგო. რადგან ზოფლად რუსული სკოლა არ იყო, გორში ვცხოვრობდი ბიძია არტემ მინაზაროვის ოჯახში. ბრესტში წასვლამდე მამა გორში მსახურობდა და მინაზაროვებისა და ჩვენი ოჯახები დაჰეგობრდნენ. მინაზაროვები გახდნენ ჩემი მეორე მშობლები, ათი წელი გავატარე მათთან და არასოდეს არ გამოვურჩევივარ ერთადერთ ღვიძლ ქალიშვილში. ბიძია არტემი 1964 წელს გარდაიცვალა. დეიდა ანა გიორგის ასული კი ახლაც გორში ცხოვრობს. ძალიან მინდა, უსათუოდ ესტუმროთ მათ. გაუხარდებათ... დეიდა ანა ხომ ჩემი დედობილია.

1953 წელს გორში დავამთავრე რუსული საშუალო სკოლა და ხუთ წელიწადს იქვე ვმუშაობდი. 1958 წელს გავთხოვდი. ჩემი ქმარი — თედორე კუზმას ძე პროხოროენკო. ციმბირელია, ვცხოვრობთ ირკუტსკში; გვყავს ორი გოგონა—ლარისა და ნინო. საახალწლოდ ოროთახიანი ბინა მივიღეთ. ძალიან დაგვეხმარა საქართველოს კპ ახალქალაქის რაიკომის შუამდგომლობა. ვმსახურობ ასლის გადამღებად. ქმარი ირკუტსკის ნავსადგურში მუშაობს, გასულ წელს დაამთავრა ენერგომშენებლობის ტექნიკუმი და ემზადება ინსტიტუტში შესასვლელად“...


ასე ჩარჩა 7—8 წლის გოგონას მენსიერებაში ომისა და ოკუპაციის მძიმე წლები: დედ-მამის, დის, მეგობრების დაღუპვა. იგი არაფერს წერს მათ გმირობაზე. არაფერს წერს, რომ მისი და გელაშვილის ოჯახის წევრები დიდი სამამულო ომის პირველი ქართველი პარტიზანები იყვნენ, რომ ისინი მტრის შემოჭრის პირველი დღეებიდანვე აქტიურად ჩაებნენ სახალხო შურისმაძიებელთა რიგებში და სიცოცხლე შესწირეს სამშობლოს. ელიკო ანანიაშვილი ხომ პირველი ქართველი კომკავშირელი პარტიზანი გოგონაა, რომელიც საპი წლის განმავლობაში დედ-მამასთან ერთად შორეული ბელორუსიის მიწაზე გამირულად ებრძოდა ფაშისტ მტარვალებს. მაგრამ ჩვენმა ხალხმა ძალიან ცოტა. თითქმის არაფერი იცის თავიანი საამაყო ქალიშვილის ამ რაინდულ თავდადებაზე. ისიც არ ვიცით, სად, რა პირობებში აწაშეს ფაშისტმა მტარვალებმა თვრამეტი წლის უშიშარი. ხალისიანი გოგონა... მაგულას მოგონებიდან ჩანს, რომ დედასთან და გელაშვილებთან ერთად ელიკო სწორედ იმ საღამოს შეიპყრეს, როცა

ავტომატგადაკიდებული ტყეში მიდიოდა მამასთან — პარტი-
ზანული რაზმის ლეგენდარულ მეთაურთან — „გრიშა ქართვე-
ლთან“, კაპიტან გიორგი ანანიაშვილთან... და სანამდე მისუ-
ლა ფაშისტი ჯალათების გაბოროტება და ცინიზმი: ცხრა
წლის უპატრონო გოგონასათვის იმავე დღესვე გაუგზავნიათ
წამებული დედისა და დის სისხლიანი ტანსაცმელი!..

* * *

ახლახან გამოირკვა, რომ ბრესტის ოლქში დღემდე ასოვთ
„ოცდაათიოდე წლის გამხდარი, თაფლისფერთვალემა, ცო-
ცხალი და მხიარული „გრიშა გრუზინი“ — პარტიზანთა უში-
შარი მეკავშირე, ფაშისტური გარნიზონების რისხვა... ცრემ-
ლითა და სიყვარულით იგონებენ მას კობრინის პარტიზანუ-
ლი ბრიგადის ყოფილი მეთაური გაპასიუკი, მეკავშირე გრი-
გოლ კომისარაიუკი, მიხეილ ობრაზცოვი, სტეფანე დუდკო...
მაგრამ გვარი მხოლოდ კობრინის პირველი საბავშვო ბაღის
გამგემ ზინაიდა ბურაკოვამ გაიხსენა, რომელიც ომამდე ბრეს-
ტის ციხე-სიმაგრეში მსახურობდა და ანანიაშვილის ოჯახს
კარგად იცნობდა...

1941 წლის ზაფხულიდან გიორგი ერთ ხანს კობრინის მახ-
ლობლად, სოფელ ოგოროდნიკში იმალებოდა, სადაც გაეცნო
პარტიზანული რაზმის მეკავშირეს, გრიგოლ კომისარაიუკს. გა-
მოცდილმა ქართველმა მეთაურმა მალე უჩინარი მზვერავის
სახელი გაითქვა. მას უკვე ათობით გაბედული ოპერაციის
ჰქონდა ჩატარებული, ასობით ოკუპანტი ჰყავდა მოკლული,
როცა 1942 წლის ზაფხულში პარტიზანთა სარდლობამ ნება



ელიკო. მაგული და ნინო ანანაშვილები.

დართო ბრესტიდან გამოეტაცა თავისი და გელაშვილის ცოლ-
შვილი, რომელთაც არალეგალური მუშაობისათვის დახვრე-
ტა მოელოდათ. რამდენიმე ამხანაგთან ერთად გ. ანანაშვილი
ლამით ფარულად მივიდა ქალაქის გარეუბანში, სადაც, წინას-
წარი შეთანხმებით, უცდიდნენ ლტოლვილები, მაგრამ ეტყო-
ბა, ისინი ვიღაცამ გასცა. ჩასაფრებული ფაშისტები მოულო-
დნელად დაესხნენ თავს, რამდენიმე პარტიზანი მოკლეს,
გიორგი მძიმედ დაჭრეს, ხოლო ქალები და ბავშვები შეიპყ-
რეს და წამებით დახოცეს...

მომაკვდავი გ. ანანიაშვილი ამხანაგებმა სოფელ ბრატულევოში მიიყვანეს და ოლგა ზემლიაკოვას ოჯახში მკურნალობდნენ. როცა პოლიციამ გეში აიღო, დაჭრილი საჩქაროდ სოფელ კროვლინში გადაიყვანეს, სადაც გამოჯანმრთელებამდე დარჩა. იმავე წლის ბოლოს გიორგი კვლავ დაუბრუნდა პარტიზანთა რაზმს და შურისძიებით აღვსილი მუხრან ავლებდა მტრებს...

1943 წლის ზაფხულის ერთ საღამოს ქ. ჟაბინკოვსკის ეკლესიაში ფაშისტებს დიდი თათბირი ჰქონდათ გამართული. პარტიზანული ბრიგადის სარდლობამ ეკლესიაზე თავდასხმა გ. ანანიაშვილს დაავალა. ოპერაციამ წარმატებით ჩაიარა, — სახალხო შურისმაძიებლებმა ბევრი გერმანელი ოფიცერი და ფაშისტი მოხელე ამოულიტეს, ხოლო როცა მტერს მაშველი ნაწილები მოუვიდა, ორგანიზებულად უკან დაიხიეს. სოფელ ლასტოვკასთან რაზმი ჩასაფრებულ ესესელებს წააწყდა. მათ დავალებული ჰქონდათ, რადაც უნდა დასჯდომოდათ, ცოცხლად შეეპყროთ „უხილავი მზვერავი“ — „გრიშა გრუზინი“.

უთანასწორო ბრძოლა საღამომდე გაგრძელდა... ორნიღა გადარჩნენ ცოცხალი, ორივე მძიმედ დაჭრილი. ალყას თავი დააღწიეს და ტყისკენ წავიდნენ. მაგრამ სისხლისაგან იკლებოდნენ და სოფლის განაპირა ქოხთან ჭრილობის შესახვევად შეჩერდნენ. მდევრებმა იქ მოუსწრეს. გიორგიმ და მისმა ამხანაგმა სხვენზე ასვლა მოასწრეს, პოზიცია დაიკავეს და წრიული ცეცხლი გახსნეს. ჩამობნელდა. ფაშისტები დარწმუნდნენ, რომ პირდაპირი იერიშით ვერაფერს გახდებოდნენ, ქოხს თივაბულული შემოუწყვეს და ალყაში მოქცეულ პარტიზანებს ცეცხლის წაკიდებით დაემუქრნენ. განუწყვეტელ სროლაში გიორგიმ ერთადერთი ამხანაგიც დაკარგა და

როცა უკანასკნელი ვაზნა დაცალა, ისლის სახურავი აარღვია, ფაშისტს, რომელიც აპირებდა თივისათვის ცეცხლი წაეკიდებინა, თავზე დაახტა და ავტომატი აართვა... მაგრამ სისხლისაგან დაცლილს ძალა აღარ ეყო და უგონოვ დაეცა.

დიდხანს აწვალეს გ. ანანიაშვილი ქაბინკოვსკის გესტაპოში, მაგრამ „არ ვიცი“-ს მეტი ვერაფერი ათქმევინეს.

ნაცემ-ნაგვემი, დატანჯული, ხიშტითა და დანით დაღადრული „გრიშა ქართველი“ მაინც ღიმილით ავიდა ეშათოტზე...

და კიდევ რაძღენი რამ რჩება ბუნდოვანი და გაურკვეველი გიორგი, ნინო, ელიკო ანანიაშვილების, იაკობ, მარო, ლენა, მელსიყ გელაშვილების თავგადასავეალში!.. შეიძლებოდა კიდევ შეეკოთხოვით ვინმე, შეიძლებოდა კიდევ გაგვეგო ცოტა რამ, მაგრამ საჭიროა?!.

შევძლებთ კი სრულად აღვადგინოთ მათი საოცარი ბრძოლისა და ტანჯვის სურათი? დე, დაჩჩეს მათი ლამაზი ცხოვრება ამოუცნობ ლეგენდად, რომელშიაც თვითეული ჩვენგანის ფანტაზია ახალ-ახალ საიდუმლოს ამოაკითხავს.

* * *

ბრესტის მიწაზე ერთ წუთს არ შეწყვეტილა ბრძოლა. დაღუპულ პარტიზანთა ადგილს ახალ-ახალი რაზმები იკავებდნენ... 1943 წლის ზაფხულში, როცა ფაშისტებმა ანანიაშვილისა და გელაშვილის ოჯახები ამოხოცეს, პილონეთიდან ბუგი გადმოცურეს საკონცენტრაციო ბანაკებიდან გამოქცეულმა პარტიზანებმა: შალვა კობიაშვილმა, შალვა ბაბუნაშვილმა, ლევან გამცემლიძემ, ს. ნოზაძემ, გ. საჯაიამ, კ. რა-

მიშვილმა, კ. გოგებაშვილმა, გ. ჯიბუტმა, გ. სვანიშვილმა, მ. გურაშვილმა და სხვებმა. ბრესტის მახლობლად ერთ პარტიზანულ შენაერთში ორმოცამდე ქართველი იბრძოდა.. აღარ იყო მტრის რისხვა „გრიშა ქართველი“, მაგრამ სულ მალე არანაკლებ გაითქვა სახელი „საშვა ქართველმა“, მოხვევე შალვა კობიაშვილმა, პარტიზანული ასეულის კომისარმა... დოგაჩევის საქმო საფლავში განისვენებენ სამკედრო-სასიცოცხლო ბრძოლაში დაღუპული გმირები: გიორგი საჯაია, სტეფანე ნოზაძე, შაქრო გურჯანელი...

* * *

ეს წიგნი კარგა ხნის დამთავრებული მქონდა, როცა თამარ ჯიჯიშვილმა მახარა, ჩვენთან, კარდიოლოგიის ინსტიტუტში, კიდევ ერთი ბრესტელი აღმოჩნდა და თქვენი გაცნობა სურსო.

იმავე საღამოს ჯიჯიშვილებს ვესტუმრე. ოთახში შემომეგება მალალი, ახოვანი ვაჟკაცი.

— გაიცანით, ჩვენი ინსტიტუტის ასპირანტი, გვარდიის ლეიტენანტი ბიძინა მაცაბერიძე! — მომმართა დიასახლისმა.

გალიმებულებმა მაგრად ჩამოვართვით ხელი ერთმანეთს.

შემოვუსხედით თუ არა მაგიდას, ჩემს ახალ ნაცნობს ზედღიზედ მივაყარე კითხვები: — რომელ ნაწილში მსახურობდით? რომელ უბანზე იბრძოდით სიმაგრეში? იცნობდით ალექსანდრე ჯიჯიშვილს, პანტელეიმონ აფხაზაევას, იაშა გელაშვილს, ონისიმე ასათიანს, გოგი ანანიაშვილს?..

— არა, არც ერთ მათგანს არ ვიცნობდი! — ცოტა დაბნეულად მიპასუხა ბიძინამ.

მე იქვნეულად ავათვალთვიერ-ჩავათვალთვიერე ახალი ნაც-
ნობი.

— როცა თქვენ 1941 წლის ზაფხულში ბრესტის სიმაგრე-
ში იბრძოდით, მე ჯერ ისევ საქართველოში ვიყავი... მერე
ბრძოლით გავიარე შორი გზა კავკასიის მთებიდან დასავლეთ
ბუგამდე და 1944 წლის ზაფხულში, ომის დაწყებიდან ზუს-
ტად სამი წლის შემდეგ, მონაწილეობა მივიღე ბრესტის გან-
თავისუფლებაში!..

ვიგრძენი, რომ ჩემ წინ გადაიშალა ბრესტისათვის ბრძო-
ლის ახალი, საყურადღებო ფურცელი და სულგანაბულმა მი-
ვუგდე ყური ომგადახდილ ქართველ ექიმს:

— ყუბანის კახაკთა 34-ე ლენინის ორდენოსანი გვარდიუ-
ლი კავალერიის კორპუსის შენაერთებში, რომელსაც საბჭო-
თა კავშირის ორგზის კმირი გენერალი ისა პლიევი მეთაუ-
რობდა, ბევრი ქართველი მსახურობდა.

...1944 წლის ივლისში კავალერისტთა ახალი აღტყინება
გამოიწვია გენერალ ტუტარინოვის ბრძანებამ — პირველნი
გავსულიყავით სახელმწიფო საზღვარზე.

ცხენოსნები საათში ათი-თორმეტი კილომეტრით მიიწევე-
დნენ წინ; არტილერია და „კატიუშები“ გზას გვიკაფავდა...

ბრესტის მისადგომებს გერმანელები უბრძოლველად არ
თმობდნენ. პრუჟანთან ჩვენმა პოლკმა მტერს სასტიკი და-
მარცხება აგვმა და ბრესტ-ბელოსტოკის რკინიგზის ხაზიც
დაიკავა. 18 ივლისს, საღამოს, სოფელ რუდაკთან სახელმწი-
ფო საზღვარსაც მივალწიეთ... გამოჩნდა ძმათა სისხლით მორ-
წყული წმიდა მიწა!.. მუხლზე დავეცით და ვეამბოროეთ.

ყოველ ნაბიჯზე გვხვდებოდა ნახევრად დანგრეული რკი-
ნაბეტონის საცეცხლე წერტები, დამწვარი და გადამტვრეუ-

ლი ხეები, — უთანასწორო გმირული ბრძოლის უტყუარი მოწმენი.

პირველმა და მეორე ესკადრონებმა მალე გადალახეს მდინარე ბუგი და ბრესტის ჩრდილო-დასავლეთით პლაცდარში დაიკავეს. ფაშისტებმა გააფთრებული კონტრიერიში წამოიწყეს. მესამე ესკადრონის პოზიცია საფრთხეში აღმოჩნდა, აუცილებელი შეიქნა ახალი ზღუდის გადალახვა. განსაცდელში მყოფ ამხანაგებს ჯახაია იცავდა ტყვიამფრქვევით. იგი მარტოდმარტო დარჩა მტრის პირისპირ და განუწყვეტელი ცეცხლით აკავებდა ფაშისტთა იერიშებს. მამაცური თავგანწირვით ჯახაიამ უზრუნველყო ესკადრონის მანევრირება და როცა საკუთარი ტყვიამფრქვევის საფარქვეშ ამხანაგებისაკენ უნდოდა გადანაცვლება, უთანასწორო ბრძოლაში გმირულად დაეცა. იმავე ესკადრონში იბრძოდა სერგო სიხარულიძე. 22 ივლისს ბუგის გადასასვლელზე მძიმედ დაიჭრა არჩილ მდინარაძე.

ბრესტში გამომწყვდეული გერმანელები გასაქცევ გზას ეძებდნენ და ტანკების დახმარებით განუწყვეტლივ კონტრიერიშზე გადმოდიოდნენ. მაგრამ ჩვენი საზენიტო არტილერია და „კატიუშები“ ამოსუნთქვის საშუალებას არ აძლევდნენ.

ამასობაში, ფრონტის ერთ-ერთმა დაჯგუფებამ ქალაქს ზამხრეთით შემოუარა და პოლონეთში შეიჭრა.

28 ივლისს ბრესტი მთლიანად გავათავისუფლეთ.

ასრულდა სიმაგრის 1941 წლის დამცველთა ოცნება.

მათ გმირობაზე ლეგენდარულ ამბებს გადმოგვცემდნენ იქაური მცხოვრებნი.

ბრესტის განთავისუფლებაში მონაწილეობისათვის უმაღ-

ღესი მთავარსარდლის მადლობა მივიღე და იმ დღეთა მოსაგონებლად ეს სახსოვარიც დამჩჩა.

ბიძინამ ჯიბიდან ამოიღო მედალი „მამაცობისათვის“ და ჩემ წინ მაგიდაზე დადო.

შევამჩინე, რომ მედალი შუაში ჩაპობალი იყო და თანამოსაუბრეს გაკვირვებით შევხედე.

— ბუგზე რომ გადავდიოდი. ბრეტის სიმაგრესთან ნამსხვრევი მომხვდა მკერდზე. ამ მედალმა გადამარჩინა.

დიდხანს დავყურებდი ნატყვიარ მედალს და მერე, უნებლიეთ, ტახტის წინ გაფენილ ნობის ნაჭერს გადავხედე.

თვალწინ გაიელვა სამმა ქარბუქიანმა წელმა, რომლებიც ომის ამ რელიქვიებს ერთმანეთს აშორებდა.

მაგრამ, ვინ მოთვლის. რამდენ რამეს ეუბნება ჩემს გულს ეს ორი წმიდა სახსოვარი!

ვინ მოთვლის, რამდენ რამეს გააზსენებდნენ ისინი უგუნურ გადამთიელებს, რომლებმაც ვერაგულად აღმართეს ხელი თავისუფალ ხალხზე და დღემდე ვერაფერი ისწავლეს ისტორიის გაკვეთილებიდან!

დაე, თვალწინ ედგათ ბრეტის სიმაგრე, როგორც ბრალდება და მრისხანე გაფრთხილება!